



## A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

## Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

## À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>



D. D. BIBL. VNIV. GAND.

**ALBERT ET ALEXIS CALLIER**

η η η

MDCCCCXXV

η η η



HEEK GENT



Digitized by Google





197 D.7.

**COURS  
DE LITTÉRATURE  
COMPARÉE.**

PARIS. — IMPRIMERIE LE NORMANT,  
rue de Seine, n<sup>o</sup> 8, r. s. g.

# LEÇONS LATINES

## MODERNES

# DE LITTÉRATURE

## ET DE MORALE,

ou

Recueil, en prose et en vers, des plus beaux morceaux des Auteurs les plus estimés qui ont écrit en cette langue depuis la renaissance des Lettres.

PAR M. NOËL,

Chevalier de la Légion-d'Honneur, Inspecteur-Général de l'Université  
Royale de France;

ET M. DE LA PLACE,

Professeur d'éloquence latine à la Faculté des Lettres de l'Académie de Paris.

Ex his cæterisque lectione dignis auctoribus et verborum sumenda copia est, et varietas figurarum, et componendi ratio, tum ad exemplum virtutum omnium mens dirigenda. Neque enim dubitari potest, quin artis magna pars contineatur imitatione.

QUINTILIEN. L. 1-2.

TOME PREMIER. — PROSE.

Seconde Edition.

PARIS.

V. LE NORMANT, LIBRAIRE, RUE DE SEINE, N° 8.

1836.







## AVERTISSEMENT

### DE LA SECONDE ÉDITION.

---

LES amis des bonnes études ont applaudi dans le temps au soin que nous avions pris, M. de La Place et moi, de faire mieux connaître en France cette latinité moderne toujours attaquée et toujours triomphante des attaques des détracteurs. Le suffrage des esprits solides est devenu celui du public. C'est donc sous les auspices de sa bienveillance et de son équité que je fais paraître cette seconde édition des *Leçons Latines modernes*. Elle n'offre pas de grandes différences avec la première. Quoique de nouvelles recherches m'aient procuré une abondante récolte, je n'ai pas cru devoir surcharger cet ouvrage de trop nombreuses augmentations. Les additions que j'ai faites n'ont eu d'autre but que de mettre plus de rapport entre les divisions dont il se compose, soit pour le nombre, soit pour le choix des morceaux; et d'y introduire quelquefois un ordre plus méthodique.

J'avais annoncé, dans la préface de la première édition que je me proposais de publier les *Leçons Italiennes* et les *Leçons Grecques*. J'ai tenu parole. Les premières, où je n'ai eu aucun collaborateur, mais pour lesquelles j'ai consulté des Italiens lettrés, ont paru dans les années 1824 et 1825, et ont eu cours dans les maisons d'éducation. Les secondes ont vu le jour dans le cours de l'année 1825, et l'année suivante, le Conseil Royal, par une décision qui me fut adressée le 13 juin de la même année, les admit au nombre des livres qui peuvent être employés à l'enseignement de la langue grecque dans les collèges de l'Université. En même temps, cette décision fut communiquée à MM. les Recteurs des Académies, et l'ouvrage leur fut particulièrement recommandé.

Je me plais à consigner ici le témoignage de ma gratitude pour le Conseil Royal de l'Instruction publique, qui, reconnaissant dans mes divers écrits le désir ardent d'être utile, les a tous honorés de son approbation et consacrés par son suffrage. C'est une réponse éloquente aux attaques d'une malveillance que j'ai la conscience de n'avoir nullement provoquée, et qui n'en aura point d'autre de ma part.

Je croyais avoir terminé ce *Cours de Littérature comparée*, accueilli en Europe avec la même

faveur que dans mon pays, lorsqu'il s'est présenté une occasion de le rendre encore plus complet, et j'ai joint bien volontiers mes efforts à ceux de M. Stœber, pour rédiger, de concert avec lui, une Chrestomathie allemande puisée aux meilleures sources, et faite pour donner aux Français une idée plus exacte d'une littérature si riche et trop peu connue.

Ce genre de Collections si agréables par leur variété, si propres à former le goût de la jeunesse et même à piquer la curiosité des hommes faits, a trouvé chez les étrangers des imitateurs, et j'ai sous les yeux des *Leçons Hollandaises*, deux volumes in-8°, qui ont adopté le même cadre.

Le *Cours de Littérature comparée* se compose donc jusqu'à ce jour :

1° Des *Leçons Françaises*, deux volumes in-8°, vingt-deuxième édition..... 10 fr.

2° Des *Leçons de Philosophie morale*, composées sur le plan des *Leçons Françaises*, un vol. in 8°..... 5 fr.

3° Des *Leçons Latines anciennes*, deux volumes in-8°, troisième édition..... 7 fr.

4° Des *Leçons Latines modernes*, deux volumes in-8°, seconde édition..... 8 fr.

5° Des *Leçons Grecques*, deux vol. in-8°..... 8 fr.

Ces collections faites avec M. de La Place, à l'exception des *Leçons de Philosophie morale*.



6°. Des *Leçons Anglaises*, deux volumes in-8°, prix 8 fr. 2<sup>e</sup> édition, publiées avec la coopération de M. Chapsal, professeur de grammaire générale, d'histoire et de géographie, avec lequel j'ai publié depuis un *Dictionnaire Français*, un volume in-8°, et une *Grammaire Française*, composée de plusieurs parties (1).

7°. Des *Leçons Italiennes*, deux volumes in 8°. 8 fr.

8°. Enfin des *Leçons Allemandes*, faites en société avec M. Stœber. 2 vol. in-8°. . . . . 12 fr.

Tous ces ouvrages, imprimés sur beau papier, en beaux caractères, et avec une grande correction, se trouvent chez M<sup>me</sup> v<sup>e</sup> Le Normant, rue de Seine, n° 8, faubourg Saint-Germain.

(1) Ces deux ouvrages ont été admis aussi au nombre des livres classiques par le Conseil Royal de l'Instruction publique.

## PRÉFACE.

LORSQUE nous fîmes paraître la première édition des *Leçons Latines de Littérature et de Morale*, nous conçûmes le projet de les compléter en quelque sorte, en publiant, à la suite et en rapport avec ce premier recueil, une *Chrestomathie de Latinité moderne*. Mais cette entreprise, qui n'avait jamais été que très-imparfaitement exécutée parmi nous, offrait de grandes difficultés. La première, et la plus effrayante sans doute, était la multitude presque infinie des écrits qu'il fallait extraire. En effet, dans la latinité de l'ancienne Rome, on est circonscrit par un petit nombre de noms, de ces noms à la vérité qui se pèsent plus qu'ils ne se comptent, et que les modernes se glorifient d'avoir pris pour modèles; mais enfin ce travail a des bornes, et nos premières études en ont presque fait tous les frais. Il n'en est pas de même de la latinité moderne. La langue latine a été pendant plusieurs siècles la langue universelle de l'Europe, et tous les savans ont écrit en latin.

Plus la mine était riche, plus l'exploitation en était pénible, et le découragement devait suivre de près les premières tentatives. Cependant nous nous livrâmes à cet immense dépouillement avec le courage qu'inspire le désir d'être utile; et que ranimaient sans cesse les exhortations des amis des bonnes études. Plus de dix années se sont écoulées dans ces longues et fastidieuses recherches, aux-

quelles nous ne pouvions donner que nos loisirs, et il en a résulté une moisson abondante dont nous ne présentons aujourd'hui que la fleur.

Le second obstacle, qui n'était pas moins capable de nous arrêter dès l'entrée de la carrière, était la prévention, alors assez générale, établie en France contre la latinité moderne; prévention qu'ont fortifiée l'autorité imposante de Boileau et les subtiles argumentations de d'Alembert, et qu'il est peut-être plus facile de détruire par les faits que par les raisonnemens.

Mais ce discrédit injuste ne nous a pas rebutés. Nous avons considéré que les objections qui se répètent de temps en temps contre l'usage d'écrire en latin, n'ont jamais plus de force qu'aux époques où les études solides sont tombées dans le mépris. Toujours reproduites, et toujours réfutées par les bons esprits de tous les âges et de toutes les nations éclairées, elles devaient perdre leur influence à mesure que ces mêmes études refleurissaient de toutes parts.

Nous avons donc persisté dans notre dessein, avec d'autant plus de constance que le retour aux saines doctrines semblait nous en présager le succès.

C'était d'abord un service à rendre à cette jeunesse ardente qu'on exerce tous les jours à composer dans la langue de Cicéron et de Virgile, que de mettre sous ses yeux les essais de leurs plus heureux imitateurs<sup>(1)</sup>.

(1) Quintilien, comme on le voit par l'épigraphie de ce recueil, Quintilien, après l'étude et l'imitation des anciens, recommande la lecture des écrivains qui les ont suivis, et même de ses contemporains. Rollin, Le Batteux ont les mêmes principes, et donnent aux jeunes gens les mêmes conseils.

Ensuite, outre ce motif d'utilité première, c'était une distraction agréable à ménager aux amis des langues anciennes, que de leur épargner la peine d'exhumer des auteurs qui dorment dans la poudre des bibliothèques, et dont la plupart ne méritent pas cet injuste oubli.

D'ailleurs, les anciens, bien qu'éternellement nos maîtres et nos modèles, n'ont pas tout dit. La succession des temps, les découvertes des arts et le progrès de la civilisation, ont amené une foule de choses qu'ils n'ont pu exprimer ni décrire, et que les latinistes modernes ont rendus souvent avec autant d'élégance que d'exactitude. Plusieurs de ces écrivains ont été des hommes de beaucoup d'esprit, et sont dignes d'être jugés autrement que sur parole. Mais, pour ne pas se perdre dans cette mer sans fond et sans rives, il fallait se faire une boussole, pour ainsi dire, et la suivre fidèlement. La nôtre a été l'amour du vrai et du beau. Nous nous sommes attachés d'abord au fond des choses, puis au mérite de l'exécution. Dans ce choix, ainsi que dans nos autres recueils, nous avons apporté la plus grande sévérité; et, comme on n'est en ce genre que trop tenté de conserver une récolte qui a coûté tant de peine, souvent nous nous sommes défiés de nos propres lumières, et nous avons consulté des juges éclairés.

Il a fallu d'abord avoir égard aux âges; car le goût de la latinité a dû suivre et a suivi en effet les révolutions de la littérature, et il y a loin du bon sens qui caractérise les productions latines des Bembe, des Vida, des Sadolet, etc., aux froids conceitti des latinistes qui leur ont succédé, comme il y a loin



des écrivains immortels du célèbre *Seicento* aux Marini et à ses contemporains (1). C'est donc en Italie d'abord que nous avons dû chercher à recueillir le feu sacré qui s'est transmis sur cette terre classique avec l'air et la vie, et comme par droit héréditaire. Car, ainsi que l'a observé un excellent critique (2), « il est peut-être vrai de dire que la question (de la légitimité du latin moderne), qui est encore douteuse chez la plupart des nations de l'Europe, ne pouvait être décidée affirmativement qu'en Italie. » Une moisson non moins riche nous attendait dans notre France, qui, sous ce point de vue, nous paraît mériter la seconde place, si l'amour de la patrie ne nous fait illusion. Nous n'entreprendrons pas de régler les rangs entre les autres nations; mais toutes ont été mises à contribution; et il n'en est aucune qui n'ait concouru à la formation de ce nouveau recueil.

Les prosateurs sont extrêmement nombreux; mais nous avons dû nous borner, et dans le dessein de rendre nos extraits plus intéressans pour nos lecteurs, nous avons choisi, surtout dans les historiens modernes, ce qui nous paraissait plus piquant ou plus rapproché de nous, et Paul-Émile, De Thou, Strada, Mariana, Mafféi, Buchanan, etc., nous ont fourni une grande variété de morceaux.

Parmi les poètes, si multipliés que le nombre en effraie l'imagination, nous avons recherché ceux qui à l'élégance du style joignaient le mérite d'exprimer

(1) Le style de cet auteur appelé *Marinisco* corrompt la poésie italienne, on pourrait ajouter la poésie latine, et fut le germe du mauvais goût qui régna pendant le dix-septième siècle.

(2) M. Ginguené.

quelque chose de nouveau dans les productions de la nature ou des arts, et les poèmes didactiques des modernes ont plus que rempli nos vues à cet égard.

Au reste, dans la poésie comme dans la prose, nous n'avons pas fait acception des personnes; nous avons réuni les Universitaires plus solides et plus graves, peut-être, aux Jésuites plus légers et quelquefois d'un goût moins sévère; et Rollin, Coffin, Hersan, Grenan, Le Beau, etc., figurent, dans notre recueil, avec Cossart, Commire, Rapin, Vanière, Brumoy, Porée et les Jésuites des autres nations.

Nous n'avons pas moins pris à tâche de mettre ce nouveau recueil en harmonie avec les précédens, dont il forme une partie intégrante, et d'y ménager des points de comparaison propres à former le jugement et le goût.

Les deux volumes que nous publions sont donc un ouvrage neuf à tous égards. C'est le produit d'un immense travail resserré dans des bornes étroites, et à qui l'abondance de nos matériaux nous eût permis de donner une plus grande extension. Il est rédigé sur le même plan, dans le même esprit, avec la même conscience, avec le même respect pour la religion et pour les mœurs que les précédens, et peut-être offrira-t-il de plus un intérêt de curiosité, parce que les sources où nous avons puisé sont plus rares, moins connues et d'un rapprochement plus difficile.

Nous le présentons avec confiance à la jeunesse studieuse à laquelle nous avons consacré nos veilles, à tous les amis des bonnes études dont l'approbation n'a cessé de nous soutenir dans nos travaux, au public qui nous a su gré de nos efforts pour être

utiles, trop payés de ces efforts, s'ils contribuent à répandre de plus en plus le goût des langues anciennes, et en particulier du bel idiôme du siècle d'Auguste.

*Lisez Cicéron*, répondait le célèbre Arnaud à un ami qui le consultait sur les moyens de se former un style. — Mais c'est en français que je veux écrire. — *Lisez Cicéron*, répliqua le docteur.

« Il n'y a que ceux qui savent bien le latin qui sachent bien le français (1). » Cet oracle, émané naguère d'une bouche auguste, est tout à la fois notre justification et notre récompense. Lorsque nos études classiques trouvent ainsi sur le trône l'assurance d'une protection bienveillante et l'autorité de l'exemple, qui pourrait être arrêté par la crainte de blesser les détracteurs de la langue qui a formé nos plus grands écrivains, et que recommandent de si glorieux suffrages!

Il est à regretter sans doute que le latin ait cessé d'être pour les savans de tous les pays un lien de communication qui tenait lieu de la langue universelle dont Descartes avait conçu l'idée (2); attachons-nous au moins à la cultiver chez nous dans l'intérêt même de notre gloire et de nos jouissances littéraires. Persuadons-nous bien que le moyen de sentir plus vivement les beautés des anciens est de lutter en quelque sorte contre eux dans l'idiôme que leurs écrits ont perfectionné, et que cette lutte est

(1) Paroles du Roi (Louis XVIII) à M. Barbier-Veymar, éditeur de l'*Hérenus Romanus*.

(2) On l'attribue généralement à Leibnitz; mais Descartes l'avait eue avant lui. Voyez ses *Lettres*, t. II, pag. 548.

utile autant qu'honorable; ne regardons pas comme une langue morte, une langue qui n'a pas cessé d'être vivante en quelque sorte, ni comme arbitraire, celle aux locutions de laquelle tous ceux qui ont fait des études solides, attachent les mêmes idées, à Rome, à Londres, à Vienne, comme à Paris. Ne restons pas au-dessous des étrangers chez qui cette langue n'a pas cessé d'être en honneur, et que l'universalité de la nôtre ne soit pas un motif pour dédaigner la source où elle a puisé tous ses moyens de succès.

Mais ce serait calomnier l'époque où nous vivons que de s'arrêter à combattre un dédain dont on a reconnu l'injustice, et qui n'existe plus. L'Université de France, qui, même dans des temps difficiles, avait osé signaler le retour des idées saines en plus d'un genre, a depuis long-temps rétabli dans ses actes publics l'usage des harangues latines, et celles de nos jeunes maîtres ont été des réponses victorieuses à des objections futiles.

L'accueil que le public a fait à l'*Hermès* de M. Barbier-Veymar, et le succès toujours croissant de cette entreprise utile (1), prouvent les progrès de l'opinion publique à cet égard. Avant cette tentative qui paraissait courageuse, mais qui n'était plus intempestive, de bons esprits, en donnant à la fois l'exemple et le précepte, avaient prouvé, par l'élégance et la pureté de leur style, que les modernes n'étaient pas indignes de parler la langue de Virgile, et nous ne craignons point d'être démentis en citant

(1) Elle a cessé depuis, au grand regret des amateurs des Muses Latines.



ici les poésies de MM. Cauchy, Le Maire, Billecocq, Chambry, etc., comme dignes du siècle où Corneille ne dédaignait pas de rendre en vers les belles images du P. La Rue (1), du siècle qui vit fleurir les Fléchier, les Bossuet (2), les Rapin et les Santeuil, à côté des modèles du Parnasse français.

Ainsi s'avance ce *Cours de Littérature comparée dans les langues anciennes et modernes*, que nous avons entrepris pour le bien des études. Nous avons donné successivement les *Leçons Françaises*, dont la vingt-deuxième édition paraît; les *Leçons Latines anciennes*, troisième édition; les *Leçons Anglaises*, deuxième édition; les *Leçons Italiennes* et les *Leçons Grecques*, dont le manuscrit a été rédigé sous les yeux, par les conseils et sur les excellentes éditions de M. De la Porte Du Theil, et que demandaient plusieurs de nos premiers hellénistes.

Nous publions aujourd'hui la deuxième édition des *Leçons Latines modernes*.

(1) Voyez le Passage du Rhin dans nos *Leçons Françaises*.

(2) On reconnaît dans le style latin de Bossuet le génie vif et sublime de ce grand homme.

---

**LEÇONS LATINES**  
**MODERNES**  
**DE LITTÉRATURE**  
**ET**  
**DE MORALE.**

---

**NARRATIONIS.**

---

**PRÉCEPTES DU GENRE.**

**T**ENUI admodum limite discluduntur simplex et abjectum dicendi genus; aut altius nonnullorum effertur oratio, aut se plus æquo demittit, magnâque solertiâ opus est, ut illa tantoperè præcepta narrandi ingenuitas nullo humilitatis confinio lædatur. Neque enim, si ambitiosa ornamenta rejicit narratio, ideò viles pannos ferat turpemque vestitum; neque, si fucus dedecet, continuò squalorem situmque patitur. Media inter utramque via est, quam natura diligenter inspecta docet, ad quam et brevitās ipsa

Leç. lat. mod.

2

conducit; quam virtutem satis de se narratio commendat ac præcipit. Quis enim patienter sustineat importunos illos narratores, qui orationem suam inutili sententiarum verborumque copiâ onerant magis quàm ornant; qui alia ex aliis diverticula aucupantes, neque quò intendant satis pervident, neque viam dispiciunt quâ finem suum narratio consequatur; qui, dum legentem per abrupta secum trahunt, iisdem impediunt erroribus, iisdem ambagibus implicant; eodem cursu rapiunt, eodem lapsu demùm præcipitant? Is profectò non magis esse similis velim, quàm cum duce locorum ignaro per saltus devios, ignotasque vagari solitudines, ubi nec viæ discrimina, neque ulla cultûs humani vestigia cernerentur. Respuit animus odiosam loquacitatem, et istos usque eadem aut aliena aut inutilia inculcantes cum tædio narratores. Nescio enim quomodo naturâ omnes discere cupidi, et amantes præcipuè novitatis, rem narrandam uno, si fieri posset, cupere-mus intuitu consequi; neque quidquam veremur tantùm, quàm ingenii celeritatem sermonis prolixitate retardari. Undè necesse est narrandi tenor omninò elanguescat, nisi vel novitatis quædam quasi perpetuitas animum legentis blandiùs moretur, delectet, pascat; vel, si novitati non est locus, nisi quodammodo narratio prætervolet, atque instar fulguris oculos perstringat.

Ludov. MARIN, *de Genere fabulari*, orat. part. ult.

Camma.

ERANT in Gallogræciâ duo potentissimi tetrarchæ, Sinatus et Synorix, et propinquitate sanguinis inter se conjuncti; quorum Sinatus Cammam virginem in uxorem duxerat, quam formæ dignitas spectabilem, virtus omnibus admirabilem reddebat. Non enim de pudicitia solùm benè audiebat aut conjugali erga conjugem chari-

tate, sed animi magnitudine prudentiâque celebris erat. Huc accedebat humanitas eximia et bonitas erga subditos, undè mirè inter populares grata fuit. Hæc ornamenta idèò clariora fuère, quòd sacerdos Dianæ erat, quam gens illa imprimis colit, et in pompis et sacrificiis magnifico cultu ornatam exhibet.

Hæc de causâ captus ejus amore Synorix, cùm nec preces, nec vim, vivente marito, quicquam effecturum se sperat, ad dirum facinus convertitur. Per dolum enim Sinato interfecto, impatiens moræ, non ità diù post cædem factam, nuptias Cammæ ambit, assiduè per id tempus in Dianæ templo versantis, nec flebiliter aut ignavè calamitatem ferentis, sed irâ consiliis instructâ opportunitatem ulciscendi expectantis. Ille autem in preces effusus, allegatis quoque speciosis rationibus, jactabat sese Sinato cæteris in rebus præstantiorem esse; nec cædem animi immanitate, sed necessitate amoris fecisse.

Femina ibi haud inclementer recusat, videbaturque paulatim progressu temporis emolliri. Instabant enim amici, tum vi, tum precibus, ut nuptiis Synorigis assentiretur; quâ in re gratiam benevolentiamque potentissimi hominis aucupabantur. Expressum est tandem a feminâ ut matrimonium non detrectaret. Accersitur igitur Synorix in templum Dianæ, ut ibi quasi coram numine sponsalia confirmarentur. Quem ubi eò venientem matrona comiter excepisset, libat e phialâ, partemque ejus poculi ipsa ebibit; partem bibendam Synorigi porrexit. Erat autem venenatum mulsum. Quod ubi epotum vidit, venerabunda numinis clarâ voce exclamat:

- « Te testor, charissima Diana, me solummodò hujus
- » diei gratiâ post cædem mariti superstitem esse voluisse,
- » neque intereâ temporis quicquam mihi dulce fuisse
- » præter cogitationem ultionis, cujus cùm compos sim,
- » ad virum descendo. Tibi autem, scelestissime om-

» nium; pro nuptiis et thalamo sepulcrum amici tui  
» parabunt. »

His auditis, Synorix vim veneni jam persentiscens, in currum ascendit, vehiculi jactatione ad vomitum usurus. Quem motum haud tolerare potuit affectum corpus. Quamobrem ad lecticam transgressus, sub vespertinum crepusculum expiravit. Camma verò, cùm vim veneni per eam noctem sustinisset, auditâ Synorigis morte, læta et alacris vitam finivit.

*Ex Plutarcho, Petrus NANNIUS.*

#### Début de Démosthène.

DEMOSTHENES, cùm ob neglectam ab avaris atque improbis tutoribus sedulæ institutionis curam laboraret quibusdam loquelæ vitiis, atque adeò principi suæ artis litteræ pronuntiandæ impar esset, nihilo tamen secius ea, ut plerique assolent, parvi pendens, cùm satis ipse sentiret nullam sibi deesse ex iis partibus quæ solidum et præclarum oratorem constituunt, et, Minervâ ipsâ impellente, in eloquentiæ arenam incredibili impetu raperetur, ubi primùm per ætatem licuit, nihil ei longius visum est quàm in Atheniensium conspectum prodire, et gloriæ, auctoritati, potentiæ, auris denique popularibus, obsequente oratorio spiritu, velificari.

Jam is ergò nihil mediocre volutare animo : selectum ab eo argumentum omnium quæ ad rem pertinerent publicam nobilissimum, et quo Athenienses præ cæteris afficerentur : exquisita oratio, perfecta ingenio, elaborata industriâ, quæque, si unquam aliàs, lucernam ole-ret, quippe in quâ Demostheni omnes civilis vitæ et futuræ existimationis spes essent positæ. Noctis quæ stato diei proxima vix minimam partem somnûs abstulit : semisopito plausus, laudationes, coronæ, paratum suggestûs imperium obversari animo, et juvenili ingenio proximæ glo-

riæ dulcedine lactato quasique ebrio mirè adblandiri. Nulla ei unquàm nox visa longior.

Consurgit, accingitur, dicenda in memoriam revocat, immoratur eminentioribus, sibi plaùdit, nec vanâ (quid secum dissimulet?) tenetur spe fore ut ipso exaudito fervida Callistrati ac Laodamantis fama refrigeat. Procedit aliquandò in medium, suggestum ascendit; expectatio præconis loco silentium indixerat: adolescentem antiquis moribus, publicæ rei studiosissimum, chartis impallescenscentem, rhetorum præceptis sedulò imbutum, Socraticis Platonis operâ imbutum sermonibus, magnum aliquid, nec sanè vulgare allaturum. Paululùm oratione processerat; mussitare clanculùm Attici, tum admurmurare ac supplodere. Gratulari Demosthenes, ea secundissimi favoris indicia ratus, ac propè præ gaudio liquescere; pergit; murmur increbrescere: tum is mirari, subsistere; cachinni hinc indè erumpentes, molestissimi interpretes, rem paulò aliter quàm expectaverat explicant. Postremò cùm sese incitans persequeretur, tanta exorta sibilorum vis, clamor tantus, ut orator jam malè certus, jam impos animi, qui esset, utrùm esset, annon esset, id ipsum nesciret, et vix tantùm sufficeret viribus dum sese daret e suggestu præcipitem, et obseratis auribus, togâque obvoluto capite, per confertam exsibilantium, explodentium, indigitantium, turbam sese ocyssimè in fugam proriperet.

Ubi primùm ex eo æstu ad se rediit, Plutarcho teste, inambulabat is secus littora, Bellerophonti Homérico similis,

Ipse suum cor edens, hominum vestigia vitans :

atque hic complorare fortunas suas, eoque acriore stimulo confodi, quòd ambiguus hæreret animi, deosne an homines, an seipsum, de tantâ calamitate accusaret, nec satis secum statuere posset, quo tandem oratorio pec-

cato tantam ac tam insperatam ignominiae molem in se arcessisset. Properabat ergo domum Minervae iratus, immerentes rhetorum libros, suasque lucubrationes cedro dignissimas, paternae fornaci injecturus, et vacaturus deinceps, domesticas secutus artes, ferreis operibus procudentis, vir quem eloquentia suis ipsa confabrandis coruscandisque fulminibus designaverat.

Affuit opportunè Satyrus, clari eâ tempestate nominis histrio, qui, veram ejus infortunii causam edisserens, abjectum et jacentem consilio excitaret suo, moneretque ut primum emendandæ pronuntiationi vacaret sedulo, tum rursus in populi conspectum prodiens fidenter, ex Pericleâ quâ pollebat dicendi ratione, omnia sibi secunda et prospera polliceretur.

Ex eo Demosthenes in id unicè, enixè incumbere, et cum pravâ institutione quæ jam in naturam abierat, strenuè luctari : modò calculis in os injectis contendere ut linguæ repagula disrumperentur, modò continentem stridentium ac frendentium dictionum seriem pronuncians efficere ut asperiores litteræ exercitatione tractatæ retratatæque mollescerent. Ubi pravæ consuetudinis vitia pertinaci labore expugnata, tum rursus in concionem prodire ausus, hianti ac miranti populo videri alius, et ejus loquela non jam hirta, propè dixerim salebrosa, scabra, sed levigata, expedita, flexibilis, per aures molliter illapsa, tum demùm pro imperio in audientium animis dominari. Est sanè cur magnas histrioni optimo habeamus gratias, per quem foro et gloriæ Demosthenes redditus est, verùm etiam cur aversemur inconditæ pronuntiationis vitium, per quod parùm abfuit, quin ipsa Atticæ suadelæ vox conticesceret.

CESAROTTI, *de incommodis e pravâ pronuntiatione ortis.* — 1810.

## NARRATIONS:

7

Le comte Ugolin.

UGOLINUS GIRARDESCUS, civis pisanus, Guelfarum partium princeps, initio contrariâ factione partim pulsâ, partim percussâ, eò potentiæ domi pervenerat, ut nutu omnia administraret, patriæque dominus et esset et haberetur. Divitiis, nobilitate, ingenii famâ, auctoritate ingens, uxore, filiis, nepotibus, et omnibus in vitâ appetendis circumfluens, beatus, felix, et cæteris et sibi visus; eorumque cogitatione perfruens, lætus, fidens; etiam illorum commemoratione gaudebat. In festo frequentique natalis sui celebrandi convivio, ad quod suos omnes invitârat adhibueratque, dum fortunam suam fando effert, admiratur, cæloque æquat, ausus est quemdam ex intimis amicis Marcum, quid tandem abesse videretur, interrogare. Ille, vel reputatione rerum humanarum, quàm fluxæ fallacique specie, quàm volucris orbe circumagantur, vel mente divinitûs admonitâ, « Sola, ait, » ira Numinis procul diùque abesse a tam secundis rebus » non potest. » Et necesse erat congesta in unum hominem nondùm alteram fortunam expertum bona excipi calamitate ingenti. Guelforum viribus consenescentibus, Gibellini, armis correptis, ædes ejus circumsistunt, oppugnant, unum e filiis, unumque nepotum, vim arcere conatos, occidunt; ipsum et duos præterea filios, tres nepotes, comprehensos in turrim inclusere, obseratis foribus, clavibusque in Arnun propinquum flumen dejectis. Ibi fame in oculis, in gremio suo charissima pignora parens moriens vidit morientia. Vociferanti exposcentique ut suppliciis humanis exigendis inimici contenti essent, sacræ confessionis sacrosanctique viatici potestas facta non est. Hæc inhumanitas partes Gibellinorum magis invisas effecit<sup>(1)</sup>,

P. ÆMILII, *de Rebus gestis Francorum*, lib. VIII.

(1) Voyez tom. II, *Narrations*.



## Les Fils dénaturés.

**SANCTIUS** major, Hispaniæ Rex, cùm proficisceretur in bellum, generosum equum, et quo nullus erat nobilior, Reginæ sollicitè commendavit : nihil enim eâ tempestate equorum armorumque possessione charius erat Hispanis. Garsias, Regis filius natu maximus, a matre Regina equum sibi dari petiit : neque illa abnuebat, nî molestum id Sanctio fore Petrus Sessius, nobili loco vir, regio stabulo præfectus, denuntiasset. Garsias ex repulsæ dolore in furorem actus, sive vero interpretatus haud levi de causâ plus Petri preces, quàm ipsius postulatum valuisse; sive simulato, ut dolorem ulcisceretur, adulterii crimen matri imponere constituit. Nec juvenili impetu rem executus est: nam, quò major fides esset, solerter Ferdinandum fratrem ad sceleris societatem invitat. Impium illi et nefarium facinus visum est primum. Deinde commento ità connivere, ut tragœdiæ spectator neutri se parti adhæsurum jurejurando polliceretur. Garsiae criminatio Regis animum vehementer perculit. Hinc Reginæ celebrata pudicitia, et integra semper fama movebat; illinc filius, quem nisi magnâ de causâ in eam causam ingressum esse existimare non poterat. Ferdinandus, sententiam rogatus, ancipiti responso patris animum vehementiùs conturbavit, atque ità ut Reginam custodiæ manciparet. In nobilium et procerum conventu de re tantâ disceptari placuit : omnium communi sententiâ statum, ut nisi esset qui jure, armisve Reginæ pudicitiam tueretur, ignis pœnam subiret.

Erat Regi filius ex impari matre, nomine Ramirus. Is innocentis novercæ vicem miseratus, atque Garsiae fratris fraudem subodoratus, singulari certamine profitetur se depulsurum calumniam quæ innocentiae obtendebatur. Magnum Regi ex eâ provocatione parabatur malum, utrà-

vis parte vincente, victâve. Verùm eam omnem procellam viri sancti diligentia discussit, qui, multa monendo hortandoque, cùm diceret dedecus Reginæ non ad ipsam tantùm pertinere, sed ad Regem etiam, ipsosque, atque adeò Hispaniam universam : viderent ne criminando matrem, quam etiam sontem tueri debuissent, divinam vindictam in suum caput provocarent, gravissimaquè supplicia, quibus impios ausus Deus mulctare consuevisset, eò perduxit Regios fratres, ut calumniam confessi primùm, deinde ad patris pedes provoluti veniam precarentur. Rex negat, nisi Reginâ placatâ, se eis tantum scelus condonaturum. « Siccine, inquit, tantum facinus in nos » regiamque nostram suscipere animis atque designare » ausi estis, nefarii sceleratique filii, si eo digni estis » nomine, gravissimâ inustâ maculâ nostro generi atque » sanguini? Tueri matrem, quamvis sontem, erat consentaneum, manifestæque fœditati vitam et sanguinem » velum prætereundum : nunc innocentem de turpissimo » crimine postulâsse quantum nefas ! Parcite, Superi, in » hoc scelere omnia insunt scelera : impietas, crudelitas, » furor; tolerabilem aliquam vindictam sumite. Parcite, » mortales, in uno crimine summi, medii, infimi, violati » estis. Externæ nationes parcant ad quas tantæ nequitiae » fama pervenerit, neque ex eâ de nostris moribus conjecturam faciant. Parce, ô sanctissima conjux, non » magis filiis quàm patri. Ego quidem vix lacrymas te- » neo, vix me contineo, quin parentum reverentiam vestris capitibus sanciam. In irâ tamen quid nobis potius » sit dignum, quàm quid ipsi sitis promeriti considerabo; » neque ut in luctu veteri novus exoriatur luctus committam. Detur id ætati, detur temeritati vestræ. Nimitia te, Garsia filî, indulgentia corripit ut princeps » impietatis anctor fratrem in fraudem impelleres. Neque » pœnas in præsentem expeto, neque in posterum veniam » do. Matri vestræ sanctissimæ innocentissimæque de

» vobis arbitrium permitto; quod illa sanxerit, id jus  
 » fasque esto; et ipse meæ facilitatis credulitatisque  
 » pœnam per omnia numina deprecabor. »

Sic filii a patre repulsi sunt. Regina procerum precibus fatigata et filiorum lacrymis victa, veniam hâc lege dedisse traditur: ut Ramiro pretium operæ atque defensæ innocentiae merces esset Arragoniæ regnum: in quo natalium vitium eximia virtus fidesque compensarent. Garsias penes quem potissimum ejus tragiæ culpa fuerat, maternæ ditionis atque imperii ad quod legibus vocabatur, hæreditate careret. Utrumque patre Sanctio concedente factum.

MARIANA, *Hist. d'Espagne*, liv. VIII, chap. 13.

### Les Trois Valentins.

QUAM nihil sit parentibus in filiorum, si pravisint, caritate repositum, fabellâ quâdam haud illepidâ declaratur.

Quoddam est hominum genus qui, dum in dissolvendis metallis toti sunt occupati, mirabilia quædam ad propagandam vitam arcana, aurique conficiendi rationem investigant, neque sibi quidquam arte multâ, multisque laboribus conferre possunt, nisi pretiosam inopiam: alchymistæ vocantur.

Degebat in Germaniâ quidam Basilius nomine, huic arti deditus, vir alioquin sanctus et innocens. Is extremâ confectus senectute, quum vitæ finem instare sentiret, vocato ad lectum Valentino filio, perditæ indolis adolescentente: « En, inquit, ut scias, fili, quonam tam longinquæ vitæ labor evaserit, id ego sum multis tandem ascutus vigiliis, ne mihi meorum quisquam superstes esse possit. » Cùm perhorruisset filius, « noli pavere, inquit, non tibi mortem reperit pater amantissimus, sed a se depulit. Cernis testulam hanc hoc liquore coccineo plenam? Hanc mihi paravi adversus fati necessitatem præsentissimi remedii vim. Si intra post obitum de-

» cem horas, priusquàm ex hoc limo recentis animæ te-  
 » por abierit, hoc liquore corpus unxeris, et pauculas  
 » aliquot guttas hisce labris instillaveris, redibit patri  
 » tuo spiritus ac juventæ vigor; redditoque quam præ-  
 » stiti vitæ beneficio, jam æquo jure inter nos et fratrum  
 » loco erimus. Ars interim nostra alterum tibi seculum  
 » certâ ratione elaborabit. »

Post hæc mandata quum expirâsset, filius dolore amens, simul inter lacrymarum intervalla reputans patri tam pio alterâ vitâ non opus esse, sibi verò tam perditio peccatori omninò utile fore superstitem esse sibi, ut contractas contrahendasque priori vitæ maculas posteriore elueret, noluit iteratæ confectionis subire aleam. Testulam ne attigit quidem. Patrem inter avos reliquit; ipse dictatis in alteram vivendi vicem officiis, quod libidinis erat, præripuit. Obrepsit homini senectus, testulæ morbus admonuit. Erat ipsi quoque filius patri quàm avo similior. Cujus quidem, quum sciret suâ nihilò certiorrem esse, avaritiam tentavit, exhibitaque testulâ, et prædictâ admovendi arcani ratione affirmavit, se, modò id ritè fieret, totum fore aureum. Flebat interim filius, multoque se singultu discrucians, solabatur patrem miser, et perditè testabatur, se aureum cadaver omni reverentiâ habiturum, neque id unquàm permissurum sibi, ut vel digitulum unum e tàm dilecto parente resecares, nisi si fortè fragmenta aliquot collocandis sororibus opus esset. Hâc astutiâ fretus pater ad moriendum ultrò se componit, et hilariter, quippe mox ad vitam postliminio rediturus. Qui postquàm extremum tamen spiritum emisit, pretiosi corporis hæres, gestientis intus charitatis impetum non sustinens, imperare sibi non potest, quin optimi parentis molem, quàm longa lataque sit, cupidissimè dimetiatur. Quam ubi in aurum conversam haud pœnitendam tanti laboris mercedem fore, subductis calculis, cognovit, accingit se ad opus. Sed, heu! peruncto egre-

giè corpore, quum liquor labris admoveretur jam vitæ redeuntis quasi admonitum subsiluit cadaver, et ex novi artificis manu testulam excussit (1). Car. LEBEAU.

L'Ingratitude punie.

MERCATOR locuples, non auro minùs quàm ætate gravis, filiam habebat nubilem et unicam. Eam cùm nuptui tradidisset adolescenti nobili, pro dote bona sua donat omnia. Peractis nuptiis, gratulantur sibi novi conjuges insperatam felicitatem, illa quòd viro nupserit illustri genere; hic quòd duxerit uxorem benè nummatam. At non item gratulatur sibi senex, angitur contrà intimis sensibus, dementiamque deflet suam; haberi se ludibrio secum ipse queritur, se contemni indignum in modum a filiâ generoque, sic ut ne aspectu quidem dignentur obvium. Neque tamen abjicit spem omnem levandæ ægreditudinis. Consilium hoc init callidum: amicum adit; quem posteaquàm salutavit, quo in loco suæ sint res docet; et, quid excogitârit, simul aperit; ac « Nummos, inquit, in hanc rem non paucos commoda, » in paucos dies. — Libenter, inquit ille. En deprome » ex hâc capsulâ, quantùm voles. » Summam iste capit non levem, domumque redit plenus spei maximæ.

Vix ingressus cubiculum, generum audit suum scalas domûs ascendentem. Abdit se in suum conclave senex, utque tinnitu pretioso inescet hominem, effundit aurcos in mensam, et numerare nummos altâ voce clarioque sono incipit. Ad sonum monetalem advolat ille, auscultat præ foribus, miratur, inhiat. Denique egreditur senex, cui iste: « Undè, inquit, mî pater, tam densus tibi defluxit » imber aureus? — Quota, respondet noster, hæc » summa ex iis quæ debentur mihi? Hanc a debitore » recepi hodiè, mutuò daturus ex amicis meis cuipiam. »

(1) Voyez les *Leçons Anglaises*, tom. I, *Narrations*.

E vestigio uxorem ille adit, et, « O nos amentes, inquit, » nimiùmque credulos ! Vetulus noster etiamnum affluit » auro. » At illa : « Quid ais ? auro affluit ! faxo ad nos » brevi totum defluat, quantumcunque est ; non, si in » arcem ejus arca vertatur, impressionem sustineat. »

Nec plura : ad patrem devolat, vultum a dblanditiis componit, nectarea tota fit ; melleis verbis et osculis parentem salutat. « Ut vales, inquit, mî pater optime, » mea faustitas aurea, et felicitatis aurora ; ô meæ vitæ » gaudium ? » Ille dolum dolo excipiens : « Valeo, » inquit ; te advenisse gaudeo id temporis ; volo enim » testamentum condere, teque scribere hæredem summæ » cujusdam. — Beas me, inquit illa ; et cur me id » celâras, pater, filiam tuam tuî observantissimam, quæ » te his oculis plus amo ? — Nimirum, ait senex, non » omnia sunt quovis evulganda tempore ; tabellionem » accerse..... » Protinûs accersitur ; facit ille testamentum ; summo deinceps honore colitur ; moritur demum, sumptuoso effertur funere ; aperto testamento, patet fraus, seseque delusos dolent dolosi conjuges (1).

P. FR. POMEY, Soc. J., 1748.

Le Cid venge l'outrage fait à ses filles.

CARRIONIS reguli Dieghus et Ferdinandus ( Infantes vulgò dicimus ) viri eâ ætate in Hispaniâ genere et copiis nobilissimi, animo ignavi, e Cidi opibus aviditatem explere posse cogitantes, quoniam masculâ prole orbus erat, Regem adeunt, petuntque ejus operâ et auctoritate Cidi filias Elviram et Solem sibi uxores dari. Anni-tente Rege, Reguenam oppidum, quod non procul Valentîâ situm est, ad colloquium ventum : et, re deliberatâ, Carrionis reguli Valentiam Cidum prosecuti, voti com-

(1) Voyez tom. II, *Narrations*, Conaxa.

potes facti sunt. Nuptiæ regio apparatu, festâque lætitiâ celebratæ sunt. Adolescentes culti magis munditiis, quàm virilis ac militaris animi, mores suos socero et aulicis in armis educatis haud satis probabant. Semelque leone e caveâ, fortè an consilio incertum, sed egresso tamen, cùm præ metu in turpes latebras se condidissent, et iterùm in tumultuario prælio adversus Mauros qui ex Africâ venerant, certamen exhorrire visi essent, ignaviæ atque timoris significationem dederant. Dedecus quod virtute procurare debuissent, turpiter ulcisci cogitant: et est fermè crudelis ignavia. Suerus, adolescentum patruus, in quo propter ætatem præsidii atque prudentiæ aliquid esse debuisset, in ægris animis, facis instar, majus incendium excitabat.

Re constitutâ, patriæ se desiderio teneri simulant: petuntque volente socero, discedendi sibi facultatem esse. Annuit Cidus eorum postulatis, filiasque et generos aliquanto spatio prosecutus, mœstus flentes et quasi tacitâ divinatione perfusas lacrymis abs se dimittit: honestissimo stipante comitatu, ad Castellæ fines perventum: Durioque amne superato, in Valeranicæ finibus Corpesia Toborata facinori perpetrando locus idoneus fore videbatur. Comites alii aliò confictis de causis amandati; ipsi uxores a militari viâ in interiorem silvam seductas, et nequicquàm Divorum hominumque fidem implorantes, nudas flagris cædunt. Feriendi finem fatigatio satietasque fecit. Exanimis atque in suo sanguine volutantes pro mortuis dimittunt. Ab Ordonio, quem Cidus, cùm fraudem suspicaretur, præcedentium iter, dissimulato habitu, prosequi jusserat, repertæ sunt, atque in proximo vico medicamentis ciboque recreatæ.

Injuria atrox erat, neque ferenda inhumanitas; et, re cognitâ, Carrionis reguli invidiâ maximâ flagrare cœperunt; indignum passim judicabatur tanta beneficia tam insigni contumeliâ compensata esse. Juvenes e

stultis amentes planè factos esse dictitabant. Cidus, vindictæ studio, honesti curâ, Regem adiit. Toletum tunc generales regni conventus agebantur: aderantque Carrionis reguli tanto facinore fœdi turpesque. Judices abs Rege, Cido expetente, in causâ dati. Disceptatâ causâ, primùm, quæ a Cido data erant omnia, gemmæ, vasa aurea et argentea, vestisque pretiosa, ut redderentur integrâ fide, mandatum est; deindè de illatâ injuriâ ut singulari certamine dimicarent duo juvenes et consilii auctor præcipuus Suerus patruus, pronunciatum. Cùm Carrionis reguli imparatos venisse se excusarent, Cidus Valentiam, illi in patriam discesserunt. Rege agente, quoniam redituros Toletum designato tempore non putabant, Carrione depugnatum esse memorant. Victi omnes in certamine sunt, atque, Martè arbitro, declaratum iniquè eos fecisse. Cidi milites victores ad duces profecti, cujus filiæ Ramiro Sanctii Vasconum Regis filio, et Petro Petri Regis Arragonii filio, ultrò per legatos expetentibus, conjuges a patre datæ sunt: Ramiro Elvira nupsit, Sol Petro: Iis nuptiis accepti dedecoris et infamiæ memoria oblitterata est, auctaque vehementer lætitia, quam ex prioribus generis vindicatis ceperat maximam. Præterea a Rege Persarum missi ad Cidum legati, cùm rerum gestarum fama toto orbe diffusa esset, publicæ lætitiae multùm addiderunt: a Rege potentissimo, tantâ terrarum longinquitate ultrò de fœdere sanciendo, jungendâque amicitia appellatum esse.

MARIANA, *Hist. d'Espagne*, liv. x, chap. 4.

#### Le Médecin des Fous.

FUIT olim civis Mediolani, dementium medicus, qui insanos ad se delatos intra certum tempus sanandos suscipiebat. Erat autem curatio hujusmodi: Habebat nempe domi aream, et in eâ lacunam aquæ fœtidæ atque ob-



scenæ, in quâ nudos ad palum alligabat eos qui insaniam laborantes adducebantur. Hos usque ad genua, illos umbilico tenens, nonnullos profundius, pro dementiæ modo, eosque tamdiu aquam atque inediâ macerabat, quoad sani viderentur. Allatus est inter cæteros quidam, quem usque ad femur in aquam demersit, qui post quindecim dies cœpit resipiscere; ac medicum rogare ut ex aqua reduceretur. Ille hominem exemit a cruciatu, eam tamen conditione ne arcam egrederetur. Cui, cum diebus aliquot paruisset, ut universam domum perambulet, permisit, item eam lege ne januam exterioriorem egrederetur; reliquis sociis, qui plures erant, in aquam relictis. Et ille quidem diligenter obsecutus est medici mandatis. Stans verò aliquandò super ostium, neque enim pedem efferre audebat timore lacunæ, advenientem equo juvenem cum accipitre et duobus canibus, ex his qui sagaces dicuntur, ad se vocavit. Rei motus novitate, neque enim, quem antè insanum viderat, tenebat memoriâ, cum accessisset eques: « Heus! tu, inquit ille, ausculta, oro, me paucis, ac, si lubet, responde: hoc quo veheris, quid est, et quamobrem illud tenes? — Equus est, inquit, et aucupii gratiâ utor. — Tum deinceps, hoc verò quod manu gestas, quid vocatur, et quam in operam adhibes? — Accipiter, respondit, et is aucupio aptus ficedularum perdicumve. — Tum ultrà: Hi qui te comitantur, quid sunt, age, et quid prosunt tibi? — Canes, ait, et aucupio accommodati ad investigandas aves. — Hæ autem aves, quarum capiendarum causâ tot res paratæ, cujus sunt pretii, si in unum conferas totius anni prædam? Parum quid nescio cum respondisset, et quòd sex aureos non excederent, subiungit homo: « Quænam verò equi, canumque et accipitris impensa? — Quinquaginta aureorum alter affirmavit. » Tum admiratus stultitiâ equitis: « Tu verò, inquit, abi hinc ocyus, oro, atque adeò avola, antequàm medicus domum redeat. Nam si hic te compererit, velut insa-

nissimum omnium qui vivant, in lacunam suam conjiciet curandum cum cæteris mente captis, atque ultra omnes ad mentum usque in aquâ collocabit. » Ostendit aucupii porro studium summam esse amentiam, nisi et ab opulentis, et exercitii gratiâ fiat.

POGGE.

### Le Roi et le Philosophe.

FUIT ante multa secula Rex, qui, quòd benè imperare populo suo cuperet, veritatis summo desiderio teneretur. Cui aliquandò philosophus quidam (tales enim homines fovebat in aulâ suâ, cum quo de studio veritatis disserebat), ingenuè professus est, ad Reges ferè nunquàm veritatem perrepere posse, quòd ipsis a fraudibus amicorum, metu scelestorum hominum, blanditiis adulatorum, scurrarum parasitorumque ineptiis, omnis ad Reges aditus præclusus et obvallatus esse videretur. Rex contrà, non in cæteris hominibus, sed in ipsis Regibus plerumque culpam quærendam esse qui nollent verum videre, quòd ipsorum oculis veritas incommoda sit. Plerosque eorum magis regi, quàm regnare, ac cupiditatibus indulgere, quàm providere populorum saluti malle. Philosophus verò a sententiâ noluit discedere (est enim naturâ pertinax hominum genus gens philosophorum), regesque culpâ censuit eximendos. « Regibus scilicet neminem faciliè repugnare; quod- » cumque regibus excidat, id cæteros statim bibulis » auribus exceptum pronâ mente recipere : Quem Rex » laudet, eundem admirari et extollere omnes. »

Hâc oratione Rex inductus est, ut hominem quemdam, cui, quòd vulgò, nec perperam, mente captus haberetur, magistratum providentiæ curatorem adjunxerat, die quodam, quo magnus procerum ad aulam concursus fieret, ad se perducendum curru regali curaret. Statim ut vidit Rex Suram (id nominis erat homini),

Leç. lat. mod.

aliquantisper ejus excipiendi gratiâ processit, allocutusque est quàm familiariter. Id verò cùm quotidie deinceps usurparetur, nemo eorum, qui in aulâ versarentur, dubitare ausus est quin Regi Sura esset omnium qui viverent, gratissimus. Et quis aliter credat, si videat Suram quotidie ad aulam venire, a Rege blandius excipi, honoribus augeri et divitiis, mensæ regali accumbere, et cum principe occlusis foribus per continuas horas solum versari? aut quid majus et optabilius contingere in aulâ possit? Igitur Sura, ineptus antea Sura, insulsus Sura, Sura ille stupidus et inficetus, subito totius aulæ stupentis, invidentis, metuentis consensu, sapientissimus Sura, idemque excellentissimus, vindex justitiæ, stator litterarum fugientium, Musarum præses, Mæcenas eruditorum hominum, regiâ benevolentiam intra mensem unum evasit, cùm tamen ne signa quidem litterarum internoscere, aut nomen suum exarare posset.

Postquàm ad eum modum Suræ existimationem crevisse Rex intellexerat, cœpit e potentissimis aulicorum iis imprimis exquirere quibuscum olim se de Suræ stultitiâ non semel collocutum esse recordabatur, quomodo Sura ipsis probaretur: quem isti sinemorâ uno ore omnes immodicis laudibus extollunt, laudant elegans Regis judicium, et inter ipsos convenit Suram unum totius aulæ sapientiam in se repræsentare. Tandem verò, cùm Rex omnes expiscatus esset, omniumque animis parem perfidiam et mentiendi præ metu facilitatem insidere deprehendisset, tandem reversus ad philosophum eundem, acriter conquestus est de tam durâ Regum conditione, quæ tot fraudum laqueis eos irretitos circumveniret.

« Ità est, inquit philosophus; cæteris hominibus non  
 » rarò invitis obtruditur veritas, quæ Regibus cupien-  
 » tibus negatur, sed hi tantò vehementiùs illam appetere  
 » debent, quantò eosdem videatur acriùs fugere. »

Friderici PLATNERI, *Lanx Satura*, 1758.

## Le Trésor enlevé.

FUIT apud Italos nobilis et egregius vir quidam, possessionum avitarum dives satis, ditior virtutum, sed pecuniæ non ita, cujus non custos, sed dispensator ac dominus esse didicisset. Erat illi filius primogenitus, fori negotiis apprimè industrius, qui vigili curâ et parcimoniâ ingenti in magnas opes creverat, multùmque auri quæsierat; ut esset mirum visu, juvenilis in patre senæ largitas, senilis in juvene filio tenacitas. Sæpè illum pater hortari ne suum ingenium fraudaret, ne pietatis ac famæ oblivisceretur, neve in auri comparisonem et decus et debitum et naturæ sibi jura vilescerent: denique ut sibimet et annosæ matri, et fratribus parvis, et consanguineis, et amicis, et egentibus prodesse aliquandò divitias suas vellet. In hos enim usus, non in custodiam tantùm, multò minùs ad supplicium, partas esse. Sed nequicquàm vel surdo canitur, vel avaro.

Contigit tandem pro republicâ filium abesse, et cum electis viris ad Romanam aulam proficisci. Quo digresso, statim pater, occasione arreptâ, novis thalamum arculamque clavibus introgressus, thesaurum nulli utilem e latebris eruit, seque et conjugem et filios familiamque omnem exquisitissimis vestibus induit. Emit equos ornatissimos, vasa argentea, supellectilem speciosam; ultimò domum amplam, sed minimè cultam, novis auget ædificiis, et picturis insignibus adornat, munitque rebus omnibus ad liberalem et lautam, abundantemque vitam pertinentibus; multa præterea pauperibus erogat. Sacculos verò, qui priùs auro tumuerant, arenâ lapillisque flumineis plenos obstructosque, et obserata omnia, quoque priùs in statu fuerant, restituit. Quæ cuncta brevissimo tempore gesta sunt, quòd et voluntas senis et pecunia in promptu essent.

Redeunti dehinc filio fratres obvii fuere: quorum ille occursum hæsit, indumenta atque habitum miratus qualem antea non vidisset, quæsit cuius essent equi, unde illa vestium lautitia. Hi verò læti atque omnium ignari, simplicitate puerili, equos patris esse, multosque alios domi in stabulo substituisse respondent; utrumque etiam parentem multiplici ac regio esse vestitu. Magis ille singula magisque mirari. Indè ubi paternæ domus limen attingit, vix parentes vixque parietes ipsos agnoscens, neque admiratione jam simplici, sed stupore attonitus thalamum arculamque festinus adiit, ubi, cum exterius nihil mutatum cerneret, parumper animo conquievit. Et quoniam collegarum præsentia et festinatio amplius non sinebant, raptim arculam aperuit, sacculisque conspectis solito more turgentibus atque obtrusis, jam securus exitit. Mox negotio publico expeditus, iterum ad domum, indè ad thalamum, quo inclusus, arculam aperit, sacculos introspicit, aurumque in arenam versum nactus exclamat. Adest pater: « Et quid, inquit, rei est, fili? Quid quereris, aut quid fles? — Amisi, inquit ille, pecuniam quam, multis quæsitam vigiliis multisque laboribus, his sacculis credideram; et, quod vix credibile est, spoliatus tuâ sum in domo, pater. » Ad hæc genitor: « Quomodo, ait, spoliatum te doles? Nonne sacculos omnes plenos video? » Ille autem gemens: « Arena, inquit, pater, non pecunia est; » simul hæc effatus, apertos patri sacculos ostentabat. Tum senex, fronte nihil mota: « Quid, inquit, refert, nate, apud te arenæ an pecuniâ pleni sint? » Memorabile prorsus dictum, præclaræque sententiæ! Siquidem apud multos otiosa pecunia est, nihilque agit aliud, nisi quod locum occupat atque animum, apud plures malè et improbè operosa, apud paucos demum fructuosa.

PETRARCÆ, *de Remediis utriusque Fortunæ*,  
Lib. II, Dial. 13.

## L'OEil du Maître.

Duo germani fratres, cùm ex æquo satis amplum lautumque patrimonium a parentibus accepissent, alter rei familiari naviter inserviens, opes paternas hæreditate acceptas mirum in modum auxit, ut ab omnibus dives haberetur; alter verò suarum rerum omninò negligens, ad extremam ferè paupertatem redactus est. Quid verò istuc mirum? Necesse est enim vel aureos (quod aiunt) montes imminui et liquefieri, si profusis sumptibus nunquàm non indulgeas, neque rebus jam partis quidquam adjicias. Itaque alter hic frater magno suo dispendio tandem animadvertens bona sua pessum ire, magnâque se rerum inopiâ premi; contrà verò fratrem omnium rerum copiâ affluere, et apud omnes esse gratiosum, adit eum; rogat quid fiat, cùm ex æquo bona a parentibus utrîque obtigerint, ipsius in dies magis magisque crescere, amplificari, augeri, sua verò imminui, atteri, consumi. Necesse esse eum singulari quâdam arte fortunas suas procurare; alioqui fieri non posse, ut tantâ rerum omnium copiâ circumfluat. Etenim quoquoversus oculos vertat ipse domum ingressus, omnia esse conferta, omnia redundare, neque esse quod quisquam optare queat, quin continuò suppetat optanti. Itaque, si quam artem amplificandæ rei familiaris noverit, rogare etiam atque etiam eam ut secum communicet, quove pacto opes parandæ sint edoceat. Enimverò frater locuples et opulentus, quâ erat industriâ, cùm animadvertisset, illum alterum nihil quicquam curare, quemadmodum domus resve familiaris administraretur, quemadmodum uxor, famuli, ancillæ, suum quisque munus obiret, respondet: Se quidem artis nonnullius esse gnarum, quâ si utatur, fore ut res ad arbitrium ipsius planè fluant. Itaque acceptum muscum illigat linteolo, dat istum ei

fasciculum, jubetque e collo suspendat, atque ità instructus singulos in dies primâ luce domum perlustret, conclavia, granaria, bovine perambulet, et agros, prædia, hortos, prata, lucos, quàm diligentissimè obeat.

Ille tanto ductus munere pollicetur se dicto ipsi fore audientem. Quocircà ingressus manè granarium, illicò animadvertit, cum vim ingentem frumentorum eò recondidisset, a servis, ab ancillis, a villico, ista furtim distracta esse, vixque superesse, quo familiam commodè sustentet. Cogitat igitur (quis enim naturâ tam dissolutus, qui, incommodo suo ante oculos posito, non commoveatur?) id nequaquam e re suâ fore, et idcirco majori posthâc curâ frumenta esse asservanda. Simili modo cum se contulisset in bovine, in equile, in porcorum stabulum, videt ille miser pecudes perquàm malè et intempestivè pasci, fœnum et stramina inutiliter disperdi, neque in usum suum converti. Igitur cum ad tantam tamque detestabilem familiæ totius ignaviam aliquandiù obstupuisset, tandem redit ad se, animoque statuit, istam arte quâdam ità corrigere ac regere, ut posthâc officium quisque suum et fideli et diligenti studio adimpleat. Sic, cum rus iret, contemplaturus agros et prædia, perspicit partim inculta, partim spinis ac dumetis obsita, partim etiam vastata a porcis, tum justo tempore neque arata, neque occata; ad summam, reipsâ experitur *Vestigia domini*, quod aiunt, *agris defuisse*. Gemens igitur tantam intuetur vastitatem. Atqui nunquàm in hanc curam incubuisset, ut perlustraret, quonam pacto domestica sese haberent, nisi hâc opinione fascinat, si istum fasciculum de collo suspensum circumferret, fore putavisset, ut bona ipsius accrescerent, ipseque dives ac locuples fratris instar evaderet. Redit paulò post ad fratrem, significans ejus se consilio acquievisse. Tum frater: Benè, inquit; ostendam tibi, quid sit, quod tibi circumferendum dederim. Apertoque fasciculo, ostendit esse muscum, qui quidem

nihil quicquam ad opes cumulandas valeat, sed dedisse tamen ei, ut hac ratione, perspectâ familiæ negligentia, ad curam de rebus domesticis suscipiendam perduceretur. Quamobrem sic persuasum habeat, siquidem rebus suis consultum velit, non aliam esse artem, quæ plus ad rem familiarem parandam, augendam, conservandamque valeat, quam curam atque diligentiam. Det igitur posthac operam, quantam maximè possit, ut domum ipse suam ratione et prudentiâ regat atque gubernet, nec futilibus servis neque garrulis ancillis ejus gubernacula committat. Sic, fore ut ex bonis suis uberes capiat fructus, ipse locum suum tueri, familiamque suam quam honestissimè alere possit.

MELANDER.

#### Le Compte rendu.

MAXIMILIANUS imperator, ut nequaquam solitus est defodere pecuniam, ita clementissimus erat in eos qui decoxerant, modò nobilitatis titulo commendarentur. Ex hoc hominum genere, cum cuidam juveni vellet opitulari, mandavit illi legationem, ut a civitate quâdam, titulo nescio quo, peteret centum millia florenorum. Is autem erat titulus, ut, si quid impetratum esset dexterritate legati, pro lucro duci posset. Legatus extorsit millia quinquaginta; Cæsari triginta reddidit. Cæsar lætus insperatâ prædâ, dimisit hominem, præterea nihil inquirens. Interea quæstores olfecerant plus acceptum fuisse quam exhibitum. Interpellant Cæsarem, ut accerseret hominem. Accitus est: venit illic. Tum Maximilianus: Audio, inquit, te accepisse millia quinquaginta. Fassus est. Non exhibuisti nisi triginta millia. Non negavit. Reddenda est, inquit, ratio. Promisit se facturum, ac discessit. Rursùm cum nihil actum esset, instantibus quæstoribus, revocatus est. Tum Cæsar: nuper, inquit;



jussus es reddere rationem. Memini, respondit ille, et in hoc sum. Cæsar suspicatus illi rationem nondum satis esse subductam, passus est illum sic abire. Cum sic eluderet, instare ministri vehementer, clamitantes non esse ferendum, ut ille tam palam illuderet Cæsari. Persuaserunt ut accersitus juberetur inibi præsentibus ipsis exhibere rationem. Annuit Cæsar. Accitus venit illicò, non tergiversatus. Tum Cæsar: Nonne, inquit, pollicitus es rationem? Pollicitus, retulit ille. Jam, subjunxit Imperator, opus est: En adsunt qui excipient; neque est diutius tergiversandi locus. Assidebant quæstores, paratis ad id codicillis. Ibi juvenis sat dextrè: « Non detrecto, inquit, rationem, invictissime Cæsar. Verum hujusmodi rationum non sum admodum peritus, ut qui nunquam reddiderim; isti qui assident, talium sunt peritissimi; si vel semel videro, quemadmodum illi tractent hujusmodi rationes, ego faciliè imitabor. Rogo jubeas illos vel exemplum edere; videbunt me docilem. » Cæsar sensit dictum hominis, quod non intelligebant hi, in quos dicebatur; ac subridens: verum, inquit, narras, et æquum postulas. Ità juvenem dimisit. Subindicabat enim, sic illos Cæsari solitos esse reddere rationem, quemadmodum ipse reddiderat.

ERASMI COLLOQUIA, *Convivium fabulosum.*

La fausse Loterie.

RATISPONÆ cùm augustissimus Cæsar Mathias comite Imperatrice versaretur, atque eòdem plurimi undique proceres, ad res imperii componendas, magnâ frequentia pompâque confluiscent, confluerunt etiam, ut mos est, post magna corpora magnæ umbræ, magni parassiti, magni moriones. Ibi, dum quisque suas artes, suos ludos, suum ingenium promit, et, ut fert proverbium, ipse semet canit, et suus tubicen est, ecce prodit unus;

nec in Baviâ, nec in imperatoriâ aulâ incelebris ludis, cui alias in ejuscemodi ingeniorum amœnitatibus, præsertim verò in modestiâ jocandi, cæteri facili cederant. Nomen illi prophetæ erat, quippe Jonas vocabatur, quamvis ipse propheta non esset; oportuisset tamen illos prophetas esse, qui præstigiis aut sutelis illius nimis credulâ deceptione inhiabant. Nam hujusmodi rem commentus est.

In atrio aulæ Cæsareæ theatrum erexit. Circùm abacos posuit, funes tetendit, perticas fixit. In perticis arma proposuit; de funibus vestes varias, pannosque suspendit; in abacis vasa aurea, argentea, torques, annulos, gemmasque, et quidquid apud Palatinos in pretio est, longâ serie collocavit. Dixisses eum mundo mundum ostendere voluisse. His ita apparatis, magnam hominum vim, omnis ordinis, omnisque dignitatis, suomet aliqui videndi studio trahendam, insuper etiam tubis tympanisque convocavit.

Non pauci etiam erant, quos lucri cupiditas evocavit. Eam enim res faciem habebat, ut haud difficili conjecturâ intelligi posset urnam Fortunæ esse quatiendam, quæ multis sæpè vilissimo nummo magna solet præmia elargiri. Impleta jam erat capax area multitudine spectantium, fenestræ omnes, tecta ipsa obsidebantur, cum tandem et ipse Cæsar, solus totius astutiæ conscius, unâque Imperatrix, spectatum prodierunt. Magna erat exspectatio omnium, ingens cupido videndæ experientæque Fortunæ.

At, ô spes inanes! ô stulta mortalium vota! prodit ad extremum tanquàm rex tragicus et ipse morio grandem in manu gestans urnam, levique pretio ad ingentia lucra spectatores allicit. Hic ergò quisque primus in theatrum emergere, manumque in urnam immergere cupientissimè gestiebat, ut indè aut vestem Attalicam educeret, aut poculum gemmis distinctum, aut quid simile. Nocet

aliquandò vel officio vel dignitate cæteros anteire ; etenim qui etiam hîc in honore primi habebantur, primi ibant ad suum ruborem, quantòque manum injiciebant cupidius, tantò majores apud imperatorem cachinnos excitabant. Nam audite sycphantiam incredibilem ! morio iste non schedulas, præmiorum indices, in urnâ deposuerat, sed vivam feram, echinum mille aculeis rigentem atque ferientem. Itaque quisquis in urnâ chartas venabatur, plagas capiebat, nec manu duntaxat redibat, verùm etiam fronte rubicundâ ; tantòque plures istâ sutelâ ludificabantur, quantò quisque dolorem magis dissimulabat, ne solus rideretur, si fraudem impatiëntiæ signo prodidisset. Sunt qui dicant ipsam Imperatricem primam manus in echinum latentem impegisse.

*Labyrinthi Ægyptiis fraudes cum mundi periculis collata.* Auct. Georg. STENGELIO, S. J. theolog., c. part. I, cap. 8. 1630.

#### Vengeance d'un Peintre.

FERTUR Antverpiæ quidam nimius pecuniarum amator, et mercator opulentus, haud ignobilem ad se accersivisse pictorem, a quo volebat effigiem suam ad vivum depingi. In laboris pretium duodecim pepigit philippæos, sed eâ conditione, ut bellè pingeret atque accuratè. Sin autem secus, nihil ei se daturum edixit. Data acceptaque est conditio. Statuto die sedit mercator, stetit ad tabulam pictor, omnemque operam et artem adhibuit, ut hominis lineamenta ad amussinû exprimeret, neque unum vel in barbâ vel in capitis comâ pilum imprudens præteriret. Capite satis delineato, cætera corporis domi absolvit.

Intereâ, ut vitia plerumque vitiis repugnant, in pectore mercatoris magnum inter superbiam et avaritiam certamen exortum est. Gaudebat animi tumor, quòd se ipsum mercator identidem in effigie suâ posset intueri, et egre-

gium illum ac propè divinum Eucratem admirari, si imago coloribus suis absoluta afferretur. Mirè dolebat avarities, quòd duodecim philippæi, absque ullâ necessitate, essent profundendi, cùm præsertim mercator, utique longè accuratiùs, et naturâ non errantè, simulacrum suum in speculo expressum, quoties vellet, posset contemplari. Victa est ab avaritiâ superbiâ. Pœnituit eum pepigisse, et tantò magis, quòd, postquàm pictor attulit imaginem, quamvis omnibus numeris absolutam, ipsi tamen superbiæ ea non satis accurata videretur, siquidem reipsâ mercator longè se censuit esse quàm in illâ effigie pulchriorem. Quoniam igitur maluit pécuniam quàm signum suum domi servare, irato similis, pactum rescidit, causatus tabulam haud esse ex conditione depictam, neque ad suam voluntatem, atque ideò a vultu suo diversam, ut *Œdipo* opus sit, qui divinet cujus ea sit imago.

Pictor, qui non minùs ingenium habebat in promptu quàm penicillum, quasi nihil istâ re offensus, placatissimè respondit, haud se idcirco dolere, facilè se id operis alibi majore pretio venditurum. Mercator, monitum de picturâ ad arbitrium consuleret, jussit cum tabulâ suâ bonis avibus lares repetere. Reversus domum pictor illicò penicillum arripuit, ut imaginem emendaret, mercatorique redderet similiorem. Versicolore ergò mitram capiti ejus imposuit. Cappadocemque fecit, quali fere ornatu stulti solent incedere in aulis principum. E mitrâ surgebant geminæ longæque aures, quales *Midæ* appinguntur, aut quales solent esse asinorum. Neque carebant appendicibus summæ aures, quia erant cacuminatæ, ut tintinnabulis sonoræ viderentur.

His insignibus condecoratam imaginem in pinacothecâ venalem exposuit. Quicumque igitur tabernæ propiores transierunt, subsistebant, et cujusnam stulti ea esset effigies scire cupiebant. Neque diù ambigui fuerunt. Ità

enim facies imaginis respondebat vultui mercatoris; ut ovum ovo similis non esset. Movit ea res spectantibus risum, manavit fama in universam civitatem; pervenit rumor etiam ad ipsum mercatorem, nimirum summo cum illius ludibrio ridiculam ejus imaginem prostitui, cachinnos aspergi, uno verbo illum tanquam stultum repræsentari. Surgit e vestigio mercator, accurrit ad tabernam, ac, ne diutius in argumentum ridiculi prostet, imaginem pariter atque ignominiam suam jam quatuordecim philippæis lubens volensque redimit. Ità quam superbiam avaritiamque in imagine exercuit, luit in imagine, pictorque læsus injuriam ex æquo pensavit.

STENGELII, ex Opere cui titulus: *Judiciorum quæ Deus hoc in mundo exercet*, t. III, c. 44. 1651.

La Rave et le Cheval.

LUDOVICUS, Galliarum rex, ejus nominis undecimus; cum rebus domi turbatis peregrinaretur apud Burgundiones occasione venationis, nactus est familiaritatem cum Conone quodam, homine rustico, sed animi simplicis ac sinceri; nam hoc genus hominibus delectantur monarchæ. Ad hujus ædes frequenter diverterat Rex e venatu; et, ut plebeiis rebus nonnunquam delectantur magni principes, apud eum magnâ cum voluptate vescebatur rapis. Mox ubi Ludovicus restitutus jam rerum potiretur apud Gallos, submonuit Cononem uxorem, ut Regem veteris hospitii commonefaceret, adiret illum, et rapas aliquot insignes illi dono adferret; tergiversatus est Conon, se lusurum operam: principes enim non meminisse talium officiorum. Sed vicit uxor. Deligit Conon rapas aliquot insignes: accingitur itineri. Verum ipse per viam captus illecebrâ cibi, paulatim devoravit omnes, unâ duntaxat exceptâ, insigniter magnâ. Ubi Conon prorapisisset in aulam quâ Rex erat iturus, statim agnitus est a Rege, et

accersitus ille magnâ cum alacritate detulit munus. Rex majore cum alacritate accepit, mandans cuidam e proximis, ut diligenter reponeretur inter ea quæ haberet carissima. Cononem jubet secum prandere: a prandio egit Cononi gratias; et cupienti repetere rus suum jussit pro rapâ numerari mille coronatos aureos.

Hujus rei fama cum, ut fit, per omne Regis famulitium esset pervagata, quidam ex aulicis dono dedit Regi equum non inelegantem. Rex intelligens illum, provocatum benignitate quam præstiterat Cononi, captare prædam: vultu majorem in modum alacri accepit munus; et, convocatis primoribus, consultare cœpit quo munere pensaret equum tam bellum, tamque pretiosum. Interim qui donârat equum spes opimas animo concipiebat, sic cogitans: si sic pensavit rapam donatam a rustico, quanto munificentius pensaturus est equum talem oblatum ab aulico? Cum regi veluti de re magnâ consultant, alius aliud responderet, diùque vanâ spe lactatus esset captator, tandem Rex: Venit, inquit, in mentem, quod illi donem; et accersito ex proceribus quopiam, dixit in aurem, adferat id quod reperiret in cubiculo (simulque locum designat) serico diligenter obvolutum. Adfertur rapa: eam, ut erat obvoluta, Rex suâ manu donat aulico, addens, sibi videri benè pensatum equum cimelio, quod sibi constitisset mille coronatis. Digressus aulicus dum tollit linteum, pro thesauro reperit, non carbones, quod aiunt, sed rapam jam subaridam. Ità captator ille captus, risui fuit omnibus.

Intelligence d'un Éléphant.

ELEPHANTI cuidam ad horam cibus non oblat. Queritur et barrit. Herus excusat, et vas æneum ejus cibarium ostendit pertusum ac perfluens, causam hanc moræ esse, quod cibi non ultrâ tenax. Jubet igitur, si esse velit, ad

fabrum ferrarium ferat reconcinnandum. Parat ille, vasque proboscide sublatum ad fabrum desert. Opifex negligentius reparat. Refert elephas. Herus vitium comperit, et stomachatur; inclamat illum absentem, hunc præsentem, denique redire jubet, cum illo ipso vase. Facit, et fabro querulus impingit. Homo facetus iterum os sublinere conatur, et admoto malleo rimam claudere simulat. Nec tamen imponit. Quippe cautum ac suspicax animal resumptum lebetem ad flumen desert; et immersum aquâ implet, periculi faciendi causâ. Videt effluere. Igitur plenus irarum ad fabrum recurrit, et minitanti similis, magnâ voce intonat. Confluit vicinia rei novitate excita. Faber blandis verbis iratam demulcet belluam: acceptum denique vas probè refingit, atque ex fide. Sed ille ne tum quidem fidit, iterum ad flumen, et ad haustum, dum contineri aquam videt; hic ad circumstantes conversus, veluti testes in factum advocans, et itâ demùm abiit domo.

CAMERARII, *Memorabilium Medicinæ et mirabilium Naturæ arcanorum Sylloge*, Centuria x, c. 98.

Le Perroquet avisé.

ALEBAT Henricus VIII, Anglorum rex, Psittacum, in palatio Londinensi Thamesis ripis imminenti. Dicebatur is humanas voces imitari, profectu tam secundo, ut etiam, quas nemo dictâset, et quasi per transennam jactas perceptasque, exprimeret. Erat, ut in fluvio navigiis semper frequenti, assiduus in terrâ stantium clamor, seu necessitate suscitatus, seu quandòque et joco, ac, nominatim, Britannico perstreptentes idiomate voces iterabantur istæ: *Cymbam! cymbam, vel pro viginti libris* (seu, argenti pondo): quibus illi Charontem sibi aliquem de ripâ ulteriore in oram citimam, ad transvectionem advocabant. Hoc nauticum toties inculcatum

adagium ille Psittacus, ignavis omnibus, altissimâ sibi meditatione impressit. At scientiam dies ipsa demùm et calamitas in lucem protraxêre. Post aliquantùm enim temporis, dum, nescio quâ pedum temeritate, seu tecti imbricibus, seu fenestrarum margini illudit, fallente malè fixorum unguium retinaculo, in præterfluentem Thamesim Avis delabitur, diùque, madefactis invalida pennis, natat ac fluctuat. Cum ecce, in tempore, toties auditæ nauticæ implorationes periclitanti succurrunt; lamentarique Psittacus, et de medio flumine, vocibus Anglicis inclamare cœpit: *Cymbam! cymbam, vel pro viginti libris.* Et fuit mox, qui trans amnem, intellecto discrimine, scapham expediret, Psittacum fluitantem exciperet, agnitumque ex ipsâ speciei præstantiâ reportaret, adjectis quæ ille suo in periculo proclamâsset, promississetque. Regi non indelectato alumni sui jocosò balneo tamen paulò gravior visa est argenti tam ponderosi, inscio se, stipulatio; cujus tamen debiti exsolutio à fisco suo speraretur. Igitur ad navicularium conversus: « Hæc quidem tu sic, inquit, enarras. Cæterùm quantum pro vecturâ tibi debeatur, ex ipso potius Psittaco percuncitemur. Quid ais, naufrage? Tu quantum pro naulo spondidisti? » Cui Psittacus: « Da, inquit, » nebuloni solidum. » Risus est omnium coortus, et remex cum pretio, quantum Avis edixerat, trans fluvium remissus.

E. J. BISSELI, *Soc. J. Æstivorum*, lib. III.

L'Aigle pourvoyeur.

Cum Caspar Schombergius, Nantoliæ comes, et Jacobus Augustus Thuanus, ab Henrico III Rege ad fœderatos principes conscribendi exercitûs causâ mitterentur, in itinere Mimatensem præulem in Cœnomanis Adamum Urtalupium convenerant. Ibi observatum inter



mensas, quæ apponebantur, volatilia, aliaque silvestria, capite, crure, alâ, aut clunibus ferè truncata esse, mirantibusque facètè a domino responsum, *promi sui gulæ condonandum, qui cibos prægustare sit solitus*. Cùm quærerent convivæ, *quis ille promus quem designaret*, sic comperiebant : Frequentes illis locis, ut montanis, aquilas nidulari, quippe re omni abundantibus et toto regno ob id præcipuè pecuniosis. Nidulari autem illas cavis rapibus inaccessis, et ad quas, cùm pedibus, quantum fieri potest, ascenderis, per scalas comportatas aut uncus ferreos vix pervenitur. Id observare pastores, protinusque juxta tugurium extruere, quo tecti ab infestis illis, cùm ad pullos prædâ onustæ advolant, tam mas quàm femina, se tueantur. Nam mas trimestre totum, femina quamdiù pullus in nido jacet nec evolat, aut quousque novis amoribus pertentetur, ad prædam per subjectam regionem discurrunt, et e domibus rusticorum capones, gallinas, anseres et ejusmodi aves cortales, aliquandò agnos, hædos, interdum et porcellos lactentes rapiunt, et certatim pullis ingerunt. Major et copiosior præda ex agro, phasiani, perdices, gallinæ silvestres, anates feræ, nec non lepores et capreoli. Pastores verò, ubi parentes avolârunt, subito ad cava erepunt, et allata auferunt, pro iisque pullo intestina animalium domo allata supponunt : quod tam citò fieri nequit, quin aut pullus partem aliquam, aut ipsi parentes, urgente fame, jam voraverint. Eo fieri, ut truncata illa mensæ inferantur, cæterum optimi succi, et cui nihil eorum, quæ prostant in macellis, comparari possit. Cùm verò tandem in eo pullus est, quod tardiùs accidit, pastu nimirum defraudato, ut evolare queat, tum catenâ nomas eum alligat, ut, quò diutiùs in cavo hæret, eò diutiùs parentes prædas alendo pullo comportent, quousque mas primùm, dein femina, novo subeunte amore, ejus jam grandioris obliviscatur. Tum nomas clanguidum pullum aut solvit, aut

misericordiâ tactus ad domum affert. Id coram inspicere voluit Thuanus, et difficili admodum adscensu ad locum adivit, in quo pullus catenâ vinctus erat; ubi dum esset, mater advolavit tam latè sparsis alis, ut quasi obrutam tenebris cœli lucem eriperet, et phasianum ad pullum hiantem attulit, subitoque ad novam prædam avolavit. Quod dum fieret, Thuanus, et qui cum eo erant, se tuguriolo infra structo abdiderunt, ut impetum ejus devitarent. Nam a rusticis vulgò jactabatur, pueros quosdam nidis notandis servandisque destinatos, qui se incautiùs advolantibus obtulissent, infesto rostro et unguibus discerptos fuisse. Hoc subsidio ad rem familiarem utebatur episcopus, eoque tantum ejusmodi educiorum tribus aut quatuor nidulationibus se paratum habere asserebat, quantum mensæ opiparè onerandæ per annum ferè sufficeret.

DE THOU, *Mémoires de sa Vie*, liv. IV, ann. 1590.

#### L'Ane astrologue.

ITA vitæ suæ timebat Ludovicus XI Galliae Rex; ut omne hominum genus, undè nonnullum ejus vel tuendæ vel proferendæ subsidium peti posse videretur, circa se haberet, eoque medicum menstruo decem mille nummorum stipendio conductum aleret. Inter alios aderat et astrologus sat celebris, aut potiùs famosior, quem Rex, postridiè venatum exire cum in animo esset, de crastinæ diei tempestate consuluit. Is, inspectis tabulis ac cœli positione, sudum pollicetur. Progresso Regi, non procul a silvâ in quâ instituta erat venatio, occurrit carbonarius, asinum carbonibus onustum agens, qui, viso principe, exclamavit: Benè feceris, ô Rex, si quàm citissimè ad urbem redieris, siquidem intra paucas horas atrox te tempestas excipiet. Rex, contempto hominis rustici oraculo, ut cui serenæ diei fidem fecerat astrologus, pergit

Leç. lat. mod.

nihilominus. Vixdum venandi factum erat initium, quum ecce aer nubibus obduci, tonare cœlum omni tumultu, crebris æther micare ignibus, tanta denique vis pluviae ruere, ut fossæ aquis undique stagnarent. Dilapsis hinc indè venatoribus et aulicis, et tuta ab imbris injuriâ loca variâ fugâ quærentibus, Rex, equi pernecitate confisus, ad proximum pagum, indè mox ad ipsam urbem avolat. Paucis post diebus, carbonarium accersitum interrogat, ubi et a quo magistro didicisset astrologiam, et quâ arte prævisam imbris procellam prædixisset. Cui carbonarius: Ego ne a limine quidem scholam unquam salutavi, adeoque omnium litterarum expers sum: domi tamen astrologum alo qui vera semper, falsa numquam, me præmonere solet. Quis ille? tandem sciscitanti Ludovico: Asinus meus, retulit, quem hesternâ die præ me agebam. Hic, si quandò pluvia aut tempestas immineat, demittit auriculas, lento procedit gradu, et applicitum muro arborive latus enixè fricat. Quibus signis heri animadvertis, te monui ut regiam repeteres. Rex in risum solutus, astrologum aulâ ejici, stipendium verò carbonario dari, et asinum quovis astrologo peritiorum lautè haberi jussit, hæc præfatus: « Itâ vivam valeamque ut ego » posthac nullo alio astrologo quàm carbonarii asino usurus sum (1)! »

Gasparis ENS, *Pausilypsi*, lib. IV. 1631.

Le Spectre.

ERAT ingens militum copia, quæ Gallicam urbem præsidii causâ intraverat. Angustior domorum quàm militum numerus detraxerat civibus capaciorem ædium partem; neque id effici potuit, quin milites aliquot incommodissimè habitarent. Erat inter milites vir majore

(1) Voyez tom. II, *Narrations*.

ribus animis quàm opibus, cui sors vilissimam delegaverat domum, quæ et sordibus, et odore paupertatis indice, generosum hominem totos dies in foro tenebat. Is cùm perambularet urbem, et passim domorum tectorumque minas intentis oculis perlustraret, incidit in elegantem domum binis turribus, et variis statuarum elegantiss exornatam. Sed omnia velut in pestilentia conticescebant; fores pluribus adstrictæ vinculis, fenestræ aliquot apertæ negligenter, et omnia desertarum ædium signa. Cùm miles indignaretur vacare pulcherrimam domum, et eos qui pro salute civium vitæ curam projicerent, in pessimas sedes conjici, admonuit commilito, infestam spectris domum, cùm assiduis tumultibus familiam vexasset, tandem dominum coegisse, ut aliò commigraret. Nullum aditu prohiberi, si cui per audaciam, nisi verius temeritatem dixeris, inquit, in infami sede pernoctare libuerit: sed neminem in illum diem reperi- tum, qui periculo nihil utilitatis afferenti vitam tradere voluisset.... Hæc postrema oratio virum acrem stimu- lavit. Exarsit animo cupiditas, ut princeps scrutaretur quidquid subesset mali. Itaque ad magistratum primò, ad dominum ædium deindè contendit, polliceturque, si quid fuci in istis timoribus, si quid vicinia, si quid ser- vitium doli moliatur, impigrè se rimaturum; lychnis modò et lignorum copiâ instrueretur domus. Quòd si hæc humanâ fraude contingerent, ferro se improbos ulturum: si majore vi tragedia excitaretur, non invi- tum pro laude publicisque commodis moriturum.

Nemo erat quem non caperet adeò generosus impetus, cùm famulus præterea militis promitteret ad omnia ma- nus, firmaretque non fore aliquod discrimen domino, quod ipse non adiret. Conveniebat ad militem vicinia, tanquàm Hercules stetisset ad Tænarum, pugnaturus, in Mortis imperium et Inferorum pacem. Sed ille, cùm omnes arceri jussisset, ense sedulò detergit, ac sub

vesperam, animis modicâ cœnâ refectis, desertas subit ædes, unico comite famulo, quem etiam communicatæ gloriæ invidus arcuisset, nisi notæ fidelitatis homo jurasset, aut eâ sibi nocte moriendum, aut cum domino esse vivendum. Igitur, appetente jam nocte, cùm nescio quis tremor invitos occuparet, ignem in amplissimo triclinio excitant, passim lychnos suspendunt, et, obfirmatis longâ cogitatione animis, a se tandem impetrant, ut minimum in illâ luce præsidii esse putent: magnos viros a seipsis auxilium petere oportere, seipsos obfirmare, nihil suâ virtute præstantius ducere, undè aut disciplinæ sanctitatem, aut pugnandi magnanimitatem hauriant.

In solutiores deindè sermones lapsi, jocos etiam et risu, fortè non vero, primam vigiliam consumpserunt, cùm in superiore triclinii parte visus est lacertus hominis seipsum immodicè quatiens, sic ut in pavementum decideret. Dubitantibus illis, ex aliâ sese parte crus humanum exseruit, ac deinde omnes passim corporis partes, ita sanguine diffuentes, ac si recenti cæde cadaver supplicium immane lacerasset. Mox in mediâ sede visum est truncum caput sese ex tabulato expediens, quod etiam ex alto deinceps ruptas humeris cervices aptavit. Inde artus inter se coire, colligari membra, visa omnia convenire, atque ingentis staturæ homo velut ex Cadmi semine procreari; qui, ferociter ensem quatiens: « Tu » verò, inquit, quisquis in meam domum temerarius » irrumpis, eia, mecum de imperio ædium certa, nisi » fortè inultus cadere malis. » Nec militi consilium in tantis monstris, neque audacia defuit. Ultrò ad provocantem provolat. Non impetus, ut præcipitaret temerè corpus, non timor, ut fœdè ageret, evincebat. Tanquàm mediâ luce dimicaret in hostem, modò promovere gradum, modò cum artificio succedere in latus. Tandem videbatur respexisse fortuna: ensem capulo tenùs intra corpus hostile condidit. Expectabat ut rueret homo

truculentæ molis. Sed nec cruor ex vulnere sequi, neque titubare vestigia, neque vulnus quicquam e purpurâ remittere. Hæc militem incautiùs admirantem ferro hostis excepit, neque tamen segniùs depugnabat miles, aut aliquod ferri frigus intra viscera sentiebat. Cùm deinde adversum uterque pluries confodisset, horis plus minùs duabus exactis, velut signo dato, in capulum recumbunt, sudorem exfricant, et arcè meantem spiritum tanquàm per inducias extendunt.

Excitabat lychnos militis servus, pugnaeque paratus, si herus cecidisset, succedere locum, et mortem ulcisci destinabat, cùm athletæ, collecto satis spiritu, sæviori odio invicem incurrunt. Miles nunc succidere poplitem hostis, nunc visus ferro transegisse latera, et ipse modò lacertum sibi eripi credebat, modò cervicem decidere, modò transfixo corpore sanguinem emicare: cùm nulla interim vulnorum vestigia libarent integerrimum corpus. Sed major animo labor deficientem paulatim militem jam ad ultima deduxerat. Cassi ictus, tarda vestigia, motus languidi, anhelitus crebrior, et incensi penè vultus quicquid erat in corpore humoris exhauserant. Cùm ab hoste aversus, ac veluti datis manibus, se in lectulum, quem dominus ædium sterni curaverat, penè ultimis viribus, dedit præcipitem, et famulo pugnae cupidine flagranti, quòd herum ex vulneribus extinctum crederet, locum amoris ostendendi concessit.

Ibi brevior pugna minori utriusque discrimine finita est. Etenim collectus e frustulis homo servi os tam immaniter percussit, ut ille confuso spiritu in pavementum corrueret, ac deinde ad lectulum venit, urget decumbentem, ut surgat ad pugnam: utrumque offenso corpore, utrumque parem esse; nec duobus posse concedi victoriam. Cùm miles debilibus verbis juberet a se discedere, non posse post tanti temporis certamen aut sicam aut ensem tollere: « Te verò patior, inquit, eâ condi-

« tione quiescere, si vanissimam superstitionem ejuras, » et quod nomen anicularum commenta tibi colendum » a cunis insinuârunt, saniori consilio detestaris. » Cùm se miles antè ultima passurum supra vires vociferaretur, cùm ad ensem excitatus respiceret, spectri inanis imago in aerem soluta discessit. Lapsus deinde in somnum miles, cùm non antè altissimam lucem evigilâsset, stertentem eodem quo deciderat loco famulum excitat : quem perturbatâ diù mente jacentem antè sopor oppresserat, quàm aut de se, aut de domino cogitaret. Sed ecce postremum nocturnæ tragœdiæ actum : Non agnoscebat herus servum, eâ vultûs parte quâ ictum acceperat, supra omnes Æthiopas atrum. Donec, errore cognito, fores laxant, exspectanti populo sui copiam faciunt, omnium quæ evenerant fidem decolori servi vultu faciente. Exitus lætior, quòd et exemptæ istâ infestatione ædes, neque miles modicâ mercede donatus, cùm totâ regione diffusus præterea rumor amplissimum homini præmium daret, quòd illius laudibus ac fortitudine omnia personarent(1).

BARCLAY EUPHORMIONIS, pars 1, c. 8.

La fausse Magic.

EST ibi caupo, non sui solùm ordinis, sed multò etiam superioris longè locupletissimus : hic nobilem cauponiam facit, neque cujusvis sortis homines excipit, sed viros tantùm nobiles, ac, si usus veniat, ipsos etiam reges atque dynastas. Etenim ea est illi supellex, ut non ad unius privati hominis usum, sed ad regalis magnificentiae cultum, comparata esse videatur. In eâ sunt peripetasmata, aulæa, toreumata, vasa corinthia, argentea, tum pura, tum sigillis emblematicisque perfecta. Hæc in adventu

(1) Voyez tome II, et les *Leçons Latines anciennes*, tome I, *Narrations*.

virorum principum solitus est palàm exponere. Præterea magnam vim pecuniæ in arcis armariisque semper habet inclusam, solutam ab iis, quos exceptos hospitio, lepide nitidèque, suis sumptibus, alit.

Hujus bonis sycophanta quidam callidus ac doctus inhiabat, atque id unum præter cætera studebat, quemadmodum cauponi manum adiret, ejusque ad se habentiam averteret. Verùm, die quodam, cùm, in regionem suarum astutiarum ingressus, omnes perlustraret, ea illi maximè placuit, quæ monebat, ut, si vellet ea quæ cogitaverat sibi feliciter cedere, ad cauponis amicitiam aditum aliquem viamque muniret. Itaque venit ad eum, ac simulat se summum quemdam virum esse, ex remotissimâ nescio quâ insulâ, illucque navigio advectum, ut, regionis amœnitate, a curis animum relaxaret; propterea velle apud ipsum divertere, ubi sciret hospitibus benè esse solere ac lautè; sibi autem sese in animo pecuniæ non parcere, quò molliùs nitidiùsque curetur. Caupo gratias agit, neque alium esse locum affirmat, ubi sibi lepidiùs esse possit, quàm ibi.

Admissus igitur cauponis in domum, nihil sibi esse faciendum priùs existimavit, quàm ut sese penitus in ejus familiaritatem immergeret. Neque res fuit magni laboris ac temporis. Nam brevi totum hominem possedit. At ubi videt satis sese ad illum insinuâsse, segregat eum solum, ac: « Tuis, inquit, in me benefactis facilè superas, ut sis mihi superior quàm quisquam alius, atque aliquid propter me tibi veniat boni; verùm id, cujus nunc occasio datur, non illud est, quod pueri clamitant in fabâ sic reperisse, sed Croesi divitiæ, sed montes auri. Quamobrem si fidas te taciturnum, veram tibi causam quæ me huc adegit exponam. »

Caupo, pecuniæ studiosus in primis, hæc oratione excitus, affirmat, jurat, quod apud ipsius aures deposuisset; saluum indidem eum esse sumpturum; immò



non tutius Fidei quicquam, quàm sibi committi. Ille igitur, non solum se inquit esse cumprimis domusue nobilem, verum etiam astrologum summum, ariolum, divinum, ac magicæ artis longè peritum, ejusque artis beneficio perspectum habere in quâdam parte publici agri, cujus loci signa ac notas pròbè teneret, ingentem latere thesaurum, hunc se velle defodere; cum eoque partiri; sed opus esse silentio: nam si id cuiquam suboleret, utrumque pœnas legibus esse daturum, quæ vetant glebam unam in publico agro commoveri, nisi prius factâ a magistratibus potestate; sed nondum tempus idoneum ad eam rem esse, quòd essent exspectandi siderum quorundam ortus compositionesque, sine quibus quidquid ipsi tentâssent, teterrimè caderet; verum, ut ex cœli conversione perspectum haberet, tempus illud propiùs abesse. Idque malus eâ causâ faciebat, ut posset hominem diutiùs exedere. Nam postquàm piscis hamum voraverat, perindè, tum in prandiis cœnisque, tum in cæteris rebus honorificè eum habebat, ac si rex aliquis esset, vel imperator eximius; ac ne verbum quidem de mercede faciebat, quòd crederet omnia sibi largiùs, quàm vellet, ex thesauri massâ pròventura.

Interea novus ille magus, quòd ejus spes aleret, quotidie obortis tenebris, ducebat eum in apertam atque patentem agri planitiem; ibique sumpto in manus astrolabio, siderum motus se notare assimilabat. Sed cùm quatuor jam menses abiissent, neque ampliùs prolatando, ac diem ex die ducendo, sine fraudis suspitione posset hominem ludere, die quodam fit illi obviàm, ac lætus venit, exclamat: « Venit nox illa tam exspectata, tam amœna, tam » hilaris, quæ te cauponibus, hominum mendicabulis, » eximat, atque, ob divitias, regibus ipsis exæquet. » Quamobrem, concubiâ nocte, illuc quò duceris, cum » ligonibus istis quos asservandos curabis, mecum ea » oportet, defossoque terræ gremio, illum ex eâ factum

» extrahamus, qui jam diu luci deripitur. Sed quia magis  
 » cantionibus sunt prius manes evocandi ac vinculis con-  
 » stringendi, atque ii praesertim lemures, quibus thesauri  
 » custodia commissa est (nam secus omnis noster labor  
 » esset inanis ac vacuus), ideo quotquot tibi domi sunt  
 » claves, in medium afferas; nam iis, cum mortuorum  
 » ossibus, ac certis herbis, ad minorem lunam resectis,  
 » brevem illos in gyrum, quem radio descripsero, com-  
 » pellam, in eoque concludam et tanquam obserabo,  
 » ne commovere se audeant. »

Ille, qui nihil etiam tum mali suspicaretur, quidquid habebat clavium, in medium attulit. Quarum simul ac ille potitus est, ad tres viros recta contendit, ac, « si mihi, inquit, fides publica datur, thesaurarium vo- » bis furem manifestarium dabo. » Jussus fide publica dicere, indicat, cauponem illum divitem convenisse secum, ut, proximam concubiam nocte, cum ferramentis ad agrum publicum accedant, ac thesaurum ibidem abstrusum effodiant; ac, si sibi minus credant, conquisitores illius in domum immittant, nam « invenient, inquit, » in culinam, in angulo, ad laevam manum, ferramenta ad » fodiendum necessaria. » Illi, lictoribus missis, hominem statim cum tota familia comprehendunt, et in carcerem condunt. At sycophanta, occasionem tam lepidam nactus, clavibus, quibus inferna monstra decreverant in gyrum concludenda, angulos omnes aedium et conclavium miseri illius cauponis sibi pervios facit; capsas et armaria omnia aperit, atque inde thesaurum eruit, magnam videlicet vim argenti ac pretiosa alia multa; quae omnia convasata, in navigium, quod pridie conduxerat, attulit, ac, nemine persequente, in alias regiones, longe ab iis disjunctas remotasque, se contulit. Sed, paucis diebus post, caupone e vinculis exempto, ac pecunia multato, hujus doli detecti sunt.

E. J. N. ERYTHRAEI (*Vittorio Rossi*), *Eudemia*, lib. x.

## Le Brigand écossais.

REGNANTE Jacobo I, furentibus per totam latè Scotiam latrociniis, erat insignis latro, in Rossiâ natus, qui, impunitate superiorum temporum pravum ingenium incitante, diù in vicinos grassatus fuerat. Unum, præter alia, insigniter crudele facinus ejus narratur. Cùm vidua mulier, ab eo spoliata, vehementer quiritaretur, atque identidem clamaret, se ad regem querimoniam delaturam : « Et tu, inquit, quò minore molestiâ illuc pervenias, ego quoque te juvabo : » advocatoque fabro, plantis ejus soleas equinas clavis ferreis affigendas curat. Neque istâ injuriâ contentus, etiam verborum contumelias adjecit, eam adversùs aspera et confragosa viarum sic munitiorem fore ; ac per ludibrium prætereuntibus ità confixam ostentabat. Mulier ferox, contumeliis magis accensa, quàm deterrita, ubi primum iter tolerare poterat, ad Regem profecta, rem ordine denarrat. Rex, qui et ex aliis idem audierat, et auctorem facinoris in vinculis habebat, miseram solatus, brevi sceleris inauditi poenæ min inventorem redundaturam promisit : prolatoque e vinculis latronum duce cum duodecim sociis, clavis ferreis confixos triduo per urbem circumduci jubet, novi supplicii causâ populo per præconem indicatâ : deinde ipsius corpus capite truncum, duodecimque socios, laqueo strangulatos, in cruces prope vias attolli.

BUCHANAN, *Histoire d'Ecosse*, l. x.

## Le Géryon moderne, ou le Brigand aux trois visages.

FUIT in Panormi finibus latro, non spernendæ calliditatis arte diù inultus. Quippe vultus illi triplex, ut de Geryone quædam anus fabulis memorant. Ætas homini

media erat, rava barba, et tenuis: sed in sinu capillitia duo, ex quibus totidem barbæ pendeabant, hæc horridior, et in senilem effigiem cana: fusca alia, in primæ virilitatis specimen colebatur. Has larvas tanta ars concinnabat, ut nemo adscititiam formam deprehendere, nemo arguere furtivos vultus posset. Igitur modò senex, nunc junior, interdum demptâ personâ, cernebatur. Sic impunè latrocinantem mutabilis forma non supplicii tantum, sed et suspicioni diù eripuit. Nam juvenili grassatus specie, mox senex occurrebat quærentibus; rursusque fallebat juventutis imagine, si sub canis peccaverat. Pater tunc meus provinciam regebat, qui fatigatus pessimi chamæleontis ingenio, tandem captum meritissimâ cruce fregit. Sed miratus fraudis ingenium ad naturam accedentis, pilos jussit apud se asservari.

BARCLAY, *Argenidis* lib. I.

#### Le Brigand de Sienné.

FUIT Gynus Sennensis, staturâ grandi compactisque membris, impiger, audax, laborum patiens, ingenio liberali, sed quod perversa educatio et domestica improbitas in prævum detorserat. Itaque insita homini fortitudo ad scelus et latrocinia prorupit. Et elucebant tamen in ipso latrocinandi genere aliquot nondum oppressa innatæ liberalitatis indicia; nam et quod aliis eripuerat, id effundebat in alios prædator munificus; neque excutiebat ipse viatores, sed in quem fortè inciderat, eum jubebat id quod sibi superesset, ultrò proferre, pro suis quemque copiis, quo facto, bonam ejus partem reddere solebat; quin etiam, Musarum amans, viros litteratos nactus, quorum plerumque tenue peculium est, ipsis de suo largiebatur, et ad studia stimulos addebat. Is quanquàm assidue insidiabatur, nummos, non caput petebat, neque sibi obnoxios unquam occidi patiebatur: dignus profectò

vir qui latronibus jura legesque conscriberet, si quod in injuriâ jus posset definiri. Hunc, quamvis a cæde alienum, ira tamen et dolor ad cædem impulit, quam audaciâ nobilitare voluit. Cùm enim Sennensis quidam magistratus Taccum ipsius avunculum, æquè latrocinio infamem, supplicio affecisset, hunc Romam, ut ibi judicia exerceret, a summo pontifice advocatum, Gynus interficere constituit. Neque in itinere homini incauto insidiari sustinuit, id ignaviæ esse ratus. Sed ubi Romam pervenisse audivit, advolat in urbem, atque in eum locum, ubi judex ille pro tribunali sedebat, audacter ingressus, in medio consessu, in ipsis subselliis, impetu facto, obtruncat; caputque abscissum secum ferens, cruento gladio sibi viam facit, atque omnibus attonitis ac propè constrictis, tutus evadit: longo facinorum successu felix, donec, ut plerùmque fit, toties victricem gladiatoris audaciam suæ tandem poenæprehenderunt. Car. LEBEAU.

### Le Soufflet vengé.

**MEGOLUS LERCARIUS**, civis Genuensis, nobili et per-  
vetusto genere ortus, novo atque haud scio an unico  
incredibilis audaciæ et fortitudinis edito facinore, virtutem  
privatorum hominum ipsis etiam regibus et summis prin-  
cipibus verendam et formidolosam fecit. Quippe quos do-  
cuerit apertâ quoque vi, armisque ultrò inferendis, inju-  
riarum et contemptûs sui interdum vindices esse posse.

Is enim inter aulicos Cæsaris Trapezuntii cùm esset,  
lusuque, ut fit, pomeridianas horas traduceret, in alter-  
catione et jurgio, ab homine qui magnum gratiæ locum  
apud Cæsarem obtinebat, colapho cæsus, cùm ipsius  
injuria a Cæsare neglecta esset, omnem iracundiæ et  
generosæ indignationis impetum, humilitate auctoris  
spreta, in ipsum Cæsarem contulit.

Genuam igitur in patriam cùm venisset, animi moesti-

tiam squalore atque habitu corporis præferens, injuriâ amicis et propinquis expositâ, illorum opibus adjutus, duas triremes comparavit et instruxit. Cum quibus egregiâ florentis ætatis bellatorum, omnisque navalis instrumenti et bellici apparatus copiâ refertis, tanta maris emensus spatia, Euxinum ingressus, non populationibus modò, incendiis, vastationibus, omnem Cæsarianæ ditionis oram brevi infestam fecit, sed vim, et iram implacabilis animi memoriamque altè insidentis injuriæ volventis, in miseros a se captos, sædo supplicii genere expromebat, quos, naribus et auribus desectis, dimittebat, ut videlicet contumeliam in ore acceptam illâ oris deformitate reddendâ ulcisci videretur.

Quibus acerbitatibus impulsus tandem Cæsar, quatuor triremes in illum armavit, quas Megolus, cum apertâ vi imparem se intelligeret, astu solertique consilio elusas vicit. Simulatâ enim fugâ, cum Cæsarianæ omnibus remigii viribus connixæ fugientes insequerentur, disparique celeritate aliæ alias anteirent, Megolus respiciens eum astum sibi processisse, pugnâque illarum segregatâ, imbecilliores fore illas cerneret, in duas proximas conversus, reliquis longo intervallo sequentibus, easque adortus, ipso impetu et incursu oppressas cepit. Quo exemplo reliquæ perterrefactæ, fugâ salutem expediverunt.

At Megolus, triremibus suppressis, usitata deformandi oris exempla in captos edidit; quos dimittens nunciare Cæsari jussit, unam illi tantummodò esse, sese ac populos suos e tantis cladibus eximendi rationem, si eum, qui ipsum injuriâ affecisset, sibi in manus daret; aliter sibi satisfieri non posse. Quod cum Cæsar malis urgentibus et populorum fremitu victus fecisset, Megolus hominem ad se adductum, calce prius in consensu triremis in ore percussum, ad genua in humiles fletus projectum, ac mortem quidem tam audacis superbiæ et

arrogantiæ facinori debitam fatentem; sed tormenta et cruciatus deprecantem, benignè allocutus, bono animo esse iussit; cùmque sibi affatim satisfactum esse diceret, unam reliquàm esse addidit erga nomen Genuense satisfactionem, cui non minor quàm ipsi facta esset injuria: si Trapezunte Cæsar ædes publicas negotiatoribus Genuensibus ædificasset, egregii serie facinoris in parietibus pingendo expressâ, ad documentum sanciendum, ne quis in posterum illius nationis homines injuriis cujusquam obnoxios duceret. Quas ædes Cæsar ex pacto ædificatas, homine recepto, Genuensium nationi domicilium assignavit. *Ex J. L. BALZAC, Epistolis selectis.*

Ruse d'une Mère.

ERAT vidua quædam, stirpis et dignitatis splendore facile præcipua; sed huic filius curvæ planè mentis, cujus ad tres-viros non semel ob nobile latrocinium nomen pervenerat; ad summam, præstigiæ lavernalis unicum exemplar. Hunc catenato cœtui adscriptum parens ægerrimè sustinebat; quem ut e custodiâ et pedicarum crepitu sibi vindicaret, tale comminiscitur facinus.

Esurienti cùm ad meridiem ex more diaria ferret, venenum mero dilutum porrexit. Ille siccis cupidisque faucibus commodum obsecutus, cœpit incertum obtutum volvere, dentes rictu nudare, dubia balbutire, nubilæ potionis gravedine confici. Quid multis? exanimis humi procumbere. Porro captivi omnes murmure et ululabili plangore, planè infando huic schemati congruente carcerem totum impleverunt, donec e primatibus nescio quis clamore saucius adcurreret; ut aures suas conviciis ulcisceretur, et, « quos nobis, inquit, tumultus, ô Daunia » pecora? an quia ad viginti pedes sub humum non de- » pressi, aut secretiore cavæ incultu minùs circumventi, » pulmones vobis pruriunt? faxo magistratus pronuntiet,

- » et, rerum capitalium vindex, fauces istas obturet, quò  
 » minùs transeuntium auribus illatretis. »

Tum unus e vincis acerbo gemitu concussus, « meliora  
 » verba, pater. Universi ætatis tuæ veneranda genua  
 » adoramus, ut bilem supprimas. Ecce incestæ veneficæ,  
 » non dicam genitricis, momentario toxico peremptum  
 » pignus. » Hic omnes, ut dicta pondus haberent, teti-  
 gère oculos, et per genium illius sanctissimè juraverunt,  
 temperato aconito (quis innoxios latices crederet?) ju-  
 venem concidisse. Ille truces palpebras et iratum caput  
 commovens, cùm timorem victis incussisset, ne tris-  
 tiora præteritis adjungeret, et eos sceleris auctores pos-  
 tularet, tanquàm adolescenti spiritum exclusissent, læ-  
 vorsum abiit.

Nec multis interpositis horis, lictorum ministrorum-  
 que publicorum videre est densam frequentiam, quæ  
 retortis mulierem brachiis trahunt. Ad hæc pusionum  
 plerique quos annorum tenellus impetus ad lasciviam  
 ferre solet, acerrimè atque æstuosè perstrepere, præ-  
 textæ gremia saxis onerare, ut rigidâ illâ tempestate  
 infandum crimen expiarent. Inter cætera notandum est,  
 feminam non lugubriter ejulare, non tritâ et horridâ  
 pallâ obsitam, non turbæ venari misericordiam, aut  
 culpâ se exonerare: sed modestâ gravitate per æstuan-  
 tem populum rubore magis quàm lacrymis suffusam  
 incedere; ut facilè appareret ex hâc notâ nullis con-  
 scientiæ noxiæ furiis eam exagitari.

Mox patres ad carcerem conveniunt, ut, causæ mo-  
 mentis rectè trutinatis, veritatem eruant. Jam cunctis  
 residentibus, instar victimæ in proscenium vidua addu-  
 citur, et, ut altercationibus compendium faceret, prius-  
 quàm liquor clepsydris infunderetur, priusquàm præco  
 juberet, non dubitat fateri nefas, constantissimè roborare  
 suspicionem, se maternas nati sanguine manus imbuisse;  
 et, quod erat apprimè mirabile, obtestari sumerent sup-



plicium rotâ, pice, vel liquidâ plumbi grandine. Generis gloriam facinori causam præbuisse, ne scilicet maculâ crucis affinium candida integritas oblitteraretur, nec proavorum manes et ceræ pudendo opprobrio violarentur.

Hactenûs mascula indole, prorsûs ut Thebana Timocleia videretur. Sed subindè allacrymans, et fletu ad scenam composito, per publicam misericordiam, per inculpatam justitiæ dexteram, potestatem sibi dari postulat, ut funus, quod ipsa fecerat, prosequeretur, et supremo officio mandaret, quem unicum in necem produxerat. Ipsum jacentis corpus in conditorio se extremi sceleris admoniturum. Hanc poenam quibusdam credi gravissimam, imò legibus sancitum, homicidam circa cadaver debere perpetem diem excubare. Et, « ut sciatis, » inquit, judices sanctissimi, me benignitatem vestram » eludere minimè velle, neque ab ullo captare gratiam, » hoc unum flagito, ut implacabili consensu in perniciem meam perduretis. »

Dii boni! quanta vis lamentabilium questuum et impeditarum singultibus precum! etiam a compertæ severitatis hominibus extorquent quod flagitant.

Ecce patrum conscriptorum et concionis calor inexpectato sermone ictus sensim intepuit, et ad misericordiam impellitur, liberumque sepulturæ tempus facit; hâc tamen conditione, ut, manibus ritè conditis, matrona revertatur. Ergò ex arbitrio opportunam dolis occasionem nactâ, non tepido rore corpus lavat, non spirantibus amomis ungit; sed charissimo filio (nihil enim præter soporiferum mandragoræ succum hauserat) sospitatoris somni nebulam detersit.

Ephebus, mimico ab orco redux, et adhuc poplites, ferro graves, animo volutans, fidelissimam matrem agnoscit, intelligitque se vitam et libertatem morte invenisse. Nec moratus, in tutum per sacros muros, relicto longè capulo et feralibus pannis desperatissimus ille devolat.

Matrona verò ut fidem exsolveret, ad vadimonium optimatibus datum se sistit. Omnibus tandem ubi factum liquidè innotuit, nemo de consularibus, de equestribus nemo, ac ne de ipsâ quidem plebe quisquam, qui non liberandam clamaret, quam priùs diris devoverat. Sic impolluta virtus parricidali velamento spoliata, et suæ solis egregia præfica! condignam factis mercedem tulit.

*Ex ERYCII PUTEANI suadâ Atticâ.*

La Chose impossible.

ALMANSORI Granatæ Regi inter familiares præcipuè gratus fuit quidem nomine Ruserizius, vir prudens admodum, justus et verax, multisque aliis ornatus virtutibus, quibus regem unicè sibi devinctum tenebat, ut nihil ab eo peteret quin impetraret. Hanc quamvis debitam tot virtutibus felicitatem ipsi invidentes aulici quidam Regi, amorem, quo virum illum complecteretur, prædicanti, insusurrârunt hominem istum qualemcumque tantâ Regis benevolentia minùs esse dignum. « Quin tu ergò, aiunt, » ut scias quantum ille te diligat, et quanti te ac jussa tua » faciat, rem aliquam paulò difficiliorem ei mandas? » Placuit Regi consilium. « Nec tantum, inquit, rem difficilem, » sed etiam quæ fieri nequeat, ei faciendam imperabo » ; vocatumque ad se sic alloquitur : « Est quiddam quod » omninò à te fieri volo : quod tu nisi effectum dederis, » scito omni meâ te gratiâ excidisce. Vervecem habeo » præpinguem et benè curatâ cute nitidum. Eum volo » ut tu domi in præsepi tuo iis ipsis abundanter pascas » cibus, quibus apud me pasci solet, adeòque etiam la- » tiùs tractes, si plus appetierit ; ità tamen ut eundem » vertente uno mense macilentum mihi, debilem et flac- » cidum restituas. » Conditionem hanc recusare non ausus Ruserizius (ut cui id unicè propositum erat Regis ad nutum obtemperare), quamvis quod jussus erat fieri non

Leç. lat. mod.

posse videretur, vultu ad lætitiā composito, nullam ait rem unquā tam gravem, tamque arduam fore, quam Regis amore non esset perfecturus. Sic domum reversus, reique difficultatem etiam atque etiam animo perpendens, tandem sagacissimo suggerente ingenio, aliquid naturæ valdè consentaneum comminiscitur. Caveas duas è firmissimo ligno compingendas curat, et inter se propius admovet: earum alterā Vervecem, alterā Lupum includit. Verveci interim pabulum, uti jussus fuerat, abundanter præbet; Lupo verò tam tenue, ut semper urgente fame dentibus frenderet et, unguibus clathra effringere conatus, verveci inhiaret qui, tam vicini hostis metu, licet pabulum totum absumeret, non modò non pinguior, sed in dies etiam macilentior evasit, vix quicquam ut præter ossa et pellem haberet. Hâc arte vir ingeniosus non modò integram Regis benevolentiam servavit, sed mirum in modum quoque adauxit.

E. CASPARIS ENS, *Proscenii vitæ humanæ* (Gusman d'Alfarache), lib. III, cap. 4. 1652.

#### L'Ennemi généreux.

VEZINIO, Honorati Sabaudi, Villarii Marchionis, in Cadurcis legato, homini ex provinciali nobilitate forti, sed quem ferina propè natura plerisque invisum effecerat, cum Renerio, ejusdem nobilitatis adolescente pariter strenuo, sed cultioris ingenii, inimicitiae capitales, quæ neque amicorum, neque vicinorum interventu componi hactenùs potuerant, intercedebant. Igitur cum Renerius in lanienâ parisiensi, nono die septembris, observante ubique ante oculos morte, ad extrema se componeret, ecce, effractis subito foribus, Vezinius, cui in Cadurcos proficiscendi sub id a Carolo IX rege negotium datum fuerat, stricto gladio cum duobus armatis supervenit. Cumquè eò magis ille, jam mori certus,

prostrato humi corpore, divinam opem imploraret, Vezinius horrendâ voce intonans supplicem surgere, et asturconem ad id in viâ paratum inscendere jubet. Itâ Renerium, quò traheretur initio incertum, urbe postremò educit, ac fide acceptâ sequi imperat, amboque, nunquàm intermisso itinere, in Aquitaniam tendunt. Et cùm toto illo tempore Vezinius Renerium alloquio minimè dignatus esset, tantùmque ut illî in diversoriis ad victum necessaria parata essent, per suos curâset, tandem in Cadurcos, atque adeò in Renerii arcem unâ pervenerunt. Ibi Vezinius ad Renerium conversus: « Avidum jam » pridem ultionis animum, inquit, scis quàm mihi facile » fuerit explere, si occasione uti voluissem; sed nec » pudor id meus sivit, et virtus tua semper digna mihi » visa est, cum quâ, æquato periculo, experirer. Habe » igitur vitam beneficio meo servatam; tibi que sic per- » suade, tam me ad contentiones nostras, more inter » nobiles recepto, dirimendas, paratum deinceps fore, » quàm me nunc ad ineluctabile tibi fatum avertendum » haud segnem expertus es. » Ad quæ Renerius: « Neque » animus, neque vires, aut voluntas adversùs te, Vezinî, » ampliùs constant. Omnia hæc, quæ contra te parata » habebam, recenti beneficio tuo mihi eripuisti. Ipsas » simultates tam generoso facinore exstinxisti, cujus » exemplum nulla delebit ætas, et ipse memoriam æter- » nam servabo. Quem imperiosè sequi jussum hùc inco- » lumem duxisti, nunc, quòcunque voles, sponte secu- » turum ducito, tibi que habeto persuasissimum, me » vitam, quàm tibi debeo, et virtutem, quam in me » laudas, si qua est, arbitrio tuo expendere paratissi- » mum semper fore. Calamitatis publicæ, quæ tam » multos involvit, hic fructus apud me erit, ut, quem » inexprabili antè odio persecutus fueram, tam insigni » gratiâ devinctus, omni deinceps veneratione et officio » mihi colendum existimem. » Quibus dictis, Renerius

cùm in amplexus rueret, Vezinius, pristinam in vultu torvitatem servans : « Amico inimicove, ait, me, ut » lubet, utere. Nam utriusque tibi optio meo beneficio » data est. » Statimque, non expectato responso, calcaria equo subdit, relicto asturcone, quo Renerius vectus venerat, quem a Renerio officiosè remissum nunquam recipere voluit (1). DE THOU, liv. LII.

L'Algérien reconnaissant.

NULLA gens obtusa adeò gestat corda, ut non in eâ insignia interdùm exempla virtutis eluceant, imò a mediâ sæpè Barbarie existere videas mansueti, excelsi animi specimina, quibus nostra tot præceptis expolita humanitas nihil conferri possit, ut plus in illis impetus naturæ quàm in nobis doctrina valere videatur.

Nemo ignorat quæ sit Algeriensium feritas, quàm inculti mores, et belluis quàm hominibus digniores. Naturâ immites et truculentos insuper efferant maritima latrocinia, quibus unicè dedita gens est. Illius decus ex quocunque navigante convectare prædas. Neque enim, ut aliis gentibus, certi hostes, cæteris pacati. Hostis est illis quemcunque spoliare impunè licet ; nec spoliis miserrorum contenti, in ipsos sæviunt, captivosque illuvie, squalore, vinclis, fame macerant, donec, persoluto ingenti pretio, suas crudelitati victimas avaritia extorqueat. Ac ne mansuescere ullo modo queant ferocia ingenia, omnem politiozem litteraturam arcet ab iis absurda superstitione. Tali morum inhumanitate, cùm ab illis insolentiæ pœnas tonans Ludovici Magni classis repeteret, viribus impares, ad ignavam eandemque atrocem ultionem animum adjecerunt. Captivos, si qui aut patriâ, aut

(1) Voyez les *Leçons latines anciennes*, tom. I, *Narrations*, Pulfion et Varenus.

communione religionis cum Gallo cuncti essent, ad ora tormentorum alligatos, incensi pulveris vi jaculabantur in auras, ut discerpta et disjecta hinc et inde membra artusque lacerati et truncata corpora, postquam per aera rotata fuerant, in gallicas naves recidentia, horrore ac fœditate eorum animos confunderent, quos justo arcere bello non poterant.

Ducebatur inter cæteros ad miserrimam necem Gallus, quem immanium belluarum potestati fors inimica dederat, cum ecce agnoscitur ab Algeriensi quodam viro primario, quem olim ille captum navali certamine, ut est mansuetum Gallicæ gentis ingenium, atque etiam in hostes fœderis humani memor, clementer et benignè habuerat. Tetigit hominem, Gallis similiorem quàm suis, accepti beneficii recordatio, et: « Si vos, inquit, juvenis » egregii nobilitas, si virtus infausta nihil movet, at civi » vestro, ac meis in rempublicam meritis amicum, hos- » pitem, liberatorem condonate. » Simul memorat quemadmodum sibi apud eum justa et clemens servitus fuisset, et summâ liberalitate tractatus, et summâ facilitate dimissus, vitam et libertatem debere, videre se lucem, patriam, civium ora, ejus operâ, omnia parentum beneficia ab illo se habere.

Ridere Barbari talia dicentem, eò infestius urgere captivum, et jam tormento alligare. Illic verbò exarsit generoso animo furor, amensque, nec jam potens suus: « Viles, inquit, animæ, imbelles in hostem armatum, » in inermem indefensumque truces, explete, sævissimæ » belluæ, explete feritatem. Mihi quoniam amicum cru- » deli exitio eripere non datur, cum illo interire certum » est; idem ambos supplicii genus, idem horæ momentum » auferet. » Nec dicto defuit fides. Accurrit ad Gallum sub ictu jam stantem, expectantemque, dum admoto igne feralis machina fulminaret, et medium amplectitur, stringitque arctis ulnarum nodis, cum eo mox abripien-

duſ et ſpargendus per auras. Movit etiam Barbaros virtutis inauditæ miraculum, expugnatâque tandem sævitiâ, ne civem perderent, hoſti pepercerunt (1).

Car. LE BEAU.

Aventure de François Civil.

**BELLO** civili in Galliâ ardente, Rothomagoque obſeſſo; res memoratu digna accidit. Franciſcus Civilis, e vicinâ nobilitate juvenis ſtrenuus, ac robuſtâ valetudine, cum ſuâ cohorte ſtabat inter propugnatores. Is glande plumbeâ, per maxillam dextram ad cervicem penetrante, ictus, cùm e pomœrio decidisset, ſtatim foſſores, qui paulò infra vallum ducebant, mortuum rati, priùs ſpoliatum, cum altero itidem ſeminece compositum, levi terrâ ſub meridiem obruunt. Finito dein ſub vesperam certamine, cùm quiſque ad ſua ſe reciperet, percontante lixâ, qui cum equo militari herum in proximâ plateâ exspectabat, *an fama de interfecto Civile vera eſſet*, a Gabriele Mongomerio duce reſponſum eſt : *Et illum interfectum, jussuque ſuo terræ mandatum*. Quo intellecto, lixa pro ſummo beneficio petiit, ut locus indicaretur, quo heri cadaver erutum ad ſuos referet. Index ei datur a Mongomerio Johannes Clericus, ipſius ſtipatorum legatus, quocum lixa ad locum profectus, cùm erutâ terrâ cadavera tabo deformata, confuſis oris lineamentis, reperisset, et in prato nequicquàm expoſita minimè agnovisset, rursùs re desperatâ, in foveam recondit, manu alterius humo exſtante : quod cùm aliquantulùm progreſſi reſpicientes animadvertissent, veriti ne manûs

(1) Fait arrivé en 1683. François-Joſeph, comte de Choiseul, baron de Beaupré, capitaine de vaiſſeau en 1705, fut depuis gouverneur de Saint-Domingue. L'Algérien qui le ſauva ſe nommait *Hali*.

indiciæ canes ad cadaver eruendum ac devorandum invitarentur, humanitate adacti eodem redeunt, acciditque ut, cum manum terrâ obtegunt, adamas triangularis, quem digito inclusum Civilis gestare consueverat, ad lunam refulserit, ex quo lixa herum suum, quod ex facie non potuerat, agnovit; et, cum os ori admovisset, spirare adhuc, et caloris fomitem in eo nondum omnino extinctum comperit, protinusque corpus in equum, quo vectus venerat, imponit, et ad Claræ fanum, in quo vulnerati publice curabantur, defert. Sed, cum chirurgi in homine dubiæ vitæ curando operam ac medicamenta nequicquam absumi causarentur, præsertim in tantâ sauciatorum multitudine, lixa semianimem in hospitium transvehit, in quo per quatrimum sine cibo et potu vitam incertam toleravit, tandemque, advocatis medicis, ex eorum consilio diducuntur contracti dentes, et jacula in os adhuc spirantis immittuntur, ac, vulnere detereso, medicamenta idonea adhibentur. Ex eo sensim refici vires, nictare oculi, aures ad circumstantium strepitum excitari, tandemque vox penè mortuo redire. Sed mox urbe captâ, ob veteres cum fratre similitudines, cum inimici homines in illius hospitium infestis animis irrupissent, in ipsius irreperiti vicem, fratrem adorti, eum e conclavi, in quo jacebat, per fenestras in subjectam aream dedere præcipitem. Verum Deus misero rursus præstò fuit. Nam factum est ut in eâ ingens fimi cumulus esset, qui cadentem excepit; atque ita ab omnibus relictus, per triduum rursus sine potu et cibo vixit, donec unus e cognatis eum per milites clam ac noctu extra urbem in rusticum prædium transferendum curavit, in quo per otium plenè curatus est, pristinamque valetudinem post tot veluti mortes ita recuperavit, ut quadraginta annis, et etiam, hæc scribente Thuano, deinceps in vivis fuerit.

DE THOU, liv. xxxiii.



## Conjuration du comte de Fiesque.

**CUM** Andreas Auriæ Genuæ libertatem, exactis Gallis, restituisset, ea publicæ administrationis ratio instituta est, quæ, summi imperii magistratu, a quo lege nobiles excluderentur, cum nobilibus communicato, plebeias hinc familias deprimeret, hinc supra modum patricias efferret; ut facilè vetus odium inter nobiles et plebei nominis cives, nondum ex animis omninò extirpatum, ex eo sensim vires resumere potuerit. Ità affectis popularium animis non defuturos in eâ civitate motus apparerebat, si dux rebus novandis idoneus non defuisset. Eum se præbuit Joh. Ludovicus Fliscus, Lavinie comes, clarissimâ gente ortus, et elato animo juvenis, quòd ægrè ferret, recentibus Andreæ Auriæ meritis Auriacam domum, cui suam nullis partibus inferiorem existimabat, in tantam magnitudinem evectam, ut meritò popularibus et liberæ civitati gravis, sibi verò molestissima esset. Et ut Andream tot adoreis mactum tantisque beneficiis, quæ ipse inficiari non poterat, de patriâ optimè meritum, propter ætatem et civium gratiam, quâ modestissimus senex minimè omnium totâ vitâ abusus est, patienter ferret, Janetini Auriæ fastum et asperitatem ferre nullo modo poterat. Is Thomæ Auriæ filius, in re tenui educatus, seriacam textrinam, quod apud illos minimè ignobile est, exercuerat. Sed cum Andreas Thomæ patruelis, liberos non haberet, eum sibi, ut sanguine et nomine proximum, hæredem destinaverat, nec solummodò bonorum, sed amplitudinis ac potentiæ quasi successorem jam tum constituerat, viginti triremibus attributis. Quæ res ut erga nobilium juventutem summum favorem et auctoritatem Janetino conciliabat, ità apud populares maximam conflabat invidiam.

Aliam viam ingressus Fliscus, comitate et humanitate, quam specie naturali et composito vultu præ se ferebat, plebis gratiam aucupabatur, primarios ex illis adolescentes benignè appellando, et in eorum cœtus sese familiariter insinuando. Erat quippe in homine, etsi propè adolescente, summum dissimulandi artificium, quod totâ oris specie, lumen quoddam hilaritatis ac modestiæ præ se ferente, mirum in modum juvabatur. Color scilicet illius imprimis egregius, læti oculi, incensus sêdatus ac liberalis, qui equo præsigni sæpiùs, ut se populo ostentaret, sublimis per urbem vehebatur; idem quoque vultus et constans in multiplici actione varietatis similitudo. Hâc ingenii agilitate odium suum, quod adversùs Janetinum jamdudùm concoquebat, cujusque suffusa nota nonnulla in ipsius ore antea apparerat, totum intra animi latebras abdiderat, et specie quâdam amoris singularis illum adortus, quicquid in illius corde suberat opinionis incommodæ, id prorsùs deleverat; et tum humanissimè præsalutando, tum domi conveniendo ac consilia communicando, interdùm et ipsius liberos in sinum acceptos coram parente deosculando, in arctissimam ejus familiaritatem irrepserat. Adductis igitur in societatem facinoris præter alios Joh. Bapt. Franco Verrinâ, Raphaele Sacco, jurisconsulto Savonensi, et Vincentio Calcano, Fliscus, moræ impatiens, propositum maturat, eique conficiendo secundam januarii noctem constituit.

Jam specie triremis armandæ et prædatum mittendæ, re cum ipso Janetino communicatâ, ut omnem suspicionem amoveret, homines coegerat, qui ipsi a P. Aloisio Farnesio libenter submissi et ex suæ ditionis oppidis lecti, frequentes convenerant. Id clam Andream factum, quod Fliscus de eâ re Janetino sermonem conferens, « Metuere se diceret, ne, si resciret ille, propter pactas » inter Carolum v et Solimannum, Turcarum impera-

» torem, inducias, absque dubio id fieri vetaret. » Nec contentus his militibus Fliscus, etiam prætorianos qui aut suæ ditioni subditi erant, aut ipsius beneficio militiæ adscripti, sollicitavit : quod a Jocanto Corso, militum tribuno, cùm vespere præsidium recenseret, animadversum, scrutatis militum contuberniis, et reperto eos ad Fliscum commeasse, continuò ad civitatis præfectos, atque ad ipsum Auriam perlatum est. Verùm ille mox a Janetino de Flisci consilio, quod ab eo sibi communicatum dicebat, certior factus, non solùm quod erat minimè suspicatus est, sed etiam ab ipso Janetino exoratus, quominus milites, uti ferebatur, prædatum mitterentur, non impediit. Jam nox advenerat facinori destinata, quâ armatos homines evocatos occultè in ædes suas, quæ in suburbii clivo ab aliis insulæ instar omninò separatæ erant, introduxit, januam strenuis satellitibus custodiendam committit, ita ut ingredientibus omnibus pateret, exeuntibus, præterquàm conjuratis, clausa esset. Tum habitâ in Janetini et Auriacorum tyrannidem oratione, consilium suum iis aperit, additis minis, « injuriam in » eos, qui in consilio, quod communi omnium causâ » susceptum sit, ducem tam egregii facinoris deseruerint, » tanquàm prodicionis reos, se vindicaturum. » Pavidis silentium pro assensu fuit ; nonnulli tamen vanitatis colaudato consilio, « sequi paratos se, quò dixisset, altâ » voce proclamant. » Quo audito, uxor, propè animo consternata, manantibus per ora lacrymis, quod triste infausti exitûs omen fuit, et viri genibus advoluta, obtestari cœpit, « ut a tam fædo et periculoso incœpto de- » sisteret. » Sed frustrâ, nam nihil uxoris lacrymas moratus, factâ spe felicitis successûs, eam prope diem principem Genuensium salutatum iri spondebat, verba subjiciens : « Aut non me videbis ampliùs, aut » crastinâ die minora infra te videbis omnia. » Quibus dictis, ita partito agmine, ut frater Cornelius portam Arcûs,

Ottobonus frater portam B. Thomæ sive Fasciolanam; Thomas Assaretus Verza, Janetini olim minister, Darsenam portam occuparet, ipse ad triremes potiundas, in quibus omnem imperii spem collocasset, accurrit; sed mobili ponte, quem in triremes trajecturus conscenderat, prolapso; armis onustus unâ cum tribus militibus ponè sequentibus delapsus submergitur, re a nemine, ut tunc a tenebris, animadversâ. Cæteris portas occupantibus, famâ tanti strepitûs ad ædes Andreæ suburbanas perlatâ, Janetinus ab uxore excitatus, quòd rixam tantum inter navales artifices subortam crederet, ejus sedandæ causâ, nautico habitu, cum puero facem præferente; rectâ ad portam Fasciolanam contendit, ubi ab Ottoboni præsidariis, cùm quis esset quærenti militi dixisset, admissus et confossus est. Ipse Andreas cùm videret jam Fasciolanam portam ab adversariis occupatam, equo impositus, ad Mozam oppidum, quod quindecim milliaribus ab urbe abest, properè se contulit. Flisci patefacta mors, ut civibus, qui jam manus dederant, animos addidit, itâ conjuratis, qui in aliis parum præsidii esse putabant, omnem spem rerum potiendarum ademittit, qui partim vi ejecti, partim sponte elapsi, rem infectam reliquerunt. Corpus Flisci vix tandem repertum, armis detractis, jussu Andreæ, rursus in mare projicitur. Et itâ dirum illud malum, quod longo labore conceptum ea nox in miserandum reipublicæ exitium pepererat, puncto temporis, præpotenti supremi Numinis dexterâ in undas effusum est. Tum Fliscana Genuæ domus perantiqua et magnificis sumptibus exstructa, funditus eversa, deque cæteris conjuratis captivis ultimum supplicium sumptum; Octo annis post, Ottobonus, Vulturini a Joh. Jacobo Meleniano captus, in Andreæ manus devenit, qui miserum juvenem culeo, parricidæ instar, insutum in profundum demersit: quod factum, ut indignum eâ virtute atque ætate viro, prudenter silentio præteriêre, qui vitam

ejus scripserunt, id unum videlicet in tantâ ducis modestiâ dignum reprehensione judicantes, quem omni laude posteritati commendandum susceperant.

DE THOU, liv. III.

Prise de Jérusalem par les Croisés.

**PRIMA** luce nostri tertiûm muros oppugnare incipiunt. Clamor utrimque tollitur. Duces suos quisque regione destinatâ ducunt. Adsunt, hortantur rem gerant : cæteræ machinæ promoventur. Turris repenti excitata, ac, ne igni corrumpi posset, a fronte coriis recentibus ac percrudis inducta agitur, urbem despiciens multiplici tabulato, undè tormentis tela ingeri possent. Certatur, oppugnatur, propugnatur. Agger jacitur, addensaturque, ut depressiora loca expleantur, munianturque, quâ turris tutò agatur. In meridianum tempus dimicatio laborque trahitur. Æstûs diei, sitisque, ac jejunii et lassitudinis vulnerumque sensus aberat. Par utrimque pertinacia, par virtus, par animus; eadem spes, similis fiducia; æquæ vires, nullum dùm fortunæ discrimen; Mars communis, nisi quòd nostri, nisi expugnarent, pro victis erant discessuri; hostis victoria erat non capi.

Ferro et igne utrique certabant: Barbari, ut machinas et imprimis turrim sparso igne cremarent; nostri, ut eâdem ratione storeas et cætera frustrandis ictibus Latinorum objecta incenderent: et aqua utrimque parata ad extinguendum incendium effundebatur. Fortè coortus ventus terga oppugnantium afflabat, in frontem oraque Barbarorum atrociter spirans, nostris animos addidit, ut faces certatim ac majori fiduciâ jacularentur intorquerentque. Hæ, adjuvante vento et inferente, facile adhæsere, et quæ Barbari muris prætenderant, flammâ conceptâ absumebant: neque opem aquâ comportandâ fundendâque, aliâve ratione, hostes ferre poterant, quòd

vapor fumusque adversus loco quemque suo stare non sinebat. Idem Latinis minimè officiebat. Ità nudatis eâ parte propugnatore muris, adæquato solo, substructionibusque expugnatis, via turri propiùs admovendæ facta.

Simul quæ hostes in pestem nostrorum paraverant, factum est ut iis ipsi caperentur. Adversùs Genuensium turrim malum in muro erexerant, trabemque transversam suspenderant, ut, ejus interiore capite reducto, ac mox magnâ vi remisso, exterius in appropinquantem machinam velut aries incuteretur. Contrà Ligur falcibus se muralibus instruxerat, et ex propinquitate retinaculum trabis cum horrendo sonitu ingruentis abscidit, et humi stratam in tabulatam sustulit, in murosque hostium porrexit. Fors, consilium, ars juvit. Frons turris ità scitè structa fuerat, ut superior ejus pars parvo molimine inclinari, ac pontis instar protendi, cùm res postularet, in hostem posset. Firmitudo trabis pondus illud superimpositum facilè sustinuit, ut ausus fuerit primus Gothofredus in muros hostium transcendere, miraculo virtutis etiam cæteris nostrorum attonitis. Insecutus hujus frater Eustathius, ac deindè alii atque alii. Ità eâ regione muri occupati, refractaque porta, et omnes intromissæ copię.

Cædes Barbarorum totâ urbe facta. Ad templum Salomonis eorum proceres refugère, ubi paulisper prælium recrudescens tenuit, ab Ægyptiorum nullo temperatum. Quarto nonas julias urbs sancta recepta. Postridiè humandis corporibus, purgandæque urbi opera insumpta. Tempia etiam lustrata, supplicationes habitæ, gratulatio facta. Quos Barbari exegerant revocati cives. Qui servilibus in ministeriis habiti fuerunt, libertati restituti. Hierosolomytani universi latinis ducibus gratias egère, quòd sibi patriam, se patriæ restituissent. Compositissimâ oratione collaudârunt, quòd, pro religione, pietate, orbis terrarum salute, sæculorum omnium securitate, res humanis majores confecissent, Numenque in eis haud

dubiè eluceret, quorum divinâ incredibilique virtute res sacræ incrementa, Latinum nomen pristinum decus, Sancta Terra, cultum civis regisque sui Christi, recuperâssent.

*Ex PAULI ÆMILII de rebus gestis Francorum lib. IV:*

Siége et prise de Constantinople par les Français et les Vénitiens.

Post relatam de Alexi sene victoriam, primâ luce vulgatâ tyranni fugâ, oppidani Isacium e custodiâ educum adorant: vitam ei victoriamque acclamant; portas patefaciunt; nostros græcæ majestatis vindices servatoresque salutant. Alexin adolescentulum sibi adorandum exhiberi darique a Francis suppliciter exposcunt. Itâ cæde direptioneque opulentissimæ urbis temperatum; liberatus Isacius; filius restitutus; novumque Francis sociisque decus partum. Senex augustus quantas maximas potuit gratias egit nostris, « Quod, eorum fide » ac virtute, universa Græcia tyrannidis jugo exempta » esset; sibi, cum lux non posset, vita, libertas, patria, » imperium, filius restitutus esset, et ipse filio: quod » arma in Mahumetem sumpta pro se gessissent, causam- » que suam, causam religionis esse voluissent. Nullam » gratiam referri, nulla præmia excogitari, nullos honores haberi tantis in se suosque meritis pares posse. » Tam pii filii pacta sibi rata sanctaque esse: quidquid » ille nostris, domesticæ majestatis gratiâ recuperandæ, » spopondisset, id pactum receptumque velle; ac, si » quid addi posset, omnia se cumulatiùs præstiturum. »

Cæsar memor gratusque imprimis agitabat consilia quânam ratione persolvi fides posset: utque cives libertati dicto parerent, pecuniamque conferrent, quæ fœdere filii debebatur, Franci in castra ante urbem locata, Veneti ad naves se recepêre. Collatio ingentis pecuniæ gravis ingrataque Græcis erat, solitis exigere, non pen-

dere. Isacius creditur ex arctâ tetrâque custodiâ perpetuâque mortis expectatione in solium revocatus, repentinam vitæ mutationem non tulisse: hæc an occultiore causâ decessit. Nec diù patri superstes erit filius. Fremebant cives « indignum facinus esse, Græcorum imperium oppigneratum ac potius addictum esse a puero » avaræ superbæque genti, Græciam auro spoliari; jam » Cretam, tantam insulam, in medio mari sitam, Latinis » dono datam; Constantinopolim, græcamque Ecclesiam, » a pontifice Romano sacra jura petere jussam, subesse » ac servire veteri urbi Romæ, undè semel felicibus » auspiciis emigratum sit; insigniaque ac jus imperii a » magno Constantino translata. »

Hæc pro se quisque: hæc in circulis, hæc plebs, hæc optimates, principes conquerebantur. Tumultus exoritur: ad arma discurritur. Ad ædes regias multitudinis consternatæ impetus fit, manibus minimè temperaturæ: pestem adolescenti Cæsari minitabantur. Subitus ei casus, necessitasque in re trepidâ consilium attulisse visa: se e superiore ædium parte ostendit: testatur se suorum in civium potestate fore: nihil nisi illis auctoribus acturum: eos ætatis pectorisque sui moderatores futuros. Conticuit in præsentia tumultus: mox æstuaræ Cæsar cœpit, ancepsque ferri. Utrisque satisfacere non poterat: alteris fides servanda; alteri offendendi; medium tertiumque consilium nullum. Fidem, quam Latinis dederat, sanctiorem ac potiozem duxit.

Misit ad Ferratensem, ut proximâ nocte de tertiâ vigiliâ copias in urbem inducat: portam quæ regiis ædibus proxima sit, per fidos sibi homines illi reseratum iri. Id clam non fuit. Sensit consilium Alexis cognomine Myrtillus, quem Muzuphlum alii appellant, Cæsareæ stirpis vir, et imperii cupidus. Nocte jam imminente, par priori tumultus exoritur, submissis dispositisque a Myrtilo, qui eum motum concirent: mox ipse in vulgus prodit, con-



cionemque habuit, « Miseratus publicam Græcorum fortunam, qui regerentur arbitrio infirmæ ætatis; quæ, quò Latinorum cupiditas ferret, præceps ageretur. Oportere regiam urbem, quandoquidem a quibus minimè deceret proderetur, venumque daretur, ac pessum iret, ipsam sibi consulere. Viro patriæ suorumque amantissimo opus esse, antequàm quidquid Græci nominis reliquum esset, occideret. »

Tunc, diversis clamoribus sublatis, alii eum ducem rei publicæ constituendæ, alii rei militaris magistrum, alii Cæsarem salutabant. Hæc acclamatio superavit, in eamque sententiam itum tandem undique est. Ità Cæsar salutat, consilium cepit classis Venetæ improvisò assumendæ ut spem com meatûs salutisque Francis demeret. Sedecim suarum naves, plenas tædâ, sulphure, stupâ, piceque, et omni genere rerum quibus flamma alitur excitaturque, vento fortè ad id ferente, repentè subjecto igne, immisit. Veneti altum celerrimè petiverunt: et turpe fuisset totmaritimis præliis exercitos non præparâsse animos, iisque artibus instruxisse classem, quibus incendia possent arceri. Vanus igitur cecidit Græcorum conatus: et quia initia parùm feliciter evenirent, subsequi sunt a Myrtilo legati, qui eum dicerent hujus fraudis participem non esse; culpam omnem penes imperitam multitudinem; se amicitiam societatemque petere; Latinosque pecuniâ, com meatu, copiis adjuturum bello in Saracenos Turcasque gerendo.

Rejecti sunt a Francis ad Venetos. Dandulus respondit: « Tunc crediturum se vana non afferri, cùm Alexis Isacii filius, quem nostri restituissent, fidem daret, ac pro multitudine, in quam crimen intenderent, deprecaretur. » Id magis incitavit Myrtilum ad tollendum adolescentulum, ne vulgus, impetrandæ pacis spe, illum e periculo eximeret, rursusque adoraret. Jam enim efferebantur voces, rem duriorẽ quàm fuisset factam,

remediaque malorum qualiacunque quærenda. Ei igitur manu suâ in latebris, quò se receperat, spiritum oppressis faucibus interclusit, famamque emisit eum sibi mortem laqueo conscivisse.

Veneti frustrâ dolo petiti fuerant. Francos religione simul armisque aggredi placuit. Robur totius urbis, et procures juventutis armat, et oratione acuit: « Tutaren-  
» tur patriam, universam Græciam, monumenta paren-  
» tum, majorum gloriam, decus præsens, spem futuro-  
» rum, habentes in conspectu mœnia, intra quæ geniti  
» natique in expectationem maximarum rerum fuissent;  
» templa, uxores, liberos: horum omnium misereren-  
» tur; ne reciderent in tam fœdam servitutem, ut millies  
» emori præstaret. » Ità incensis militibus, Virginis  
signum præferre sacerdotes, insignibus suis velatos, jussit:  
subsequi armatas copias, et iu hostes ruere. Impetus eos  
tulit in stationes, quæ pro castris erant, quâ parte Bal-  
duinus tetenderat.

Fuit initio certamen anceps; deinde cùm omni parte  
castrorum conclamatum esset ad arma, et undique con-  
cursus in hostem factus, Græci fusi, fugati, in urbem  
compulsi: Virgo in potestatem venit. Signo quasi fatali  
imperii capto, ac velut evocatâ divâ regiæ urbis præside,  
mœnibus se Myrtilus continuit. Nostrorum animis novâ  
re accensis, arctiori ac sanctiori fœdere Veneti Francique  
junguntur, ut communi animo consilioque bellum gere-  
retur; cùm debellatum esset, quæ in potestatem venis-  
sent, ut inter fortes fidosque socios, dividerentur. Duode-  
septuaginta dies urbs acriter oppugnata est. Non inter-  
diù, non noctu quies dabatur; alii aliis in orbem succe-  
debant. Franci a terrâ, Veneti a mari premunt. Hi binas  
naves, in quibus turres propugnaculis urbis excelsiores  
excitarent, jungebant, demptis interioribus remorum  
ordinibus, ut superstantes perspectæ virtutis milites, tela  
ignesque in muros propugnaculaque hostium conjicerent.

Leç. lat. mod.

6

Dandulus miram virtutem præstitit. Ignemissili tecta urbis aliquot incendit, eaque partem insanam trepidationem iniecit. In turrim quoque propinquam, jam propugnatoribus obrutis, telorum vievasurus videbatur, cum Myrtilus subsidio accurrit, rursusque ancipiti Marte ibi dimicabatur. Francus a terrâ rem fortissimè gessit; priùs [cum fossis, cum aggeribus, cum substructionibus, quàm cum muris pugnandum ei fuit : omnia aspera ei objecta : ingens labor desudandus. Ea pars, quòd ad ædes regias ædemque almæ Sophiæ spectat, et aditus a continenti suspectior atque hostibus opportunior, magisque expositus videbatur, maximis munitionibus septa erat. Ferum, vires, audacia, animi obstinatio perripuit, perfregit omnia, evasit. Jam turrim occupârat Francus, quæ *Angeli* dicebatur, quòd ibi nuncii cœlestis signum situm erat. Ferunt Myrtilo datam dictionem, Byzantium non posse nisi per *Angelum* capi. Ubi igitur *Angeli* turri potitos Francos vidit, de se actum ratus : cum nox immineret, Francis in unam portam versis, per aversissimam elapsus est ; et utrinque hosti via data.

E vestigio sacerdotes omnes cum sacris crucibus, sacrisque amictibus supplices victoribus occurrere, adque militum, et maximè ducum pedes procubuère obsecrantes « ut meminissent rerum humanarum : victoriam, » gloriam, imperium, nominis immortalitatem peterent, haberent : cæde, incendiis, direptione, temperarent : homines hominibus, viri fortes nequaquàm paribus, sed viris tamen parcerent : stantem integramque quàm eversam inanemque urbem mallent. Eam fuisse Græcorum regiam, nunc esse Latinorum : et jam non alienæ, sed suæ consulturos illos. Auctores amentię Alexin senem Myrtilumque furoris pœnas fugâ exilioque dare : innoxie infelieisque multitudinis, aliâ super aliam parricidarum tyrannide oppressæ, misericordiâ eos caperet : id se per passum Dominum

» Deumque ; per mactatum , per sepultum ; per resur-  
 » gentem , per eundem , virorum fortissimorum , victoriâ  
 » clementissimè utentium mansuetudini opima multi-  
 » pliciaque præmia et cumulatissimam gratiam relatu-  
 » rum , orare , obsecrare ; obtestari , ignoscerent , parce-  
 » rent , veniam darent : mitissimorum dominorum ,  
 » patronorum , parentum animos induerent , gererent ,  
 » et lácrymis cognoscerent animorum habitum. Hæc  
 » regia , hæc augustissima templa , hæ sanctorum reli-  
 » quia vobis supplicant , pedibus vestris advolvuntur. »

Duces voce præconis pronunciaverunt , captis oppor-  
 tunis urbis locis placere continuò templa peti , Deoque  
 optimo maximo gratias agi , velut victoriâ de tantâ urbe  
 divinitùs datâ. Hoc temporis spatium et nox opprimens  
 miseris plus quàm misericordia precesque profuère.  
 Anno salutis millesimo ducentesimo quarto pridie idus  
 aprilis Byzantium receptum.

*Ex PAULI ÆMILII Histor. lib. vi.*

#### Prise de Breda.

**BREDÆ** in Hollandiæ confinio positæ , septemdecimque  
 vicis imperitanti , Nassavia domus , cujus in ditionem  
 cesserat , munimenta fossasque addidit et nobilissimam  
 arcem præsidio simul et ostentui. Belli usus novissimis  
 temporibus propugnacula , cæteraque arcendis hostibus ,  
 et a difficili expugnatione gloriam adjecerat. Dolum , quo  
 capi posset , nauta monstravit. Heraugerius , Cameracensis  
 centurio , re æstimatâ cum principe Mauritio , cepit au-  
 dendi consilium , Lambertumque Charlium , strenuum  
 militem , adoptavit in facinoris societatem. Navis assumpta  
 fraudi , quæ solita partes inter commeare fide publicâ ,  
 ut alimenta ignium Bredam conveheret. Limus Hollan-  
 diæ paludibus editur , qui , postquàm solibus inaruit , scis-  
 sus in cespitem , ligni præstat usum. Nam bitumini sulphu-

rique par ingenium efficit inclusus terræ calor, quem, ut alibi montium incendia, ita hic prorumpentes interdum flammæ prodiderunt; nisi prostratæ olim silvæ, impulsu maris ac turbinum, postquàm super inductâ humo putruère, mutatâ facie naturam retinent.

Imponitur carinæ oblongæ lecta e cohortibus et prompta in periculum juvenus, numero septuaginta, quos tenui interjectu tegerent cespites, dissimularentque. Diù parùm favit fortuna audaciæ, ut solent ejusmodi conatus malis onerari, etiam quæ non metuantur. Adversa vis venti, et, quanquàm exitu hiemis, asperum frigus, mox defectus ciborum, quos morâ consumpserant, prima tempora abstulère. Ubi refoverant corpora, et animos Heraugerius sermone firmavit, misso ad Mauritium nuntio, qui proximam apud insulam militem occultabat, haud procul Bredâ repetitum iter. Intra aquæ septum, quod arcem prope est, pervectos, undè regressus non erat, nova calamitas terruit. Nam recessu fluminis afflictus vado alveus, sive glacies pertudit, oppleri undis cœperat. Ibi inclusi trepidare, ac detestari infelices latebras, madentes genuum tenùs, donec æstu levata navis nullâ humanâ ope perfluere ultrò desiit. Explorandi curam, quasi ex usu magis disciplinæ, quàm quòd necesse arbitrarentur, præsidii rectores ad minora quisque officia relegaverant. Multorum per socordiam ad manipularem rejectum munus, qui, securus exemplo jubentium, puppe leniter pertentatâ, nihil ultrâ scrutatus est. Et fortè evenerat, quod vix aliàs, ut tussim frigus nemini excuteret. Memoranda imprimis vox militis, qui præmetuens ne spiritu prorumpente secum cæteros proderet: « Occidite me, inquit, commilitones, » ne occidamur.» Ipsi navem præsidarii in arcem traxère, quòd non satis soluta glacies aquas attineret. Indè alia rursùs incommoda, quippe admotum propiùs periculum formidinem expresserat, et in Heraugerium querelas, ut alieni pariter sanguinis ac sui prodigum. Pars, omni pro-

jectâ spe salutis, tenebras non morari, sed quandò, moriendum esset, apertum cœlum, et hostem, in quem erumperent, poscere, ne in illo suo carcere oppressi ad supplicia traherentur: torpere plures, nec tam ducis hortamenta ad virtutem et gloriam, quàm desperatio compulit cœptum exsequi. Ejecta pars oneris, neque ultrâ levata navis, ne insidias nudaret, solertiâ nautæ lassitudinem simulantis; cui et vox et vultus miram animi præsentis firmitatem præferebant.

Media ferè nox erat, neque illunis, cùm educere visum milites admonitos priùs ad decus ac præmia victoriæ, desertoribus verò animosi facinoris non vitam, ne mortem quidem honestam dari. Haustu sentinæ aversæ hostium aures; ità exiêre, utmirum est, inobservati excubitoribus. Pars militum prætergressi armamentarium, obvios vigillum, dehinc custodes portæ, quâ in oppidum itur, intra stationem obtruncant: nisi quòd ausus prorumpere significer, et infesto mucrone Heraugerium petens, morte haud ignavâ procubuit. At Charlius, cui attributa erat manus altera, præsidium hostile in arcis intima compulit. Aquæ ædes ambiunt; has in spem novissimam retinebat Paulus Antonius Lanzavecchia, vice patris Bredam regens, juvenis, et belli artium rudis. Ipsum Odoardum Gertrudisbergæ, tres leucas distantis, munitio et creditus illuc copias trahere Mauritius detinebat: quippe submissi specie exploratorum, qui, falso metu vulgato, verum averterent. Nec levis error Alexandri Parmensis, qui unâ duo oppida servanda commiserat, cùm vix singulis singuli sufficiant, et benè meritis alia sint sine periculo præmia. Sed Paulus, si fortè exiguam adhuc manum prælio exturbaret, denso militum cuneo (sex et triginta adsumpserat), egressus ponte hostem irruit. Vicêrequibus vinci non licebat: multâque cæde saucius ipse, quâ venerat, refugit. E xaudiri interea per urbem pugnantium tumultus cœperat, et oppidani portas arcis irrumpere;

nî Heraugerii miles proximâ e porticu glandibus arceret. Tandem accepto rei benè gestæ signo, adest Hohenloius cum parte Mauritiani exercitûs, qui speculabundi non procul substiterant. Cùm portum glacies obstrueret, septum e palis transiêre: nec distulit Lanzavecchia, dedito quod arcis retinebat, incolumitatem pacisci. Secutus confestim Mauritius, et major exercitûs altera pars, pedes turmæque, per arcis portas impressionem minabantur. Sed pavida civitas, et præsidio nudata, bimestri stipendio direptionem redemit: namque Itali, queis commissa oppidi tutela (erant hi peditum centuriæ sex, turma una), quorum officium fuerat, aut pontem arci oppidoque medium abrumpere, aut aversas ab hoste tenere portas, ad armorum ex arce sonum exterriti, atque jam pridem inter se discordes, eò faciliùs in fugam consenserant. Victor ingressus paternos penates Mauritius populum accepit in fidem ac ditionem, tum Heraugerium præfecturâ oppidi, cæteros deinceps honoribus et præmiis auxit.

Hugonis GROTHII *Historiarum de Rebus Belgicis* lib. XI.

Prise d'Amiens.

FERDINANDUS Tellius Portocarrera Durlanium Hispano regebat, quo oppido haud ità longè Ambianum abest, Picardiæ caput, urbs inter Galliæ maximas, opum potens, belloque tum et commeatibus opportuna, allabente amne, cui vetus Samaræ nomen. Parebat Henrico civitas, sed excluso præsidio; commissâque magistratibus custodiâ, per speciem privilegiorum negligentius usurpans jus invisæ dominantibus et periculosæ apud hostem libertatis. Quæ postquàm Ferdinandus, exsulum monitu ac præcipuè monachi cujusdam, situmque locorum missis exploratoribus didicerat, milites ab Alberto accipit peragendaæ fraudi. Promptissimi duodevinginti dubiâ luce, cùm primùm ingressus patet, post alios alii mit-

tuntur, agresti specie, poma ferentes: pars et plastrum agebant onustum pabulo, quo portæ pensiles, abscissis; ut fit in periculo, retinaculis, adversus casum sustinerentur. Custodes aditûs occultis antè armis aut primâ e cæde raptis conficiuntur: celerique accursu eorum qui proximis urbi locis abditi subsederent, fit via insequenti agmini, quod pedites bis mille, sexcenti equites complebant. Fortè eo ipso temporis articulo (Quadragesima erat), quidam in sacrâ ad populum allocutione peccata ipsis sua exprobrans et rei ignarus, meritos dicebat ut in Hispanorum venirent potestatem; et venêre; nam valida quamvis et numerosa civitas, quatuordecim hand minùs hominum millibus habitata, non diù restitit, ambigûa in regem fide, an pavida ex priori securitate et imperii egens: quin et præfectus Sancti Pauli comes, audito tumultu, parte aliâ diffugerat. Rebus tutis auctum præsidium, corrupta flammis quæ contigua urbi erant, exarmati cives direptique, egregia in militem præda, sed et in ducem; quia Rex vim magnam machinarum omnemque belli apparatus paulò antè indiderat.

Hug. GROTII *Histor. de Bello Belgico* lib. VI.

Sélim détrône son père Bajazet.

**SCEPTRA** imperii Turcici tenebat Bajazites II, rebus gestis clarus et numerosâ prole succinctus, in quâ minimus natu Selymus erat, de quo hîc agitur. Sex ille fratres habebat, e quibus duo primævi suo fato obierunt; tertius paternâ vi: duo supererant ætate et jure imperii ante ipsum. Sed imperium tamen animo agitabat, et, ut perveniat, patrem impedimento futurum, e medio vult sublatum. Id variè tentavit, et primo colore aliquo pietatis. Mos Turcarum habet, filios principis in certo loco aut oppido claudere, nec eos finibus iis egredi, nisi permissu aut jussu patris. Id contra spes aut res novas institutum



videtur, et ne militibus aut populo misceantur, captentur aut capient. At Selymus fines istos audacter transiit, comites colligit et milites, et cum istâ manu ad patrem pergit. Miranti, et per legatos etiam expostulanti, « ecquid sibi vellet? patriæ leges, patris jussa sperneret? » quo fine aut quâ causâ? » ille refert: « Non pravâ » mente, sed pietate motum facere; et, Mahumetis » lege, cautum ut tertio quoque aut quarto anno filius » parentes inviseret: velle se parere, et parentis optimi manum osculari. » Bajaziti haud placitum, iterumque legatos et asperiora mandata mittit, quorum summa, referret pedem. Ille pergere nihilo segnius, et jam Hadrianopoli appropinquare, nixus, ut putabatur, occulto favore et gratiâ Genitzarorum, quos in partes traxerat. Erat in eâ ipsâ tunc urbe pater, qui fraudes aut vim metuens, et simul urbi dominæ timens Constantinopoli, ubi thesauri et regia gaza erat, illuc concitus pergit. Idem filius, et patrem in vico assequitur, qui Tzurulus: quid? ad manûs osculum? imò ad manûs consectionem, et suos instruit, et vim parat, patre contrâ, cum eò ventum videt, dirigente.

Pugna committitur, anceps et cum discrimine, majore etiam metu Bajazitis, qui haud sine causâ fidem suorum suspectam habebat, et Deum ac Mahumetem altâ voce invocabat, vindices patriæ et imperatoriæ majestatis. Audivit Deus, et fugit Selymus, vasis omnibus et impedimentis amissis, sed animum et impietatem relinet, ac Capham cum venisset, copias iterum colligit, et primâ hieme in Thraciam redit. Fiduciam enim Genitzari dabant, qui, in urbe tumultuati, Achmetis (is frater major erat) imperium aspernabantur, atque adeò legatos ejus qui tunc advenerant per ignominiam ejecerunt. Occultè ad Selymum etiam missi, ut appropinquaret: sese ceterâ executuros, et viam manu facturos ad solium. Sed Achmetes horum non ignarus, cum ipse quoque

juxta Constantinopolim venisset, et militum quidam operam ac fidem obtulissent, annuit; sed quod momentum aliorum inclinationi facturum erat, aurum præsens et amplioris stipendii spem non adjecit. Imò vocem jecit, liberam, sed intempestivam. Offendit et alienavit.

Jamque Selymus ad urbem venit, tentoria in pratis fixit. Cui obviàm factus Corcutes, frater alter, modesti ingenii, et sapientiæ, religionis studiis deditus, ut captus est gentis. Audito ejus adventu, Genitzari statim coeunt ac tumultuantur. Decem e suis ad Bassas (præfectos sic nominant) ablegant, qui postulent: Dominum et Sultanum Selymum esse: Bajazitem ætatis et virium imbecillum, tantæ moli sustinendæ imparem. Hoc ipsi edicerent, suaderentque volens faceret, quod vel nolens adigeretur, et cederet, aut cædi ipsi Bassæ expectarent. Sententiam omnium sic ferre. Hæc dicta, et prompti facere erant. Ergò timor Bassas incessit, et Bajaziti rem et discrimen exponunt. Generosus animus, et veteris laudis factorumque conscius, indignari, nihil indultum velle, arma et manus suorum spectare et implorare, sed abnuentium. Atque ibi primus Bassarum (Vizirium dicunt), Mustaphas: « Ergò supremum vale, inquit, impetrator; nam nos quidem morituri te alloquimur, haud » scio an morituum. Hoc animi tui decretum ultimum » nobis jam dicit. » Et minas militares addit. Movetur ille, et ipsos miseratur, atque infit: « Ergò certum iis » vitam nobis adimere, et huc ventum? » Mustaphas: « Huc ventum, quod ad nos attinet; de te Deus me- » liora....! sed, ut optima, spiculis tamen hastarum de » solio imperatorio scito te detrahendum. »

Senex videt ultimam esse necessitatem, et paulisper vocem compressam solvit: « Agite igitur, inquit, ad » filium ite, nuntiate rerum summam illi permitti. » Filius venit, pater excipit, vultu quidem lætus, et thesauros ei, atque alia imperii resignat. Tum et solium

conscondere jubet, sed recusantem et subdola modestiâ, pietatem solam, affectumque patris visendi præferentem. Iterum jubet, propinquo etiam periculo monitus, et minaces militum vultus vocesque audiens, aut videns. Annuit filius, sed in proximum diem conveniunt frequentes equites peditesque. Sedet pro tribunali, et imperii jurisque usurpandi causâ, unum e Genitzaris laqueo suspendi jubet: cæteris spe factâ benigni simul et fortis, dignique majoribus imperii. Cujus primum facinus, relegatio patris Dimotucum; et priusquàm perveniret, interitus veneno procuratus. Aiunt medicum ejus pretio corruptum id obtulisse, adamante minutatim confracto, et cibus immixto. Cui tamen operæ pretium mors fuit, et cæcis incisa, cum voce Selymi præviâ: *Veteri domino infidam, novo fidum non fore.*

Mox itum in alias cædes, et quinque fratrum filii occisi. Tum ipse frater Corcutes arcûs nervo strangulatus, cum eum e fugâ retrahi curâsset. Supererat Achmetes, primus fratrum, et societate Ægyptii etiam Sultani validus; sed falsis Genitzarorum litteris elicit, tanquàm fastidientium novelli et iniqui imperii. Prodiret modò, arma cum ipso in hunc sociaturis se daret. Prodiit, pugnavit; victus, suffocatus est, et solus jam certusque Selymus princeps, qui in Bassas et procures variè sævit, homo cædis totus et sanguinis, idem tamen fortunæ charus, et qui res maximas in suo imperio gessit, Persas vicit et repulit, Sultanium Ægypti sustulit, et amplum id regnum sibi posterisque firmum asseruit. Nihil etiam privatim adversum: et dormire cœlestis justitia videbatur, nisi quòd in extremo actu se ostendit, et peste correptum exstinxit ipso loco et vico, ubi prima cum patre signa contulisset.

E. J. LIPSII *Monitorum et Exemplorum politicorum Libro*, cap. v. 1630.

---

## TABLEAUX.

---

Cléopâtre remontant le Cydnus (1).

Ap placandum Antonium, qui in Ciliciâ erat, diluendumque objectum crimen quòd opem tulisset Cassiò, proficisci statuit Cleopatra, sed instructu astuque muliebri apparat permulta dona, quibus etiam sapientium animi conciliantur eaque eximia. Ipsa se ornat vestitu imprimis insigni et eleganti, quod quidem innatam adjuvaret pulchritudinem : tum Cydnum, lenissimum cursu fluvium, visuque clarissimum ingressa est, ut ad eum adiret, hâc pompâ. — Eburneam cymbam conscendit; magno ingenio atque arte elaboratam, cujus puppis ex auro; vela, quæ circum eam obtendebantur ad excipiendum ventum, e purpurâ : argenteam propellebant aquam remi et ipsi argentei, qui ad tibiæ fidiumque harmoniam attemperati agebantur. Ipsa sub conchyliato conopæo placidissimè recubabat, eo ornatu atque amictu quo pingebatur Venus. Aderant quiescenti hinc atque indè pueri, cum Amorum imagine atque ætate congruentes, qui subtilissimo flabello ventulum miro ordine faciebant. Ancillæ porrò formâ egregiâ, Nereidum habitu et Charitum, ad auratos rudentes et gubernacula se-

(1) Voyez tom. II, même sujet et Venus portée sur les flots.

debant : suaves interea spiritus, vel efflabantur ex odoribus incensis, vel afflabantur e floribus. Fiebat ex omni parte concursus hominum : complebantur ripæ, dum undique effusi omnes tantam rem tamque admirabilem suis oculis haurire cupiebant. Unus erat hic omnium sermo, Bacchum à Venere conveniri. Bacchum enim, honoris causâ, Antonius nominari se volebat ; et erat profectò, si numerare scyphos, quos mero plenos audacter ingurgitabat.

*E Franc. BENCII, Soc. J. oratione xxv, de compuratione Navis et Reipublicæ.*

Entrée triomphante de Charlemagne dans Rome.

**P**ER annum adventus Caroli in expectatione fuerat. Nunquam in urbe Româ, ne jura quidem terris dante, tantum exterorum mortalium fuit. Confluxerant ex reliquâ Italiâ, ex continentibus regionibus, ex propinquis, ex ulterioribus, ex longinquis, ex ultimis propè oris ad famam venturi Romam Caroli. Staturâ erat eminenti, corpore amplo, membris congruentibus, facie pulchrâ, canitie reverendâ, vultu majestatis pleno, universâ specie augustâ. Visuri erant eum cum pontifice maximo, in templo terrarum sanctissimo, in urbe terrarum parente, velut nihil majus in terris conspecturi.

Continens agmen per aliquot millia passuum ; variegates, dissonæ linguæ, multiplex ut oris, ita et vestis habitus. Edixit Leo, ut cum suæ quisque gentis hominibus conglobatim turmatimque regi occurrerent. Quicquid decorum magnificumque est usquam, proferebatur. Laudes Regis omnibus resonabant linguis. Duces sua quisque decora, dum Romæ totius orbis conventu concinerentur, terrarum omnium sermone celebrata cognoscebant, ac viventes gloriâ et posteritate perfruebantur. Nullo unquam tempore ab Urbe conditâ, neque res Romana liberior visa, neque pontificia dignitas augustior:

Cæsarum majestas jam et antè propè vilis ob res adversas; impiamque de imaginibus divorum sententiam, et tunc nulla, quòd nullo exemplo per aliquot jam annos mulier, Irena, mortuo marito Cæsare, sola imperaret, haudquàm Cæsareo sanguine orta. Itaque Romani proceres ipsi fremere, « solium Imperii, quasi Numine offerente, » regi Franco dandum, summis in religionem meritis id » debitum. Eum victoriarum gradibus ad id culmen » conscendisse, ut summus regum summum rerum humanarum titulum obtineat : diem quoque, locum, » annum, celebritatem mortalium id postulare. »

Octingentesimus salutis annus agebatur, et rem divinam Natali domini ac Dei nostri Leo in æde Petri faciens, ingenti assensu procerum, qui undique in urbem admiratione Caroli Francorumque convenerant, Carolum Augustum appellatum infulis ac cæteris Imperii insignibus exornat. Acclamavit populus : Carolo Augusto, divinitus coronato, magno et pacifico imperatori, vita et victoria. Cùm deindè templa circumiret, effusæ in publicum virgines matronæque ac pueri contineri non poterant quominus propius adire, salutare, contingere conarentur. Certatim ruebatur, crescebatque semper turba. Nummus procul sparsus in vulgus, et tandem multitudo divisa in areas ædesque sacras, ubi in conspectum se oculis omnium daturus erat, ac suū appellandi, dextræque contingendæ copiam facturus.

Roma et cæteræ Italiæ urbes incredibili lætitiâ affiebantur, quadringentesimo duodeseptuagesimo circiter anno, quàm insignia Imperii Romani in Thraciam delata fuerant, velut postliminio revertisse, summique nominis dandi jus in Italiam revocatum : et Carolus Italorum erga se pietati charitate respondebat, nec quicquam reliquum fecit, quo magis Italiam universam, singulasque ejus partes augere atque ornare posset. Proceres Italiæ, nobilitatemque coluit, communicare libertati ac multi-

tudini consuluit; ut leges dominarentur; probi mores; institutaque servarentur (1).

*Ex PAULI ÆMILII, de Rebus gestis Francorum lib. III.*

Prise du camp de Saladin par les Croisés.

**ASSIDENTIBUS** Ptolemaïdi Latinis, Saladinus, coacto numero exercitu, positisque haud procul castris, penuriam in dies auxerat, ut nec jam fames ferri posset. Milites, omni coitione factâ, omnia tentanda inter se fremunt : « Nihil inexpertum relinquendum; descendendum ad spem extremam; atque, id quod hostes minimè expectent, eorum castra oppugnanda; futurum in re inopinâtâ aliquod operæ pretium; nihil durius accidere posse, quàm, quod optabilius, ut potius ferro quàm fame, miserrimo genere mortis, occumbant; multas arces loco præsidioque invictas audendo conandoque in potestatem virorum fortium venisse; nullum acrius telum homini necessitate, per vicaciâque, ac desperatione datum. »

Hoc præceps erat consilium, nec duces inhibere impetum poterant; et, quandò ad id locorum ventum, ardori militari faces addunt; consilium probant, animum admirantur; nihil tanto pectorum robori inexpugnabile futurum; omnia tantæ consensioni alacritatique cessura. Ad triginta millia hominum conglobati erant. Ibant ut rabidi, ut furore perciti. Nihil medium vel in conatu emori, vel victores castra ingredi hostium in animum inducunt; id certum, id destinatum habent; id, cæteris abscissis, unum sibi proponunt. Feræ, non homines videri poterant.

Nec Barbarus ausus ità affectos ruentesque opperiri munimentisve fidere. Per aversam a nostris castrorum

(1) Voyez les *Leçons latines anciennes*, tom. I, *Tableaux*.

portam suos educit, relictis tentoriis, stantibus omnibus tabernaculis, omnibus plenis publicâ privatâque opulentiâ, et, quod maximè peti sciebat, commeatu. Unum venenum ad obruendos capiendosque improvidos deerat, vinum, quo Saraceni non utuntur. Vacua et aperta ingressi nostri hostium ignaviam increpitant: cibo avidè et in præteritum, et in præsens, et in futurum replentur. Vociferantibus ducibus cavendas callidissimi hostis insidias, ne repentè superveniens incautos opprimat, verâ solitaque fieri dicebantur; nec tamen avelli potuère, nisi prædâ onusti, quidam etiâ sarcinariis camelis impliciti, omnes incompositi.

Nihil optatius usu venire Barbaro potuit. Saladinus; id quod accidit, suspicione assecutus, longo, ut falleret, circuitu, exercitum compositissimum instructissimumque duxit in eum locum, undè in repetentes sua castra hostes repentè impetum facere posset, atque interclusos excipere. Nec vanum consilium cecidit. Regrediuntur graves victique jam cibo, qui jejuni ac fame propè enecti invicti fuissent. Redeunt onusti prædâ, non continenti agmine, sed dissipati. Nec ducibus ad signa revocantibus parènt, nisi qui, vel generis, vel factorum nobilitate, turpe sibi existimabant temeritati multitudinis imperitæ potiùs quàm auctoritati summorum virorum obtemperare.

Cæteros Barbarus frequentibus signis adortus cædem edere cœpit; et quia dispersati erant, nec simul omnes invadere poterat, minor clades accepta; pugna propè nulla fuit. Latinorum militum vulgus hæud facîle se et onere levare, et arma expedire; nec Barbarus coire patiebatur. Nobilitas cum certam pestem cerneret, antequàm cæde recenti calens feroxque victor castra posset aggredi, sese recepit. Cecidère hostium ferro, qui procerum suorum cœptis parere noluerunt.

PAULI ÆMILII, *de rebus gestis Francorum* lib. VI.



## Massacre des Juifs à Lisbonne.

LÆTITIAM, quam attulerat Regiæ domui natus Infans, tumultus Olisipone haud magnâ occasione concitatus vehementer conturbavit. In Divi Dominici æde sacrâ Christi à cruce pendentis effigies sculptilis visebatur, sinistri lateris vulnus vitro tegente. Die quodam, qui sacris operabantur, vitri splendorem fortè animadversum, per errorem miraculum putârunt cælo editum. Repugnavit unus quidam ex adstantium numero procacioribus verbis, quàm ejus conditio pateretur, quippe ex Judæorum genere ac sanguine. Plebs malitiam interpretata, ferox ut solet in ejusmodi rebus et præceps, injectis in miserum manibus, temploque abstractum interimit, ac repente subdito igne, pyrâ excitatâ, comburit. Quidam ex eo monasterio monachus vecordi oratione flammam furenti jam populo addidit, ut Christo ab eâ gente illatas omni tempore injurias vindicarent è loco superiori hortatur. Hæc singuli, hæc universi inconditis clamoribus vociferantur. Nulla res vehementiùs multitudinem inflammât, quàm religionis species, quamvis simulata et inanis. Ubi superstitione capta est, non ratione agitur, sed furore, alioqui impotens, sæva vecorsque. Acti ampliùs in furias populares quasi signo dato ejus nationis in ædes irruunt feroces formidabilesque, sibi quisque dux et adhortator. Crucem duo ejus ordinis monachi præferebant vexilli adinstar. Rabies populi in miserorum cæde bacchantis tribus diebus omninò tenuit: ex quanto tempore supra duo millia homines sunt occisi plerique innoxii, aliqui etiam ex diverso genere, per errorem aut ex simultate. Rebus turbatis, cùm omnes omnia audeant, minùs insignia sunt quæ singuli faciunt, cuncta pari violentiâ volvuntur. Belgæ et Germani è navibus, quæ in portu erant, concurrunt ad prædam participes futuri, aut

manu suâ direptis domibus, aut à promiscuâ plebe parvo redemptis spoliis. Rex ex eo commotus, ut par erat, animo ac vindicare certus, duos è proceribus destinat, qui quæstiones exercerent. Duo monachi, multitudinis concitatores, dictâ causâ mandati lege de sicariis, ignis supplicium extinctis fuit. De plerisque sontibus sumpta vindicta, sed carptim et singulis, in vulgi motu salutare remedium. Externi sublati velis evaserunt cum navibus copiâ miseræ gentis onustis. Sic frequenti ac numerosæ civitati tranquillitas rediit; tumultûs popularis ea medela exstitit, mali causis nihilo major.

MARIANA, *Hist. d'Espagne*, liv. XXVIII.

#### Mort de Pierre-le-Cruel.

VICTOR HENRICUS Montielem oppidum coronâ circumdat, nisi Petro capto, indè non discedere certus; formaceis parietibus circumvallata mœnia, ne exitus aliquâ parte pateret. Aquæ penuriâ in oppido laborari cœptum est, frumentique, à militum aliquo industriâ corrupti; his malis Petrus circumventus fugæ consilium capit. Erat Sanabria vir nobilis, Trastamaræ quidem natus, cæterum egregiâ in Petrum fide; hoc internuntio Clakinus (Duguesclin) tentatur, multis promissis oppidis, ducentisque aureorum millibus, si mutatâ fide Petro evadendi potestatem faceret. Excusat ille sempiternam perfidiæ maculam eo facto inuri; urgente Sanabriâ, spatium ad deliberandum sumpturum se ait; re cum fidissimo quoque communicatâ, visum est Henricum de re totâ monere; ille magnis pollicitis suadet, ut, spe fugæ hosti factâ, eum in suum hospitium eliciat: factum itâ. Petrus noctu aliquot comitibus stipatus, ut convenerat, venit in castra; spei aliquantum, metus amplior, cognitis verbis recens auctus (sic ferunt), quæ in præ-

Leç. lat. mod.

cipua hujus arcis turri inscripta erant : *Hæc est turris Stellæ*. Acceperat a vatibus, in ejus appellationis turri exitum astra portendere; sed ejus artis quanta sit vanitas, et post res affingi sæpè rumores non ignoramus. Illud prudentiùs; ex medico Judæo, qui nova imperia, multum gloriæ et felicitatis ex natali die ostendi Petro affirmaret, cum, rebus asperis ac desperatis, rogasset, ecquid vaticinii fides constaret? Subdidisse vatem aiunt : Cælo rigente, si quis in balneo lavet, sudaturum nihilo minus : astris studia vitæ, moresque potentiores esse indicans. Ergò, Petro rege in Clakini tentorium ingresso, ac de fugâ meditante, accurrit Henricus, primùmque, attonito similis, substitit. Facinoris magnitudine, credo, an quia inter se diù non viderant; fluctuantibus inter spem et timorem omnium qui aderant animis, monet Gallus, intentâ in tyrannum manu, eum hostem ipsius esse. « Petrus ego, inquit, ego sum. » Ad hæc, vulnus in faciem illi pugione ab Henrico inflictum est. Mox brachiis inter se colluctati, uterque humi prostratus est. Henricum, ut fama fert, Clakino juvante, substratumque volvente, multis vulneribus confectus est Petrus; tetrum planè spectaculum, regem, regumque progeniem in suomet sanguine volutari, a notho fratre cæsum; sed cujus funesta Hispaniæ vita fuerat, mors salutaris exstitit : gravique documento monstratum, nullis legionibus, opibus, potentiâ, tutam esse improbitatem; exemplum editum quod admirentur posteri, perpetuòque exhorreant, atque doceantur, principum scelera non invidiâ tantum præsentis et certo exitio vindicari, sed æternis etiam annalium monimentis et execratione, a quâ improborum manes nullo tempore conquiescent.

LE MÊME, *Hist. d'Espagne*, lib. xvii, cap. 13.

## Derniers momens de Louis XI.

DIGNUM est orbis terrarum spectaculum et humanæ fragilitatis scena amplissima rex potentissimus, quem Europa suspiceret, metueret Francia, qui terrori vel principibus foret, qui eos ad nutum caveis ferreis, angustis admodum, includebat, qui compactis in carcerem globos ferreos, immensi ponderis, appendebat ad pedes, qui laqueo et ferro tam multos sustulerat, ille, inquam, rex, vice nunc suâ, abjectus, trepidus, seque ultrò in carcerem atque in vincula mancipans, ut divinæ justitiæ reus pœnâ exemplo sit, offensionî qui culpâ fuerat. Biennio antequàm moritur, se Plessiaci ad Turones domo includit, voluptariis ædibus in carcerem versis; fossis septus clathrisque ferreis, ex ferro muricibus supra murum prætensis, et excubantibus diu noctuque in fossâ vigilibus, qui accedentes telis repellerent. Paucissimos in cubiculum admittit; excutuntur vestes accuratè, ne quis sicam occulat, pugionem aut cultrum; familiares etiam et affines suspectos habet, generum, filium filiamque perscrutantur custodes. Ab Calabriâ Franciscum accersit, Minimorum ordinis conditorem, virum sanctitate vitæ, miraculisque percelebrem; præsentem, flexis genibus, instar Numinis orat, sibi vitam ut proroget; ipsi omnia suoque ordini pollicetur: sacras reliquias ex Europâ totâ corrogatas vestibus inserit, iisque se in mortem communit; preces publicas toto regno ad avertendum aquilonem indicit, qui ventus ipsi erat incommodus; palatium redundat mulierculis, novas preces et nova vota insinuantibus. Se mancipem medico tradit, vili et arroganti in paucis; decies mille nummos in menstruum stipendium ingerit, ejusque ad nutum, imò ad contumelias se patienter accommodat, sacra omnia et profana

tentans, mortem ut a se depelleret. Verùm in eo sècessu, ne credatur jam ante obitum præsepultus, se vivum regno et Europæ promulgat; edicta et leges novas in dies cudit et recudit; magistratus abrogat atque instaurat; delectus militum haberi et machinas apparari jubet; loricas Mediolani emi plurimas curat; quæ in singulis regnis rara essent et pretiosa comparat; sumptuosè et magnificè indutus progreditur; morti per omnia volens illudere, quasi, qui omnes dissimulando hactenùs fefellisset, posset morti et fraudem facere.

P. DE BUSSIÈRES, *Historiæ Francicæ*, l. XIII.

#### Mort de Charles-Quint.

EXSEQUIARUM occasione, quas matri Carolus Quintus anniversarias persolverat, nova incessit animum cupido (si liceret) et suas celebrandi: reque communicatâ cum Joanne Regulâ ex Hieronymianâ familiâ, qui conscientiam ejus moderabatur, cùm is insolitum quidem et inauditum, pium tamen ac salutare dixisset, apparari funus sibi quamprimùm jussit. Ergò excitatur in templo inanis tumuli moles, funalibus illuminatur, atrati circumstant famuli, funebre sacrum lugubri monachorum cantu peragitur. Ipse funeri superstes suo, spectabat in ficto illo munere veras suorum lacrymas: audiebat exsequiale carmen, placidam sibi quietem beatas inter sedes adprecantium, eademque ipse sibi suffragia psallentibus immistus exposcebat. Donec sacra peragenti propior factus, eique tradens quam gestabat accensam facem, sublatis in cœlum oculis: « Ego te, inquit, summe vitæ » ac mortis Arbiter, oro et obtestor, ut, quemadmodum » oblatum hunc a me cereum sacerdos capit, sic com- » mendatam in manus tuas hanc animam tu, quandò- » cunque libuerit tibi, in sinum complexusque tuos be-

» nignè suscipias ! » Tunc, ut erat pullâ fluxâque veste opertus, humi procubuit, renovatisque omnium qui aderant fletibus, quasi depositus, supremâ lamentatione comploratus est. Atque hoc videlicèt rudimento Carolus vicinæ jam morti proludebat. Namque altero ab exsequiis die, febri correptus, eâque paulatim exedente consumptus, Toletano antistite procurante quæ, christiano ritu, luctanti animæ suppeditantur adjumenta, monachisque, qui frequentes e cœnobio circumstabant, abeunti hospiti expeditum iter in cœtus piorum comprecantibus, excessit.

FAMIANI STRADÆ, *de Bello Belgico*, decadis primæ, lib. I.

Henri II blessé à mort dans un tournoi.

NUPTIARUM hilaria nunquàm profectò Gallia peregit funestiori catastrophe. Inter alios apparatus, equestris decursio indicta est (hastiludium vocant); atrox enimverò voluptas, speciosumque periculum : quo nec ludere credas, qui sic præliantur; nec præliari, qui demùm ludent. Gratum tamen Gallis ingenuumque spectaculum; quippe audenti bellicæque nationi. Jamque hippodromo in theatri speciem superbè constructo, ac flore hastatorum equitum referto (namque ad hujusmodi ludos totius Europæ hastas Gallia provocaverat), uno alteroque die rex ipse decurrerat palmari semper laude, eoque gloriosior, dùm postridiè, repetito tertium campo, contra suorum preces, cum prætorianæ cohortis præfecto, galeâ præproperè non satis occlusâ, congregitur, ab adversæ hastæ fragmento apertam bucculam irrumpente, transosso dextero oculo, ictoque indè cerebro, inspecantibus reginis, regiisque liberis infelicem ludum, illicò exanimatur, exceptusque accurrentium manibus, totus

sanguine perpluens, theatrum illud, quod modò lætissimis plaudentium vocibus implebat, subitâ conversione publicum in luctum ac lamenta mutavit. Quintoque post die, princeps juxtâ bellicosus ac pius, dignus utique fato meliore, decessit. Simul ante oculos infinitæ multitudinis, quam ipse ad funus videlicet suum ambitiosè convocaverat, ad vivum egit, extra scenam et fabulam, humanæ tragœdiam felicitatis.

STRADA. *Decas prima*, lib. I.

#### Retour de Marie Stuart en Ecosse.

FAMÂ de Reginæ adventu passim divulgatâ, quidquid erat nobilitatis, ex omnibus regni partibus statim accurrit, partim velut ad spectaculum publicum, partim ut reditum gratularentur. Convenerant et nonnulli, ut officia sua erga absentem commemorarent, gratiamque ejus statim occuparent, aut inimicorum calumniis occurrerent: non pauci, ut ex initio novi regni, auspicium de rebus futuris captaient.

In his tam variis animorum motibus, omnes ex æquo suam Reginam videre cupiebant, post tam diversos utriusque fortunæ eventus, velut ex insperato, sibi oblatam: ut quæ, sævissimas inter bellorum tempestates, patre, intra sextum quàm nata erat diem, orba, matris quidem lectissimæ femine summâ diligentia educata; sed inter domesticas seditiones et externa bella eorum qui plus possent prædæ relictâ, et antequàm sensum habere maiorum posset, omnibus fortunæ sævientis exposita periculis; et, patriâ relictâ, velut in exilium relegata, inter hostium arma et fluctuum violentiam, ægrè servata: ibi quidem, fortunâ paululùm blandiente, matrimonio quidem illustri aucta; sed velut ostentato magis quàm exhibito gaudio, extinctis matre viroque, in luctum et orbi-

tatem rejecta, novo quod acceperat regno amisso, veterem propè incerto.

Commendabatur etiam, præter discriminum varietatem, excellentis formæ bonitate, et maturescentis ævi vigore, et ingenii elegantia : quam vel auxerat, vel certè falsis virtutum coloribus gratiorem fecerat aulica educatio, minimè quidem illa sincerè, sed ad quamdam honesti similitudinem adumbrata ; et quæ naturæ bonitatem studio et placendi curâ deteriore faceret, et virtutum semina delinimentis voluptatum retunderet, quominus ad maturos fructus pervenirent. Hæc ut in vulgus grata erant, ita perspicaciores minimè fallebant ; sed mollis adhuc et flexibilis ætas rerum usu putabatur facilè corrigi posse.

G. BUCHANANI, *Rerum Scotticarum*, lib. XVII.

Retour du grand Condé à la Cour et à Paris.

IN Condæo nihil demissum, nihil tumidum aut in rebus novis novum ; mens ab exilio et a reatu ad maiestatem repente transierat. Læta omnia et affluentia : concurrentes et in adulationem effusos allocutus, extemporalis facundiâ, quidquid diceret aut ageret, etsi sine arte, adstantium aures et oculos juvabat. Cæterum, ut militare nomen grave apud aulicos otiosos, quò aliis id virtutibus temperaret, tranquillitatem atque otium palàm professus est. Vidisses subitâ luce vultus illustres, tam brevi discussâ tot præteritorum caligine. Tantum potuit ille sanguinis, ille rerum gestarum splendor, et quod superest, nihil arduum Condæi fatis. Qui in opere, in agmine, gregario militi nuper in Belgio mixtus, incorrupto ducis honore, Lutetiæ comitate et alloquiis provocat officia magnatum. Certantibus studiis augebat famam ipsius Condæi ingenium, quantæcunque fortunæ capax ; decor oris cum



quâdam majestate, prosperæ res, inclinatis in eum animis, et loco omnium ejus fortuna; evasisse tot imminentia, redditum penatibus, auctum gloriâ. Cernere erat ædes principis a primâ luce in multam noctem undare populis, intrare visendi cupidos, beatos remeare, non satiari vultu, admirari eamdem virtutem quam nuper oderant; gravibus curis frenatos juveniles animos, et relaxatos olim, mutatos in melius mores: ac medio quanquàm in spatio integræ ætatis ad gloriam longissimum ævum peregissee narrabatur.

*E* Benj. PRIOLI, *de Rebus Gallicis*, lib. I.

#### Régence d'Anne d'Autriche.

**EUROPA** mirabunda talem spectabat rerum nostrarum statum: nihil felicitati nostræ deerat, præter moderationem et fruendi artem. Principes nostri concordēs, Reginæ nutus venerari; quæconsiliis Mazzarini fulta, ita habenas temperabat publici fati, ut, florente regno, domi militiæque omnia feliciter et ad invidiam succederent. Illa acerba nupserat; et habita severè, juxtâ gratiam aut fastidium viri perpessa mulier sanctitate morum ad priscum morem, Regina fortis et invicta malis, judicio maxima, simulandi et dissimulandi perita, in rebus novis nihil novum ostendit. Decretum strenuè natos et regnum tueri. Interim invalidâ ætate Regis, non irritare principes, res apud eos alternare prudenti trutinâ. Etiam recens a dolore, hæc jacere: imperium Gallicum exercitus fidi defendent; hunc, Regem demonstrans, sua majestas..... Domus regia aliena malis quæ per aulam plurima serpunt. Pueritia Regis præceptis et monitis Mazzarini adolescebat, cui et admotus, tenens secundas, Villaregius nostrarum rerum gnarus, aulæ peritus, ingruentium dominationum prævisor solers.

Nostri magnates toti intenti quid corraderent, aut expiscarentur, antequàm Rex adultus compesceret male-  
sanas cupiditates. Hoc habent in more positum Galli, ut  
ignavos se arbitrentur et rerum suarum incuriosos, nî  
aliquid reportent a novo principe, ex quo hauriendum  
tanquàm ex torrente non semper casuro; præsertim ob  
ministri peregrinitatem, cui se illudere posse fidenter  
rebantur. Etiam multi privati petaces. Mazzarinus, prout  
cujusque studium flagrabat, præbere, neque sumptui  
parcere, dùm obnoxios fidosque Reginæ faceret, quem-  
cumque posset tunc largiendo parabat. Interim ærarium  
a palatinis hirudinibus expilari.

*Idem*, lib. I, 1669.

### La Fronde.

INCUBUERAT huic imperio fatalis quædam calamitas;  
et improvidas hominum mentes ita occupaverat, ut tan-  
quàm si offusa Galliæ sempiterna nox esset, ruerent  
omnes in tenebris, et optimus quisque, non spe, non  
cupidine, non scelere aliquo incitatus, sed nescio quo  
fato, vel ignoratione, vel metu lapsus, aut etiam specie  
quâdam publicæ rei, et officii opinione delusus, aber-  
raret. Nemo non illæsam majestatem principis, nemo  
non integram Reginæ auctoritatem, nemo non salvam rei  
publicæ navem cupiebat: sed partim consilia, partim  
studia a communi utilitate discedebant. Interea subibat  
animos parùm cautos mala quædam adversùs eminentes  
fortunas interpretatio, et grata dulcedo maledicendi.  
Sed ista primùm clàm et timidè, et intra invidiæ modum;  
deinde voces, coitiones, minæ; postremò arma et furor.  
Nunquàm Gallia magis in ambiguo fuit.

In ipsis regni visceribus delicatâ principum ambitione  
abutentes homines: non ii quidem improbi, non flagi-

tiosi, non stolidè turbulenti, non qui sua vulnera rei-publicæ vulneribus curari vellent, et afflictâ patriâ florere, aut eversâ imperare : sed homines genere, dignitate, ingenio, famâ, suisque virtutibus tantùm metuendi : pertæsi rerum præsentium, ardentes, inquieti, impatientes otii, carentes ægrè degustatâ semel gubernandi regendique vel spe, vel dulcedine, amantes publicæ rei, nec suæ negligentes; professi fidem in Regem, eundemque per alienum latus infideliter appetentes; voluntate amici, necessitate hostes; obsequentes singuli, universi contumaces.

Quid Rex interim? quid Regina? dicam dolenter potiùs quàm contumeliosè. Neglecta Regis pueri tenera majestas; spretum Augustæ nomen; aula incerta, fluctuans; nihil agens, omnia patiens; indulgens in sceleribus, quibus resistere non audebat; connivens in perduellione, quam punire non poterat; blandiens audaciæ, quam timebat; cedens tempori, obnoxia injuriæ, nemini metuenda, neminem non metuens.

*Ex Marci Antonii HERŒAN Oratione habitâ in funere  
Michaelis Tellerii, Galliarum cancellarii.*

#### Révolutions de la Langue française.

ACCEPIMUS veteres Gallos, majores nostros, simplices et candidos fuisse; sed feros, sed agrestes, et ab humaniorum gentium cultu non minùs remotos quàm a vitiis; utpotè ad quos ea, quæ mentes effeminant, nondùm pervenerant. Nonne in illâ, quâ tunc utebantur, linguâ simplici et inconditâ, hanc ipsorum imaginem fidelius et significantius, quàm in tabulis, si quæ supersunt, et statuis expressam deprehendimus? Equidem quoties in scripta temporum illorum incido, videre mihi videor masculam rusticorum militum prolem, dolos facere et

perferre nesciam, patientem omnium laborum, impatientissimam omnium injuriæ, contentam facili victu, et aut curvo ligone versantem agros, aut ære et armis totam rigentem. Intueor matronas graves, perustas sole, robustis infantibus ubera potanda porrigentes, et villosa marito, ex aratione et præliorum feritate horrido ipsas sæpè horridiores. Hanc ad vivum pictam effigiem genus eorum dicendi asperum, durum, forte, nobis exhibet; qualis eorum vita, talis lingua.

Postquàm excoli morum acerbitas mitigarique cœpit, oratio, fida morum imitatrix, exulta simul est, et ad civiliorem vivendi modum civilior et ipsa sensim se conformavit. Rubiginem abstersit nitor. Mundities accersita, quæ sordes amoveret, operosâ concinnitate non offenderet. Cincinni adhibiti, sed verecundi. Ars et diligentia placuit, citra fucum tamen et anxietatem. Quid multa? In oratione, ut in reliquis rebus, supellectilem agnovisses non luxuriosæ ætatis, sed abundantis. Quæ orationis ornamenta unâ cum ornamentis morum advecta sunt; utraque cunctanter et lentè, quoniam incrementa omnis bonæ rei non nisi pigrè exeunt, citò festinatur in damnum.

Et verò intra laudabilis elegantiae modestiam non diù stetere mores, sed statim ex diligente cultu in delicias lapsi sunt, quibus lascivire hoc sæculum utinàm falsò diceretur! At quandò immoderatio luxus? quandò in nugis effusior? Convertamus oculos in insanas substructiones, quæ laxitatem occupant agrorum, et jugera colonos pauca vix relinquunt. Parùm nobis beati videmur si nitidâ supellectili instruxerimus domos, nisi crystallis radiant parietes; et laquearia auro et argento, non dicam distinguantur, sed propè inquinantur. Vestes ut sunt pretiosissimæ, non tam in hoc comparatas dixeris, ut corpus tegant, quàm ut patrimonia devorent. Delicatum somnum præterquàm in ostro et conchyliatis stragulis

collocare piget; nec minùs circa cœnas fastidium. Ambitiosâ fame laboratur; usitatos saporos respuit palati superbia. Vix verba suppetunt appellandis condimentis, quæ voluptas artis magistra excogitat, omnique avium et piscium exquisitissimo genere mensas insternit terræ marisque luxuria prædatrix.

Pertinuit ad eloquentiam tanti mali contagio, et, ut animi, sic ingenia in delicias se ac lasciviam pari impetu dederunt. Dictio concinnior quidem, quàm apud veteres, et longè tersior: sed nimîâ limâ et subtilitatis affectatione adeò gracilis, et, si ità loqui fas est, macilenta, ut magnâ ex parte nervos, succumque, et sanguinem, et ossa desideret. Voces non electæ, sed captatæ; rarò consulentes animis, semper indulgentes auribus. Decoris non illius nativi, sed a pigmentis petiti consecratio sollicita. Mulierculam dicas, quæ, mundo suo explicato, vultum exigat ad speculum, omnesque formæ veneres, omnia lenocinia curiosè venetur.

Neque dictionis structura, quàm ipsa dictio, modestior: paria paribus relata, conclusiones argutulæ, soni minuti et leves, membrorum festiva distributio æqualibus intervallis distantium; hæc et similia sic expetuntur a plerisque, ut in his totum eloquentiæ verti putes, volvique principatum. Sententiam claudere nefas, quæ non in morem cantici ducta modulatè labatur. Qui crystallum expolit, non diligentius cavet, ut lævis glacies digitos sine ullâ offensione admittat, quàm illi ut verborum commissura teres et rotunda molliter auribus accadat. Quod non eò reprehendo, ut voces sine vinculo vagari laxas et dissolutas velim, cùm nullæ sint aures tam inhumanæ, quas numeri non afficiant; verùm eam demùm viris doctis placuisse orationem video, quæ numerosè quidem, sed liberè et cum fiduciâ quâdam ingreditur: nam hærerè diutiùs in dimetiendis syllabis, sententias ità omnes perfectò verborum ambitu adstringere;

ut nihil extra mensuram aberret, infelicis luxuriæ tormenta ista sunt laborantis circa inanes delicias, et eloquentiam veram infringentis.

Benigni GRÉNAN. *Orat. de corrupto dicendi genere.*

### Les Invalides.

INTUETUR unusquisque vestrûm animo superbas illas ædes, quas veluti ad spectaculum magnitudinis suæ in ipso reginæ hujusce urbis aditu posuit Ludovicus ædificiorum amplitudine et situ loci illustres, substructionum magnificentiâ verè regias, novi verò instituti operis prorsùs singulares.

Nullum erat antehàc ærumnosæ virtuti perfugium, nullus veluti portus quò se milites ex diutinâ bellorum agitatione reciperent. Fracti annis et vulneribus, truncato corpore, claudi, cæci, debiles, errabant flebili agmine circumferentes miserabiliter per oculos et ora civium paupertatem suam et vulnorum cicatrices, fœda belli præmia.

Providit optimus Imperator illorum inopiæ et senectuti paternâ prorsùs charitate. Nec miror intrepidus nunc regnante Ludovico milites, mortique devotos, per arma, per flammæ, penè dicam vecordi audaciâ alienatoque a præsentis periculi sensu animo, in hostem ac prælia ruere. Redeuntes eos ex bellicis laboribus et periculis manet ampla et magnifica domus, ubi sub tutelâ Ludovici, et quodam modo sub ejus palmarum umbrâ, emeriti senes, juvenesque laureati, in otio triumphali conquiescunt. In hoc illustri et christiano Gallici Martis domicilio regnat alta et secunda pax; mirus tamen ordo disciplinæ militaris observatur. Perstrepunt hæc velut suburbana castra continuo armorum strepitu, sed innocenti et incruento: aguntur illic perpetuæ diu noctuque excubiæ;

nullius tamen hostis insidias timent, præterquàm interni et domestici, animorum vitia et cupiditates intelligo. Hæc illis unica superest pugna, unica quæritur victoria. Post lacessitas temerè mortes in medio æstu et cæco furore præliorum, discunt ibi in ipso beatæ pacis sinu christianam mortem expectare patienter.

Dignum est angelis spectaculum, intueri ferventem in hâc domo plurimorum militum pietatem : atque haud scio an ulla solitudo majora pietatis exempla suppeditet. Quâcunque diei horâ ingrediare augustum illud supremi exercituum Dei templum, videas tanquàm stantes piis in excubiis veteranos centuriones ac milites, prostratos suppliciter ante aras, sine ullâ ostentatione et pompâ, sed tanquàm unico teste Deo, lacrymantibus oculis, fixo in terram vultu, immoto corpore, eoque suspiriorum fervore et religionis spiritu, qui etiam ab impiis divini nominis confessionem et reverentiam extorqueat.

Sileant, si volent, de Ludovico poetæ; conticescant oratores; quiescant etiam, si libet, periti facta regum venturis servare sæculis artifices; meliùs veriùsque rudi et imperitâ militum voce, quàm exquisitissimis orationibus ac carminibus Ludovici nomen celebrabitur: perenniùs durabit ejus gloria in fidis pectoribus et gratâ ac memori pietate militum, quàm in auro, in ære, in marmore et pictis ad vivum imaginibus. Militaris illa libertas, unius amica veritatis, promptiorque imperatorum culpas arguere, quàm laudare virtutes, aberit ab omni suspicione adulationis, cujus nos poetæ et oratores vix fugere possumus opinionem.

Nec erit unius ævi ista Ludovici gloria, aut intermoriatur ac concidet cum iis qui nunc istas ædes incolunt. Transmittetur illa fideliter et quasi per manus tradetur, ab iis qui nunc sunt ad futuros hujus præclaræ domûs hospites. Qui si fortè de tanto Ludovici in se beneficio sileant, clamabunt ipsi lapides ædificiorum et templi

parietes, fundatam esse hanc a Ludovico Magno illustrem domum, apertumque hoc illius piâ liberalitate et magnificentiâ miseris militibus asylum, in quo possit illorum senectus non solum quiescere, sed etiam honorata consistere. Quin et gentes extræ, vicinique principes, qui æmulatione Galliæ simile opus aut jam instituerunt, aut venturis ætatibus instituent, tantò quidem amplitudine et magnificentiâ nostro hoc inferius, quantum ipsi sunt eruntque Ludovico impares, renovabunt illi scilicet et quodam modo cumulabunt Ludovici gloriam, ad quem, tanquam auctorem et institutorem præclari operis, et sua et aliorum in milites benefacta pertinebunt (1).

ROLLIN, *Louis XIV*, panégyr. II.

#### Intrépidité de la Palisse.

CONSALVUS, comperto destitutam milite Roveram, paucis cum Palissâ ad oppidi custodiam a Nemursio relictis, ut clarissimum bellatorem caperet, simulque novo facinore gloriam augeret urbe oppugnatâ, quartâ post horâ, spatiosam muro labem infert, atque extemplo aggressionem instituit. Nulla res oppidum, præter Palissam unum, propugnabat; murus infirmus, jam sub machinis proruens; miles rarus, cives subito metu perculsi; numerosus hostis, jam ab aggere prominens; nulla auxilii spes aut salutis: verum Palissa tot tantaque incommoda unus compensabat; spectabatur, propugnaculi instar, in ruinâ muri crasso hastili depugnans, hostemque ex aggere in fossam devolvens; jam Hispani tertium obtinuerant aggerem, ab eo tertium unius viri virtute dejecti, jam vexillum in ipso muro erexerant; idque vir

(1) Voyez les *Leçons Françaises*, tom. I, *Tableaux*; et t. II, *Narrations*.



fortissimus deturbaverat; jam tota legio in eum unum conversa hastis, ensibus, pilis ingruerat, eamque universam dejiciebat vir unicus, hastâ tam crebros validosque ictus incutiens, ut nemo impunè ad ipsum propius accederet.

Tandem Hispani, consumptis armis animisque, ceu propugnaculi molem aut scopulum subruituri, cadum nitrati pulveris inflammatum in pugnantis caput conjiciunt. Ille cadi pondere vique incendii devolvitur in imum aggerem, casu præcipiti, fumoque spississimo, quâ galea panditur, exundante. Neque ideò viribus aut animo destituitur; sed aquis, quas e summo muro miles effundebat, opportunè recreatus, et restincto utrimque incendio, sicut erat contusus membris et propè assatus, exsurgit, et per ipsos hostium cuneos ad loricam arcis se recipit, rursùmque per multorum stragem grassatus, tandem viribus cum sanguine deficientibus, illibato adhuc animo, se Jacobo Mendosæ tradit, projecto longiùs, quantum dabat infirmitas, gladio. Imò, quamvis captus, se invictum hosti exhibuit, quippe ad arcem a Consalvo ductus, ut deditionem suaderet, contrà ad obsistendum adhortatus est militem, tantoque terrori vel in vinculis fuit, ut nusquam copia redimendi se ipsi facta fuerit, gnaris hostibus quantum in capto, quantum in libero, lucri facerent atque detrimenti.

P. DE BUSSIÈRES, *Hist. Franciæ*, lib. xiv. 1661.

Le Phosphore naturel.

KENNETHUS, Scotorum rex, conventu habito, cùm de bello in Pictos consultaret, quanquàm Rex et ferocissimus quisque juvenum justam a perfidis expetendam vindictam suaderent, tamen major pars, ac potissimùm seniores censebant, expectandum, dùm vires, superioribus bellis

attritæ; reficerentur; a Pictis interea nec pacem petendam, nec bellum gerendum, donec aliqua major se offerret, aut pacis ineundæ necessitas, aut belli instaurandi opportunitas. Hæc sententia cùm vicisset, consensu tacito utriusque gentis triennium proximum pax fuit. Quarto anno, Kennethus, belli cupidus, cùm paucos in conventu sententiæ suæ fautores invenisset; primores gentis ad cœnam vocat: et cùm in multam noctem convivium fuisset extractum, in aulâ omnes pernoctant, quod eò facilius iis fuit, quòd majorum instituto humi cubarent, in spatiosâ domo, ut quisque poterat, compositi, substratis tantùm frondibus aut herbâ.

Ibi juvenem sibi propinquum Rex subornat, ut piscium exuviis (maximè generis asellorum) a siccatis vento piscibus detractis, indutus, noctu ingressus, voce per longum canalem emissâ, quò longiùs perferatur ad aures, veluti cœlitùs demissus, eos ad bellum adhortetur. Ad hanc vocem, humanâ (ut tùm ipsis visum est) augustiorem, proceres subito expergefacti, plerique etiam vino graves, attoniti, cùm fulgor argenteus e pellibus piscium in semisomnes oculos incuteret, aciemque hebetaret, stupore vehementissimo capti sunt universi, cùm et oculos species insolita, et animos occulta quædam religio percelleret. Illud etiam admirationem non modicè auxit, quòd nuncius, personâ reliquoque ornatu detracto, cùm se per exitum occultum momento temporis e conspectu subduxisset, evanuisse est visus. Mane, cùm rumor ad regem permanâset, multique, ut fit, in majus augerent, nec ipse dissimularet similem sibi speciem per quietem obversatam, omnium decreto bellum, tanquàm Deo auctore, gerendum decernitur. Exercitibus eductis, ubi primùm alteri alteris visi sunt, non exspectato ducum imperio, quâ cuique proximum fuit, in hostem procursum; nec minùs atrociter pugnatum, quàm cupidè commissum est certamen. Tandem ad Scotos pervenit victo-

ria, Pictorum maxima cædes fuit, Scotis non solum superiorum temporum odio indulgentibus, sed recentis crudelitatis adversus captivos memoriâ inflammatis.

BUCHANAN, *Histoire d'Ecosse*; l. v.

Danger que court l'historien De Thou sur le lac de Wallenstadt.

CURIA digredientibus ante solis ortum et tempore pluvioso consensum est abiegnum navigium ad lacum proximum, cujus natura ea est, ut, cum inter altissimos et undique præruptos montes claudatur, ventis incumben-  
tibus periculose agitetur, et naufragium minitetur trans-  
euntibus; a quo Thuanus et qui aderant, parum abfue-  
runt, eoque majore discrimine, quod per summam im-  
prudentiam Germanum cum equo vector admisisset, qui,  
undarum succussatione territus, cum plerumque popliti-  
bus posterioribus succumberet, navigium penè evertit;  
et, cum nusquam appulsus esset, crescente semper vento  
et imbre, saxumque continuum immensâ altitudine, quâ  
proxima erat terra, pro ripâ appareret, in summâ de-  
speratione cuncti versabantur, clavo jam a gubernatore  
abjecto, et, ut quisque saluti consuleret, admonente.

Erat cum Thuano Nic. Rapinus, Nicolai, qui et in-  
genio et virtute per Gallica bella satis inclaruit, filius,  
adolescens summi animi et natandi peritissimus, qui,  
abjecto thorace et interiore tunicâ, ultrò se paratum in  
lacum desilire ostendebat, et Thuanum, ut se sequeretur,  
et lumbis prehensis fortiter teneret, hortabatur; sic enim  
fore, ut, aut prior ipse mergeretur, aut incolumem se-  
cum in ripâ, quò proximus daretur appulsus, sisteret.  
Cum in eo omnes essent, ut sola in cœlesti auxilio spes  
superesset, specus in rupe excavatus eminens apparuit,  
quò jussus vector, ut navigium jam aquâ penetrante fa-

tiacehs dirigeret, annitentibus qui vehabantur, et remis adversus ventum certantibus, tandem socii, ut erant imbre madidi, saltu in brevia proxima descenderunt cum sarcinis quas quisque gestare poterat, certi vel crurum tenens in aquâ citra periculum manere, quousquè tempestas desæviret.

Sed accidit ut intra rupem arcus, quasi per gradus in saxo sculptus, sit repertus, per quem, ut erant ocreati et palliati, summâ alacritate, quanquam arduus esset ascensus, ad hæc imbre et vento infestarentur, omnes per miliaris spatium in summum evaserunt, et in viâ cursum, a bobus tractum, per præceps delabentem obvium habuerunt. In summo haud procul hospitium erat, in quo, hypocaustorum beneficio siccatis brevi vestimentis, gliscente post tam præsentis exitii metum insperatâ lætitiâ, molestæ viæ labore non parùm recreati sunt.

DE THOU, *Mémoires de sa vie.*

Le Courtisan disgracié.

AULAM esse oceanum quis neget? Quot fortunæ his fluctibus se credidère, tot naves sunt, imparia certè versantibus undis onera; quædam enim ad tempestates firmiùs sunt comparatæ, suisque velis commodiùs utuntur: omnibus tamen una sors, sæpè ferri quò nolint; latè circumstans periculum trepidè intueri; non plus inter aquas ab aquarum insaniâ, quàm ab hostili igne reformidare; qui semel flantibus auris noxiè incensus est, cum fugæ ratio desit, omninò pereundum. In eo autem damno, quæ priùs non periclitanti socia navigia adhæserant, ut grassantem flammam devitent, fœdus solvunt, ac, vel otiosâ miseratione commoti, vel evasisse gestientes, quotquot eâ sibi declinatione consulunt, procul spectant amicorum incendium.

En destitutum aulicum : infelicem nemo palàm audet solari, nemo compellat, accedit nemo; omnes quippe ardentis fortunæ vel leves scintillas reformidant. Et putem in aulâ stabiles amicos inveniri, cum haud læsi terga vertant quibusque familiarissimis, statim ac principibus accepti esse desierunt, tamque citò nullo pudore deficiant? Ubi suum in rus vir iste secesserit, qui gratiâ principis excidit, nullus nisi furtivus inviset. Si qui scribant, ipsæ epistolæ sub pallio vel consciâ tantum nocte traditæ; pavebunt ne qui se promisit latorem, delator fiat. Qui fastidiebat agrestes velut ex viliori scilicet luto confectos, jam penè pro sodalibus habebit exsul miserimus, vel mœstissimâ solitudine, ut nimirum brevior vita intolerabili ærumnæ compendium faciat, corpus conficiet. Redibit in memoriam importuna pristinæ felicitatis imago; frequentia clientium; adulatorum tot artibus adumbrata fides; intumescantis spei, cum nihil impervium sibi crederet, audacia : inter fletus ac gemitus continuo succurret, quàm benè initia processissent; quàm sæpè Rex humanissimè compellârît; denique jam bona ista penes inimicos, quæ aut ipse tenuerat, aut erant prorsus ventura, nisi repentina calamitas sortis optimæ contextum invidâ manu præcidisset.

Petri FIRMIANI, *Gyges Gallus, Oceanus Aulicus.*

Le Charlatan (1).

PONITE, quæso, vobis ante oculos unum aliquem ex circumforaneis istis præstigiorum artificibus, quibus unum a republicâ demandatum munus esse videtur, ut volentes impunè decipiant. Præter pueros et bajulos, et infimæ plebis fæcem, veniunt sæpè ad illum cives etiam

(1) Voyez tom. II, même sujet, *Caractères et Portraits.*

honesti oblectationis causâ, et ut animos contentione fatigatos joculari spectaculo nugisque audiendis paulûm recreent, certi tamen nullam mendacissimi agyrtæ sermonibus fidem adhibere : intereâ pegma ille conscendit, exponitque suas merces ambitiosè et ad pompam. Promittit unguenta, pastillos, odores exoticos omnis generis : crustula dealbandis dentibus a se confecta diligenter ; mirificum saponem ad detergendas manus cutemque lævigandam ; pulverem qui siccet crînes, eosque crispet innoxie ; alia ejusdem notæ medicamina, quasi in antecessum, præmittit. Nam ubi ventum est ad divinum illud et cœleste pharmacum, Dii boni ! quàm gloriosè se jactat in hoc campo ! quàm triumphat magnificè ! quàm novis, quàm exquisitis nominibus rem unam appellat ! Hoc enimverò *moly*, hoc cœlestem panaceam esse : contineri in Mithridatico suo fontem vitæ, animam mundi, medullam astrorum, immortalitatis antidotum, præsens ad omnia alexicacon. Ne multa, (vereor enim ne circulatorum quoque agere imitando videar) hoc perficit pollicitationibus suis, et crebrâ jactatione miraculorum, quæ ubique terrarum patrata narrat ope incomparabilis medicamenti, ut demùm pecuniam a cunctis, scientibus, videtibus ; et suam ipsorum stultitiam ridentibus emungat.

Le P. COMMIRE, *Oratio de arte famæ parandæ.*

Difficulté de succéder aux hommes supérieurs.

**FINGITE** vobis tabellam aliquam numeris omnibus absolutam, in quâ certet cum majestate venustas, cum gravitate festivitas, cum audaciâ prudens et apta partium compositio, quam suo Natura exarâsse penicillo, suis Flora tinxisse coloribus, suis Fabula exhilarâsse figmentis, suis Charites inspersisse leporibus, suis Amor sed purissimis afflâsse videatur ignibus, quæ sic denique al-

liciat oculos, ut nunquam expleat, sic omnes picturæ delicias exprimat in sese, ut ipsa nulli sit exprimenda : jubeatur accedere pictor aliquis in arte pingendi non ita rudis, sed sibi parum confidens, ipsique proponatur imago pulcherrima, uno ferè calami ductu depropereanda eâ lege, ut, si totam minùs adæquet archetypi præstantiam, vel minima penicilli vitia acerrimè castiget censuræ stylus.

Adsint interim pingenti homines plus æquo fervidi, qui cautam delineantis tarditatem inerepent : circumstrepant homines clamosi, qui opus elaboranti aures obtundant : circumstent homines morosi, qui manum exarantis usque et usque vellicent : subsilient hinc et inde homines salsè dicaces, qui, dum coloribus telam illinit, hunc dicteris aspergant : assideant homines otiosi, qui, in operis absolutissimi contemplatione defixi, vix inchoatum tanquam tyronis opus despiciant fastidiosè, ac superbè despuant : tot veluti fluctibus jactatum quid futurum putatis pictorem quo nullus infelicior? An operi incepto animosè ac pertinaciter inhæsurum? an non potiùs colores, telam et calamos suos omnia deque stomachosè projecturum? Projiciet enimverò, et vel abjiciendo penicillum vestris ad vivum depinget oculis ærumnosam successoris vicem, cui magnum exemplar proponitur imitandum, et maxima simul adimuntur imitandi præsidia, dum unà cum æmulatione subducuntur æmulationis pabula.

P. BAUDORY, *Viris in arte suâ præcellentibus succedere quàm sit operosum*, Oratio. 1451.

Carrousel, à Amsterdam, en l'honneur de Marie de Médicis.

UTR classem Yæ fluento innatantem cernere erat, ita in continente equitum patriciorum turma occursu suo jucundissimum præbebat Reginæ spectaculum. Non

mercenario illa constabat milite, sed optimatum et opulentium civium selectâ sobole; non necessitate ad bellum, principis aut magistratûs jussu convenire solita, sed suâ voluntate ad honestam animi exercitationem. Calcaria, stapedes, frena, bullæ, fibulæ; contorti in cincinnos non sine artificio capilli et jubæ, et id genus alia equorum ornamenta, aureis argenteisque bracteis fulgebant. Sellæ, pectoralia, stragula, pretio et pulchritudine certabant. Enses, sclopeta pro armis erant. In pileolorum verticibus discolores plumæ radiabant. Equis caput erectum argūtumque, oculi acres, magni et micantes, breves auriculæ, collum juxta caput gracilescens, pectus amplum; pleni lumbi, pedes lati et villosi; coloris plurimi punicei vel castanei, nigri quidam, quidam varii et ex pluribus temperati.

Quorundam generositatem arguebat pedum color niger, cana et crispa coma, maculæ zonæque rubræ. Erant quos stellula in fronte commendabat; alios quatuor pedum, alios duorum, alios unius, vel dextri vel sinistri, candor. Ex circumversione ad utrumque latus versatiles agnoscas, ex incessu elegantes, ex habenarum motu obsequentes et faciles. Quòd si qua sonum procul arma dedere, stare loco nescii, stantes spumantia mordebant frena, humum arrectis auribus pede pulsabant. Ibant ad numerum, et hinnitu dominorum suorum instituto adfremebant, eâ gravitate, ac si regiæ se majestati præire arcano instinctu cognovissent. Incedebant factis externo equite contuberniis. Præcedebant tubicines tres purpureâ veste induti, et tubarum clangore aurium gratiam demerebantur. Equites amictûs forma colorque distinguebat. Hi Serico, hi Tyrio, hi Phrygio, hi bombycino, hi fimbriato, alii undulato speciosi ac decori. Pro supremâ veste plerisque lorica erat coriacea, militaris habitus, aspectus omnium et singulorum pulcherrimus.

*E. G. BARLÆI, Medicæ hospite, 1638.*



## Fête populaire.

OMNIUM postremi ludi erant plebeiï, qui, mense maio, a plebeiis hominibus celebrantur, quo die opifices, ab operis feriati, totos hilaritati se tradunt. Hi, summo mane, unâ cum uxoribus ac liberis, secedunt in agrum, duobus circiter millibus passuum procul ab urbe, et secum equos, asinos, vino, pane, caseo, aliisque cibariis onustos, adducunt, quibus parvulos etiam pueros et infantes imponunt; ferunt etiam citharas, sistra, fides, atque alia ejusmodi instrumenta musicæ, ad quorum modos vocem exercendo, itineris molestiam levant; tum pervenitur in æquatam agri planitiem, arboribus ferè in quincuncem dispositis consitam; in cujus summo, rudi ac rusticano opere factus fons inest, cujus aquæ frigidæ, dulces, nitidæ, atque perennes, ad irrigandum eum locum sese diffundunt. Ante hunc fontem mensa marmorea, longa, quadrilatera, varias inter ac proceras arbores, paulò supra terram porrigitur; quam qui prior occupat, beatus habetur.

Hic animi, curis ac sollicitudinibus valere jussis, dant omnes sese variis ac jucundis oblectationibus. Nam alii seorsim a cæteris saltant; alii puellarum choris immisti, festas atque alacres ducunt choreas; alii citharâ, alii voce, alii fidibus canunt; alii oleâ, alii trocho, alii pilâ datatim ludunt; alii ligneis orbiculis certant, uter propius ad orbem accedat, qui signi gratiâ præmittitur, ad quem dirigantur cæteri; omnes denique paulò ante meridiem, in gramine sese projiciunt, et ad arboris cujuspiam umbram edunt, potant, animo obsequuntur, atque omni se dant hilaritati.

Veniunt eò citharædi, fidicines, et ad citharæ fidiumque cantum, ex tempore carmina fundunt de discum-

bentium virtutibus, a quibus deindè, grati scilicet animi causâ, vel vini cyathum auferunt, vel carnis porcinae, vel vitulinae frustum, vel pulli gallinacei alam, vel placentæ caseive partem. Verùm cibo potuque expleti, atisque sanctæ Saturitati gratiis, surgunt omnes, ac largiùs etiam quàm antea, saltationes, cantus, choreas, aliosque ludos, quos intermiserant, repetunt, et usquè ad occidentem ferè solem producunt. Multæ, inter æquales, horum ludorum causâ, affinitates, multæ inter inimicos pactiones et fœdera conciliantur. Is denique ludorum istorum est finis, ut, cùm advesperascit, omnes eâdem, quâ venerant, alacritate domum revertantur.

E J. Nicii ERYTHRÆI (*Vittorio Rossi*) *Eudemicæ* libº xº.

#### Le Mât de Cocagne.

BULEUTERIUM ascendimus, ubi proceram arborem, suo denudatam cortice, multoque sevo perunctam, conspicimus, e cujus vertice pendebant farcimina, casei, ligulæ sericæ, palumbi, aviculæ, et alia id genus multa, quorum pretium minam non excedebat. Signo dato, veniunt in medium, in veste lineâ, qui parati erant Maium (id arbori nomen erat) scandere, divisi in classes quatuor, ex ultimâ plebe conflatas. Fit pugna inter eos et acerrima contentio, quinam primùm arborem accedant, eam consensuri. Res agitur pugnis, colaphis, calcibus, cubito, pede: itaque se invicem urgere, pellere, verberare, supplantare; alter alteri os, caput, collum ferire, contundere, committigare, ut nullum autumno pomum sit æquè mite ut illorum erant ora et capita pugnis mitia ac mollia: denique unusquisque erat alteri pro gymnasio, in quo ille verberando se exerceret. Atque hæc omnia ad populi sibilos, ad tubarum sonum ac tympanorum strepitum fiebant.

At quæ pars, rejectis aliis, superior discesserat; **Maium ambire** : tum unus, cæteris audacior ac promptior, manibus, genibus, pedibus, eidem advolutus, conabatur sursùm ascendere; sequebantur alii, ex eodem grege, cum castulis ac sacculis plenis arenæ, cuius ope auxilioque tentabat ille, an trunco illi, nodis vacuo, ac sevo, ut dictum est, delibuto, manibus posset hæere : ac sæpè fiebat, ut, qui ad verticem usque se contulisset, statim deorsùm, omnium cum risu, relaberetur. Sed cùm tandem unus, propè reptando ad summum arboris **enixus**, potuit ramos ibi prominentes manibus uncis apprehendere, confestim in signum victoriæ, unti ex avibus ibidem alligatis, vincula demere, ac facere potestatem avolandi quò vellet; deindè pendentia indidem præmia per vim evellere, rapere, sociis tradere; postremò, direptis rebus omnibus et in culeos ingestis, omnes ejus gregis, ovariantibus similes, discedere, seque aliquò in popinam immergere, ubi ad vesperam usque neque edendi neque potandi finem facerent.

*Idem, ibid.*

#### Promenade des Champs-Élysées.

Quàm magnificum, quàm unicum in toto terrarum orbe spectaculum offerunt in aditu Parisiaco, aulam inter et urbem, feliciter positi Campi Elysii! Occursantibus undique naturæ et artium opibus; festo serenoque die effusâ plebe immensâ, laborum oblitâ, gramineis toris discumbente, ad symphoniam tripudiante, jocis, deambulationibus, ludis, comessionibus, compotationibus, et omni Gallicæ hilaritatis impetu exultante; inter popularia gaudia strepentibus publicis viis præcipiti volubilis ambitionis aulicæve adulationis concursatione, ventosâ superciliosæ aut luxuriantis vanitatis pompâ;

tardigradis obese opulentiae ac morosae senectutis tædiis; pulverulentis hiantium mirantiumque advenarum vehiculis, spectatores omnes, omnes spectaculum, lenes inter umbras deliciasque ruris exhibent miras vultuum, morum, hominum, rerumque differentias, grata simul et utilia oculorum et animorum delinimenta. Talia ne quaesieris in privatorum, vel etiam regum, hortis. Hæc ad unos naturæ ac gentium hortos pertinent.

G. BROTTIER, *Hortorum Hist. Rapini Hortis Conjuncta:*

Paris et les Provinces.

PONITE vobis ob oculos regem aliquem præstantissimum, quem circum obsequiosa diu noctuque ministrantium turba jugiter excubat. Alter panario præpositus rem frumentariam providet, regio in usus impendendam; alter cellario præfectus omnes ferculorum et altilium lautitias undique corrogat indefessâ sedulitate mensis apponendas regalibus; hic poculis principi ministrandis usque vigil et arrectus pincernæ munus fungitur; illi regium latus hastatis agminibus stantes hinc et inde protegunt. Quid plura? dum solio princeps longè latèque spectabilis insidet, fervet undique circumfusa, et e regio pendens arbitrio famulantium cohors.

Quod regi ministrorum obsequia, hoc sunt reginæ Lutetiæ officia provinciarum. Sedet illa, mollibus undequaque colliculis coronata, in vastissimâ planitie, tantquam in aulâ pulcherrimâ, hinc fusas in orbem provincias ad suos quasi ad heriles nutus experrectas quietâ prospicit. Patiatur esuriem? Præstò sunt illicò provinciæ frumentariæ: suas Neustria, Belgica suas, suas Picardia studiis rivalibus fruges depromunt; tota simul horrea in reginæ mensas devolvenda certatim exhauriuntur. Jubeat illa exquisitissimis ferculorum saporibus exhilarari sese?

Adsunt jubenti veluti cellariæ provinciæ : suas oves Biturigæ , ipsis edules regibus ; sua Cenomanum altilia , vel oculo indice morsum invitantia ; suos Aremorica piscium cumulos , suavissima furentis Oceani spolia ; suas Turones fructuum delicias , Hesperidum pomariis invidiam facturas , ad salivam reginæ commovendam deproperant. Velit illa sitim restinguere ? Advolant alacres pincernarum in morem provinciæ vitiferæ : suos sitiendi reginæ liquores Burgundia ministrat tam suaves in potu quàm ab haustu salubres ; suos Campania suaviter ignitos , lenè mordicantes , limpidos ac sinceros et sinceritatem suadentes. Conflictetur illa brumæ glacialis asperitate ? Haud mora , fervet in provinciis labor , ad arcenda reginæ laborantis incommoda : jam cædua sternuntur humi truncorum roborâ ; jam totas Sequanicis innare fluctibus silvas credideris ; jam passim assurgunt fastigiatae lignorum strues , ipsi formidata Boreæ munimenta. Ingruat ab hoste periculum ? Adsunt in procinctu quasi regiæ satellites provinciæ , regni margines , quæ munitissimis arcibus hostiles frangunt impetus , et totam belli molem sic in sese recipiunt , ut vix reginæ somnos interturbet bellicus fragor. Interea his protecta vallis coeuntium hostium apparatus ridet ea vel canit more suo , vacua timore , quia secunda periculi : quâ quidem parte quantum provinciis Lutetia debeat , satis admonent antea acta retrò sæcula , cum his destituta firmissimis aggeribus hostiles turmas suis finibus exspatiantes , inque ipso regni capite regnum adorientes , contremiscebat.

P. BAUDORY, *Parisiis Provinciæ , Provinciis Parisii quantum debeant , Oratio.*

## Venise.

VENETIARUM urbis, in recessu intimo sinûs Adriatici, ea regio ac situs est, ut leniter stagnantes ex alto aquæ illam ex omni parte circumluant; ea inclytæ urbi et ad merces copiasque invehendas opportuna receptacula, et contra hostiles incursus munimenta firmissima sunt. Ex iis porrò æstuariis, majores minoresque euripi totam urbem interkursantes, variis mæandris ac flexibus ità distinguunt, ut, quot in partes pedibus, in totidem ferè mari aditus sit, egregio sanè vel artis vel naturæ miraculo. Indè vicorum, insularum, pontium ingens numerus; ut qui diutiùs ibi versati non sunt, viarum locorumque modò varietate, modò similitudine sæpè fallantur. Sed contra ejusmodi ambages certum paratumque remedium est maxima multitudo cymbarum, quæ usquequaque dispersæ, nominatim ad omnia et publica et privata loca quemlibet haud ità magnâ mercede trajiciant.

J. P. MAFFÆ.

## Coup d'œil d'un Port de mer.

EMERGERE ex undis videtur magna civitatis moles, ac toto latè mari dominatur. Hùc ex omni parte confluunt mercatores; hùc quidquid ubique pretiosum aut exquisitum, aut natura peperit, aut humana finxit industria, convehitur. Civitatem ingredienti non urbs alicujus unius gentis videtur, sed omnium gentium quasi emporium. Procurrunt in altum, velut brachia quædam, aggeres duo, qui portum ingentem inaccessum ventis amplectuntur. Hunc si procul intueare, silvam credas; tam densi exsurgunt mali navales. Tum in ipso portu tanta

**multitudo navium**, ut totum mare lateat quasi tabulato contactum. Fervet civium industriâ universa civitas; omnibus trepidatur locis : alii exonerare naves, alii merces transvehere, alii divendere. Ibi non inambulant perforum viri otiosi : pro se quisque suam vicem, suam operis sortem molitur. Omnia concursatione, motu, labore misceri; ita ut non mare magis quam universa civitas fluctuare videatur.

C. LE BEAU.

Le bon Roi.

UT aliquâ ex parte primis lineamentis informatam tibi proponam optimi regis imaginem, cogita tecum serpente illum æneum in Arabiâ Deserta a Mose erectum, solo aspectu vulnera ab aliis serpentibus facta sanantem. Cogita e multitudine numerosâ alios a serpentibus ictos, et ad remedium præsens concurrentes, cum videant lethiferi vulneris dolores non medicamentis cum cruciatu ægri, labore medici, et amicorum assiduâ sollicitudine, tolli; non longinquitate temporis, sed uno momento ad sanitatem reduci. Jam confer mihi cum serpente illo regem : sed ita confer, ut et regem bonum in maximis Dei beneficiis numeres : qui solus sine tuâ impensâ, sine tuo labore, omnes regni molestias levet, sedet perturbationes, et vetusta etiam animorum ulcera ad cicatricem brevi perducatur ; nec iis modò sit salutaris, qui eum cominus intuentur, sed qui tam longè absint, ut nec ejus videndi spem ullam habeant : cujus in imagine animis oblata sit tanta vis, ut id faciliè perficiat, quod nec juris peritorum prudentia, nec scientia philosophorum, nec tot sæculorum in artibus colligendis experientia præstare unquam potuerit. Qui verò honor, quæ dignitas, quæ amplitudo major aut majestas in homine ullo dici aut excogitari potest, quam ut sermone, congressu,

aspectu, famâ, tacitâ demùm specie animis oblatâ, luxu diffuentes ad modestiam, violentos ad æquitatem, furiosos ad sanitatem reducat? Potesne, si velis, majus hoc a Deo, rebus humanis propitio, beneficium postulare?

Hæc est vera, nisi fallor, imago regis, non illa circumsepti armis, semper metuentis, aut metum facientis, ex odio in populum suo, populi in se odium metientis. Ecquid tibi nunc humiliter et contemptim de rege sentire videor, et eum, quod dicunt aulici, oneratum compedibus in legum ergastulum compingere? An non potius in lucem et hominum cœtus, et publicum humani generis theatrum eum produco, non superbo spiculatorum et machærophororum cœtu, sericatisque nebulonibus stipatum, sed suâ tutum innocentia; nec armorum terrore, sed amore populi munitum; nec modò liberum et erectum, sed honoratum, sed venerabilem, sacrosanctum et augustum, cum bonis omnibus et faustis acclamationibus prodeuntem, et quòcumque progrediatur, omnium ora, oculos animosque in se convertentem? Quæ oratio, quis triumphus cum hâc pompâ quotidianâ comparari potest? Aut, si Deus humanâ specie delaberetur in terras, quis major ab hominibus honor ei posset haberi, quàm qui vero regi, hoc est, vivo Dei simulacro exhibetur? quo præstantiorem nec amor largiri queat, nec metus exprimere, neque adulatio comminisci (1).

BUCHANAN, *de Jure regni apud Scotos.*

(1) Voyez les *Leçons Latines anciennes*, tom. I, *Caractères et Portraits*, et les *Leçons Anglaises*, tom. II, *Définitions*.



## Le Tyran (1).

NON oblitus es quæ apud poetas de Furiis, apud nostros de Cacodæmonum naturâ dicuntur : esse videlicet humani generis hostes, qui, cum ipsi perpetuis in cruciatibus versentur, hominum ideò tormentis gaudeant. Hæc profectò vera est tyrannidis imago. Sed quia cogitatione modò et sine ministerio sensûs hæc imago cerni potest ; aliam tibi proponam, quæ non modò animum, sed sensus etiam feriat, et vel in oculos incurrat. Finge te navem in mari procellis vexatam videre, littora omnia circumcirca non modò importuosa, sed hostium infestissimorum plena : ejus verò navis dominum mutuo cum vectoribus odio certantem, nec ullam tamen aliam, quàm in nautarum fide, spem salutis habentem ; nec hanc quidem certam, ut qui non ignoret, se maximè barbaro generi hominum et ab omni humanitate alieno, vitam suam credere : quos pecuniâ solâ conciliatos retineat, quique lucro majore objecto adversus eum ipsum conduci possint.

Talis est profectò vita illa, quam veluti beatam tyranni amplectuntur. Foris hostes, domi cives metuunt, nec cives modò, sed domesticos, propinquos, fratres, conjuges, liberos, parentes. Itaque cum vicinis externum, cum civibus civile, cum suis domesticum bellum semper aut gerunt, aut metuunt, neque usquàm auxilia sperant, præter mercede conducta : neque bonos conducere audent, neque malis fidere licet. Quid istis tandem in vitâ jucundum esse potest ? Dionysius filias virgines adultas, cum novaculam ad guttur admittere timeret, a barbæ radendæ ministerio removit ; a Timoleonte frater, ab uxore

(1) Voyez les *Leçons Latines anciennes*, tom. I, *Caractères et Portraits*.

Alexander Pheræus, a patre Sp. Cassius est interemptus. Qui hæc ante oculos exempla proposita semper habet, quam tu eum carnificinam in pectore circumferre credis? cùm cogitet sese universo mortalium generi, tanquàm signum in quod jaculentur, propositum; neque solùm vigilans his conscientiae tormentis excrucietur, sed terrificis etiam vivorum et mortuorum simulacris e somno excitetur, et Furiarum facibus agitetur. Tempus enim, quod omnibus animantibus ad quietem, hominibus etiam ad curarum laxamentum natura tribuit, illi in horrores et supplicia convertitur.

*Idem, ibid.*

---

## DESCRIPTIONS.

---

### *Education de l'héritier de la couronne chez les Perses.*

**P**UERUM, penes quem futura esset summa rerum, sic institui solitum fuisse scriptum Plato reliquit. Statim ut ille regalis hæres exceptus in lucem spe bonâ regiam domum fundare visus esset, honestissimis infantiae custodibus tradebatur alendus, cum eo jussu ne quid præterirent, quominus a teneris principem sibi quàm elegantissimum conformarent : proinde corpusculi vitia pravitateque corrigerent, ducerent vultum, membra fingerent, gestum omnem incessumque componerent. Ubi septimum attingisset annum, continuò magister equitandi aderat, ex quo sternacem et indocilem equum intra gyrum compulsum inflectere disceret, et a gyro longiùs explicare cursum et volubiliter ad numerum gressum glomerare, et in arduum urgere cunctantem, et a ruinâ sustinere præcipitem. Hinc ad tolerantiam membra durabat, inediâ, siti, algore, sudore, telorum jactu, palæstrâ, clamore, venatu, quo venustatem oris horridiuscula quædam concinnitas ad dignitatem efferaret.

Exin quartum annum et decimum ingressus, ad moderatores itabat, quos vocabant regios : qui quidem numero quatuor præstare cæteris sapientiâ, justitiâ, temperantiâ, fortitudine putarentur, quorum ille primus sapientiæ magister ad Zoroastri magiam erudiebat

adollescentem : nam magicâ Persarum institutione Deorum cultus, ritusque sacrorum, et instituta regia continebantur. Secundus justitiæ doctor monebat, ut illiberalis ingenii mendacium esse duceret, ut uteretur parcomoniâ verborum, et in omni vitâ simplex et apertus esse meditaretur. Tertius temperantiæ præcepta tradebat, ut omnia rationis e præscripto faceret, neve cupiditati serviret unquam, omnem impetum animi contineret, suû prius rex esse disceret, quàm suorum auderet esse populorum. Quartus autem virum fortem nihil reformidare jubebat; audacter omnia pericula subiret; servitutem supremum esse malum; vitæ laudem anteponeret, laudi virtutem; pro regiâ dignitate, pro salute civium, pro patriis legibus et institutis, pro religione Deorum et cultu vitam libentissimè projiceret.

P. STEPHONIUS.

Education de Henri IV.

PRIMA ætatis tyrocinia ac rudimenta complectamur, ut quibus ex initiis tantæ laudes concitatæ sint, facilius intelligatur. Non illius infantiam puerilium annorum illecebræ ac voluptates exceperunt : non nutricum blanditiis emollitus in otio ac jociis elanguerat; non inter convivia atque epulas garrire, non in ludis ac saltationibus frequens esse consueverat. Nullæ in eâ ætate delicie; nihil in victu aut cultu corporis profusum, nihil solutum ac languidum, nihil quod luxum atque inertiam redoleret : summa ubique frugalitas ac parcomonia : cibi potûsque non præcipua aut exquisita præcæteris, sed vulgaris quotidianaque ratio : vestitus obsoletus; cætera cum famulis communia, ut ex eâ nobilitate nihil tamen esset, quo eum ab aliis discernere præterquàm animi præstantiâ ac regiâ totius corporis dignitate posses.

Jam laboris exercitationisque quàm acris, quàm assidua contentio! Cum asperis in locis atque incultis, inter præruptas montium latebras, modò per acclives devexasque rupes cursu ad verticem subiret, modò in campo planitieque decurreret; hîc armatus gladio cominùs certaret, illic eminùs jaculum torqueret; aliàs æneà fistulà glandem ad scopulum dirigeret; pedes sæpiùs, nonnunquàm equo vectus, ludicrà atque umbratili meditatione armorum usum ac militiam prædisceret. Quid in venatu? Quoties per horridos ac devios saltus ferarum cubilia persequens, nive ac pruinà obriguit, aut immodicis ardoribus tostus, camporum patentium pulverem cum sudore commiscuit! Rectè enim illud de veterere Persicorum disciplinà principum usurpaverat; uti nunquàm, nisi labore attritum ac defessum, corpusculum cibo ac somno recrearet: sic apud Chironem Achilles, flosque Græciæ totius, durissimà olim minimèque molli disciplinà habiti feruntur. Nec dissimilia utriusque Africani fuerunt sub fortissimis parentibus rudimenta militiæ. Per hæc eadem Annibalis virtus in bellicosissimæ gentis ac potentissimi imperii terrorem excreverat: ab iis notissimi illi toto orbe duces atque imperatores, Græci Romanique pariter ac nostri, ad insignem primùm corporis animique vim, tum sæculorum omnium notitiam ac celebritatem effloruerunt (1).

P. PETAU. *De laudibus Henrici IV Oratio.*

Supplique du Connétable de Lune.

Uno tempore a rege Castellæ Alvari oppida et thesauri occupabantur; ipse e vinculis causam dicere est

(1) Voyez les *Leçons latines anciennes*, tom. II; et les *Leçons françaises*, tom. II, *Descriptions*.

compulsus, quæ bona esse non poterat adversum regem tantis præsertim injuriis exacerbatum. Dati judices majestatis damnârunt. Portilio, quo deductus erat, Vallisoleto relat, Pœnitentiâque et Eucharistiâ procuratus, ad supplicii locum mulâ vectus est per plateas, voce præconis, sententiæ summam de more inclamantis, his verbis : « Hoc supplicium huic crudeli tyranno abs rege » esto : quod præcipiti temeritate et amentia cum regia » majestatis quæ divinæ in terris vicaria est suggillatione, » aulâ in potestatem redactâ, republicâque universâ ad » arbitrium revocatâ, supra conditionem, supraque » privati hominis modum elatus superbiâ, in Deum regemque, regii patrimonii magnâ jacturâ, fœdâ judiciorum perturbatione, ea flagitia, maleficia, facinora, » peculatus perpetravit, pro quibus securi subjicitur : » ut divina regalisque vindicta sancita unius supplicio, » cæteris documentum detur similis audaciæ vitandæ. » Sic qui deliquit, pœnas dato. »

In medio foro suggestus erat amplus, cruxque in eo et geminæ faces accensæ tapete substrato ; eo consenso, crucem veneratus, aliquotque passibus confectis, amanuensi puero signatorium annulum, galerumque dat : « hæc, inquiens, postrema a me munera habe. » Ingens pueri ploratus, circumstantium gemitus consecutus est. Variæ rerum imagines mentibus occurrebant ; proximæ felicitatis cum præsentī fortunâ comparatio inimicis etiam excusserat lacrymas. Aderat Barrasa Henrici principis stabulo præfectus. Huic ad se vocato, « Vade, inquit, » Principi ex me dicito, famulis gratificandis ne Regis » hoc exemplum sequatur. » Erat uncus ferreus sublimi ligno affixus ; rogat carnificem ecquem in usum paratus esset ? « Sejunctum, ille, a trunco uti imponatur ca- » put. » — « Post mortem, subdit Alvarus, de corpore, » ut libet, facito ; viro forti mors turpis esse non potest : » neque immatura tantis honoribus defuncto. » Hæc

dixit : simul diloricatis tunicis intrepidè securi caput subjecit, tertio nonas julii ; vir verè magnus, ipsâque fortunæ varietate admirandus.

Triginta circiter annos ità in aulâ dominatus est, ut nihil neque majoris neque minoris rei, nisi eo arbitro gereretur : ne vestes quidem Rex, aut cibi genus, aut aulæ ministeria nisi ejus voluntate mutaret. Sed exemplo tamen calamitatis monendi sunt aulici, ut amari a principibus quàm metui malint, quippe metus domini exitium servi est : et fata vix sinunt superbos famulos feliciter mori. Truncus tribus diebus in suggestu relictus pelvis juxta positâ, ad stipem colligendam, quâ sepeliretur homo paulò antè regibus potentiâ exæquandus : sic res humanæ variant. Vulgo fertur, consulenti vatem Alvaro prædictum, Cadahalsum exitio fore ; eum, quod ad suggestum referre debuisset (id ea vox Hispanis significat) oppidum interpretatum illo in Carpetanis nomine, suum quamvis, per totam vitam vitasse ; quæ nos, ut vasa, parùm curanda putavimus.

MARIANA, *Hist. d'Espagne*, l. XXII.

#### Mort de Marie Stuart, Reine d'Ecosse.

ELIZABETHA, postquàm videri poterat ex dilatione moruisse clementiæ laudem, et compulsa ad supplicium imperandum declinasse invidiam, jubet cum reâ juxta regii senatûs ordinumque regni sententiam agi, conficique de sumendâ poenâ mandatum, quod a duobus e ministris ad Mariam in Frodringamum oppidum, ubi Maria detinebatur, perlatum est : ultimaque ei necessitas, Regiæ et regni nomine indicta. Neque imparatam aut reluctantem feralis nuntius invenit. Hunc enim illa diuturni carceris exitum expectabat, haud inscia, in magna principum injuriis haud incipi ut ab incepto desistatur.

Itaque compositis ad Elizabetham reginam, ad Henricum Galliae regem, ad alios litteris, commendatoque, inter monita ad filium Regem anxie transmissa, amore ac patrocinio catholicae religionis, pro qua mater occumberet, et in qua majores sui Reges antea decesserant, in retractus cubiculum, dimissis etiam plerisque fidelioribus ancillis, noctem illam precibus traductura, se abdidit.

Hæc dum Frodringami agebantur, ferunt Londini eadem ipsâ nocte, quam Elizabetha curis agitata ducebat insomnem, matronam in ejus conclavi dormientem, repente spectris expergefactam exclamasse: « Videre se » Mariam Stuartam capite plecti, mox et dominam suam » eâdem securi obtruncari; » quibus clamoribus Elizabetham quæ per haud absimilia visa distrahebatur, exterritam enixè mandasse, advolaret illicò nuntius Frodringamum, ac Mariæ supplicium differri suo nomine imperaret.

Sed serò hæc parabantur, peractâ jam quatuor ante nuntii adventum horis Reginae cæde. Etenim albescente vix dum die, festinantibus qui Mariam adservabant, atque admonentibus cuncta jam parata esse ad ultimum illum velut actum, paucis suorum comitata, jussisque (in questus enim et ejulatus eruperant) ne lætissimum ac triumphalem propè diem importunâ lamentatione corrumpere, in aulam supplicii locum processit pretiosioribus vestibus induta, piaculari corollâ ad latus accincta, et Christi e cruce pendentis imaginem utrâque manu erigens. Ad cujus aspectum audiri ubertim aulâ totâ coepere, quamvis premerentur, suspiria et singultus. Crevitque palàm comploratio, ubi conspexerunt ferale pegma, impar sanè regiae majestati solium, subsequente carnifice, ascendentem. Hoc e suggestu Maria solito lætior pulchriorque (nam visam omnibus perhibent mirâ decori vultûs specie prænitentem: siye nativam



oris formam commiseratio intendebat, seu vicinæ beatitudinis aliquis jam tùm fulgor afflabat), conversa ad multitudinem oravit, qui inter eos adessent fidei catholice cultores, ut secum in eo vitæ mortisque confinio, preces apud Deum consociarent: quem ut innocentiae suæ causam ac testem adorabat, ita ab eodem veniam suæ mortis auctoribus ex animo flagitabat. Postremò, provoluta in genua, postquàm ipsa sibi velum e capite submovit, et collum nudavit lacte candidius, affixum cruci Christum arcè complexa osculataque, cervicem carnifici Regina subjecit: a quo tremebundo atque inhorrescente, nonnisi post tertium vulnus, avertentibus oculos a fœdissimo spectaculo etiam qui mortem ejus votis omnibus expetiverant, regium Mariæ caput, sacras inter preces, amputatum est.

Hunc exitum habuit Scotiæ Regina: magnum, si quod aliud, utriusque sortis exemplum. Formâ, ingenio, regnis Scotiæ atque Galliæ, quæ administravit, et, qui debebantur, Angliæ, Hiberniæque titulis fortunatissimè cumulata; sed, versâ felicitate, nothi fratris odio prodita, Reginæ sororis invitatu decepta, hæresi periclitante criminationibus circumventa, magnatum judiciumque sibi præcaventium sententiis oppressa, ab Elizabethâ amittendi regni metu damnata, nullo teste coràm producta, quo sublato, ex regni lege, damnari ne privatus quidem potuit, post viginti ferè annorum captivitatem, post mutati sexdecies carceris illuviem, tanto vitæ spatio inter satellitum injurias traducto, destituta omni invisentium solatio, præter nonnullas Romanorum pontificum litteras clàm illatas, regnis, libertate, vitâ demùm, indignâ carnificis manu, spoliata est.

FAMIAN. STRADA, *J. De Bello Belgico*, Dec. 11.

La Galère d'Agrigente.

AGRIGENTI olim juvenes aliquot cùm ex conducto collatisque symbolis ad cauponam famosam accessissent, ibique lautius epulati poculis frequentioribus indulsissent, inaudito quodam dementiæ genere, ita mente alienati sunt, ut alii tamen aliorum ab aliis animo non abiverint, sed omnes incredibili consensu in id deliramenti inciderint, ut crederent coenaculum, in quo convivabantur, magnum quoddam esse navigium, quod, coorta subito tempestate, pessimis modis afflictabatur ad Syrtes, extremo jam salutis communis discrimine: sive quia cerebrum ex mero largius accepto undabundum injecisset menti unam cogitationem de fluctibus: sive quod paulò antè, voluptatis causâ in mari proximo vela fecissent non sine aliquâ jactatione ventorum: sed quacumque tandem ex ratione extra ordinem rationis agerentur, servabant tamen factorum ordinem, summâ sententiæ semel susceptæ constantiâ cohærentes sibi: primò enim conclamare alter alteri vocem interturbantes, rimas tabulata ducunt, corruunt antennæ, vela conscinduntur; tum pallescere; tremere, Castorem et Pollucem obtestari, nuncupare vota Neptuno et Thetidi; cumque nescio quis exclamasset: « Exoneranda est » navis, abjiciamus sarcinas; satius est perire nostra » quàm nos. » Enimverò primùm quidem et mantilia, et patinas, quæ in expedito posita erant, per fenestras demittunt; tum popinam ingressi, ollas et fictilia quæque vascula cum omni coquinario instrumento pari impetu deturbant, neque parcunt mensis et abacis, quin omnia ex domo summâ cum festinatione projiciant. Ad subitarium tumultum accurrere cauponæ dominus, remque suam pessumdari videns, ringi, vociferari, objurgare, obtestari, interminari, ac demùm tam nocuos sibi hos-

pites in jus vocare. Tunc ex benè potis nonnemo : « Ecce » Gubernatorem, inquit, qui temone deserto feriat, » ut nos in scopulum impactos in eluctabili naufragio perdat. » Acceptoque fuste, diverberans hominem, addit : « Quandoquidem sedere ad Gubernaculum non vis, » munia nautarum exsequere, exonera nobiscum ratem, » ne, tuâ servatâ re, vitam nostram perditum eas. » Ità metu mortis coactus, è caupone factus nauta sine navigio, somnians in vigiliâ et sanâ mente delirus, suis manibus aulæa, et tapetes, ceteraque parietum ornamenta detrahit, quin et arcas et arculas, omnemque ferè supellectilem per scalas ac fenestras dat præcipites : dum intereâ confluente in viam popello, unusquisque externorum rem oblatam distrahere, rapere, domum comportare properè : et, quod caput est, ipsi familiæ veteres inimici præstò sunt, direptisque bonis, tanquàm spoliis optimis detractis, velut ovantes discurrunt. Sed neque hic conquiescit furor ; quamvis enim partim labore defessi, partim vino depressi nonnihil quievissent, tamen cum paulò post in iudicium publicum seriò adducerentur, tanquàm manifesti factæ per vim expilationis, in eâdem opinione naufragii perstare, atque adeò iudices obviosque homines, tanquàm marinos deos ac deas, pertinaci deliratione compellare : « O viri Tritones, feminaeque nymphae Nereides, quàm malum » domicilium est mare terrestribus animantibus ! Per » Neptunum Patrem, Matremque Matrimam Tethydem, » exhaurite nobiscum sentinam, vel extrahite totum navigium ex hoc fundo, ut sani, si minùs sicci redeamus » domum, et reversi tandem Athenas coram populo et » magistratibus piscium hecatomben vobis ex voto solvamus. » His auditis, iudices, pars hilaritate perfusi, pars misericordiâ commoti, dimissâ concione, comprehendunt, toto foro cachinnis inconditis personante.

P. LEONIS SANCTII, *J. Floridorum*, pars III.

## Le Printemps.

REGINA tempestatum pompas ducit regi dierum, et pulcherrimo eodemque jucundissimo stipat veluti satellitio. Nunc cœlum renidet purius, nunc sol altior, et auro similior, nunc orbis lunæ pulchrior splendet, atque illibati stellarum chori clariùs enitescunt. Nunc fontes manant liquidius, et hibernis compagibus expediti largiùs amnes fluunt, prata collucent floribus, turgent gemmis arbores, detonsi nitent herbarum tori, et per virentes agros agni lasciviunt. Jam naves cum celesmate solyunt e littore, et alas velorum explicant, mox leni cursu fluentibus assultant delphini, et suavissimè quidem anhelantes tranquillo mari fidi comites nautas deducunt.

Lætus autem agricola serenum intuetur cœlum, et aratrum reficit, frugum largitorem Deum appellans; tum strenuè boves aratores cogit sub juga, et dulces imprimit sulcos, totus jam spe delibutus. At opiliones cum bubulcis concinnant fistulas et pastorale carmen accinunt, nunc per gramen abjecti, nunc umbris rupibus insidentes, veris suavitate mulcentur.

Ex alterâ parte olitores plantas excolunt, aucupes calamos instruunt, designant ramos, ad insidias eleganti artificio contexunt. Piscatores profundum scrutantur, purgant retia, petrisque marinis insident.

Interim apes laboriosa, explicatis pinnulis, discedit ex alvearibus, sapientiæ datura specimen; et jam prætervolat, jam flores pabulatur, et castra cerea concinnius elaborat, contextis veluti disparibus, ac sexangulis fistulis, rectos quoque vicos, et alternos angiportus mirabiliter implicans, ut operi firmitatem et elegantiam conciliet. Deinde mel in apothecis recondit;

errat quippe et laborat suo hospiti gratum animalculum, eique feriato fructum affert perjucundum (1).

*Ex S. Greg. Nazianz. P. CAUSSINUS, de Eloq., l. XIV.*

#### Chute du Pont de Florence.

**FERVEBAT** studio ludorum Florentia; et ad novum spectaculi genus tùm ex urbe tùm ex omni viciniâ, magna vis hominum in pontem confluxerant. Quippe exhibebatur scena horribilis et atrox, aptaque vulgi oculis qui terrore pasci plerùmque amat. Patebat hiatu immani barathrum inferorum; ibi et damnati et caco-dæmonum fuliginosi vultus, et multiplex pœnarum facies alteram pontis crepidinem latè horrificaverant. Intereâ dùm pueri matresque ac viri pallent, obtutu toto defixi, ecce pons qui sublicius erat, turbæ ingentis non patiens, diductis repentè compagibus, concrepuit, et in subjectas aquas magno cum fragore procubuit. Ruit apparatus omnis ludorum, ignesque, ac tormentorum supellex; Dæmones et vulgus omne spectantium, inter ligna et sublicas confusâ strage coacervantur. Hinc vagitus, illinc clamores, et veri jam ululatus. Concutit totam urbem fragor rupti pontis, simulque pervolat tantæ calamitatis rumor. Concurrere undique trepidi cives; planctuque ac gemitu viæ passim compleri. Alii lugere amissos; alii quos amissos rebantur miserabiliter complorare. Stabat in fluvii ripis excita sedibus universa civitas, parentesque ac conjuges liberique suos quisque invocare nominatim, haud minùs miserabiles quàm qui inter aquas foèdè luctabantur : cùm vario corporum habitu motuque, varios aut emergentium aut pereuntium casus exprimerent, protendentes manus, annuentes,

(1) Voyez les *Leçons françaises*, tom. I, *Descriptions*.

adhortantes alii, alii projectis funibus, aut lintribus quos fors obtulerat extrahere conantes. Et quanquàm ad ferendum auxilium cuncti trepidabant, multi tamen mortales aut oppressi trabibus aut gurgitibus hausti periëre (1).

Car. LE BEAU.

Détresse des Hollandais dans la mer Glaciale.

Ex duabus Hollandorum navibus, quæ, relictis Orcadibus et Norvegiâ, procul in altum evectæ, indè vela in diversum tenuerant: una, curvato paulùm in austrum cursu, conata hinc in ortus proficisci, tempestatibus retrò in Russorum littus adacta est; inferiùs altera ab inventis sibi insulis cursus in Zemlam rexit: ubi, dùm notas oræ ac primi itineris vocabula nautæ cognoscunt, ventis, indè gelu, impediti quominùs profundo remearent, difficiles inter moras, hominumque et maris pericula, vix Arausionenses insulas superavère: quippe cùm continuâ glacie firmare sese ut solido cogerentur, eadem rupta iterùm et in se rediens cuncta in discrimen daret: quæ vera quidem, sed haud minùs stupenda Græcorum fabulis.

Paulùm progressis in alterum Zemlæ latus atrocior in dies vis frigoris hinc Scythicum mare, indè Nassavicum in fretum iter præcluserant. In spem denique ultimam quà venerant revertentibus, hæsit glacie succincta puppis, nec procul littore; quo factum est ut postea, etiam cætero mari liquescente, navem gelu non dimitteret. Nec jam aliud restabat, quàm ut in Zemlâ hibernantes, meliora tempora opperirentur. Ità raptis e navi tabulis, sibi suisque rebus receptaculum struunt. Ac fortè vim lignorum maximam, incertum quibus e

(1) Voyez les *Leçons latines anciennes*, tom. I, *Tableaux*.

terris; eandem in oram æstus adjecerat: quod tantâ in solitudine tegmen et ignibus alimentum fuit. Quotidiana interim cum ursis prælia, qui sæpè clamoribus, et, si acriùs furerent, tuborum telis profligabantur. Carnem esu insalubrem (quippe sola illic ferarum terrestrium alimenta maritimæ sunt feræ) haud sine noxâ didicerunt; adeps usum nocturni luminis dedit.

Miserrimos mortalium, feras inter, sterili in solo, post cuncta hominum bona, sol etiam deseruit, quem stato anni tempore subire terras, nec nisi post longum tempus resurgere licet alio itinere comperissent, nox velut ignaros oppressit. Cum tenebris auxit horror, aerisque intemperies. Cumulatas immensum nives, ne habitaculum obruerent, ægrè amoliebantur, frangebantque in gradus, tantâ cœli circumsistentis asperitate, ut egressis parumper ad tumorem usque artus adureret. Atque intus etiam densus adeò rigor, parietes, hominum amictus, ipsamque flammam obsederat, ut torrerentur quæque faciliùs quàm calescerent. Igitur dùm clausis foribus certant cum frigore, penè incautos exanimavit prunarum vapor. Balneum imitari, aut candente ferro saxove cubilia fovere optimum e præsentis copiâ repertum est. Vacua ursis loca (namque ursis obtusior visus, atque eo tenebras metuunt, specubus abditi) vulpes occupaverant; quæ per insidias captæ, exuviis et victu profuere.

Infelicem diù patientiam spes anni melior erexerat, cum veluti divinâ miseratione sol etiam celerius quàm mundi ratio ferebat, vultu toto emicuit. Nam noctis spatium trimestri brevius fuit, quod septuaginta in partes depressus orbis longius deposcit: sive in loci situ, aut cæci temporis mensurâ erratum est, quod vix credibile ipsorum diurna faciunt, sive ipso haud procul infra terras labente densa nubes solis speciem percussit, seu quædam naturæ adhuc latentia mirari satis est. Tum primùm ausi proropere, et languida corpora in labores firmare, qui

difficillimè instabant. Vocabat enim apertum mare, quò septentrionem ipsum, non quò Scythiam spectat; sed tùm navis glacie adhuc hærentis exitum frustrà nautæ morabantur: cunctantesque propè alimenta modicè hactenus in dies et viritum partita defecerant: corruptus gelu potus nivem compulerat liquare, et, si diutius hærent; hiems rursus ac cætera perniciēs imminebant. Scaphas expeditvère; et, quanquàm ægri plerique, cunctis tot nuper mala et egestas vires attriverant, omni molestiâ fortior animos dedit necessitas, ut glaciem in juga surgentem ferro panderent. Hâc viâ pulsæ in mare naviculæ tandem fluitaverunt: neque dùm laborum finis, crebro retenti gelu, velisque et remis, sæpè et manibus vix eluctati indè proxima littora coguntur per inediatiā intervīsere: namque ova ibi reperiēbantur, et volucres faciles capi, quia morem ignorabant humanæ aviditatis; et passim locorum insequentium argumēto compertum est, quòd ab aliis animantibus fugimur, non illis deesse, sed nobis mansuetudinē. Ægri intereā obnoxii imbribus et cœli rigentis injuriæ, pereuntes sociis dolori: aut etiam invidiæ fuerunt, cùm suos illi casus, quem sors exitum daret, pavidi respicerent. Pauci superstites modò per glaciem navigia trahebant, modò elisa, reficiebant: ita cùm vires contra imminutas labor cresceret, haud ultra operi pares clementior ventus in ultima Zemlæ et nostro obversa oceano tulit.

Primos illic hominum toto post anno Russos nautas conspexere, et fortè eosdem, quos secundâ navigatione, fretum propter invenerant. Illi igitur ut gens est minimè irreligiosa, vultu et, quantum intelligi poterat, voce miserari, quòd speciosæ quondam classis istas reliquias intuerentur: quin ultrò alimentis juvant. Reperta hîc salutaris herba solutæ membrorum compagi, quæ, propria navigantium pestis, frigore inhorruerat, æquitate naturæ erga mala remediaque. Britannica Plinii putatur,



quam Frisiis monstrantibus a Romanis adversus id mali usurpatam diligentissimus scriptor memorat. Mox retenti diù obluctante vento Russici maris in faucibus, et quoties extrema fames urgebat, fortuito navium occursu, postremò Lapporum, qui id littoris incolunt, resecti hospitalitate, cùm et scaphas tenebræ segregassent, pariter Quisodunum insulam pervenêre. Ibi intelligunt (toties res perditas casus corrigebat) vicino in portu navem, quæ secum Hollandiâ solverat, in eas partes rejectam tempestatibus, reditum in patriam adornare. Duodecim fuêre, principe Jacobo Hemskerkio, quos, ab ultimâ mundi solitudine Amstelodamum reduces, tanti laboris miraculum illustravit.

Hug. GROTH, *Histor. de Bello Belgico*, lib. v.

Même sujet.

JAM ultimas Europæ metas prætergressi nautæ Batavi in glaciale pelagus evehebantur. Hic excepit eos tetra nox et vix paucularum aliquot horarum dies, crepusculo quàm diei similior. Quippe solis obliqua lux, in remotissimo prospectu vix emergens, obductis intercepta nebulis languida admodum ac propè emoriens accidebat. Tum verò nautas incessit desperatio : rapi se ultra mundi terminos, ubi natura deficeret; imminere cœlum atrox, quovis carcere fœdus; nec quod spirent quidem quidquam esse, præter nives ac pruinas. Jam intolerabili frigore ipsas quoque venas afflari; errare se in situ, in tenebris; umbras, non homines; ejectos quasi in sepulcrum ingens rerum humanarum, ab hominum, imò etiam a ferarum domicilio et communi luce seclusos. Hæc inter se fremebant. Sed non minùs in reditu quàm in progressu periculi apparebat. Cùm enim paulò acriùs sol in dies incalesceret, ecce ex oceano polari solutæ

affluunt immensæ glaciei crustæ, quæ primò ignaris fluctuantium in salo insularum speciem præbebant. Illæ autem nunc collisæ invicem, nunc immmani crepitu dissidentes, totam undique maris faciem horrificaverant. Quædam etiam incubantia mari silvarum monstræ, ursos inauditæ molis, quos a littoribus temerè progressos diducta repentè glacies rapuerat, fœdum in modum ululantes portabant. Jactabatur navis inter glacies, concretasque undas non minùs quàm scopulos horrebat. Ibi miserrima erat nautarum trepidatio, cùm deprensi coeuntibus crustis, modò securibus frangere glaciem, modò navem, levatam multo molimine, super duram lubricamque planitiem trahere cogebantur. Tandem ærumnis ac laboribus confecti ad novam Zemlam appulerunt.

Ac primùm alicujus in tantis malis solatii spem conspecta terra fecerat. At ubi horridum hispidumque littus et frigoris injuriâ devastatum, nives propè cœlo immixtas, et æternæ hiemis fœditatem propiùs aspexerunt, tùm despondere animos; fractique et a se invicem deplorati, in oram, quasi ad sepulturam, hùc adducti fatis, egrediuntur. Indè alii ligna colligere, quæ in terram arbustis ac stirpibus nudam fluctus deferret; alii strati humi, torpentibus frigore nervis, alienam opem implorare. Quidam etiam naso auribusque truncatis quos frigoris abstulerat impotentia, vel amicis horribile spectaculum præbere. Jam strues lignorum congesta erat. Hoc verò laboris velut initium fuit de integro. Nam lignis usque ad medullas glacie oppletis, vix excitari flamma poterat, et ubi tandem exarserat, nihil ferè opis afferebat; ac miseri gelu propè enecti, cùm ad ignem adrepsissent, ambusti vix animos recipere; torreri potiùs quàm calefieri, ità ut lintea glacie rigentia, cùm ignibus admoventur, dùm pars adversa foco fumum ederet, ex aversâ parte novam de integro glaciem contraherent.

Jacebat humi strages miserabilis aut morientium, aut mortem expectantium; donec qui pauci supererant, capti ferè omnibus membris et semianimes ad navem reversi, e diris tandem littoribus, amissâ suorum maximâ parte, recesserunt.

LE BEAU.

Deuil des Soldats, après la mort de Turenne.

UBI primùm vulgata est per ordines luctuosa vox Turennum cecidisse, invasit statim omnes mœror; et eodem ictu velut exanimatos triste parumper silentium defixit. Deindè erumpere ejulatus, gemitus; et in communi luctu dissoni clamores. Collacrymari invicem orbitatem suam; interrogare alii alios, « cuinam fato relictis » essent? quis Turennum vicem impleret? quis tot victoriis » partum decus tueri posset? » Nunquàm amisso patre tam acerbus tamque concors unius familiæ luctus fuit, quàm erepto Turenno universi exercitus comploratio. Quin etiam legatus Hilarius cui eodem tormenti ictu, quo ceciderat Turennius, abscissum brachium fuerat, suo et imperatoris sanguine respersus, filio parentis casum dolenti: « Non ego, inquit, sum dolendus, ô fili! luge » potius hunc tantum virum cujus desiderium expleri » non potest. » In hoc statu rerum Lorgius, Turennum sororis filius, vir impiger, et omnes imperatorias artes sub haud pœnitendo magistro, ipso avunculo, edoctus, dissimulato luctu, ut fractos militum animos reficeret, reductas in castra legiones per quatuor dies continuit. Interea circumire singulos, adhortari, excitare mœrore torpentes, castigat lacrymarum et inertium querelarum: « Non muliebri fletu proseguendum tanti viri obitum; » erigerent animos, meminissent in manibus suis et » patriæ et ipsius imperatoris mortui decus positum esse;

- » nec cum uno mortali corpore extinctum esse nomen
- » Gallorum. »

Ubi paululūm recreatos videt, movere indē castra et transmittere Rhenum parat, ne, si nondūm firmatos animos hostis lacesseret, jacturæ magis quā prætēritarum victoriarum memores viderentur. Nec fefellit hostes, qui, ubi abeuntes sensēre, insecuti statim et in terga hærentes, in Rheni ripis aggressi sunt. Nec dubiam fore victoriam sperabant, quippē inter exercitus, alterum ferocem vigentemque viribus, alterum recenti ducis interitu propē jam victum. Hic verō patefactum est in fortibus viris non minū animosū esse mœrorem quā fiduciam. Nam, verso repentē in iram luctu, milites, in hostem frendentes frementesque conversi, ut ereptis catulis bellæ, atrox prælium ediderunt, hostiumque viū tam acriter repulerunt, ut vivum sibi quisque ducem hortantemque proponere animo videretur. Parentare imperatori hostium sanguine cupiunt; Germanosque pœnituit Gallorum gemitus et lacrymas perturbāsse.

Represso tandem hostium impetu, Rhenum trajecēre, convertentes sese identidem et cruenta doloris sui signa in hostili terrā relinquentes. Postquā in tutum pervenēre, Lorgius, ubi jam suo et exercitūs dolori indulgeri sine periculo posse vidit, avunculi sui funus, quanto maximo apparatu potuit, castrensi pompā concelebrat. Hic verō liberior exercitūs mœstitia sese effudit. Alii lugubri fasciā redimito capite, alii pullā veste, omnes cum iis quibus poterant luctūs insignibus lacrymantes processēre: sed in intimis omnium pectoribus infixā penitēs hærebat mœroris acerbitas, omni significatione major. Pro se quisque deindē funebrem tanti viri laudationem militari facundiā exsequi: « Ereptum sibi non ducem, sed » patrem, qui milites liberorum loco reputans, non im- » perio magis quā exemplo præset: nihil sibi præci- » puum sumeret nisi pericula et labores; suorum sangui-

» nis parcus, prodigus sui. » Conferre eum vel maximis de quibus fando audiverant imperatoribus, omnibus anteferre; ad hæc narrare pugnas, referre egregia facinora quorum spectator quisque ac testis fuisset; memorare unusquisque quoties ab ipso laudatus ipse et donatus, ejusque facta eò lubentiùs prædicare quòd solertissimo arrogantiae genere cum ejus laudibus suas ipse laudes ex occulto conjungeret (1).

*Idem.*

#### La Tempête.

PRÆTER disturbatum procellis aerem, et furentium austrorum violentiam, ex obliquo pelagus miscentem, etiam nubes, æstivis incensæ caloribus, inter sese collidebantur, creberrimoque ruptæ tonitru, fragoribus aures nostras, tumultu pontum ac cælum, fulgurum flammis oculos, ignium jactu proxima littorum et pavore palpitantia corda verberabant. Insuper etiam tenebri ssuppressus diei nitor nocte præposterâ nautarum ministeria suspenderat, nullâ regendæ navis spe relictâ, neque modo vel adjumento; dixisses in antiquum omnia revoluta chaos, quodamque mox veluti cataclysmo superfundi. Nam etiam, ne quid ad malorum cumulum deesset, præcipiti ruinâ fracta nubila (cùm procella, quam *ecnephiam* dicunt, nimbos impelleret), improbis imbribus descendebant, et, assiduo casu labentia, mari veteri maria nova videbantur effundere; cùm interim et ab anchoris ancipiti fide pendens, navigium nostrum fluctuaret, in momenta singula ruptis rudentibus, et sævo tot fluctuum agitato saxis littoralibus celox impingeretur. Silvæ quoque, propinquis prætentæ littoribus,

(1) Voyez les *Leçons françaises*, tom. I, *Narrations*.

mari magis ad horrorem, quàm ad subsidium përiclitantium, incumbabant, non frangendis ventorum incur-sibus, quàm augendo terrori, validiores, insano mugitu tot millibus arborum inter sese collisis, et ramorum fre-mitu longè latèque tumultuante (1).

P. J. BISSELIUS, *Argon. Americ.* l. III — 6.

L'Inondation.

LABORABATUR inopiâ frugum et caritate annonæ ob messis angustias, et sæviùs in dies miseria grassabatur. Accessit ad hanc calamitatem malum aliud quod fœturæ spem segetis in discrimen adduceret. Ecce seu copiâ nivium, seu vehementiùs invecti maris æstu, in immensam altitudinem intumescunt fluvii, et propè subitâ aquarum diluvie latiùs effunduntur. Quin etiam, ut in civili tumultu insignem se sævitiâ facit infima plebs, crescunt in insolentem molem rivuli etiam ignobiles, et qui tenui ac propè arido alveo aquationem antea dabant, viciniam inundant. Franguntur aggeres, pontes corruunt, invicta bellis arcium propugnacula evertuntur. Fit in agris strages hostili strage atrocior. Agrestium casas non subruit solùm, sed abripit undarum vis; vicos etiam totos cum impetu avulsos trahit. Alii repentino malo oppressi hauriuntur; alii vicinâ clade admoniti deserunt casas, et miseram supellectilem, dummodò sese et charissima pignora exitio eripiant, respectantque lugentes agros suos jam frustrâ seminatos. Quidam etiam nocturno incremento in villis castellisque deprehensi, lucente jam die inclusos sese et obsessos, villasque in insularum faciem versas vident, et in improvisâ calamitate nullâ spe

(1) Voyez les *Leçons françaises*, et les *Leçons latines anciennes*, tom. I et II, *Descriptions*.

tuendæ vitæ, si diutiùs aquæ incubuerint, jam futura famis mala animo præcipiunt; quam ut effugiant, alii mittunt se in aquas, alii e tectis vicinorum opem, si quæ sit, implorant; et in urbibus quas fluvii aut prætexunt, aut interfluunt, eò fœdior facies, quò densior materies mali. Nam in inferioribus locis propè demersas domus, refugientibus in summa tecta incolis, vix in sicco habitant; relinquunt excrescentibus aquis ac summa gradatim petentibus. Ædes undique deseri, exportari vasa et undis corruptæ merces; ad alienam opem quisque tendere. Excussi e tectis suis, et mediâ in patriâ ejecti et exsules. Qui verò etiam procul a periculo habitabant, ii non miseratione solum, sed propriorum etiam malorum metu angebantur, cum interclusâ navigatione uti non possent beneficio fluminum, et in convecto antea comœatu brevem sibi spem superasse intelligerent (1).

Car. LE BEAU.

Tremblement de terre de Lisbonne.

OLYSIPPONEM, Lusitaniæ caput, regiâ sede et portûs opportunitate celeberrimam, exiguum evertit temporis momentum, posteris memoranda clades. Sereno cœlo, dum effusa in templis multitudo festum celebrat Sanctis dicatum universis, exoritur repente strepitus, velut discerpentium rotarum: tremit valido ictu quassata humus, corruunt protinus tot millibus repletæ ædes, imaque evellitur arx regia, pereuntium dissonos inter clamores, horridumque ipsius ruinæ fragorem. Plurimi dum tecta repetunt, gravior irrupit et latiùs fusa pestis. Hiscebat icta iterum tellus, hauriebatque superstantia, certo parietes intra versantium exitio, nec minori dilabentium

(1) Voyez les *Leçons latines anciennes*, tom. I, *Descriptions*.

discrimine, dùm firmare fluxâ humo non datur gradum, et ruentia inter pondera fugam abstulerant occlusæ viæ. Jacuit immensa strages, sexûs omnis ætatisque mersa veluti congeries hominum et animalium, infelicis urbis aliquandò decus ac divitiæ. Ademerat sortis humanæ commercium mali atrocitas, nec propria inter pericula referebantur miserorum ejulatus, qui laceris artubus, inter saxa hærentes, aut vi pulveris oppressi, servari precabantur spiritum, nec opem ferre licebat, ob interjacentis inolis obicem.

Increscit haud multò post, extra æstûs vicem, ipse Tagus, tantâque vi infunditur, ut primo impetu raperet occurrentia; subito post recessu misceret undis, siccum dum linquit littus; mox reversus, denuò irrupit, cessitque iterum tumescens magis, minori tamen cum noxâ. Mersa tùm aquarum lapsu, majora propè flumen, ad excipiendum vectigal exstructa, jam labefacta ædificia duo. Nec cladis expertes quæ portum naves, ipsumque tenebant pelagus, quarum complures anchoris avulsæ, projectæ in solidum, fractæque sidebant. Sic maris convellebantur et terrarum ima. Tot malis cumulum imposuit finemque flamma sæviens quæ primùm sicut obducta, mixto dein pulveri fumo, vix advertebatur: mox ubi corripere licuit et adurere obstantia, ventoque irritari, validiùs exarsit, per quatridduum grassata. Juvit ignis vim malorum fraus qui, impunè quò diriperent, ipsam ultrò aluère flammam. Auxerant scelestorum colluviem ruptis portis elapsi qui custodiâ detinebantur: latrocinia dùm agunt, publicæ calamitatis additamentum, donec comprehensi plures ipso in limite justas dedere pœnas. Æquora crederes, terramque et ignem, ipsos quoque cives conclamatæ urbis decrevisse suprema.

Cecidère proceres nonnulli, et inter ipsos, Hispani regis ad Lusitanum orator. Incolarum verò constat non paucos, sustentatâ per aliquot dies vitâ, ocluso exitu,



fame periisse. Lugens haud dubiè humanarum ærumnarum obtulit documentum urbs paulò antè florentissima, citra vim hostilem, cœlesti irâ, naturæ vitio, ipso tandem deficiente solo, excisa. Tristis quoque eorum et luctuosior ferè sors qui tot malis superstites, agros pererrabant, victu tectoque destituti, dùm perditas opes, charissimæque pignora, misero quisque redimit spiritu, in communi fato, nullo pauperum discrimine, ditiorumve. Brumali, simul fœdo procellis, urgente cœlo, promiscuam excepère multitudinem ex linteo, vel ligno tabulata; nam parietes subire infida vetuit tellus binos per menses inquieta, secutosque per annos, nutans subindè. Jactura mercium immensa, quam auxit e Brasiliâ nuper adventans classis, auro onusta et adamantibus, exposito in terram onere, haustoque: magnum tamen et liquefactum pondus, inter macerias latens, aut flammis impervium, effodi contigit.

Adnotabant plurimi teterrimam calamitatem in eam incidisse diem quâ solemne erat edendum iudicium, vulgò *actum fidei* nuncupatum, quo plecti solent crema-rique diro *Inquisitionis* mandato qui circa sacra dissident, quod sicut ad spectaculum conventuros illexit complures, auxit cum invidiâ stragem. Felici aberat auspicio, cum regiâ familiâ, arci Belemensi rex insidens, quæ quidem, sicut Tago adjacentia cuncta, at violenter tacta minùs, plures per dies, habitare regem sub tentoriis, latèque coegit lustrare patriæ funera; inhorrerat enim Lusitaniæ ora, fluminum, Oceanique incremento et oppidorum ruinâ atrox, propinquum quoque Africæ littus, eversis Mauritaniæ urbibus; unâque attigerat Hispaniam sævitia mali, donec, fatisciente impetu, deflagavit intra Galliam, et, quâ respicit meridiem, Germaniam. Tot graviora passis additur victûs penuria. Subventum primò ab Hispanis, largiendo pecunias, commeatusque: mox e Britanniâ adventæ naves, frumento onustæ, centumque, ex decreto comitiorum Angliæ, adjiciuntur librarum millia.

Sidente tandem terrâ, vel minores edente motus, immisso militum præsidio, purgare cœptum areas, discernere diruta, obstructas aperire plateas, componere corpora, extra casum adeò nemine, quin ereptas lugeret necessitudines. In plana consederant edita quondam, prominebantque non visi antè tumuli, horridique gurgites, naturæ vestigia versæ ubique. Diù obstitit labori tabes, totque insepulta ob cadavera, pestifera lues, obtulitque remedium frequens aqûilone hiems. Hæsitatum dein restituere an placeret in ipso solo urbem, an linquere, penates et omina trucia. Ambigentes inter recentia veteraque movit loci marisque opportunitas, idonea quoque ad ædificandum lapidum strues, ipsumque curarum tædium, ne novis posthaberentur antiqua. Ipsî ergo cineri, fœdisque ruinis, juvante mirâ commerciorum frequentîâ, paucos intra annos, superstruitur splendida urbs, vetitâ tectorum altitudine, neque ultra alterum tabulatum, experti ob mali formidinem, attollitur regia (1).

Res ævo suo gestas memoriæ tradidit Carl. Gust.

SCHULTZ ab Ascherade. 1789.

Les Iles Fortunées.

PRODITUM est a veteribus poetis esse quasdam in Oceano insulas, ad quas post mortem deferantur eorum animi qui sanctè religiosèque vixerunt. Ibi eos inter se jucundissimè ac suavissimè vivere, in amœnissimo quodam prato, quod gemmeâ florum oculis naribusque gratissimorum varietate perpetuò distinctum picturatumque sit; nunquàm non illic ridere cœlum, frondere arbores, pubescere herbas, nitere omnia : spirare assiduè mollissimos favonios, quorum flabellis arborum comæ leviter

(1) Voyez les *Leçons françaises*, tom. I, *Descriptions*.

ventilatæ placidissimo murmure auribus blandiantur. Eò accedere innumerabilem vim ac copiam immortalium avicularum, quæ usque et usque liquidissimos cantus tenui gutture funditantes, intimos audientium sensus incredibili voluptate permulceant; pratum ipsum perennibus rivulis variè intersecari, quorum aquula nitidissima ad versicolores lapillos molliter fracta et allisa susurrum efficiat dulcissimum. Ità quæ flosculorum ambrosios odores exhalantium suavitate, quæ zephyrorum viridantibus arborum ramis illudentium sibilo, quæ volucrum concentibus, quæ blando murmurantium rivulorum strepitu beatas illas mentes indesinenter hilarari. Ergò alios ad Orphei Amphionisve lyram choreas agere, alios psallere, alios corollas texere, alios in herbâ fusos, quæ tellus tremulis laurorum ac myrtorum opacatur umbraculis, jucundissimos sermones conserere; humum ipsam, opum suarum prodigam, sine ullo cultu ter quotannis ubertate summâ alimentorum copiam eis suggerere ac subministrare (1).

MURET, *Var. Lect.*, l. v. c. 1.

### L'Opéra.

AMÆNISSIMO in horto sedet Voluptas, gramineo fulta toro, vernis coronata rosis, lyram sinistrâ, poculum melle delibutum dextrâ manu præferens. Circûmque supraque caput volitant denso examine pharetrati Amores. Ante illius pedes jacet humana Ratio floreis religata nexibus, et epoto calice mellito semisopita. Adsunt e cunctis terrarum partibus Heroes et Heroïdes amatoris quondam artibus insigniores. Conveniunt ipsi Dii Deæque omnes, quos Fabulâ toto passim discriminavit Mundo,

(1) Voyez les *Leçons latines anglaises*, tom. II, *Descriptions*.

et Cupido suis ardoribus inflammavit. Convocantur ad istam amœniorem scholam, et admittuntur homines utriusque sexûs, juvenes præsertim ac puellæ adhuc rudes amoris, sed jam dociles. His omnibus Voluptas sua dictat præcepta, quæ fermè talia sunt : carpere quoscumque obvios flores, et iis, antequàm marcescant, caput redimire; occupare delicias præsentis, et quid vehat hora sequens nunquàm prospicere; obsecundare cupiditatibus suaviter invitantibus, et rationis aliò vocantis monita obseratis auribus præterire; indulgere amoribus, et in iis omnes vitæ beatitates collocare.

Hæc documenta Voluptatis delicatissima, teneris inclusa versiculis, argutis modulata fidibus, excipiunt Sirenes canoræ, et in medio saltantium choro liquidâ voce concinunt. Eadem cantitant pascuis egressi Pastores et Nymphæ, silvis educti Fauni, Dryades, aquis emersi Tritones et Nayades, delapsi e Cœlo, advecti ex Orco Dii superi atque inferi, omnes pariter ad recolendam suorum memoriam amorum revocati. Intereà blandis omnia resonant suspiriis, et amorem volucres, amorem zephyrî, amorem rivuli, amorem saxa docentur suspirare.

P. PORÉE, J. *De Theatro Oratio.*

Grotte de Calypso.

ANTRUM erat ubi in rusticâ simplicitate nihil aberat venustatis. Non hîc quidem nitebat aurum, non argentum, aut marmor. Nullus ex columnis, ex pictis tabulis decor. At excisa rupes in fornices varios dividebatur, laqueata scrupis atque conchyliis, et serpente flexibilibus ramis hinc et indè labruscâ parietes vestiebantur. In medio solis æstu, molle frigus aspirabant zephyri. Errabant inter amaranthos et violas levi cum susurro fontes, ac variis in locis balnea præbebant crystallo nitidiora. Humus cîrcâ

viridis, et stellata mille floribus. Cingebat amœnissimâ nocte nitentes campos opacum nemus solibus impervium. Ibi sacrum silentium, nisi cantus avium audiretur, ac rivuli sonitus, qui summâ de rupe præcipitans fervebat spumis, et fugere per prata properabat. Ipsum verò antrum in medio collis clivo prospectum dabat in mare, quod modò stratis undis quiesceret, modò dementi fluctu illidebatur, rupibus ingemens, et tumentimole insurgens ferocius. Ibat aliâ de parte fluvius distinctus insulis, quas tiliæ florentes et populi aeris prætexebant. At interfusi insulis canales vario lusu per arva ferebantur. Alii currere pellucidis undis, alii stagnare desides, alii multiplici mæandro redire in sese, ac sua sæpè vestigia relegere, quasi amœni ruris desiderio retenti. Procul montes immixti nubibus, qui enormi figurâ et lætissimo prospectu visum terminarent. Vicini colles vestiti pendentibus pampinis, quibus vindemia tegi vix poterat, quin erumperet. Ibi ficus, oliva, punica malus, cæterarumque arborum luxuries, horti amœnissimi specie campos induerant (1).

Car. LE BEAU.

La Maison de campagne.

AULÂ tumultuante, secesserat in villam suam Artemius, specie quidem levandæ infirmitatis ex aeris mutatione, reverà ut otio frueretur, et periculossæ negotiorum administrationi subtraheret assuetum curis utilioribus animum. Neque squalida et fovendo apta mœrori solitudo quam petierat, vir honestis voluptatibus æquè ac pacinatus : eâ quippe rerum amœnitate conspicua erat, quæ vel captivo et exuli, post abscissas spes damnatamque fortunam, placere potuisset.

(1) Voyez tom. II, *Narrations en vers.*

Ex colle modico, liber in patentissimos campos, serpentemque per diversos errores fluvium prospectus domum commendabat, inter vineta et frondosas ulmos non invidiosè surgentem; verùm ex formâ, nec vulgari, nec superbâ, et ex munditie quæ ubique pari honore nitebat, senatore ac philosopho dignam. Præcipuis partibus, quarum in interiori ædificio cura potior est, parçâ manu cum auro marmor additum; ut inter artis delicias non periret modestiæ decus, sobriæque et sibi imperantis fortunæ verecundia. Parietes ad corporum sanitatem, stramento nexili, a summo ad imum vestiti, aulæis additis, etiam venustè abscondebant suam rusticitatem; nec deterior reliqua supellex, cujus domini esset, et quàm sapienter culti, ipso rerum nitore testabatur.

In singulis ferè cubiculis, pictorum famâ illustrium tabulæ plures, operosâ manu exaratae. Accedebat ad tot artium ornamenta bibliotheca rusticationi accommodatior, non in quâ essent ad fastum plura volumina, quàm quæ sapienti sufficiant, scientique librorum copiam ingentem non minùs eruditioni officere, quàm flammæ vim olei nimiam, corporique humano cibos abundantiores. Satis fuerat Artemio, ad studendi commodum eos collegisse scriptores, in quibus præcipua auctoritas, scientiæque, ut ità dicam, sive sacræ, sive profanæ, principatus. Inter hos reges nullus ex auctorum plebe admissus fuerat, pudueratque magnis istos admiscere qui sunt, etiam in amplissimis voluminibus, quandòque tenuissimi.

Eadem erat hortorum ratio, omni artis, seu naturæ varietate spectabilium. Illic non modò flores, qui apud nos colore aut odoribus præstant; verùm et ex peregrinis præcipuos videre erat, quos ad alieni soli patientiam adduxit ætatis nostræ diligentia. Neque minori studio undique collectæ arbores quotquot fructibus utiles sunt, ex consilio in diversa distributæ, ut non unius partis tota esset fœcunditas. Plures tamen in viridarii ambitu muris

*affixæ* opportuniore sole fruebantur, et fructuum maturerentium colore provector, ad præsentio rem voluptatem invitabant intuentes.

Nec molles ex fronde porticus, nec statuæ dispensatis per fistulas aquis manantes, pulcherrimo loco deerant; neque in multos passus productæ ambulationes; non denique ad solitudinem inter densissimas arboresfurtivi recessus: ut sive confabulari velles, sive extra conspectum spatium, necessariis curis sine teste intentior, dissimilis voluptas jucundissimâ vice afficeret diversa cupientem (1).

Petri FIRMIANI, *Sæculi Genius*.

Maison de plaisance de l'Empereur Cang-hi, en Chine.

VILLA *Yuen-ming-Yuen* ad Sinenses leges fuit exacta, quibus hortus est brevis et nitida totius naturæ imago. Indè intra unius horti fines, disjecti ac sine ullo ordine, aut naturâ aut hominum manu dispositi montes, colles, valles. Passim aquæ, quarum aliæ et rupibus præcipitantur, aliæ e fontibus scaturiunt, aliæ rivis vagantur, aliæ canalibus arctantur, aliæ in stagna, in lacus diffunduntur, omnes in quandam maris immensitatem confluunt. Nulla certa iis regula: solis naturæ legibus regi moverique omnes videntur. Hæ scopulis illis, illæ inter lapillos susurrantes, modò recto placidoque cursu, modò incitato, prærupto, retorto. Pontes iis impositi, alii agrestes, alii elegantiores, lignei, lateritii, sectisve e lapidibus, diversi omnes, perpauci recti planique; multi testudinati, gradati, miras quoque in figuras longasque ambages torti. Ripæ naturâ, non arte, aut itâ dissimulatâ, ut nunquàm ars appareat, terreæ, herbosæ, saxeæ, rectæ, curvæ, obliquæ, anguloso procursu aut sinuoso recessu

(1) Voyez les *Leçons françaises*, tom. I, *Descriptions*.

interruptæ, interspersæ calamis, arundinibus, sagittâ (1), persicariâ (2), aliisque fluviatilibus herbis, quibus diversa forma, flos varius, et venusta species. Inter canalium stagnorumque undas emicat *Lien-hoa*, speciosum nymphaeægenus (3), lætum foliorum amplitudine et viriditate, lacteo puniceoque simul flore maximo insigne, ut olim Ægyptiis, sic adhuc Sinensibus gratissimum. Per colles dispositæ arbores, ut fert quarumque natura, aut floriferæ, aut frugiferæ, aut silvestres, aut peregrinæ. Colle persicorum malorum nihil visu pulchrius.

Vallibus insident regię domus, singulæ in singulâ valle; plus ducentæ numerantur, cæque amplissimæ, viri alicujus principis totiusque ejus familiæ capaces. Rarò tamen habitantur, in solos fermè usus prandiorum, cœnarumve, aut deambulationum paratæ. Cedrinis columnis, aliisque selectis e lignis, nitent. Subgrundia, fastigia, tecta, diversis coloribus illita. Unicuique domui adstat proxima spadonis custodis domuncula, quæ latitat, muro aliquo oblecta. Imperatoria autem domus, ubi imperator, materque, si vixerit, et imperatrix, cæteræque feminæ, et ancillarum atque spadonum agmina latè habitant, proxima est a villæ ingressu, post primas aulas, et cavædia, singulosque eorum hortos, cincta latis altisque aquarum canalibus, decem circiter *Li*, sèu leucæ unius ambitu.

Ibi refulget ditissimi imperiï opulentia, sericis, aureis argenteisque textis, diversicoloribus pigmentis, Japonicis Sinicisque vasis et artificiiis, lignis, lapidibusque pretiosissimis, omnibusque regalibus opibus magnifica.

Indè recto fermè limite via ducit ad oppidum, mediâ ferè in villâ situm. Sua habet valla, turres, propugnâ-

(1) La sagittaire.

(2) La sagittaire orientale.

(3) Le nénuphar.



cula, fora, templa, curias, prætoria, portum, naves, omnis generis officinas, cauponas, tabernasque, et reliqua omnia quæ in amplissimâ urbe occurrunt. Velit princeps, statim oppidum occupatur a spadonibus, veste habituque mentitis milites, judices, artifices, mercatores, et cuncta vitæ civilis officia. Momento obversantur magnæ urbis concursationes, strepitus, tumultus, nundinationes, et, apud dolosissimum hominum genus, doli, fraudes, carceres, pœnæ, pœnarumve simulamina.

Alia per villæ agros occursant spectacula, rus, rurisque labores, pascua, armenta, pecora, pastores, agricolæ, eorum tuguria, vomera, rastra, campi oryzâ frumentoque sati, hortulani etiam et aucupes, et venatores, et piscantes, et universa agrestis vitæ famulitia.

Inter tantam, tam multiplicem, et ab unitate adeo remotam diversitatem (quod meritò hortensis Sinarum artis summum appellabo), unus est ac præcipuus totius villæ locus, mare, cujus latitudo superat mille quingentos passus. In ipso meditullio, exsurgit insula, rupesve, cui imposita domus elegantissima, quadratâ formâ, quæ plus centum cubicula, cænacula, diætæ complectitur. Nihil in totâ villâ ornatus, ut et situs pulchrior. Maris ora mirâ varietate disposita, cujus crepido partim e sectis lapidibus, partim e rudioribus saxis, partim e cespite, partim e nativâ loci declivitate. Plures quoque pluribusque formis appositi sunt gradus, quibus via ducit ad clivos, ad aggeres, ad domos, ambulacra, aliaque proxima loca, quorum gratissimus est e domo prospectus.

Sed et maris et domûs præcipua laus præcellentissimumque artificium, quòd hùc referuntur omnes totius villæ partes. Hinc videre est alveos, qui undique in mare confluunt, pontes iis impositos, valles, domosque per valles sparsas, colles singulos arboribus suis vestitos. Hùc variis e partibus accedunt naves ornatissimæ, quarum

aliquæ sunt tantæ amplitudinis, ut septuaginta octo pedes longæ, viginti quatuor latæ, cultissimas domos sustineant.

Lætissima per diem villæ species nocte adhuc vincitur, si volupe sit festis ignibus versicoloris pyrii pulveris, quorum ars summa apud Sinas viget, recreari; aut si lampadibus tota illuminanda sit villa, quæ maxima ibi festivitas est, imò et religio, maximè quintâ decimâ die primæ lunæ (1), seu primi mensis, cùm Sinense imperium, quantum quantum est, lampadibus in mille figuras, picturas, ditissimosque apparatus formatis, collucet. Incredibile est quàm magnificum, quàm cœleste e totius villæ luminibus, in mare ejusque domum collineatis, illucescat spectaculum.

E Gabr. BROTTIER *Hortorum Historia, Rapini Hortis subjuncta.*

### Fête de l'Agriculture.

IMPERATOR Venius ipse agriculturæ dabat operam, ut omnes ejus exemplo, etiam summi præfecti ad imitationem traherentur. Hinc rusticalia, festum Sinis diem, quem Hinchum vocant, originem sumpsisse crediderim. Rusticorum quidem proprius hic dies est, sed verè nobilissimus, quemque solemnem omnibus usus fecit. Primo enim vere, cùm sol medium Aquarii signum ingreditur, etiamnùm a Sinis, ingenti per imperium universum pompâ, in quâlibet civitate atque in ipsâ regiâ urbe, dies iste celebratur, in hunc ubique ferè modum.

Unus e primoribus præfectis claro cum plausu, sym-

(1) La première lune, en Chine, est celle où le soleil entre dans le signe des Poissons.

phoniâ gressibus præmoderante, collucentibus undique cereis et vexillis volitantibus, redimittens floribus, ad portam orienti obversam progreditur. Hunc virorum turba sequitur, pompæ fercula vectibus portantium, quibus veterum historiarum de agriculturâ monumenta, vel e papyro, vel e ligno ficta, repræsentantur, sericis aureisque textilibus fulgentia. Variis in locis assurgunt arcus triumphales procedentibus. Plateæ omnes aulæis dependentibus superbiunt. In hunc igitur modum præfectus ad urbis portam, de quâ dictum, procedit, veri adventanti quasi obviâ iturus. Inter simulacra cætera præcipuè duo eminent. Alterum est vacca testacea tantæ ponnunquàm magnitudinis, ut ab hominibus quadraginta portari vix queat; Alterum, sed vivum, est adolescens, quem diligentem ac laboriosum spiritum appellant, qui pedem unum nudum, alterum tibiali tectum habet, virgâ vaccam testaceam continuò percutiens. Sequuntur rustici, omnia ferentes artis instrumenta.

Neque hîc quidquam vacat mysterio. Continuâ vaccæ verberatione significare volunt, quantam curam rustici debeant agrorum culturæ impendere. Per pedem adolescentis nudum et alterum malè calceatum festinationem innuunt, quam rusticos oporteat adhibere, cùm se rus conferunt ad laborem, ut nec temporis satis ad se vestiendos sibi permittant. Pompâ usque ad regis palatium et in urbibus ad præfectorum ædes deductâ, vacca testacea omnibus ornamentis ac floribus exuitur, e cujus aperto ventre, velut ex equo Trojano, parvas magno numero vaccas, ex testaceâ ninirùm matre testaceas extrahunt, e quibus unam singulis præfectis mittit Imperator, simul monens, ut omnem operam in agris colendis a populo curent adhiberi, sedulòque invigilent, nullî nec agro, nec homini liceat otiosum esse. Scribunt ipsum Imperatorem eo die terram aratro scindere atque sementem facere.

Martinus MARTINIUS, *Historia Sinensis.*

Entrevue du Grand-Maitre Lisle-Adam et de l'Empereur  
Soliman.

MAGNUS Magister, consilio sive jussu Achineti assumptâ humili veste, qualis supplici, victo, et victoris majestatem veneraturo conveniebat, foris in castra hostium ad tyranni prætorium ivit, paucis comitibus ex illo infelici ordine equitum qui cùm die ac noctu semestri oppugnatione ultima ausi passique essent, jam post universa vitæ et victoriæ amissa atque desperata subsidia, affecti continuis vigiliis, longo diuturnoque morbo, cæde, opere irrequieto exhaustis viribus, arma sustinere nequirent, necessitatibus magis quàm vi in ignominiosam superbissimorum hostium potestatem devenerunt.

Magister cùm a summâ luce in maximam usque diei partem impetus impransusque sub densissimâ etiam pluvîâ et grandinum turbine diù ante prætorium expectasset, tandem lato clavo a Barbaris indutus, ad conspectum tyranni inductus est. Ambo, alter alterius intuitu et admiratione mutuâ attonitus, invicem sese paulisper contemplati sunt. Tum salutatus primùm a Magistro, et manum suam passus osculari, sic locutus perhibetur :

« Etsi meritò ac jure optimo deditionis leges quas præ-  
 » scripsi, irritas facere possim sceleratissimis tuis crucife-  
 » ris, ac populo Rhodio, tibi que imprinīs hosti tam  
 » infenso a cujus meritâ pœnâ justissimum victorem  
 » nec fides nec sacramentum flectere deberet, decrevi  
 » tamen in sontem et novissima exempla promeritum  
 » non tantùm pius esse et clemens, sed etiam liberalis-  
 » simus. Cui, si gravissimos vitæ anteactæ errores bene  
 » agendo emendare velit, honestissimos ordines, sum-  
 » mos magistratus, suprēma imperia in bello, in exer-  
 » citu, in togâ, in pace, polliceor. Hæc ne recuses, et

» præsens fortuna tibi suadet, et Christiani quorum  
 » causam meliore incœpto quàm exitu adversùs me tuen-  
 » dam suscepisti, hanc talionem merentur. Quid enim  
 » prohibet, quin, a tuis omnibus desertus ac proditus,  
 » victus in perpetuam fidem et ultrò oblatam gràtiam  
 » potentissimi et benigni victoris venias? »

Ad hæc Liladamus : « Maxime, clementissime Impe-  
 » rator, inquit, oblatam conditionem ego præ tantis  
 » ducibus tuis minimè mereor : sors autem, et merita de  
 » te mea haud talia sunt, ut refutare illam vel ausim,  
 » vel debeam. Liberè tamen dicam inter arma victricia,  
 » victus ante victorem, cujus summam clementiam nun-  
 » quàm desperavi, cujus fidem haud sum veritus, malo  
 » aut statim amisso imperio privatam et infelicem hanc  
 » vitam amittere, aut semper ingloriam eam vivere,  
 » quàm a meis transfuga potius quàm victus appellari. »

Solymannus admiratus cani principis in tantâ difficul-  
 tate animum et modestiam, jussit dimissum a colloqui-  
 cum summâ fide et satellitio turcico in urbem reduci ad  
 Augustale. Singuli etiam equites qui Magnum Magis-  
 trum comitati fuerant, veste coccineâ donati sunt. Neque  
 hoc officio satis se fecisse Solymannus prudentiæ et forti-  
 tudini tanti viri credidit. Die ergò quâdam improvisò  
 urbem ingressus, salutato Mahumete, Liladamum re-  
 culis suis componendis intentum invisit. Hic cùm se sub-  
 mittere in genua, et victoris majestatem adorare vellet,  
 ille nullo modo id passus est. Imò, motis paulisper a  
 fronte manu dexterâ infulis imperialibus, quod reve-  
 rentiæ genus Turcarum reges Deo tantùm et Mahumeti  
 exhibere solent, Magnum Magistrum *Babba*, hoc est,  
 patrem amantissimum et reverendissimum appellavit.  
 Et infrà scripta alter alteri per interpretem locutus est.

Prior Magnus Magister, modestiâ, prudentiâ, magna-  
 nimitate, non minùs inermis in urbe captâ quàm armatus  
 in acie esse solebat, admirabilis, sic exorsus est : « Si

» quanta audacia mihi fuit, tanta fortuna rerumque pros-  
 » perarum accessio fuisset, victor potius in hac urbe,  
 » quàm victus essem. Verùm postea quàm claram Rho-  
 » dum evertere fata voluerunt, lætor te mihi potissimùm  
 » sorte datum esse a quo vim acciperem et gratiam. Tibi  
 » quoque inter alia multa egregia non in ultimis laudum  
 » hoc est, vicisse Rhodum, et pepercisse. Adjecisti hoc  
 » modo potentiæ tuæ clementiæ famam, quæ neque  
 » summis mortalium spernenda est: nam per hanc so-  
 » lam æquales Deo æstinamur. Servabis igitur, nihil  
 » dubito, pacis leges, quas dare clementia tibi suasit,  
 » accipere mihi necessitas. Æternum nunc exemplar  
 » clementiæ et virtutis Turcicæ ero magis, quàm si sta-  
 » tum deditionem fecissem. Pertinaciâ modò meâ, gloria  
 » et pietas tua per orbem terrarum inclaruit. »

Ad hæc: « Mihi, inquit tyrannus, etiam magna lætitia  
 » est, quòd te Deus monuerit, ut aliquandò pacem  
 » quàm bellum malles, atque hoc utinàm tibi a prin-  
 » cipio placuisset! Profectò a summâ potentissimâque  
 » majestate meâ ad hoc tempus plura bona accepisses,  
 » quàm mala perpessus es. Quæ quòd nullo odio tibi  
 » intulerim, sed solâ dominandi libidine, vel hinc colli-  
 » gere potes, quod te tuosque inviolatis corporibus,  
 » intactis fortunis, hinc dimittam. Haud enim bellum  
 » gero ut divitias, ut opes, comparem; sed ad gloriam,  
 » famam, immortalitatem, protelationem imperii tendo.  
 » Est enim regis sanguine regum orti proprium, ca-  
 » pere atque invadere aliena, non avaritiâ quidem,  
 » sed gloriosâ cupidine dominandi, cui cùm obstat vi-  
 » cinus, armis et vi eum tollere satis habeo. »

Verùm tyrannus ficta omnia loquebatur, et longè  
 aliter quàm animo agitabat. Priusquàm enim amicum  
 hunc sermonem meditatus esset, ducibus delegaverat, ut  
 maximam onerariam navim, triremesque Ordinis, et in  
 eis Magistrum cum equitum cœtū Constantinopolim

veherent. Cujus rei non modò occultus inter duces rumor, sed etiam inter milites publica vox erat. Quam ubi percepit Liladarnus, cum proceribus Turcarum egit, ut imperatorem suum fidei sacramentique admonerent. Interea ipse sub noctem christianæ circumcisionis enavigavit urbem suam infelicissimam perfido tyranno relinquens.

Jacobus FONTANUS. *De Bello Rhodio*, lib. II.

Combat singulier.

AORTON ira Poliarchum urebat, nec vulgari sanguine restinguenda. Unum erat Radirobanis pectus, quod vulnere suo sævientem expleret. Per suos igitur hostiumque manipulos querere cœpit æmulum dignitati et iræ suæ parem, multum quoque inclamitans, ut, si auderet, si vir esset, proprio discrimine totius belli fortunam provocatus exciperet. Vicit dissonum et confusum præliantium cadentiumque tumultum vox sæpè repetita ac mandata circumstantibus, et ad Radirobanem haud quietiora cogitantem allapsa est; quem hoc unum puduit, quòd prior non occupasset. Ociùs cæteris abstinuit certaminibus, omnibusque submotis, properavit in æmulum. Non leones Africa illa suos, non serpentes tanto furore incitatos aspexerat. Brevi tamen colloquio sustinuerunt avidas manus, priorque Poliarchus: Ades, inquit, ô Iatro; da pœnas turpissimi flagitii. Non mihi hodiè elaboris, non si plenius quàm Achillem inviolabili Styge tua te mater intinxit. Tibi, Argenis, sacrum hoc fero, si tam fœdam hostiam fortè dignaberis. At Radirobanes: Prodis tandem de gynæceo, mollissime amator? sed præterita vitæ probra mors inter arma celaverit. Ne dubita, tanquàm vir esses, jugulum dare.

Neuter vacavit alternis contumeliis prolixiùs respon-

dere. Ira, quæ vires addere solet, jam nimia impotens-  
que, penè debilitaverat manus. Coierunt tamen pectori-  
bus, equis, telis; non mollius quàm si allisas rupibus  
rupes turbo conferret. Sed destinatis ictibus fortuna tunc  
abfuit; et equi, quanquàm in cito concursu læsi, ad cæ-  
teram pugnam non fuerunt inutiles. Circumactis ergò  
habenis, uterque jaculum altè amento quassatum vibravit;  
quod invicem parmâ excussum est. Supererat unicuique  
missile alterum. Id ne frustrâ periret, diù armorum aditus  
oculis manibusque metiti sunt. Tandem Radirobani nihil  
certius visum, quàm equum hostilem confodere; quod  
ne impunè esset, equum illius vicissim Poliarchus ferit  
in capite: mox ambo veriti lapsum, bestiarumve jam in  
morte insanientium fugam, velut pari consensu, in ter-  
ram desiliunt raptisque bipennibus, quæ pendebant ex  
equis, ad certamen præcipitant. Sed suorum pietate di-  
visi sunt. Quippè media Gallorum agmina atque Sardo-  
rum interveniére furentibus. Hæc verò auxilia cum  
uterque aversaretur, ægrè tandem, nec antè quàm sæ-  
piùs jussus, recessit e medio miles, Regibusque arenam  
restituit; qui adhuc integri, omissis bipennibus, lævâ  
clypeum tenuère, dexterâ hastam; quam ab hoste ve-  
nientem Poliarchus eludens, certiori ictu Radirobanem  
tetigit, vulnusque haud modicum infixit lateri. Strinxère  
inde ferrum, sæpiùs ità conserti, ut solo capulo ora aut  
pectora verberare liceret. Nulla pars corporis, nulli ar-  
morum nexus intentati supererant. Horror omnes indè  
ac deindè misericordia permovit, tantorum spirituum  
principes incolumi exercitu perire. Rursus igitur agmina  
coierunt, diviseruntque pugnaces; quod uterque in de-  
decus suum accipiens, proximos cum irâ et imperio ro-  
gavit, ecquid victum se crederent, quem sic tegere, sic  
a pugna properarent eripere.

Sic militibus ducibusque discussis, redeunt ambo ad  
postremum discrimen: animis quidem invictis; sed multi



sanguinis jactura vires abstulerat; anhelisque corporibus, jam nec certi nec validi erant ictus. Plus animi tamen et sanguinis Poliarcho supererat. Memor deîpde causæ undè odium exarserat, nec dubius, nisi vinceret, Argenidem dolore perituram, altius sustulit ferrum, eoque in Radirobanis jugulum obliquè intravit inter galeæ loricæque commissuram. Ille se mori intelligens, festinansque ad vindictam, cursum in Poliarchum præcipitat, affligitque sui mole corporis incautum sic ut in terram ambo deciderent.

Statim militum ululatu cælum inhorruit, his unum, his alium occidisse, plerisque utrumque expirasse ratis. Et quia sub premente Radirobane Poliarchus ceciderat, pejori omine mens Gallorum vertebatur. Inundavère in campum confertissima turba Gallorum Sardorumque. Nulla tribunorum reverentia; nulla signorum ordinumque ratio. Suum cuique videbatur ad Regem decurrere, eosque, seu occidissent, seu viverent, ab arenâ sublato eripere, adeò ut tumultuosa auxilia Poliarchum penè oppresserint. Sed jam ille paulatim se expedierat ab hostili complexu, et ultimo singultu explicitum adhuc ferro tentabat. Hunc verò ut vivere et erigi Galli conspiciunt, ingenti feroces gaudio provehuntur in Sardorum promptiores, Radirobanis cadaver tegentium, ipsumque Poliarchum infestantium telis. Sed discrimen brevissimum fuit. Nam et vincendi lætitia Poliarchum refecerat, et Galli strenuam opem ferebant. Sensim igitur Sardi cesserunt, aliquid quoque suæ virtuti imputantes quòd tantà in clade à fugâ temperabant. Illis igitur latè submotis, hostili potitus corpore spoliisque opimis, Poliarchus sincerè victor fuit (1).

E G. BARCLÆI *Argenidis*, lib. IVº.

(1) Voyez les *Leçons françaises*, tom. II, *Narrations*.

Combat des Trente en Ecosse.

INEUNTE Roberti III Scotorum regis principatu cùm prædones, duce Duncano Stuarto, plebem vehementiùs affligerent, audito adventu comitis Crafordiæ, quem Rex ad comprimendam eorum contumaciam miserat, expeditiores fugâ celeri in latebras suas se receperunt. E tardioribus multi cæsi, multi comprehensi, et ad supplicium ducti. Verùm hominum inquietorum nequitia, quominùs in plana et regiones campestris erumperet cohibita, domi inter ipsos vehementiùs exarsit. Duæ autem potissimùm familiæ insignes inimicitias insigni crudelitate exercebant. Hi cùm neque jure de controversiis disceptare, neque amicorum arbitrio eas committere vellent, missi a Rege, ad eos pacandos, duo comites, Thomas Dumbarius Moraviæ, et Jacobus Lindesius, patre defuncto, Crafordiæ, cùm animadvertissent gentem ferocem, neque voluptatis modò, sed etiam mortis contemptricem, non posse domari, sine magnâ bonorum virorum ex adverso cæde, rem astu tractare instituunt. Igitur seorsùm principes eorum allocuti, ante oculos ponunt, quantum universis periculum ex mutuâ inter ipsos internecione impenderet; nec, si altera familia alteram penitùs extinxerit, id sine gravissimo vincentium damno posse evenire; nec, si posset, ibi certaminum finem fore, quippe cùm victori, multis congressibus debilitato, bellandum adversùs Regem foret, qui quàm infestus esset utrisque, vel ex eo intelligi posse, quòd ad utrosque adhuc incolumes delendos ipsi cum copiis missi sint; verùm se salutis quàm sanguinis eorum cupidiores si audire vellent, rationem inituros, ut nec inhonestè, nec inulti, nec invito Rege, pacificari possent.

Id cùm audire cuperent, conditio proponitur, ut ex

utrisque triceni, ensibus modò armati coram Rege decertent : victis impunitatem præteritorum fore ; victoribus, decus, auctoritatem, Regis etiam et procerum gratiam. Cùm ea conditio satis utrisque placuisset, dies certamini dictus est ; quo die, cùm principes familiarum suis stipati in aulam convenissent, campi ad septentrionale urbis Perthi latus pars, fossis præaltis a reliquo seclusa, eis ad congressum assignatur ; structis circa spectaculis.

Postquàm multitudo ingens hominum ibi consedisset, mora pugnæ paululùm facta est, quòd ex alteris tricenis, unus metu latuisset, nec pauciores adversus plures decertare vellent, nec reperiretur qui in absentis locum succederet, nec ex adversâ factione quisquam eximi se numero pugnatorum pateretur, ne velut a propinquis contemptus ac rejectus videretur. Tandem sellarius opifex prodiit, ac se in absentis locum successurum est professus, si aurei scutati gallici dimidium repræsentaretur sibi victori, atque in posterum, donec viveret, de victu caveretur.

Ità rursus æquato numero, certamen initur ; ac tantà corporum animorumque contentione pugnatur, quantum efficere poterat odium vetus, novis detrimentis inflammatum, in ingeniis hominum ferocissimorum crudelitati assuetis, et victori res decusque, victo mors et ignominia proposita. Nec minor spectantes horror, quàm pugnantes furor tenebat, deformes corporum laniatus, artusque detruncatos, et in hominis effigie rabiem ferarum detestantes.

Illud autem in primis ab omnibus est animadversum, quòd nemo se omnium fortiùs gereret, quàm supposititius ille ac mercenarius bellator, cujus operà maximè partam victoriam existimant. Superfuerunt enim certamini ex eâ, cui se ille addixerat, parte præter ipsum decem : sed omnes magnis vulneribus graviter sauci. Ex

alterâ factione restabat unus, qui, cum corpus adhuc ferro haberet intactum, iniquamque certaminis fortunam sibi videret objectam, in Taum flumen propinquum se coniecit, et adversariis, quominus ipsum sequerentur, ob vulnera tardatis, in adversam ripam evasit.

Hâc ratione, ferocissimo quoque cæso, multitudo sine ducibus relicta, in multos post id annos, a tumultuando repressa, ad agriculturam rediit. Hæc pugna incidit in annum salutis 1396 (1).

G. BUCHANAN. *E Rerum Scoticarum*, lib. x.

Combat de Déodat de Gozon contre un serpent monstrueux.

SÆCULUM decimum quintum æræ christianæ vertebatur, cum apud Rhodios, Helione de Villanova equitum Magistro, in antro quodam rupi subjecto excubabat horrendus visu draco, toti regioni mirum in modum molestus et infestus; nam homines, armenta, gregesque terribilem in modum devorabat, et pestifero halitu aerem corrumpebat: itaque edicto Ordinis magistri cautum erat, ne quis ad locum accederet; equitibus verò indictum, præter habitûs privationem, capitis supplicium.

Erat eo tempore inter equites juvenis quidam manu strenuus e Vasconiâ, et ad extrema audenda præceps; nomen illi F. Deodatus de Gozon, qui, quâ ratione insulares a tali peste vindicaret, studiosissimâ mente indesinenter revolvebat: attamen Magistri Ordinis verebatur edictum, penèque deterrebatur a consilio, viso dracone; nam istius monstri formæ hæc erat, ut equum ingentem, vel bovem non æquaret solum amplitudine corporis, verum etiam quasi deglutiret. Collum longum et asperum, auribus ad muli similitudinem erectis ad

(1) Voyez les *Légons latines antiques*, tom. I, *Narrations*.

prædam. Os horrendo rictu distentum acutissimis et cruentis dentibus instructum, oculi patuli, et velut ignem spirantes. Demum corpus totum durissima squama incrustabat. Quaternis pedibus incedebat, unguibus in ursi modum præacutis. Quod ad caudam et reliquum corpus, crocodilum puta, nisi quod alis duabus cartilagineis ad celeritatem incessus volitando utebatur, ita ut equi concitati cursum assequeretur quam facillimè : si quæritis colorem, is erat sanguineus flavo et cæruleo mixtus.

Porro eques suprâ laudatus, revisendæ negotiorum prætextu patriæ, potestatem in dies aliquot abscedendi fieri sibi postulat. Tum draconem ex chartâ et stupâ, Rhodiensi quidem illi, dispositione membrorum, magnitudine, colore, parem effinxit, et equum bellatorem, eumque intrepidum, atque indefessum cum geminis Angliæ canibus sibi comparavit. In draconem commentitium subire jubet unum e famulis, qui ope funis caput, caudam alasque, et totum corpus illius agitare in diversa. Deodatus equo insidens simulacra proferre certaminis, insultare ficto monstro, urgere equum, et canes, idque indesinenter per spatium bimestre.

Tum ad Rhodum insulam cum famulis, equo, et canibus, assuetis huic certamini, iter remetiri; et invocatis ad opem deo, divisque vindicibus, adornare pugnam, monitis prius famulis, ut ad rupem ascenderent spectatores certaminis, ut, si, dracone cæso, ipsum se adhuc spirantem reperirent, amuletis comparatis, ocius succurrerent. His præmissis, heros fortitudine armatus et constantiâ in antrum succedere ac belluam portentosam clamoribus repetitis ad luctam provocare; quæ statim, spe opimæ prædæ allecta, sibilis, squamarumque et alarum strepitu locum implere, terrere omnia, et concitato gressu ac volatu irruere cum impetu. Eques intrepidus assuetos ad pugnam canes urgere, et lanceam

tantâ vi intorquere in squamam, ut primo impetu frangeretur : at heros infracto animo ut videt belluam demorsis genitalibus dolentem adversùs canum morsus sese defendere, tunc pedestri certamine eam aggredi gladio, et fortiter congredi.

Jam draco in pedes posteriores sese erigere, quatenùs anterioribus heroem opprimeret, qui, scuto protectus, compertâ colli molliori parte, gladium tam altè impressit, ut ingentem e jugulo cruoris et tabi copiam exhausiret. Draco actus in rabiem quantò propiùs equiti se admovit, tantò altiùs gladius in viscera penetravit. Tunc ingentisanguinis profluvio debilitatus, et velut exsanguis athletam tùm labore luctæ exhaustum viribus, atque fatiscentem, tùm putidâ et tetrâ, quam ex aperto corpore exhalabat, mephiti, intoxicatum sic oppressit ut videretur exanimis. Ergò succurrunt famuli, et laborantis ad opem advolant, frigidam corpori supereffundunt, fomentis languentem recreant. Mox eques in equum resilire, urbem petere, et opimam victoriam Magistro enarrare, qui de violato edicto indignabundus victorem carceri mancipat habitu spoliatum, donec, diffuso per omnes insulares certaminis exitu, hunc et vinculis eripit, et communi exceptum plausu, ad summos gradus evehit; denique, fato functo Helione, Deodatus iste cognomento *tue-serpent* in locum Magistri, consentientibus omnium equitum votis et calculis, quarto post anno suffectus est (1).

EUPHORMIONIS Satyrici Pars VI.

. (1) Voyez les *Leçons françaises*, et les *Leçons latines anciennes*, tom. II, *Descriptions*.

## Combat d'un brochet et d'une grenouille.

DELITESCEBAT in latebris ripæ vivarii Lucio discors Rana, cùm fortè Lucius otioso similis, levi caudæ motu, summas vivarii aquas ultrò citròque sulcaret, quoad tandem ad locum, quem insidiis faciendis Rana cepit, propiùs appelleret: non omisit benè gerendæ rei occupationes Rana, sed simul atque facultatem assiliendi hostis sibi oblatam vidit, ità ut erat sinibus buccarum inflatis, oculisque præ irâ flagrantibus, repentè in caput illius insilit, latèque divaricatis pedibus, frontem circumplexa (vide solertiam animalculi!) in ipsos præcipuè oculos Lucii invadit, mollissimasque et charissimas lancinat partes. At ille dolore exagitatus, modò citato per undas cursu ferri, fluctusque circum se concitare, modò vertigine rotari, fruticum et arundinum, quæ in vivario subnatæ emicabant, attritum quærere, si quo pacto malè conciliatum, nullarumque præ se virium insectorum, fronte excuteret. Cæterùm omnes ejus conatus incassum cadebant; tàm mordicùs eandem frontem Rana obtinebat, tàmque pertinaciter pœnas ab avidissimo corporissui vexatore exigebat, donec, torpescentibus ex multà luctà viribus, Lucius ipse victus succubuit, seque Ranamque unà in gurgitis ima demersit. Nobis adhuc omnibus qui aderamus eodem loci subsidentibus, luctatoresque, qui jucundum nobis de se spectaculum exhibuerant, oculo requirentibus, ecce tibi Rana subito in altum exsilit, ac more victorum ovans, coaxans vitulansque, rursùs in sua se palatia recepit. Imperat extemplò pontifex acciri piscatores, qui, Lucio retibus invento inque lucem prolato, cognoscendi potestatem facerent, quidnam cum illo demerso actum esset; atqui miser ille

utroque lumine orbus extrahitur, non sine omnipium nostrum admiratione.

CAMERARII *Sylloge memorabilium Medicinæ et mirabilium Naturæ arcanorum. Centuria IX. 1630.*

Les Fourmis.

EST certè formica Dei opus, tam rei dignitate præstans, artis subtilitate limatum, operis perfectione absolutum, quàm humanis sensibus tenuè, rude, impolitumque videri solet. Et ubi fulgentes oculos et visum natura prætendit in formicâ? ubi odoratum applicuit? ubi inseruit gustatum? quo modo duriusculis partibus quasi ossibus corpusculum interstinxit? quâ ratione venulas instar ramulorum diffudit? quo pacto à vertice per dorsi vertebrae ad caudam usque diffluentem medullam produxit? quâ solertiâ tenues membranulas distendit? quâ molitione moventem omnia spiritum, acrem, vegetum, actuosum, tam fragilibus et delicatis particulis affudit? an etiâ jecur, et in jecore vasculum bilis receptaculum? cur denique et renes costularum interstinctione quasi parietibus obsesserit nescio, cuncta tamen admiror (1).

P. CAUSSINUS, *de Eloq.* l. x-18.

L'Araignée.

AULA intus deserta ac destituta videtur, et ne columnæ quidem ampliùs ipsam firmant ac sustinent, quòd et concidat et diffuat, sed solis est habitanda araneis; solet enim animal silentio ac solitudine contexere. As-

(1) Voyez les *Leçons françaises*, tom. II, *Descriptions*.



pice et fila; hoc spuentes stamen in pavementum descenderunt; ipsas porro intueri per illa descendentes, atque reciproquo meatu ascendentes: per aerem volantes, juxta Hesiodum, ac volare meditantes, pictor ostendit. Angulis attexuerunt domos, has quidem latas, has verò concavas; in latis æstatem agunt, in cavis hyemant. Pulchra igitur et hæc pictoris opera: nam araneum ipsum sic tenuiter elaborasse, ac juxta naturam indicasse, ipsumque filum laboriosum ac difficile finxisse, artificis est prudentis atque ad amussim vera referentis. Hic autem nobis tenuissima quoque contextuit. Ecce quadrangularis funis ab ipso est angulis circumjectus, ut mali rudens. Tenuis autem funiculo applicita est tela quàm plurimos exprimens orbes, quorum a primo ad minimum extensi contextuntur laquei, æquè atque orbes inter se distantes, per quos qui in perficiendo adjuvant opere discurrentes, remissa intendunt stamina. Texendi mercedem assequuntur, muscas, si quæ telis implicentur, capientes. Undè ne prædam quidem ipsarum præterit ac neglexit pictor; hæc enim pede, illa supremâ tenetur pennâ; ista a capite devoratur; palpitant autem atque agitantur, effugere nitentes. Ipsam tamen nec confundunt, nec dissolvunt telam (1).

P. CAUSSINUS, lib. II, *e Philostrato*.

### Le Papillon.

PAPILIONEM, credo, nôstis: hunc ergo laudans, naturam laudo, cujus industriâ solertiùs est elaboratus. Animalculum est, ut in urbibus rarum, sic in agris frequens; corpus illi plenum, molle, flexile, paulatim in exiguam longitudinem gracilescens; cui super sparsus

(1) Voyez les *Leçons latines anciennes*, tom. I, *Descriptions*.

teneræ lanuginis decor efflorescit : exstant veluti porrecta minutissimis filis cornua , quæ intermicantium oculorum jucundus fulgor irradiat : sed præcipuum in penniculis miraculum : quippe supra tenuis corpusculi modulum explicatæ gemmant floribus , nitent purpurâ , micant auro , stellis radiant : his veluti remigiis libratus in aerem , et ridente passim verni temporis amœnitate , per gemmeam florum luxuriam , volitat ludibundus , ad singulas penè stirpes adhærescens. Modo delicatissimâ proboscide foliorum succos pabulatur , modò molliter quiescit inter odorum delicias , modò redintegrato volatu superbiùs emicat , et insultantium puerorum manus , sexcentis in aere flexibus implicitis , eludit (1).

*Idem. De Eloquentiâ , l. II , c. 21.*

Les Abeilles.

APES , constitutâ quâdam reipublicæ formâ , sibi regem deligunt , qui corporis proceritate et formæ præstantiâ reliquis antecellat : alis insignitur brevioribus , cruribus rectis , incessu graviore , et quodam ceu diadematis et coronæ regiæ decore : aculeo vel caret , vel non utitur , quo reliquæ pro armis instructæ sunt. Nunquàm solus extra alvearia progreditur , sed stipatu regio cinctus , reliquo insequente comitatu , nec nisi cùm totî agmini incumbunt foris negotia ; progressum illum multo fremitu et bombo tubarum tanquàm cantu præsignificant et accedunt : quæque propiùs potest regis lateri se agglomerat , omnesque illum volando defessum suo corpore sustinent. Quemcunque locum rex insederit , illic statim castramentantur. Ubi mori illum contigerit , non jam foràs pastum prodeunt , sed tristes cadaver ejus circumstant , extra

(1) Voyez les *Leçons françaises*, tom. II, *Descriptions*.

Leç. lat. mod.

alvearia deportant, tanquàm funus prosequuntur; et inhumant.

Tandem funebribus omnibus exsequiis magnâ pompâ peractis, alium sibi regem eligunt, quòd vivere sine rege nequeunt. Ad omnia intendit, oculos in omnem partem torquet, dùm reliquæ operi incepto intendunt, atque obvolitans omnibus animos addit et moras castigat. Tempus sibi ad progressum, pastûs causâ, serenum et sudum eligunt, nam et præsagiendarum cœli tempestatum vim insitam habent. Hâc sunt justitiâ et æquitate, ut nunquàm alicui animanti aculeo aut aliâ arte sint molestæ, nec unquàm stimulum suum in quemquam exerant et acuunt, nisi domicilii et alvearis tuendi causâ. Interdiù ad portas vigilum et custodiarum stationem disponunt: de nocte tamdiù ab opere quiescunt, quoad una, cui id munus incumbit, uno aut altero bombo, tanquàm tubæ clangore, omnes excitaverit: indè coeunt exploraturæ cœli conditionem; quam si serenam fore præsagierint, in campos et pabula prodeunt. Ergò aliæ florum fasciculos cruribus, aliæ aquam ore, aliæ roscidum humorem corpore exceptum in alvearia comportant. His occurrunt aliæ quæ onera excipiunt, et in sua loca statutasque sedes distribuunt; quæ in campos ad pastum dimittuntur, juniores sunt ac graciliores. Itaque si tùm fortè suboriatur sævior aliquis ventus, tamdiù expectant quoad subsederit, et vis ejus atque impetus remiserit. Quòd si sæviat diutiùs illis adversus, lapillo se saburrant, et humiles supra terram volant, ne illius impetu hùc illùc exagitatæ raptentur.

Ad res omnes suas sunt attentissimæ, et desidum socordiam sæpè morte ulciscuntur: nonnullæ extruunt; aliæ extructa perpoliunt; aliæ commeatum important; miro autem artificio sibi architectantur fornicata illa alvearia, eaque faciunt duabus januis pervia, unâ ad ingressum, alterâ ad egressum comparatâ. Conveniunt unâ

omnes, ne inæqualitas aut in cibis aut in labore dissidii ansam afferat. Lautæ et munda ut sint domicilia sua curant; ignavos fucos, fruges consumere et lætos aliorum labores destruere natos, a præsepibus arcant: quæ aculeum amiserunt inutiles redduntur, quòd paulò post illis viscera effluant et moriantur. Dominis suis mirificos afferunt ceræ et mellis fructus (1).

CAMERARII, *Memorabilium Medicinæ et mirabilium Naturæ arcanorum Sylloge*, Centuria IX.

Le Rossignol.

LUSCINIAM unam ex avibus maximè solent ii, qui naturas animalium scribunt, admirari, quòd in tam parvo corpusculo tam clara, tam suavis, tam magna, tam jucunda vox inveniatur: quòd, verno tempore, cum frondescere arbores incipiunt, diebus ac noctibus perpetuis sine ullâ intermissione canere soleat. Undè enim in aviculâ tam pertinax spiritus? undè vis illa continendæ animæ in canendo tanta, et unâ continuatione cantionis vivæ contentiones vocis et remissiones? undè tam artificiosa, tamque perfecta musicæ scientia, tam ingeniosa modulatio, tam gratus auribus sonus, qui modò in longum continuo spiritu trahatur, modò summâ quâdam cum varietate flectatur, nunc concisâ voce distinguatur, nunc intorâ copuletur? Quid, cum iterum vocem revocat, ex integrâ comprehensione cantum edit? quid, cum modulos nec opinatò derepentèque commutat? quid, cum ipsa secum jucunda et tacita murmurat? Nulla meherculè tam abstrusa, tam difficilis est cantio, quam non exprimat Luscinia, plenam, gravem, acutam, crebram, extentam, summam, mediam, imam. Quid

(1) Voyez les *Leçons françaises*.

plura? tam parvulis in faucibus omnia, quæ tanto labore, tantâ industriâ, tot inventis instrumentis, genera cantionum ars hominum excogitavit, integra atque perfecta reperiuntur (1).

P. CAUSSINUS, *ex Gesnero*, l. II.

Le Coq.

GALLO gallinaceo honorem et præstantiam quamdam natura largita est, qui formæ excellentiâ condecoratus, plumis splendidis ac micantibus, et vario sæpè colore distinctus vestitur. Cristam rectam et excelsam, spectatissimum insigne, et serratum, quod magis eminet et spectatur, cum erecto collo huc illucque inflectens, omnia prospectat, et cum jactatione quâdam corporis totius imprimens vestigium incedit, flexâ a summo caudâ speciem illustrem præbente, et spiculis crurum, quibus ad se ulciscendum armatus est, porrectis, apparentibus, gallinarum delectatur plausu mirifico, quibus favet, et majorem amplitudinem præfert.

Ex cunctis volucris crebrò cœli faciem suspicit, quem vigilem, et in excitandis ad pensa sua mortalibus, rumpendoque somno natura generavit. Ternas distinguit horas interdiu canens, nocturna verò spatia non minùs astrologorum intelligens, crepusculo cubitum tendens, tribus ante mediam noctem horis canit, medio ejusdem cursu vocem iterat, tribus etiam ab intempestâ nocte horis similiter canit, quod tempus ob hanc causam *gallicinium* appellatur. Sed maximè galli antelucano tempore canunt naturali quodam sensu solis ad nos redeuntis, quasi effec-

(1) Voyez les *Leçons françaises*, et les *Leçons latines anciennes*, tom. I.

torem maximarum rerum salutantes, impulsu ceu calliditate suæ naturæ, et motûs ubique capiendi cupiditate.

Videre est gallos pro gallinis contra serpentes milvosque dimicantes, atque ut gallinas custodiant, alienas a grege abigentes; atque mares nonnulli visi sunt, qui, cum fortè fœmina interiisset, ipsi officio matris funguntur, pullis ducendis, fovendis, educandisque operam dantes.

Cum imperitent suo generi, et regnum in quâcunque sunt domo exerceant, dimicatione paritur hoc quoque inter ipsos, veluti ad hanc rem agnata tela cruribus suis intelligentes; nec finis sæpè, nisi commorientibus. Quod si palma contingit, statim victores canunt, seque ipsi principes testantur; victi occultant sese silentes, ægrèque servitutem patiuntur (1).

Melch. DE LA CERDA. *Camp. Eloq.* lib. II.

Le Paon.

**PAVO**, incipiente vere, ad pratum aliquod accedens; quando et flores prodeunt non amabiliores modò, sed, ut dixerit quispiam, floridiores, et, quod ad colorem et tincturam attinet, liquidiores; ipse quoque, extensis soli pennis, et sublatâ caudâ, eamque undique circa se pandens, spectandos exhibet et illius flores, et ver illud pennarum, perindè ut prato ad hujusmodi contentionem et certamen ipsum provocante: convertit quippè se ipsum et circumagit, et quasi quamdam pompam agit pulchritudinis suæ; quando videlicèt etiam admirabilior apparet ad splendorem solis, variantibus se coloribus, et paulatim in alios atque alios transeuntibus, aliamque ac novam formositatis speciem subindè recipientibus. Ac-

(1) Voyez les *Leçons françaises*, et les *Leçons latines anciennes*, tom. I.

cidit autem hoc potissimum in circulis quos in summis pennis habet, quorum quilibet quasi quædam iris est circumdans. Nam qui antè æreus visus fuit, mox inclinante se paulum illo, aureus conspicitur; et rursùm, quod ad lucem apparuit, si sub umbram transferatur, viride videtur, adeò ad luminis vicissitudinem pennarum ille ornatus variatur (1).

P. CAUSSINUS, *de Eloq.* l. II, *ex Luciano.*

#### L'Alouette huppée.

ALAUDA, quam alio nomine galeritam dicimus, a cristâ quam gerit in capite, perdici similis, rostro et pedibus, secundum quosdam, rubeis, colore fusco, neque plumis despicienda. Hæc in segetibus, in agris, non in silvis habitat. Frumento et seminibus cerealibus victitat. Quamobrem in viis passim obvia viatoribus obversatur; in arbore nunquam consistit, sed humi, et huc et illuc circumspectat subsistens. Non multum evolat, et, cum evolare conatur, statim procumbit. Ingenio est ad cantum docili; quamobrem suavissimè cantillat caveis inclusa. Nam mirâ alacritate pennis exertis in aere, vocis modulatione, sereno tempore, et aperto maximèque patenti cœlo, plaudit tum gestu alarum, iis expansis, tum voce. Nam pluvio nebulosoque cœlo, vix aut nunquam canit, ac neque humi, sed inter ascendendum; ascendit paulatim, subito verò et instar lapidis descendens cantillat.

Atque masculus in hoc genere musicæ valdè laudabilis est, ob multam et suavem modulationem, qui æstatem primus inter aves prænuntiat et cantu suo diem antelucano prædicat. Pluvias et tempestates exhorret. Cantat ascendendo per circuitum volans, et cum descendit, primò

(1) Voyez les *Leçons françaises*, tom. I.

quidem paulatim id facit, et tandem alas contrahens, in modum lapidis subito decedit, quo tempore cantus edit. Avis verò hæc cicurata inter cantillandum alas movet, hoc veluti gestu ad liberum aerem redire deprecens; quòd si diù capta inclusaque teneatur, aspectu privari dicitur oculorum.

P. DE LA CERDA, *e Camp. Eloq.* lib. 1<sup>o</sup>.

Le Chien de Berger.

CANIS pecuarius robustissimus valentissimusque, ore ferocissimus, nigro fulvoque colore, nunquam non ringens, simul atque aliquem aspexit, præter pastorem, quem longè prospectum agnoscere solet, et eidem occurrere, colludere, blandiri caudâ, admovere se cruribus, lingere nonnunquam manus, et frustulum objectum capere. In ovium custodiâ positus, quia naturâ est et ingenio versutus, fraudulentus, clandestinus, taciturnus, non commovet, nisi cum lupum appropinquantem videt, et impetu facto, multum diùque pugnans, aut vincit, aut mille morsibus saucium fugat, vel in pastoris oculis ab eodem inflammatus, prosternit, et impressis dentibus suffocat.

Sæpè circuire videas gregem universum, observare custodireque latratu multo, ut lupi arceantur longius, disturbentur dissipenturque feræ immaniores, nec ullo modo audeant accedere. Quid, cum accidit ut ovem mediâ nocte, tum cum pastores quiescunt, lupus abstulerit? Sentiens canis pecuarius, aut ovem balare audiens, quantâ lupum celeritate persequitur, quanto quâque vehementer latratu vexat et premit, quoad fessus et defatigatus currendo balantem ovem perferre non possit lupus, aut ex illius ore ac faucibus abstulerit! Quamobrem canis hic robustus est, et ad cursum promptus, et



strenuus, et ad rixam et pugnam comparatus, cum insidiis lupi depellere, et raptorem fugientem consequi, et ex ore ac faucibus prædam extorquere debeat.

*Idem*, lib. x.

Le Chameau.

. **PRÆCLARUM**, mite, domesticum est camelorum genus, hominibus ad circumvehenda onera perquam familiare. Corpus illi supra cæterorum animantium speciem procerum, et punctis interstincto tergore maculosum. Caput cæteroquæ amplum paulatim ad cervicem gracilescit. Ex eo geminæ cornuum species emergunt, supra verò tempora secundum aures duo molliter consurgunt apices. In ore lacteus prominet numerosâ serie dentium nitor. Oculi jucundissimâ luminis face scintillant. Terga lata, et insigni colliculo protuberantia. Crurum non æqualis mensura; postici enim pedes anterioribus minores, ex quo non nihil claudicare videtur. Cauda talis est qualis cervis aut damis esse solet, summis a tergo nigricantibus villis hirsuta. Ad summum tali est ingenio, ut onera quàm maxima dorso ferat, et longam viam continuo cursu devoret. Quòd si quandò consistat, non vult flagris et verberibus adigi, sed suavi modulatione demulceri; hâc itineris labores mitigat, et velut novis animis revirescit.

P. CAUSSINUS, l. II, de *Eloq. descr.*

Le Chat.

SED cur domesticas venatrices, feles, indictas præterimus? Præ cæteris probantur colore leucophææ, pallidâ fuscâque varietate virgatæ, prædatricibus nimirum tigribus, ut formâ, sic indole simillimæ, quæ a Syriâ ori-

ginem et nomen trahunt. Ista enim, ntpotè calidâ e regione propagatas, temperatior sanguis ad mansuescendum dociles, ad venandum sedulas facit. Legendæ sunt ore torvæ, pectore torosæ, pedibus amplæ, toto corpore grandiusculæ, hoc est leoninæ magnitudinis generosa breviaria, ut sesquipedales hostes aggredi, ac frustillatim comminuere ne pertimescant; naturâ mares, ut viriliter vim audeant in mures; arte semimares, ne foris amicas sequioris sexûs feles, quàm domi infensos musculos, avidiùs consecretentur; docilitate cicures dominisque tractabiles, non efferæ atque uncinatis unguibus sanguinariæ mimæ; assuetudine in ipsis procul excretis sordibus mundæ, non in mediis ædium munditiis spurcificæ; educatione vigilaces, non solidum diem noctemque stertentes; fidelibus excubiis totam domum perlustrantes, non latentis sub cinere igniculi serviles custodes, vestalis nempe superstitionis hæredes; parco denique vilique cibatu ità famem tolerantes, ut hostilibus rapinis emeritæ vescantur, non herilibus damnis inexplebiles ventres immeritæ distendant.

J. Bapt. FERRARIJ, *J. De Florum culturâ*, l. III.

Les Singes.

SIMIARUM genera summa duo; alterum sine caudâ, alterum caudatum. Sine caudâ simias plures vidimus; marem quoque ac feminam cum prole; filiolus si quid videretur desiderare, manu pugnoque feminam a marito tanquàm malæ tractationis ream, etiam additâ vultûs acerbitate castigari. Nempè supercilio, rictu, murmure, irati patris atque reprehensoris mariti animum præ se ferre. In aulâ regis unus fuit qui diù bipes deambulabat, amictus sagulo militari, ensiculo accinctus. In sellâ jussus continuit sese pernox, aut perdius publico spectaculo,

itâ ut non deessent qui homuncionem putarent verum.

Caudatorum cynocephalorum species multas novimus, inter quas, quartum multò jucundissimum ac facetissimum, scurram, omnia imitantein, ut mirarer sæpè esse penè hominem verum, tùm moribus, tùm intellectione. Maximè simus est, naribus laxis ac repandis; subnigrâ facie, corpore exsucto et strigoso, caudâ subtùs plicatili, tàm præsentaneæ opis, ut ad quemcumque casum tanquàm manu utatur: ex eâ pendet, eâ vincit, trahit, verberat. Pannos vidimus lavare, nuces malleo rumpere, suâ manu bibere, etiam scripturientem mirati sumus. Manticam nobis per rimam spectantibus aperuit, catenam traduxit, supellectilem extulit: pectines eduxit, capiti admovit. Mutianus cùm prodidit etiam latrunculis luisse simiam, de hoc genere scripsisse videtur.

Odore sunt admirabili, quem augent ceparum usu: quarum partem cùm vorârint, frusto quod superest sese fricant quaquâ possunt; cæterùm nihil omittit intereâ domi quin depopuletur aut devastet. Arbores novellas, ramos adultarum, specula, vitra omnia disturbat. Turturum et psittacum, quos sibi præferri videret, interfecit; ignem summum in atrium pertulit, idem facturum in fœnilia si in mentem venisset.

Vocem hic ab aliis longè diversam emittit. Simia stridet; hic fistulæ in modum modulatur. Acuit vocem læsus, et minutissimis, creberrimis accentibus dissecat. Illud commune omnibus generibus, gesticulatio. Cœlo tonante, expavescere adeò, ut etiam colorem mutant: suspecto cœlo, ubi queant sese abscondant. Ad evitandos ictus, nullum animal attentius, ut vix fallas. Id adeò ex visu evenire intelligo, quem omnium quadrupedum acutissimum certissimumque habere illud argumentum est: pulicem ab initio saltûs consequitur, vixque consistentem illicò opprimit.

Brachiorum robore inaprimis excellit; pedibus manuum

officia facit, ubi opus sit. Vidimus nos vinctum, cùm disjectam procul a nobis nucem manibus attingere nequiret, pedibus tentâsse; ubi id non processit, festucâ apprehensâ, cibum propiùs attraxisse. Nisi coactus, in manus nunquàm, sed in pedes se demittit. Fugientem vidimus, e culmine in culmen, trans viam cùm vellet transilire, catenam quæ pēdebat, manu collegisse. Saltum aversum unus omnium animalium suapte naturâ facit, quem de eo didicit homo. Ridet quoque, atque etiam cachinnatur. Catellos atque infantulos mirè diligit. Unum in summas tegulas asportâsse aliquandò audivimus. Ælianus infantulum aquâ calidâ necâsse prodidit, cui nutricem apparâsse lavacra vidisset. Cercopithecum adeò exhorreere crocodilum, ut cætera omnia pericula nihili pendat. Crocodilum cùm non haberemus, laceratam opposuimus, non sine illius magnâ abominatione et spectantium risu.

Acerrima quæque appetunt: miro modo castaneas; sed præter cætera bellariis magnoperè delectantur. Vini adeò avidus, ut multâ ejus spe faciat jussus. Frigoris impatiens, hibernos ad focos totum se exporrigit. Minutiora animalia, quæ ceperit, devorat. Muscas mirè odit. Cùm apricatur, corpus curat. Gaudet pulcher haberi, auditque libens laudes. Intelligit convicia. Si potest, aufugit; sin minùs, tristis est; imbecilliores etiam malè habet; quod reliquum est, procul absterret-conviciantes vultùs severitate, truculentis buccis, oculis intentis. Quippiam surrepturus, dissimulat atque deorsùm spectat: mox invadit de improvviso ac fugâ sese subtrahit e supplicio; accusatus tùm de superiore loco causam dicit, frequenti mandibularum agitatione crimen negans aut pœnam deprecans.

CAMERARII *Memorabilium Medicinæ*, Centuria IX.

## Le Cerf.

**CERVUS** est procerâ corporis staturâ, præcellenti formâ, latâ facie, magnis et insignibus oculis, tergo variis maculis interstincto. Huic obesa pectora, et ingentes armi decorè protuberant. Crura ad pernicitatem cursûs aptissima molliter gracilescent. Nares patulis foraminibus veluti quatuor siphonibus concisæ ingentem spiritum hauriunt, et identidem crebris flatibus emittunt. Cervix minuta atque elegans protenditur. Sed præcipuum in cornibus miraculum : nemus diceres densis præaltisque arboribus consitum, et longis ramorum flexibus intertextum. Hoc illi natura præsidium adversus venatores dedit quo, si semel obvios perculerit, letaliter vulnerat. Sed in hâc membrorum specie, et decori corporis quâdam majestate desidet imbellis animus, qui non ita sæpè lacescit martem, adeò omnem salutis et vitæ spem collocat in fugâ; currit enim quàm velocissimè; parthicam sagittam crederes, aut fulgur, tàm pernici, tàm violento concitatur impetu.

P. CAUSSINUS. *De Eloq.* lib. II, ex *Oppiano*.

## Le Loup.

**VIDE** prægrandem et atrum lupum, eumque ferocissimum, ovibus infestum, quarum carnes appetit, in speciem et similitudinem canis, ore et dentibus valens, rigenti collo, humeris latis, hirsutis femoribus. Ululat horrendum in modum, et toto impetu fertur illo rictu suo ampliore, os quàm maximè diducens, ut majore vi mordere queat. Invadit in feras voracissimus, et propè insatiabilis, pilos et ossa devorat, et multa solida. Qui

ferox adeò et insidiosus, audax et dolosus, ut eorum rapax natura fert. Ubi caulas intravit, non solum interficit quod satis esset ad ventrem, sed magnam partem gregis jugulat. Præterea cum lupi sint immanes et crudeles, ut homines, insidias moliuntur; circumagi scias illos, in orbes converti plures, deinde excurrere, donec ex vertigine currendi et caligine, eorum aliquis lapsus est, quem illico stratum humi cæteri omnes impetu facto dilaniant.

P. Melch. DE LA CERDA, *in Camp. Elog.*

La Licorne.

MONOCEROS animal est Indicum, ferox, horribile, truculentum. Non unam feram diceres, sed portentum ex multis belluis in unum coeuntibus ad terrorem humani generis fuisse conflatum. Corpore est instar equi, non modo procero, sed valenti. Capite cervo, pedibus elephantino, caudâ apro, rictu lænæ similis. Eminent in mediâ fronte nigrum cornu, duorum ferme cubitorum, quo nihil asperius natura molita est; neque enim ut cætera cornua, aut concinnitatem habet ullam, aut lævitatem; sed ferri limâ mordacius, multiplicibus in orbem gyris convolvitur. Hoc insolenter profusam capitis jubam quatiens, quasi strictum mucronem, longum, minacem, noxium protendit. Currit autem quàm velocissimè, et magno sonitu fremituque fertur, inaccessas montium solitudines, et densissimos saltus peragrans. Quod si aut lasciviâ, aut iracundiâ in suum genus exardescat, furit insaturabiliter, fodicat, vellit, infringit, laniat; quâcumque rapitur, huc furorem, huc insaniam, huc strages concatenatas et funera ruere crederes.

P. CAUSSINUS. Lib. II, *de Elog. descr.*

## Le Rhinocéros.

**RHINOCEROS** elephanti similis, longitudine par, brevior cruribus, cornuin nare habet, in quo id est peculiare ut, quamvis alia singulis animalia cornibus conspiciantur, ut oryx, onager, cæteris tamen a mediâ fronte, huic unæ naribus promineat. Cujus fiduciâ adversus elephantem pugnare non metuit. Cujus duo cingula tanquàm draconum volumina cernere est a dorso in ventrem usquè tantum animal circumeuntia, unum jubam versùs, alterum ad lumbum. Frons illius est ornata pilis et leviter rufa; dorsum flavo spectatum colore, et maculis distinctuin purpureis. Pellis tamen tantâ firmitate munita est, ut ægrè jaculo penetrari queat. Nam prædensa cernitur, ceu crustis quibusdam squamarum compacta, colore et figurâ tectum referente testudinis, cornu autem illud in hanc formam figuratum, ut repandum sit, idem modicè reflexum, breve tamen et acutum instar ensis, et adeò valens, ut quidquid impetierit, aut ventilet, aut perforet, ferrum etiam et saxa trajiciat. Quod, contra elephantum pugnaturus, saxis etiam exacuit, et lenit. Postea congregiendi eo acuminato elephanti crura toto rictu subiens alvum petit quam scit esse molliorem, et suis ictibus perviam, eamque discerpit.

P. Melch. DE LA CERDA, in *Camp. Elog.* vol. 1.

## Le Lion.

**LEONEM** ad timorem animantium videtur produxisse natura. Cernis, ut flammeo colore rutilus accenditur? ut superbè graditur, ut vastâ se corporis mole efferens præ se despicit omnia? quantum et quàm vegetum in hoc

corpore robur? quanta in robore alacritas, quantus in substrictis membris animosi spiritûs dominatur vigor? Caput illi amplum majestatem feræ præ se fert. Magni et lucentes oculi inter villosa supercilia scintillant. Colla et armos effusæ vestiunt jubæ. Magna vis laterum spirat; major pectoris firmitas protuberat; maximus sævit oris terror, qui totus est immani dentium rietu septus. Quid genua loquar? quid tibiæ compagem? quid nervorum densitatem? quid ungues, ex quibus vel solis leonem possis agnoscere? quid incessum, quid saltum, quid cursûs celeritatem, quid omnia?

Et cùm sit ubique magnus, quantò tamen se major est, si quandò venatòrum senserit impetum! Nulla tunc mora, exsilit e speluncâ, et primùm truculentâ rugit immanitate: ad hujus rugitum pertimescunt, et aves cœlo volantes, et per silvas vagantes feræ, et immensæ maris vorticibus belluæ; ipsæ denique nemorum frondes, ipsi montium vestitus, ipsa saxa contremiscunt. Hoc veluti signo dato, accingit se ad pugnam, et primùm longam, immanem, villosam caudam explicans terram plaudit. Mox ilia percursans, eâdem veluti voluntario flagello identidem diverberans, ad summum oculis ejaculatur fulgura, oris profundam voraginem aperit, dentes exerit, in hostes summâ velocitate involat; hos caudâ atterit, illos pedibus conculcat, aliorum trementes artus cruentis faucibus fœdissimâ laceratione populatur.

P. CAUSSINUS. Lib. II, *de Eloq. descr.*

Même sujet.

LEONEM ferarum omnium et belluarum immanissimarum regem esse magno sunt argumento caput, pectus, genua, incessus, saltûs celeritas, cursus, visus, juba, os cataphractum, latera firma, nervi solidi, ungues magni.



Ille capite firmo est, facie magis quadratâ quàm osseâ. Quam speciem habet frons in medio magis cava, eminentibus decorata superciliis qui oculos habet charopos, concavos, non admodum rotundos, magnitudine mediocri, aspectu horribili.

Rictus oris amplus, et in tantam amplitudinem labra tenuia, ut partes superiores inferioribus super injectæ sint. Dentes habet teretes et acutos, cervicem rigentem, et ex uno osse constantem, nullis vertebrais cohærentem. Quamobrem nullis eam articulatis ossibus, nullis spondylis conjunctam flectere nequit, nullam in partem retorquere.

Sed quæ spiritûs magnitudo, quæ celsitas animi in leone videtur inesse, cùm colla armosque vestiunt jubæ! Quàm summa vis et robur in pectore! lis costis, eo dorso valdè firmo munitum est, ut omnes ictus et plagam omnem illatam perferre possit. Cùm verò crura multum roboris ac nervorum habeant, tùm pedes ad incedendum et sistendum stabiles; sed priores quinque distinguuntur digitis, posteriores quaternis, atque unguibus armatos rapacissimis, et ad discerpandos hostes et carnificinam exercendam aptissimos (1).

P. Melch. DE LA CERDA, in *Cap. Eloq.* vol. 1.

Le Pétard.

Est hæc machina fusili ex ære vas, formâ mortario non absimile. Imò in Juliacenci bello, ad subruendam Aldendorffii portam adhibitum a se fuisse ex aromataria officinâ mortarium, Tensinus talium machinator et scriptor enarrat. Magnitudo illi varia: ea nunc maximè probatur quam gestare ac pallio tegere miles non imbecillus

(1) Voyez les *Leçons françaises*.

queat. Adeò cuniculos non modò sub terram fodere, sed etiam nobiscum ferre excogitavimus! In latere ansulam habet ad suspendium, et ab imo propemodùm fundo palmaris prominet ad inferendum intrò incendium canaliculus.

Ubi autem inditum vasi bellicum pulverem malleo presserint, atque ad os usque constipaverint, summumque stupeò obturamento, ac ceratâ ad extremum telâ concluderint, roboreum assem latitudine vasis ampliorum, ac ferreâ cruce firmatum eidem ori superaddunt, adstringuntque, eo nempè consilio, ut per illud additamentum, fracturæ plus fiat in ostio, quàm sola mortarii latitudo faceret, angustiores videlicèt imparemque subituris militibus apertionem.

Temperatum hoc modo Pyloclastrum, post terebratam quæ impetitur portam, terebramque ibidem clavi loco relictam: ex ansulâ ad terebram alligata suspenditur, ore medias in fores verso, ac per sulphuratum fomitem qui canaliculo est insertus, incenditur. Tùm verò flammis ferratoque asse in portam arietantibus ineluctabili planè vi, quantò contumaciùs obstatur, tantò impotentius objectum quodcumque repagulum in frusta conciditur, ostiumque hiatu vastiore dispanditur.

Sic una demùm est reperta clavis cui (quod nullis fabricum ferramentis, nullis furum effractoriorum scalpbris adhuc contigit) seræ obicesque portarum omnes adaperiles sunt. Talis à Schenchio machina Bonnensi portæ primùm (1588) applicari jussa, irritatis intereà fuste saxisque suibus, qui fortè inibi stabulabantur, ut incondito eorum grunntu operarum strepitus obtunderetur, tantâ illicò violentiâ flammam evomuit, ac sparsim impulit, ut non fores modò fractæ revulsæque dissilierint, sed etiam murus portæ continuus eodem impetu ad terram procubuerit, adituque irrumpentibus patefacto, capta sit priùs quàm capi Bonna se senserit.

FAMIAN. STRADA, *J. Dec. secundæ Lib. II.*

Leç. lat. mod.

12

## Le Palmier.

**MULTIS** rebus ad victum necessariis carent incolæ (1). Sed pro iis omnibus una est palma (sic enim appellant) Judaicis et Africanis caryotas ferentibus longè præstantior. Quippè non proceritate solùm et pulchritudine excellit, verùm etiam tota prorsus in usu est ità multiplici, ut vulgò si quem frugi et industrium laudibus efferre volunt, palmâ utiliore appellent.

Prima dos in fructu ipso. Tengan Narlemve Indi; cocum seu nucem Indicam Lusitani dixêre. Humani fermè capitis magnitudine, duplici operimento; quorum exterius in summo levè, stupeâ intus densitate (*caïrum* vocant) netur ac textitur cannabis et sparti modo, cùm alios in usus, tùm præcipuè in vitilium nexus, et anchoralia; neque materia ulla ad nauticos funes, et maris impetus obsequentior. Namque ut salsuginem amat ea planta, *caïrum* quoque ex eâ prognatum, et marinis aquis immersum identidem revirescit, et anchoris illigatum fluitantes in salo naves egregiè continet, non tàm ab innatâ duritie, vel operis firmitate, quàm viriditate ipsâ, et lentitiâ quâdam ad instar corii, ut sese vel in altum elato navigio miram in tenuitatem extendat, vel residente rursus in crassitudinem contrahat.

Interior autem calyx rufo colore et globosâ rotunditate prædurus, addito auro vel argento, in pocula figuratur; ipsa verò pomi caro amygdalæ in modum, pinguedine quâdam et grato sapore lactescens, non per se tantùm in cibo grata est ac salubris, verùm etiam ubi visum fuerit exhausto lacte, paulatim in oleum eliquatur. Totus autem racemus dùm ex eo tener adhuc emicat fructus, modò

(1) In *Maldivis*.

constrictus ac leviter incisus in subdita oris angusti vascula opimum instillat succum, ex quo variis artibus coctionibusque, veteri, ut Strabo ipse testatur, invento, mel seu saccharum, vinum acetumque perficitur.

Jam folia, cum et librariis pro papyro sint, et loco tegularum imposita domibus arceant imbres, tum etiam in vestis formam facili simul ac spisso contextu necuntur.

Denique una eademque arbor omnia prorsus ad rem nauticam instrumenta ac materiem præbet, quippè truncum et ramos in malum, assamenta, et clavos, comam in vela, cairum in funes, ut dictum est, omnium optimos, filaque ad laterum suturas, postremò coccum ipsum, quæque ex eo conficiuntur, in onera. Ità non sine miraculo quodam, omnibus planè rebus ex semet apta et instructa navigat palma; eademque discissa per hyemem vivaces ad prunas lenta ignium alimenta supeditat.

P. MAFFEUS, J. *Histor. Indic.* lib. x.

---

# DÉFINITIONS.

---

## La fausse Philosophie.

PRÆESSE cæteris rebus religionem, interque illas dominari, Regina ita æquum censebat, ut, quæ religionem promoverent, iis maximam lætitiæ causam contineri existimaret; quæ verò læderent, iis longè ultra privati mali sensum percelleretur. Quo quidem in genere haud satis definire possim majorine odio an contemptu dignam judicaverit insanientem quorundam sapientiam, qui novo quodam scelere in societatem grassati, hominibus dum se prodesse velle dictitant, crudelissimè nocent; qui justitiam et probitatem, quia palàm tollere intutum, inanibus fundamentis exstructas proximæ ruinæ obijciunt, natasque sibi leges divinas præfractè negant, humanas non diù verituri; qui summum rerum imperium ab illo Deo, cujus *palpebræ interrogant filios hominum*, cujus *ares, zeli aures*, audiunt omnia, ad surdam cæcamque naturam transferre se posse existimant; qui fidem, quam supremo numini abrogant, haberi sibi postulare non erubescunt; qui christianorum sectam et instituta nullâ non machinâ oppugnantes, modò conviciis proscindunt, modò illudunt dicteriis, modò etiam, si superis placet, dolosis laudibus extollunt; qui, spreth auctoritate quâlibet, omnia ad rationem referri volunt,

sed cujus ipsi sint interpretes, moderatores, vel, si verum dicendum, planè eversores.

Hanc in dies sese efferre licentiam, neque jam clanculùm et per insidias, sed palàm, et quasi indicto bello, virtuti et moribus perniciem quæri, una maxime et intelligebat MARIA, et, quantum licebat, pessimas molitiones vel disjicere suâ potestate, vel, quam tutissimam salutis viam putabat, fuis apud Deum precibus avertere conabatur (1).

HÉRIVAU, *e Laudatione funebri Mariæ Reginae*. 1768:

Même sujet.

QUID dissimulem quæ labe his aliquot annis a pestifero fonte, vesanâ ostentandi ingenii prurigne, derivata, in religionem defluerit? Quàm audacter illam impii, et, odione magis an miseratione digni scriptores oppugnent? Dementes! qui pergant bellum nefarium inferre Deo! qui retusa toties arma, pertinaciùs recoquant; qui circum veteres, ut ità dicam, impietatis ruinas, inquieti obambulant, si fortè quædam ex illis rudera, longo sepulta situ et jamdudùm ignota, rursùs in cælum contorqueant, giganteis, ut credi volunt, lacertis!

Horum clamores et protervos risus, et crescentem stolidâ vulgi admiratione superbam audaciam, firmatâ mente MARIA despexit: dùmque, heu! nimium multos, acerbis illorum jocis permotos, propè pudere christiani nominis videtur, ipsa palàm semper tenerrimam pietatem professâ est. Ideò tantùm se imperare putabat, ut religionis imperium stabiliret; ideò se in illustri solio

(1) Voyez les *Leçons françaises*, tom. I, *Définitions*; et tom. II, *Caractères et Portraits*.

constitutam, ut indè lux pietatis suæ clarior enitescens, populos ad imitandum potentiùs incitaret.

MALTOR, *ex ejusdem Reginæ Laudatione funebri.*

Le bon Roi.

Ex omnibus donis, quibus divina bonitas acceptæ sibi nationis fidem amat remunerari, nullum neque majus, neque præsentius est, quàm ut præficiat illi rectores bonos, principes verè parentes suorum, et concordibus animis in publica commoda conspirantes. Regem studiosum, imò cupidum retinendæ pacis, et tamen arma, cùm opus est, non timidâ neque segni manu tractantem; qui hostium consilia sagaciter explorare, sua silentio et altis tenebris premere noverit; nec minùs, dùm arcet externa bella, possit salubri severitatis et mansuetudinis temperamento, exorta inter cives dissidia componere; qui, justitiæ et equitatis tenax, ferocientem sponte suâ, et omnis iniunicam freni dominationis naturam certis legibus coerceat; qui facilis et clemens, divinæ ut potestatis, sic et benignitatis imaginem in se repræsentet; præcipuè verò qui amet paterno affectu populos, et populorum amorem longè victoriis, et immensis opibus, et superbis titulis anteponat: talem optent regem, quibus etiamnùm vota facienda sunt; talem diù servari flagitent, qui sibi tantùm boni, divino munere, contigisse gratulantur.

MALTOR, *in obitum Reginæ Oratio.* 1768.

La Prudence considérée comme vertu royale.

DOTES ingenii, ut ipsa ingenia, aliæ præstant aliis: atque in his principatum quemdam obtinet prudentia, cujus exercitatio et usus in rege constans esse debet ac

ferè perpetuus. Facessant enim mali virtutum aestimatores qui prudentiam existimant summæ potentiæ inimicam esse, et ab iis solùm adhibendam principibus, qui minùs possint, vel parùm audeant. Tyrannorum est potestatem regiam libidine suâ et populorum patientiâ metiri. Sentiant omnes boni principes, quò plus possunt, eò prudentiæ usum esse majorem oportere, ut ipsâ uti potentiâ discant suâ; ut statuunt quid exigat rei cujusque natura, quid imperandum leniter, quid minaciter prohibendum: ut intelligant quid ferat quælibet loci temporisve ratio; ubinam progrediendum celeriter, quandònam lentè properandum: ut observent quid varia postulet hominum conditio; quàm diversè cum iis, pro diversâ illorum sorte, agere et versari debeat:

Quâ dignitate agendum sit cum viris e familiâ suâ principibus, qui, uno minores rege, et universo populo præstantiores, ita suum regi obsequium debent, ut suis ipsis honor debeatur; qui sic continendi sunt, vel potiùs conciliandi, ut in secundo consistent gradu, cum laude ac sine ambitione; et amari semper velint, nunquàm ament timeri:

Quâ auctoritate utendum sit cum aliis regni proceribus, qui a rege distant longiore intervallo, sed ad ipsum proximè accedunt suo munere vel officio; quibus dat rex ut magni sint, sed qui ejus quoque addunt amplitudini; quibus uti debet, ut viris sibi subjectis, sed tanquàm optimis; qui sic ad sustinendum regni onus adjungendi sunt, ut semper utiles velint esse, necessarij nunquàm videri possint:

Quâ cautione vivendum cum cæteris omnibus aulicis; qui plerùmque in eo toti sunt, ut regem inspiciant penitùs, ipsi prorsùs lateant; in quibus vera virtus esse potest aliquandò, et certè est, sed a falsâ vix dignosci potest; qui, si possint placere vitiis, illa colant pro virtutibus; qui reges bonos ac malos perindè habent, dum



illos habeant propitios; quibus rex omnino carere non potest, a quibus vix sibi potest cavere, sic autem cavere debet, ut neque fidat, neque diffidere videatur:

Quâ popularitate accipiendus sit populus, qui pars regni ultima quidem, sed multo maxima; ad quem rex eo se magis inclinare debet, quod populus ad ipsum non valeat assurgere; sic tamen inclinari decet, ut demittat se, non abiciat; ut affabilis sit, non familiaris; et amorem populi colligat, non amittat venerationem:

Quâ gravitate admittendi sint peregrini et advenæ homines, quibus exhibenda facilis quædam majestas, fastus quidam modestus, inaffectedatus elegantiae nitor, qui percellat oculos, alliciat mentes, voluntates adjungat, ut regem diligant etiam qui regno invident, et subditos rege pariter ac regno beatos prædicent:

Quâ denique humanitate omnes habendi sint cujusvis generis imperio regio subjecti homines, quibus rex æquè natus et omnibus; qui ipsum suspiciunt omnes; quorum neminem fas est despicere, quibus rex imperare debet, sed ut homo hominibus; tantò se magis probaturus regem, quantò se hominem meminerit magis.

P. PORÉE, J. Ludovico XV regni moderamen  
capessenti Gratulatio.

La Cour.

INTELLIGEBAT vir sanctus et innocens versari se in aulæ quodam quasi theatro, ubi sæpè cum peregrina virtus est, tùm illustria quæque vitia cum apparatu atque pompâ explicare se solent. Videbat gravissimam sibi personam impositam in illâ scenâ, ubi infinitæ machinationes, suspicio, proditio, infidelitatis fida commercia, spes, desperatio, implacabile odium, ira velox, ultiones occultæ, blanditiæ apertæ, vasta consilia, immoderatæ

cupiditates, multum ostentationis, veritatis parum, erudita dissimulatio, ambitio supra modum. Sentiebat quam difficile esset solâ innocentia tutum vivere inter eos homines apud quos virtutes et vitia pariter periculosa sunt; industria, obnoxia invidia; negligentia, vituperationi; odiosa severitas; indulgentia perniciosa; libertas lubrica; sermo invidiosus, irrisa credulitas. Sciebat illos versatile et translatitium ingenium habere, nascentem fortunam amplecti, crescentem adulari, florentem adorare, pendentem deserere, occidentem et afflictam insectari. O rem inexpertis incredibilem, expertis luctuosam (1)!

*Ex M. Ant. HERSAN, Mich. Tellerii Cancellarii  
Laudatione funebri.*

Le Ministre d'Etat.

**COOPTANDUS** nempè vir, qui et regem et regnum amet, utrique charus, utrique amabilis : qui eò sit solertior, quò minùs præ se ferat solertiæ; qui publicæ plurimum, minimum suæ, suorum fortunæ perparum prospiciat; qui principis benefacta non assentatione, non favore, non gratiâ, sed obsequio, sed labore, sed officiis, sed virtute provocet, nec nisi provocatus admittat, benè merendi cupidior quàm obtinendi; qui quod peragi mansuetudine possit, auctoritate non peragat; qui moderatione semper condat auctoritatem; qui neque fastu, neque luxu, neque apparatu splendido, sed modestâ, nobili et aureâ simplicitate dignitatem sustinendo splendidiorem faciat; qui ad indulgentiam quàm ad severitatem propensior, injuriosus nulli, facile condonet injurias, et condonando pœnitentiam suadeat : qui secum ipse concors et usquè pacificus, ad concordiam et pacem,

(1) Voyez *Caractères politiques*, le chancelier Le Tellier.

quam intus possidet, reges et populos blandè ac potenter alliciat; qui politicæ artis præstigias apprimè calleat, non ut fucum faciat cuiquam, sed ne quis fucum sibi aut patriæ faciat, qui denique, ut voculâ concludam unâ, relinquat dubium, ipsene, an ipsa virtus ministri munus exerceat, an principis iudicium tanti oneris in partem advocantis honorificentius electo sit, an eligenti gloriosius.

P. LASANTE, J. *De arte politicâ Oratio.* 1737.

Le Juge.

OMNINÒ nihil ad commoda populorum imperiique felicitatem potest fieri præstabilius, quàm si jus sanctâ cum integritate reddatur. Sic enim domestica bella componuntur, pax suavissimè fovetur inter cives; sic improbitati frenum injicitur; sic innocentiae præsidium comparatur.

Ad tantum munus, cujus utilitas in omnes reipublicæ partes tam latè patet, cum laude obeundum, quot virtutum ornamentis instructum iudicem esse oportet! Quantâ eruditione, ut populorum mores, regionum consuetudines, veterum instituta, leges, edicta, antiquitatis rationem omnem percalleat! quæ qui nesciat, næ illum errare turpiter, ac sæpè labi necesse est. Quantâ contentione laboris opus est, ut tot simulationum involucris, tot velis sæpius obductam veritatem internoscat; ne aut re non satis excussâ sententiam ferat, aut negotium ducat in dies! Quantâ fide et integritate, ut præsidio sit contra vim et gratiam solitudini atque inopiæ; ut ne quid cupidè, ne quid iracundè faciat; ut ab ipsius tribunali absit omnis acerbitalis, invidiæ, amoris, odii, spei, avaritiæ vel ipsa suspicio; ut perindè jus ferat ac lex ipsa, si posset loqui, judicaret! Quantâ pru-

dentia, ut nec severum nimis, nec nimis facilem se præbeat, ut ne ipso quidem et æquitatis studio longius abducatur! Quantâ denique comitate et patientiâ, ut ne quemquam domo excludat, ut si quid in lege acerbum est, quantum æquitas sinit, condimento humanitatis deliniat ac mitiget, ut ne clientium importunitate defatigetur!

P. LABAUNE, *J. Galliarum Senatui Panegyricus.*

L'Avocat.

NUNQUAM patronus ad dicendum accedet cupiditate laudis et gloriæ adductus, multò minùs spe mercedis et lucri. Paciscendi quidem iste piraticus mos, et imponentium periculis pretia procul abominanda negotiatio, longè ab illo aberit. Si sufficientia sibi (modica autem hæc sunt) possidebit, turpe ducet vendere operam, et sordido quæstu elevare tanti beneficii auctoritatem. Non defendet ille nisi viros bonos: nunquam injusta tuebitur sciens, nec portum illum eloquentiæ salutarem etiam piratis patefaciet.

Ante omnia liberum dabit iis, quorum negotia suscipiet, tempus ac locum, quamlibet verbosè res suas exponant; memor scilicet supervacua cum tædio audiri, necessaria cum periculo subtrahi: neque ad eò pluribus se causis onerari sinet, quàm quas optimè tueri possit. Litis omne instrumentum per se ipse diligenter scrutabitur, neque ad id sequestram alterius fidem et operam adhibebit.

Nunquam, a viro bono in rabulam latratoremque conversus, caninam, ut aiunt, eloquentiam asperis maledictis exercebit. Turpis hæc voluptas, et inhumana, et nulli audientium bono grata, a litigatoribus quidem frequenter exigitur, qui ultionem malunt

quàm defensionem : at si quid modò liberi sanguinis habeat, non sustinebit petulans esse ad alterius arbitrium, tantùmque aberit ut imitetur eos qui conviciis implent vacua causarum, iisque sæpè fictis, modò sit materia ingenii, mereaturque clamorem dùm dicitur ; ut ne vera quidem sit objecturus, nisi prorsùs id causæ necessitas exigit.

ROLLIN, *Préface de l'Abrégé de Quintilien.*

### Le Rhéteur.

EXPLICARE vim ac proprietatem cujusque vocis, verborum ac sententiarum elegantiam et acumen annotare, explanare historias, si quæ occurrant, veterum legum ac consuetudinum doctam obscuritatem diligenter ac curiosè rimari, hæc quidem omnia minimè spernenda sunt, sed multùm infra rhetoris officium posita.

Hujus præcipuas partes esse veteres existimaverunt docere discipulos, quæ sit vera et incorrupta eloquentiæ sanitas, in quâ naturalis insit, non fucatus nitor; quàm sæpè occurrat in orationibus latens consilium et occulta calliditas; quâ arte sensim ac leniter irrepit orator in mentes audientium; quâ luce ac brevitate narret; quâ vi nervos argumentorum intendat; quâ solertiâ ictus adversarii vel ipse eludat prudenter, vel in eum fortiter retorqueat : quemadmodùm dominetur in affectibus, et modò impetu facto irrumpat in animos, modò eosdem tantâ jucunditate demulceat, ut ipsa illa quæ extorquet, impetrare eum credas, et judex non rapi videatur, sed ultrò sequi.

Crebrâ et iteratâ ejusmodi lectione, quâ non leviter transcurrunt optimos scriptores, sed eos penitus introspiciunt, et quantum virtutis habeant intentis oculis studiosè scrutantur, accedit juvenibus limatum, et acre,

et intelligens iudicium. Assuescunt in legendo nihil omittere, sive quod in inventione, sive quod in elocutione observandum sit : artem orationis intimam, quæ plerumque latet (et verò desineret ars esse, si appareret) sagaciter odorantur : sentiunt, iudicio quasi gustu intus admonente, quæ in optimis scriptoribus maximè exstant et eminent, et cur ea excellent. Ipsa etiam, si qua sint, vitia deprehendunt, neque unquam inani se verborum strepitu decipi et vano sententiarum fulgore patiuntur.

*Idem, ibid.*

### L'Orateur.

ERIT ille quidem probabilis orator, qui incorruptè dicat et accuratè : sed curam tamen dissimulet, idque velut non agens agat, atque intelligat eam puri castique sermonis virtutem non tam adesse cum laude, quam abesse cum dedecore, qui non tenui venulâ per calculos fluat aritudini obnoxius in æstu dicendi, sed ingenti latè copiâ redundet ubique tutus a metu siccitatis : modò torrentem ripis coerceat suis, et, quod præcipitur a dicendi magistris, ubertatis luxuriem stylo depascat, qui suavi et conspersâ, quasi verborum sententiarumque floribus, oratione ita delectetur, ut suavitatem amet etiam austeram et solidam, non æquabiliter ubique dulcem atque decoctam ; qui, etsi numerosè volubiliterque ex promptâ memoriâ devolvat orationem, non ita tamen sese fugiat, quin, ubi libeat, securus et potens suè respiret ; qui cuncta rationum momentis firmet, partemque nullam sinat otiosam esse ; qui peracutis conceptisque ingeniosè sententiis auditorem excitet, dummodò illæ attemperatè cadant.

Sed is inter omnes facilè primas feret, cujus oratio non cæteris quidem ornamentis destituatur ; hoc tamen

imprimis agat, ut animorum concitationi par illa nihil jacens ac languidum habeat, sed vehemens atque eòdem sæpè reciproca feratur : quæ saxa, ut ait ille, devolvat, auditoremque, vel obfirmato ferreoque nitentem animo, agat ultrà, cogatque ire quò rapiat : quæ, compositâ veluti facie ad ingenium auditorum, insinuet sesè penitus in illorum mentes, atque eas pugnaci instantique genere dicendi, modò ad iracundiam indignationemque succendat, modò lenitate ac mansuetudine mitiget; amore rapiat, odio inflammet, confidentiâ trahat, retrahat timore, pudore suffundat, flectat misericordiâ, stimulet æmulatione, despicientiâ retardet : in omnem denique partem moderatus, orationi tanquàm laxatis retractisve habenis, impellat inertes ac desides, simul etiam præfervidos confidentesque pro arbitratu coerceat.

P. Famianus STRADA, l. II, prol. I.

L'Historien.

NON modò liber sit ab omni affectu odii, metûs, invidiæ, gratiæ, sed et videatur, quicumque historiam scripserit. Stet veluti rerum arbiter et spectator, dùm se res ipsa prodat seque, ut ità dicam, vel promoveat ipsa et appareat, vel conficiat. Dubia examinet, non ut quæsitō criminis; judicet tamen, ut veritatis vindex, nec timidus, nec temerarius. Affectationem imprimis in stylo fugiat, ne rebus quoque fucum fecisse credatur, illis certè quibus suspecta est omnis diligentia et accuratio. Elocutio ne torpeat tamen aut diffluat; supinitatem istud et negligentiam; alterum inopiam scriptoris arguit. Absint cumprimis rerum minutiae, auctoris sollicita anxietas, jejunitas verborum, phrasium phaleræ, offuciæ sermonis et obscuritas, importunæ digressiones, et quæcunque

docenti auctoritatem detrahunt, aut rebus dignitatem:

Quis ita tractabili ac versatili fuerit ingenio, ut tot personas unus induere possit? ita prudenti, ut aliorum vitiis, tractando, non adhæserit? ita firmo, ut, cum omnibus similis esse voluerit, sibi tandem non fiat dissimilis? ita perspicuo, ut, in tantâ rerum varietate et confusione stylo- rum, liquidus tamen, et suas duntaxat undas trahere videatur? sic est: verum, ut Iridi, ex colorum discrepantiâ venustas; Musicæ, ex concordî tonorum discordiâ harmonia; æri Corinthio, ex degeneris licet metalli admixtione pretium: sic etiam nova hæc quam quærimus Historiæ idea ex omnium imitatione pulchrior efflorescet.

OLIVIER, *Soc. Jes. Latinorum Historicorum quis opt.?*

#### La Poésie et la Philosophie.

Non illam laudamus poesim quæ gravem mephitim inhalet legentium animis, sed quæ suavissimum castissimumque odorem aspiret; non quæ meretricio cultu adulterata mentes enervet atque emolliat, sed quæ decenti cultu insignita illas robo- ret atque erigat; non illam quæ inaniter tinniat auribus, sed quæ utiliter præcipiat; uno verbo illam poesim laudamus, e quâ sanctitas disciplinæ, et, ut sic dicam, virilitas non minus plenè, quàm ex ipsâ philosophiâ, sed magis jucundè percipiatur.

Est illa videlicet veræ et germanæ poeseos præcipua dos, ut voluptatem afferat, sed utilem et fructuosam: lenocinatur legentium animis, sed ut eorum morbis medeatur præsentius: si flosculos inspergit, si melle et lepore omnia perfundit, hoc eâ mente facit, ut salubria præcepta his condimentis mitigata cupidius admittantur. Hujus autem innocentis doli, et, ut sic dicam;



piæ fraudis necessitatem attulimus ipsimet : veritatem incomptam odimus; virtutis asperitate, molles nimirum et delicati, deterremur. Invitandi ergò fuimus quibusdam quasi lenociniis, et, si ità loqui fas est, corrumpendi, ut leniter et penè inscientes pertraheremur eò, quò, si consuleremus nobis, inclinare sponte deberemus. Quamvis itaque fremant hujus artis derisores, dicam quod sentio. Omnes veterum philosophorum bibliothecas poetarum libri superare mihi videntur, cum rerum magnitudine et copiâ, tum maximè fructu et utilitate.

Excitemus hic priscum aliquem philosophum, non unum ex iis qui, segnem et umbratilem vitam secuti, mores depravare, quàm instituere magis poterant; sed Chrysippum et Crantorem : unum denique ex illis, qui virtutem amplectebantur unicam, e celebri porticu educamus : quanta severitas in vultu, in verbis tristitia! quàm implicatæ, et strigosæ ambages! quàm impexa et contorta oratio! ut non mirer si, quod ait Tullius, adolescentes fugiant, stoicumque de gravissimis rebus disputantem, simul atque discus increpuit, levissimæ delectationis causâ, relinquant. Prodeat ex alterâ parte comis poeta, gratiarum et amœnitatum, ut assolet, comitatu stipatus, in eodem ac stoicus versetur argumento, eadem vitia vituperet, easdem virtutes laudet, sed rerum tristitiam molliat lepore et jocis, et amœnissimo sale condiat atque aspergat; quem non alliciet urbanus censor? cui vim numerosæ orationis suavitate non afferet? Deducet quercus et ornos ex ipsis montibus, leonum et belluarum feritatem sistet; hoc est, homines agrestissimos domabit paulatim et excolet, et, quò voluerit, flexanimâ illâ omniumque reginâ eloquentiâ pertrahet, auctor virtutis eò efficacior, quò ingeniosior, quò blandior.

GRENAN.

## L'Éloquence et la Poésie.

CUM omnes inter se liberales artes naturali quodam vinculo conjunctæ sint, tum poesim et eloquentiam qui vel primâ specie cognoverit, is profectò deprehendat maximam inter eas cognationem. Neque enim potest aliquis esse orator, nisi poetico spiritu incitetur, neque poeta summus nisi vim ac nervos ab eloquentiâ duxerit. In utrâque primum est invenire quid dicas, tum inventa decenti ordine collocare, hæc denique suis vestire coloribus. Nam, ut orationem, sic et carmen omnino deceat jejunitas ac macies, cæca et fortuita temeritas, sordida et incompta elocutio. Quæ sunt igitur in eloquentiâ præcipuæ partes, eadem quoque ad poeseos laudem maximè requiruntur. Cum enim innumera ferè sint poeseos ingenia, vix unum reperias quod non aliquam eloquentiæ speciem habeat sibi prorsus gemellam. Modò, ut eloquentia, ingenti sonitu tonat; modò submissior, humanâ voce loquitur; modò rivulorum instar, tenui susurro reptare gaudet: utramque, nunc reginam dicas quæ splendido apparatu sublimis conspicitur; nunc matronam quæ gressu composito modestoque ornatu incedit: nunc puellam simplicem munditiis, quæ inter humiles myricas flores colligit. Par utrâque in hominum animos imperium; nec sermone magis hæc, quàm illa cantu incendere frigidas mentes, ardentes restinguere, ad amorem, ad odium, ad iracundiam, ad miserationem impellere, omni demùm affectu implere.

Neque sanè poeseos quàm eloquentiæ plures victoriæ, plura miracula, numerantur. Ecquis feros et agrestes hominum recentium mores ad meliorem cultum traduxit? Ecquis fundavit urbes, leges instituit, frenoque imposito exsultantem compeſcuit audaciam? Utraque potuit:

Leç. lat. mod.

non tibi solî contigit, ô Thraciæ vates, edomare cantibus feras, silvas saxaque movere sono testudinis; sed qui sæviora feris, duriora saxis hominum ingenia mollierunt, artem tuam æquavêre; aut, ut fabulas ad veritatem deducam, non tu feras, sed rude hominum genus, non scopulos, sed immanes rigidasque mentes non carmine magis quàm illâ efficaci eloquentiâ mitigasti. Memorabitur in posteras semper ætates Tyrteus ille qui clade fractam et prostratam Spartanorum fortitudinem cantu excitavit. Sed neque silebitur in Pericle summa dicendi vis, quâ populum moderatu difficilem, obsessum inclusumque mœnibus, peste, fame, ingentibus malis, majorum deinceps malorum formidine laborantem, ad patientiam ita obduravit, ut ejus vel extincta vox Atheniensium auribus insonans, in plures deindè annos post tanti viri mortem, constantiam eorum animis induerit propè ad ipsorum perniciem. Quòd si famam, si decus, si memoriam spectes, neutra habebit quod alteri iavideat. Ut gloriâ, sic diuturnitate par in mortalium animis erit Homeri ac Demosthenis nomen; neque laus Ciceronis unquam nisi cum laude Virgilio exstinguetur. Illi urbibus suis populisque superstites, humano generi commendati et quasi revincti sunt, æquales fatis litterarum.

Quamvis autem tanta sit poesim inter et eloquentiam similitudo, diversa tamen inter ambas sorores lineamenta; dissimilis nonnihil et vultus et indoles. Eloquentia quidem, ut natu majorem decet, severior ac modestior; lascivior poesis ac juvenili quâdam licentiâ effervescens. Illa sobria magis et verecunda; hæc velut ebria et audaciore spiritu instincta. Hæc otio, ludis, conviviis; illa negotiis magis convenit. In hæc plus apparatus atque cultûs; in illâ plus naturæ. Hæc ultrò se vinculis et quasi fasciis circumligat ad decorem, ita tamen ut in ipsis angustis expedita et facilis videri velit;

illa laxiore stolâ incedit et solutiore, itâ tamen ne fluxa ac vasta appareat. Versatur inter nubes ac procellas sublimi volatu poesis; ad alta quoque eloquentia erigitur, sed itâ nunquàm ut ex hominum conspectu evolet. Utraquë fulmina pertractat, sed poesis ferè ut cum eis colludat, eloquentia ut contorqueat. Altera, quod majus est, cum diis, altera, quod opportunius, cum hominibus colloquitur. In poesi denique fortassè plus artis ac splendoris, in eloquentiâ plus ad societatem civilem utilitatis.

G. LEBEAU.

### L'Apologue.

**CUPIDITAS** ulciscendi suâ, perstringendi alterius, loquendi quod sentias, et quod velis, solertes et callidas apologorum narrationes peperit primùm ac procreavit. Fovit verò securitas et latendi spes eò major, quòd, fabula quò pertineat, quemve attingat, plerique non advertant: aut, si advertunt, minimè omnium advertat is cujus interest, cùm de se quisque difficillimè malè sentiat: aut, si advertit tandem ipse vel per se, vel alterius indicio atque admonitu, vix agere cum causâ possit, et pœnas ab auctore ac reo satis speciosè repetere. Itâ hi, quorum oppressa omnis libertas erat, et quorum os quodam modo consuebatur, ut neque de domino, neque coram domino hiscere liceret, quemadmodùm tulò et impunè quidvis contra dominum effutirent, excogitârunt.

Sed ut a servis inventus iste sermo est ad vindictam mali et propter privatam necessitatem suam; sic publicæ utilitatis causâ retentus est a sapientibus. Intellexit enim consecuta posteritas, neque decentiùs ac minùs odiosè ab inferioribus posse admoneri superiores; neque faciliùs et jucundiùs pueros, mulieres,

indoctos quosvis erudiri; neque omnino commodius falsas opiniones, affectusque prave corrigi mortalium, quam si, rudi et infirma, aut obsecrata jam vitis et cupiditatibus ratione, consulatur ipsa simplex rerum natura, et tanquam vitæ ac morum magistra adhibeatur. Breves narratiunculas, et ex humillimis et positis in medio rebus petitas, fictaque argumenta in morem privatæ et familiaris cujusdam historiæ, quis non, ut ad aures pervenerunt, continuo capiat? Quem non de populo et de puerorum grege et mulierum summâ cum jucunditate retineant stirpes et bestię, quæ non jam mu'tæ, sed disertæ et eloquentes, sensus humanos omnes, affectusque mentis imitentur atque verbis exprimant? Cum autem nullo modo convenire videatur, ut interpellet de officio minor majorem, aut servus commonefaciat herum, ita demum decet, si universè, non speciatim, si ex obliquo, non directè, si quasi aliud agendo, non dedita operâ, aut quæsita occasione. Vitatur etiam invidia fabellæ obscuritate, et afflictæ orationis insidiis, quando qui reprehenditur, antè sibi persuadet rem ita habere, quam ad se pertinere reprehensionem, ac narrari de se intelligat. Etenim quod vulgò dicitur, veritatem odium parere, hanc vim habet et sententiam, ut non facilè quisquam, etsi verè arguatur, se patiatur argui. Itaque paucos quidem reperias, qui fideliter et in loco monere sciant: sed multò sanè, qui monentem ferant, pauciores. Fuerunt ergò monita, tanquam medicamenta, narrationum lenienda illecebris, et obvolvenda fictionibus, quò melius insciis atque invitis darentur (1).

F. VAVASSORIS, *de ludicrà Dictione.*

(1) Voyez *Fables et Allégories*; et la même partie dans les *Leçons françaises, et latines anciennes, prose et vers.*

## L'Histoire.

**FINGIT** ingeniosè facetus apud Græcos dialogorum scriptor, illum poeticis celebratum fabulis portitorem inferorum Charonta, aliquandò e Stygii regni tenebris ad supernam hanc lucem visendi studio emersisse; ibi obvium fortè vehementer oràsse Mercurium, ut, pro veteri necessitudine, dux sibi esse itineris instituti vellet, caliganti, incerto, locorum insolenti; illum, ut nihil non Diis facile est, aliis super alios cumulatis montibus, novum peregrinatorem in summo istiusmodi substructionis fastigio statuisset, atque indè illi subjectas quaquaversum terras, imperia, urbes, tyrannos, ludos, sacrificia, denique omnes omnium mortalium occupationes ostendisset; ut relictæ ad tempus cymbæ, laborisque non sine periculo suscepti, peritum jam humanæ vitæ, senem non pœniteret.

Hæc est, ut opinor, imago Historiæ, ludicra illa quidem, sed tamen haud absurdis coloribus adumbrata. Ejus ope velut in sublimem evecti locum, non aliquot modò, ut ille, regiones prospectamus, sed orbem latè perlustramus universum; non hominum modò vultus et externum quasi corticem aspiciamus, sed intima eorum consilia deprehendimus; non urbium modò et imperiorum agnoscimus situm, sed eorundem ortus et interitus, tantorumque eventuum causas detegimus; denique non unius modò ætatis brevem actum, sed totam omnium retrò sæculorum fabulam contemplamur.

Ecquid hominem ingenuum ac liberalem magis decet quàm hominum vitam et mores et multiplices casus intueri? Obsecro vos: cælum ipsum aviditate cognoscendi petimus; siderum magnitudines, motus, conversiones speculamur; scrutamur terræ viscera; circumfusum

aerem libramus, et totam hujusce communis hominum domûs compagem pervestigamus: ipsos habitatores, et ipsius familiæ, quæ nostra est, seriem statusque varios negligeremus, præsertim cum non modò honesta indè mentis oblectatio, ut in illâ mundi contemplatione, petatur, sed ea hauriantur commoda, quibus qui se libens fraudaverit, is aut inertissimæ segnitæ, aut iniquissimi fastidii crimen effugere non possit?

Ch. COFFIN, *de Historiæ utilitatibus*

*Oratio.* 1710.

Le Sublime.

INGENII et styli sublimitas, rara dos est quam dignè adumbret nemo, nisi qui hujus imaginem in seipso adumbratam reperiat. Hæc nimirum quoddam est naturæ simul et artis prodigium; stupenda et inopina facundiæ vis, quæ potenter allicit, suaviter demulcet, vehementer concutit, fortiter commovet, edomitas mentes subigit, admiratione defixas tenet, attonitas extra se rapit; quæ turbinis instar versat animos, tanquàm fulmen percellit; abripit uti torrens; ut subita lux, radiis amabilibus interdum recreat; varios animorum affectus tam blando, tam imperioso ciet eloquio, ut lectorem scriptor, orator auditorem suos ad nutus docilem præstet ac morigerum, et tyrannidem nescio quam in voluntates exerceat. Verbo dicam, sublime illud, sive scribendi, sive dicendi genus oritur ex innato vigore mentis, tam grandes, tam splendidas, tam improvisas procudentis sententias, tantâ sermonis dignitate ac magnificentia easdem illustrantis, tam inexpectatâ condientis dulcedine, ut sese in attendentium animos transfundere quodam modo, et secum unâ sublimes attollere ineluctabili videatur impetu; aut

inēscatos voluptatis hamo velut captivos ad arbitrium pertrahere.

P. LASANTE, *an tribuenda Gallis rei litterariæ palma, Oratio.*

Le Style italien.

ITALI, veteris hæredes Romæ, sed ab avitâ sublimitate nonnihil degeneres, vix ultra postremum reipublicæ, primumque imperii sæculum, illibatam servârunt styli munditiem; aurum subindè in stannum, flores in flosculos, eloquentiæ fulmina in fulgetra sententiarum, mentis ardorem in ignes volaticos, astra pulchrè splendentia in stellas mutaverunt erraticas: non jam imitantur aquilas a suis consecratas majoribus; non audaci volatu feruntur sursùm, non transiliunt nubes, non tonitruum regionem alâ transcendunt impavidâ: sed levicularum instar hirundinum crispant auras nugaci pennâ; hæc et illæc sine lege, sine consilio ludibundæ volitant; loquacitate argutulâ aures potius vellicant, quàm blandè recreant. Quod equidem dictum nolim quasi hoc ad universam pertineat gentem, cujus membra duntaxat hæc designat effigies! Absit ut hanc per injuriam eleveim, cujus tantum est ingenium, ut in arte litterariâ, nullâ re magis, quàm nimio peccet ingenio. Hæc tantum carpo, quæ vel ipsa carpit in auctoribus plerisque suis, quos vel in argumentis sublimibus delectat stylus tam frigidè quàm pueriliter acuminatus; qui minusculis interdum voculis grandia extenuant, frangunt solida, magnifica deterunt, sententias suapte naturâ magnas, vehementes, masculas, molliculâ et comptulâ ingenii lasciviâ pusillas, enerves ac delumbes præstant, faciuntque demùm, exuberante argutiarum copiâ, ut argutæ mentis videantur inopes. Apagæ ineptientis calami pigmentum futile, fucatis



par meretriculis, et in istarum scrinia cum muliebri purpurisso amandandum! *Idem; ibid.*

Le Style espagnol.

**HISPANI** elatæ indoli obsequentiores, sic plerumque affectant sublimia, ut grallis aut cothurno videantur insistere; tragædos agunt vel in nugis; sentiis vel grandibus, ampullatis vocibus, portentosis eventibus paginam inflant ranæ in morem æsopicæ, cujus ea tumorem assecuta, fatum quoque experitur. Si quando heroas fabulosis exhibent in historiis, non tam domitores monstrorum quam monstrosos effingunt viros; non humanas pingunt, sed colosseas imagines, et incredibili rerum admirabilitate id sæpè consequuntur unicum, ut risum, non admirationem provocent; ut nasutis ipsius suæ patriæ viris ludibrium debeant; et ut illis annumerentur scriptoribus, quos facetus ejusdem gentis auctor non illepidè ludit, dùm heroa fabulæ nunquàm satis laudandæ in alas pistrini impavidè digladiantem tam joculari commento inducit. Dolendum sanè, quòd istiusmodi scriptores splendas Arabum chimæras, quos olim tyrannos passa est Hispania, consecrari aliquandò maluerint, quam latinas retinere veneres a Romanis victoribus ad suos quondam patres felici quâdam compensatione traductas.

*Id., ibid.*

Le Style anglais.

**QUID** autem eloquar de transmarinis illis trium Regnorum incolis, quos non minùs a doctrinarum notitiâ, quàm a doctis gentibus claustra maris per multa sæcula

disjunxerunt; quorum insulæ tam Romanorum litteris quàm armis fuerunt penitus inaccessæ? Illi quidem laudis litterariæ moram litterario studio postea benè redemerunt; his diù si defuit occasio discendi, sciendi cupiditas non defuit; neque si tardiùs propagata est ad illos ingeniorum exercitatio, id ausimus refundere in ullam ingenii tarditatem, cujus acumen subtilitatemque in iis agnovimus haud invidiosè, neque incuriosè prædicamus; sed tamen, si benè se noverint, hos fateri ne pudeat, indulgere se plusculum immoderatæ scribendi licentiæ, fervido imaginandi æstui paulò servire intemperantiùs, stylum efferre in audaciores hyperbolas, longiùs petitis velare allegoriis, latiùs producto vestire verborum ambitu; quasi multorum stylus, nativæ dignitatis indigus; ab adventitio et exotico figurarum lumine hanc mutuari non secùs gestiat, ac novi quidam homines nobilitatem, quam a naturâ non habent, a superbo incessu, a comitatu, vestituque splendido sibi accersere enituntur.

*Idem, ibid.*

#### Le Genre épistolaire.

SUNT qui omnem epistolarum lectionem leve quiddam ac, propè nugatorium esse aiunt: quo tanquàm lacte pueruli, non ut solido cibo etiam grandiores ali debeant. In quibus hoc primum est quod admirer, cùm sermonis usum unum de præcipuis a Deo in hominem collatis muneribus esse fateantur isti obtrectatores, quomodo de descriptione epistolarum aliter sentire possint. Ut enim sermone inter præsentés, ità epistolis inter absentes animi sensa communicantur.

Per epistolas mercatura exercetur, quâ si careremus, innumerabilibus commodis careremus; per epistolas pater cum liberis, vir cum uxore, fratres et propin-

qui inter se, tùm quoque cùm multi inter eos montes multaque maria interjecta sunt, ità colloquuntur, ut unà omnes domi esse videantur; per epistolas et indicuntur et geruntur bella, paces componuntur, inter gentes remotissimas constituuntur societates, fœdera feruntur; amiticia quæ vitæ condimentum est, quo sublato vita quidvis potius quàm vita fuerit, nullo magis adminiculo, quàm mutuis epistolis continetur.

Itaque, si epistolarum usus tolleretur, commercium quoque, et naturalis illa hominum inter ipsos societas tolleretur. Sunt ista, dicet aliquis; sed tamen epistolis sua quisque negotia committit; graves et arduæ disputationes, et ad quas percipiendas doctore opus sit, epistolis mandari non solent. Non ego diffitear in epistolis ad Atticum Ciceronianis, nihil simile, quæ nimirum scriptæ sunt, de rebus ferè domesticis ac familiaribus simplici et sponte fuso dicendi genere, ad hominem usu domestico et intimâ familiaritate conjunctum. Verùm hoc si quis de toto epistolarum genere dicere audeat, ablegabo eum ad Platonis, Socratis, Senecæ et talium epistolas, quæramque numquid illas quoque de rebus vulgaribus et cuilibet sine doctoris operâ perspicuis scriptas putet. Jubebo inspiciat illam in primis quæ a Cicerone ad Quintum fratrem in Asiam missa est, quâ vir non eloquentissimus tantùm, sed etiam tractandæ rei publicæ peritissimus, omnia complexus est, quæ præstari debent ab iis, qui magnis imperiis summo cum imperio præsent (1).

M. Ant. MURETUS. *Oratio* XIX. 1582.

(1) Voyez plus bas *Lettres*.

## La Critique.

**SALSAM** dixi mordacitatem, sed blandè, sed modicè; sed temperatè salsam, quæ nec lædat, nec vulneret, at prudenter perstringat, delibet innocenter. Neque enim hos latratores amem, qui canino dente adversarios impetant, morsu petitos ad vivum ulcerent, crudum unguem hiulco infigant ulceri. Apage scriptores malè natos, qui felli et aceto intingunt calamum; qui scripta fescenninis onerant conviciis; qui bonorum mores jocis proscindunt illiberalibus; quorum paginae lethiferum spirant calumniæ errorisque virus, cujus pestilentem afflatum virtus et probitas perhorrescant. Si quos ejusmodi prodire viderimus, hos Gallia inficiatur suos; non Galli sunt, sed monstra, sed lues, sed probrum Galliæ. Procul, procul hinc tenebricosi partus, non e sinu profecti gallico, sed in subterraneis enati specubus, undè vix furtim audent erumpere, nec solem vident, nisi ut radiis ustulentur vindicibus.

Alios hic ego satyricos intelligo, quos mater Gallia non erubescat filios; qui lucem impunè videant, imò et spargant lucem benignioribus ingenii radiis; qui dulci utile, ridiculum acri, tam aptè, tam solerter misceant, ut vitia defricent, ac defricando ne foveant (1).

P. LASANTE, Soc. J. *De laude Gallorum  
litterarid Oratio.*

(1) Voyez *Caractères*, en prose, et les *Leçons françaises*, même partie.

## La Satire.

**SATYRÆ** est stylum exercere in duros illos et sordidos patresfamiliâs, qui avidiores in colligendo, parciores in tribuendo, mercedem servis, sumptum liberis, victum sibi invident; itaque vivunt omnibus infesti, ut nemini benè, nisi mortui, faciant.

Satyræ est confodere illos emptores nobilitatis pretiosos, qui, quòd venalia habuerint et habeant omnia, genus ipsum pecuniâ credunt emi, qui se novitatem putant exuere, si titulos grandiores induunt, atque in veterum dominorum possessionibus novi domini superbissimè insideant.

Satyræ est nigro perfricare sale illos homines insulsos, simplicitatis, uti prædicant, studiosos, et antiqui moris retinentes, re verâ invenustos, abnormes, rusticos, merum rus, et mediâ in urbe urbis egentissimos.

Satyræ est excutere viros illos politulos, calamistratâ comâ elegantulos, totâ facie candidulos, totos melitos, gestûs mollitie, vocis lenitate, odorum fragrantia suavissimos, nimia demùm suavitate insulsores insulsi-  
sissimos.

Satyræ est personam detrahare illis simulatoribus virtutum, vitiorumque dissimulatoribus callidis, qui, specie probitatis improbitatem obtegentes, ad honorum fastigia humili obrepunt gressu; quique illud austerioris vitæ professione consecantur, ut delicatè et molliter possint vivere.

Satyræ est mordere acriùs perfidos illos domorum exploratores, qui toti in eo sunt, ut sciant et nesciantur; qui, ubi nacti fuerint homines ineptè credulos, in eorum familiaritatem immergunt sese ut rem familiarem exindè subruant.

Satyræ est insequi illos sectatores otii laboriosos, quos hæc una sollicitos habet cura, ut nihil curent; quibus lucis pars optima in somnum, noctis in convivium, reliquum tempus in nugas pueriles abit; qui totam ita vitam instituunt, ut fructum vivendi nullum capiant, amicis omnem eripiant.

Satyræ est omnia denique persequi vitæ genera, et quidquid pravi, absurdi, inepti legibus emendari non potuit; hoc notare, arguere, carpere, et carpendo, si fieri potest, corrigere. Sic nulla erunt vitia ab omni reprehensione secura. Sic, dum justitia liberabit urbem latrociniis, satyra purgabit ab ineptiis. Dum illa sceleratos configet edictis, hæc inficetos dictis lacesset.

Nihilne præterea petetur ab hac præsidii? Ipsæ etiam justitiæ ad præcavenda aut punienda scelera suppetias feret. Silent enim, silent aliquando leges, satyra nunquam obmutescit. Themidis aliquando velantur oculi, neque velo simplici; satyra oculis semper intentis, semper acutum videt. Judiciorum laqueos sæpè fraus eludit, gratia expedit, aurum redimit, potentia abruptit; satyræ aculeos non declinant doli, non molliunt preces, honores et divitiæ non retundunt.

Illæ parcere nescia, scelus armatum adoritur in castris, ignaviam in tentoriis, impietatem in templis, iniquitatem in judicum sellis, rapacitatem in quæstorum mensis, mollitiem in divitum spondis, ignobilitatem in rhedis, ignorantiam in cathedris, vitium denique ubicunque est, ibi detegit, ibi impugnat, ibi confodit, non eo quidem gladio quem adhibet ultrix Justitia, at certè non imbelli telo. Cujus acies quàm metuenda sit dicant Romani illi veteres, qui, quoties Lucilius stylo ardens infremeret, toties difflebant sudore frigido; et qui modò severitatem legum spreverant impavidi, jam satyræ dicacitatem, exanimati metu, horrescebant!

Dicat et Condæus ille magnus, tam formidatus olim Galliae nostræ hostibus imperator, ut illos solo nomine terreret, propè dixi vinceret; tam interritus mortis contemptor, ut illam media inter prælia nudo capite laceraret, idemque satyræ tam æquus æstimator, ut illius metu metum quemvis alium superandum esse crederet; qui, congressurus cum hostibus, unum hoc admonebat suos; ut sibi a brevioribus illis satyris in trivio cantari solitis fortissimè caverent; ratus videlicèt minùs hostilis gladii mucronem, quàm mordacis carminis acumen formidandum esse, caputque morti potiùs quàm satyræ nomen objiciendum (1).

P. PORÉE, Soc. J. *De satyræ Oratio.*

L'Académie Française.

QUÆRITIS quo de fonte in omnes regni plagas illa profluxerit Gallici sermonis elegantia tam integra, tam sincera, vix ut illi detrahi quicquam, vel addi possit. Cernite Parisiacis in mœnibus exstantem Academiam illam nomine, re ac beneficio Gallicam: illam inspicite linguæ vernaculæ vocolas explorantem, cum delectu dijudicantem ac severitate, novellas et pravo muliercularum abusu invectas resecantem, abrogantem antiquas, sed nimia vetustate barbaras, vulgatas, sed solo vulgi calculo superbientes castigantem, vocabulis ad vocabulorum nexus et commissuras censoriam traducentem virgulam, dædaleas locutionum ambages, duriores vocum se invicem collidentium sonos, ancipites verborum structuras, omnia orationis vitia, tanquàm e supremo tribunali dispungentem. Quid mirum, si ex illâ fontis limpiditate illimes rivuli totam cœperint irrigare Galliam, si

(1) Voyez les *Leçons françaises*, t. II, *Caractères ou Portraits*.

patria lingua, non, ut olim, vocum inconcinnitate turpis, asperitate rigens, granditate tumens, vel inanitate gracilis, sed cum modestiâ elegans, cum suavitate virilis, cum simplicitate grandis, cum firmitate fluens ac tenera, uno verbo tota Parisiaca et academica ubique provinciarum effulgeat?

P. BAUDORY, *Paris. Proo. Proo. Paris.*  
*quantum debeant, Oratio.*

La France.

AGER vini et frumenti ferax; oleâ quoque insignis et omnibus pomis quæ crudum aerem non ferunt, qui ad Alpes et Ligusticum mare porrigitur, aut viciniore occidente intepuit. Neque ulla regio in orbe terrarum pro suis finibus tot incolis divitias indulsit: adeo omnis generis opibus clara, ut exterorum mercatorum commercia penè ad solam voluptatem exceperit. Nam et luxus transalpino serico pretium fecit, et artificia germanica opulentum populum ad peregrinas delicias adverterunt. Britannicæ tamen merces, si non necessariis, utilitatis certè plenissimis, navigiis subvehuntur, quæ plumbo atque stanno, ubere etiam croco, tam quotidianis usibus, quàm altiori elegantie ministrant. At Gallia, præter menses, quibus solitudinem Hispaniæ levat, vina etiam in frigidiorum viciniam dispensata, multâ carbaso et cannabi dives, necessaria plerisque gentibus vela, rudentesque, et quæ cætera ex funibus in classium armamentis idonea, subministrat. His et aliis dotibus, aurum, quod in venis suis vix habet, largissimo proventu excipit, ut, qui illud anxiâ et crudeli diligentia effodiunt, qui ab extero devehunt sole, plerumque videantur Gallicæ felicitati famulari.

Tam diffusâ regione, tot provinciarum vario nexu



compositâ, vix sterilis aut inculti soli glebam indulgentia naturæ omisit. Nam et vasta aliquot in Aquitaniâ loca, ne incolis quidem sunt vacua, vel ingrata, pinetis frequentibus, et succo fructibusque pretiosis; avibus quoque catervatim provolantibus, quæ in deliciis solent haberi: ut aeri illa plaga tantùm debeat, quantum de justo telluris officio arena subduxit.

Gallia ad utrumque mare pertingens, Oceano alluitur, et pelago quod ab Hispaniæ Africæque faucibus positas ad Ægyptum terras interfluit. Ità commodus nauticæ rei situs, et qui classes per omnis nominis maria littoraque possit admittere, si Galli, quàm equis, tam navali industriæ assuescerent, spesque, ut subitas, ità longas ferre possent (1).

*Ex BARCLAI, Iconis animorum Cap.*

Même sujet.

REGNI Gallici naturam et dotes paulisper animo recognosce; ejus observa situm, illud aspice in Europâ, terrarum parte nobilissimâ, sic positum, tanquàm ipsius cor oculumve, gemino conterminum mari ad socianda commercia, non illo circumdatum undique, nec veluti carcere inclusum; imperans Oceano, sed non contra leges naturæ domito, neque a pelago vindice metuens agris et urbibus diluvium; regnis præinctum adjacentibus, non arctatum illorum ambitu, sed quasi coronatum.

Illius contemplare cœlum, amœnum, salubre; non crassis obductum nebulis, sed plerùmque luce purâ diffusum; non vaporatum nimiis ardoribus, non aspe-

(1) Voyez les *Leçons françaises*, tom. I et II, *Descriptions, ou Caractères et Portraits*.

ratum immodicis frigoribus; sed accessu recessuque solis modico, alternâ vice, temperatum.

Illius explora solum, naturâ suâ fertile, si accedat cultura solers; ac, si satis accipiat, abunde redditurum; nec modò suffecturum ad omnia vitæ necessaria, sed ipsis quoque deliciis serviturum; non pretiosi quidem metalli ferax, sed earum dives rerum, e quibus auri tantum argentique colligat, quantum ditandis omnibus ejus incolis satis fuerit, si quid explendæ quorundam hominum avaritiæ foret satis.

Imprimis verò ejus incolarum, qui sunt in omni regno pars regni maximè spectanda, indolem et mores intueri. Illum vide populum, ut vultu, sic animo candidum; ut corpore, sic ingenio elegantem; ut pacis, ita belli muniis idoneum; fortem, sed sine feritate; magnanimum, sed sine jactatione; callidum, sed sine astutiâ; prudentem, sed sine tarditate; levem fortassè quidem, sed in levibus; mobilem, sed in ludicris, stabilem verò in fide; constantem in amore principum; liberrimum in obsequio suo, et in libertate suâ obsequentissimum.

P. PORÉE, J., *Ludovico XV regni moderamen capessenti Gratulatio.* 1723.

Paris.

URBS fœcunda gignendis malis, quæ in omnes partes tanti momenti est, ut, quò vergat, eò ferè inclinent omnia, quia in eâ vires totius regni et spes sitæ sunt, et quia inde in omnia regimen. Fundit in omnes provincias imperium, armorum et legum potens. In gremium peregrinorum genus omne recipit, et communi nomine humanum genus fovet, non instar dominæ, sed matris. Cives vocat quos admittit, ac pio nexu remotos toto orbe sibi devincit. Non sese æquiparet antiqua Roma, nec

Leç. lat. mod.

14

quidquid urbium illustrium apud Eoas gentes : quadruplices urbes effundet, nullo plebis exhaustæ dispendio. Centum millia armatorum emittet, plateis insuper affluentibus; quatuor reges inopinos splendide excipiet; saturis civibus, intersecta suo Sequanâ, qui dorso circumfert quæ alendo regno sufficiant (1).

E Benj. PRIOLI, *de rebus Gallicis Histor. libº 1º. 1669.*

### La Géométrie.

EA est geometria, quæ infimis, mediocribus, et summis hominibus, et viris terrarum principibus utilis est et maximè necessaria. Quippè quâ agricolæ, nautæ, reges ipsi et imperatores, omnes omnium conditionum homines, sive quis infimas et sordidas artes tractet, sive ingenuas ac liberales, æquè prorsus indigeant, neque suo quisquam officio defungi possit, cum aliquâ laude, nisi geometrica consecutus. Hujusce artis præsidio et elementis omnem latitudinem, longitudinem, altitudinem, profunditatem agrorum, montium, insularum, fluminum, maris adipiscimur.

Ejusdem ope dimensionem atque divisionem, omnem in cælo siderum per instrumenta observationem, omnem horologiorum vim, et ponderum rationem, omnem rerum apparentium speciem, tam variam ac multiplicem, speculis in fulgentibus, et in aliis pellucidis splendoribus, in picturis, in aquis, et in aere variè illuminato prospectum accipimus.

Hujus artis facultate totius mundi machinæ medium ac centrum, cardinesque circa quos convertitur, invenimus, et orbis ipsius figuram et quantitatem exploratam habemus. Hujusce scientiæ elementis vim cæli universi,

(1) Voyez les *Leçons françaises*, t. II, *Caractères et Portraits*.

siderumque ratam et constantem conversionem, ortum, occasum, abitum, reditum, ascensum, descensum, diei ac noctis, temporum toto anno per totum terrarum situm et circumscriptionem, et mundi ipsius inclinationem, tam mirabilem varietatem et vicissitudinem cognitam habemus. Hujusce scientiæ adjumento conjunctos et oppositos planetas, et aspectus varios, tam faciles et expeditos habemus, ut loca illorum in cœlo, et defectiones solis et lunæ, multò antè quàm sint, in posterum tempus mathematici prænuntiare possint. Hujus etiam artis beneficio et elegantissimam totius mundi fabricam antè conspectum nostrum positam, mentis oculis objectam et obversantem videre possumus. Ac, ne plura quæ innumerabilia sunt persequar, ad ipsam empyræi cœli, quatenus imbecillitas ingenii humani ferre potest, cognitionem et scientiam ejus opè ascendere possumus, atque illud, quod incredibile est hominibus, et omni fide quasi superius, credibile fiet, et planum oculis ostendatur geometricorum munere præstantissimo.

E P. DE LA CERDA, Soc. J. *Eloquentiæ camporum*  
*parte I. 1668.*

### Les Songes (1).

SOMNUS conjunctos interdum consuevit disjungere et disjunctos copulare; siue hoc re ipsâ fieri credendum est, ut, corporibus somno inerti occupatis, animi interim tanquam e vinculis furtim evolare gaudeant, immensoque spatio pertinaciter exacto, suos amores invisant; siue mens humana quoniam ignea est miræque agilitatis, simul atque omnia corporis organa somnolenti illi vapores inva-

(1) Voyez les *Leçons latines anciennes*, tom. II, *Descriptions*, même sujet.

serint, illa interim otii impatiens crassis illis nebulis obluctatur, et vel ipsa sibi fixas illic imagines renovat, vel ex diversis vaporum discursibus diversas sibi rerum facies depingit; sive, ut poetæ narrant, rex quidam placidissimus ac Deus humani generis amantissimus, quem Somnum vocant, ubi artus sensusque mortalium diutinis operis fatigatos aspersit succo lethæo, suique oblitos dulci quiete reficit, Morpheum quemdam fingendarum formarum mirificum artificem in terras emittit, qui leni volatu, nunc in hujus, nunc in illius cubiculum illapsus, notas unicuique imagines repræsentat; sive ex ulmo illâ ingenti, ut poetæ finxerunt, geminis portis ad nos evolant.

*Ex ERASMI Epistolarum Centuriâ VIII<sup>a</sup>, Epistolâ XVII<sup>a</sup>.*

#### La Mémoire.

MEMORIA excellens vitæ bonum, tanquàm thesaurus penusque disciplinarum, germana litteraturæ, musarum parens, altrixque sapientiæ. Quid enim? an potest quicquam esse aut excogitari præstantius, quàm eam patere in animo capacitatem, quam immensa rerum aliarum aliis quotidie accedentium congeries non modò non exæquet, non expleat, non cumulet, sed dilatet etiam laxetque ac fundat ampliùs, novosque semper sinus ac recessus intùs latè lacunosos aperiat? Quid admirabilius, quàm rerum verborumque multitudinem, formâ variam, sensu discrepantem, numero infinitam, iis loci angustiis ità non confusè ac permistè, sed distinctè electèque conservari, ut, quasi discreto descriptoque in capita seu familias populo, in fronte domûs domini titulum legere, indèque habitatorem evocare, aut gentem universam censere faciliè possis? Quid accommodatius, quàm simulacrorum ingentes copias, tanquàm addictam ubique tibi

sacramento militiam, eo inter se nexu ac fide conjunctam coherentemque habere, ut sive unumquodque separatim, sive confestim universa, sive singula ordinatim in aciem proferre velis, nihil planè in tantâ rerum turbâ turbetur; sed alia procul atque in recessu sita prodeuntibus locum cedant; alia semiaperto aditu quasi tentabunda, et, an ipsa quærantur, exploratura subsistant; alia se tota confestim promant, atque in medium certò evocata prosiliant? Hoc autem tam magno, tam fido domesticorum agmine instructus animus quam speciem suâ auditoribus exhibebit; dùm nihil agetur unquam, nihil cadet in consuetudinem quotidiani sermonis, nihil in disquisitionem deliberationemque aliquandò vocabitur, cujus arbitrium ille continuò petere ab antiquitate, testes citare majores, sententiis exemplisque confirmare, dicta sapienter, fortiter facta, excogitata prudenter inserere, cum recentibus antiqua, nostra cum externis, cum ultimis prima mediaque conferre ad pompam usque ostentationemque non valeat?

Famianus STRADA.

---

# FABLES.

---

## PRÉCEPTES DU GENRE.

**F**ABULA proprio vultu, propriâ pulchritudine contenta, nonnisi ægrè et quasi feluctando suscipit peregrinòs ornatus exquisitamque munditiem; imitata modestam virginis ingenuæ, quæ, si fortè nitidiorè solito vestitum festus dies imperare videatur, non multùm allaboret comendo se ad meretriciam anxietatem, non aut calamistro vibret capillos, aut curet nativos colores augere pigmentis, sed formam potiùs omni simplicitatis gratiâ commendet, aut, si usus est aliquis ornamentorum, hæc a floribus temerè oblati, quàm a fucò, cincinnis, vel quocumque artificio, repetere malit.

Talem se bonis illis Æsopi ac Phædri temporibus fabella monstrabat; talem se conspici gestiebat, non minio vel cerussâ diffluentem, non arte tinctam, non alio demùm quàm suo decore splendentem. Sic ambo eam virtutem affectârunt, ut alterum præ eâ cætera neglexisse, alterum huic præ cæteris studuisse appareat. Quàm amplam videlicèt ornamentorum segetem immensus ille facultatis poeticæ campus aperiebat Æsopo, si eam colligere voluisset! quantùm suavitatis a modulatione numerorum! quantùm etiam festivitatis et jocorum ab ingenio

suo potuit in apologos suos conferre! Id tamen videtur cavissee præsertim, ne his omnibus scriptura sua quidquam deberet, ratus haud dubiè eo neglectu, eo, ut ita dicam, incultu, futuram longè pulchriorem, quàm omni adjutam ope lenociniorum.

Quid ille Phædrus, inimitabilis imitator Æsopi? Quamvis ingenio suo paulò liberiùs indulserit, quamvis plus urbanitati, plus etiam joci, plus elegantiae tribuerit, quæ cura nihilominùs simplicitatis! quàm nihil de ingenuo illo apologi candore mutavit! et hoc profectò est quòd sanioris eloquentiæ magistri hâc nostrâ ætate singulari quodam præcepto vetuerint, hanc dictionem poeticis astringi numeris, ne res quæ naturâ suâ maximè decebat, nativum hunc, simplicem ac liberalem habitum exueret labore ac tormento carminis propè inevitabili. Quod consilium, etsi suo aliquo laxamento eget, hanc certè vim habet, ut non alium fabulæ colorem patiamur induci, nisi quem natura ipsa præscribit; aut, si accesserint ex alienâ facultate ornamenta, sic distribuantur toto opere, ut ars non excogitasse, sed, quod unè e recentioribus Fontanio nostro contigit, natura quasi sponte effudisse videatur.

LUD. MARIN. *De genere fabulari Orationis*  
*Pars altera.*

But moral de l'Apologue.

QUI censetis antiquos illos fabularum inventores voluisse tam multiplici, tamque ingenioso apparatu figmentorum? An ut legentium aures demulcerent inani modulatione vocum, aut otiosos jejunâ garrulitate morarentur? an potius ut ad alienam speciem arborum belluarumque, velut ad speculum, intuendo, sibi aliquandò mali displicerent, et, si minùs odio vitii, metu certè irrisionis et



invidiæ, temeritatem in consiliis, avaritiam in quæstu; superbiam in imperio, fraudem in omni consuetudinis ratione vitarent? Quò spectat illa leonis ac lupi toties objecta rapacitas, nisi ut ab injustitiâ caveamus? quò illa vulpis ac simiæ calliditas et versutia; nisi ut vel ipsum doli ac dissimulationis odorem aversari discamus? quò demùm illa cæterarum animantium aut solertia laudatur, aut damnatur vecordia, nisi ut ad earum exempla fugiamus quod turpe est, quod honestum est imitemur?

Neque verò id mirum cuiquam videatur, si, non palàm et apertâ vi, sed occultâ machinatione, et quasi per cuniculos prudentissimi homines improbitatem adoriri mauerint. Tali fermè artificio utendum, eâ circuitione opus est, ut nostrorum nos pudeat aliquandiù vitiorum. Ea est humani ingenii natura, ut reprehensionem vel mitissimam omnium maximè reformidet. Vix dici potest quàm longo habitu sit homo circumveniendus, ut adeatur; quàm timidè, quàm cautè, accedendum sit ad illas animi latebras intimosque recessus; quàm ægrè sibi quisque vel levisimi delicti confessionem extorqueri patiatur: et quemadmodùm vulnera, præsertim si pervenère ad vivum, tangenda sunt molliter prudenterque tractanda, sic vulgò est in morbis animi, quibus si paulò importunior medicina contingat, eo nonnunquàm dolore pungit ægrotos, ut e clamoribus ad furorem, a furore ad pulsationem plerùmque medici cædemque prorumpant.

Porrò habet id apologus proprium, penè dixi admirabile, ut, cùm homines carpere sibi præcipuo quodam jure vindicet, quod fieri minimè posse crederetur in illâ teneitudine animorum, sine ullâ tamen etiam ejus, qui admonetur, offensione castiget. Sic reprehendit, ut non sentias; sic vitia tua denudat, ut tute tibi intereâ mirè tectus esse videaris; sic denique ridet, ut de te ipse rideas, et illam ipsam imaginem insulsitatis quæ de te nonnunquàm expressa est, ames, nec nisi invisus ab eâ divellaris.

Neque is omninò malè qui totum hoc dicendi genus traxisse suam originem suspicatus est a servitute, quæ, cùm intolerandæ dominationis impatiens jugum excutere vellet, nec posset, amore libertatis innato erumpebat primùm in querelas; deindè, cùm has etiam liberas non sineret, reprimeretque vultus tyranni vel domini succensentis, ut se tamen oppressa quodam modo solaretur, confugiebat ad jocos, et calamitatem suam putabat invidiâ opprimentis posse quadamtenùs allevari. Tùm enim verò quid erat undè in mancipium dominus desævire vellet, cùm aut puniendo suam ipse visus esset animi nudare conscientiam, aud ridendo impetus omnis iracundiæ tam leni admonitione frangeretur? Adeò hæc omnis oratio, quæcumque habuerit initia, quoscumque illa auctores agnoscat, hùc demùm refertur ut mores hominum efficacissimâ quâdam suavitate corrigantur.

*Ex ejusdem Orationis parte priore.*

L'Araignée et la Goutte.

ARANEÆ per iter fortè obviam habuit Podagram. « Et » quò, inquit, tam mœsta proficisceris? — Rusticum, » ait illa, et hirsutum hospitem nacta eram, qui me » fame, ac labore perpetuo cruciabat, qui, cùm a mane » ad vesperum me inter glebas et saxa tenuisset, vix » serò pulverulentam atque inopem domum repetebamus » miseri, nunquàm integris calceis, nunquàm sine fasce » gravissimo. Illum infelicem diem nox haudquaquàm » felicior sequebatur; tristi quidem ille me cœnâ, mucidâ » ac lapidosi panis veteribus fragmentis, alioque et præ- » duris oleribus solabatur, aceto turbidam superinfun- » dens aquam. Saturnalium dies erat, quoties caseus » sardus accesserat. Sic exceptam agresti demùm et ipsius » agelli durtiam superante grabatulo componebat. Ad

» auroram indè consurgens, rursùs in campum, et ad  
 » invisum cogebat opus. Sic diem dies urgebat : nulla  
 » interim quies, nulla spes quietis. Festo enim die, aut  
 » domi lavabat oves, aut rivo viam præparabat, aut sepe  
 » novalibus prætendebat. Immortale malum, et domum  
 » meis moribus adversam perosa diffugio. »

His auditis, Aranea : « Heu ! inquit, quàm diversa  
 » conditio mea est ! hospitem habui effœminatum et  
 » mollem, apud quem non summum modò, sed solum  
 » bonum voluptas erat. Rarò pedem domo efferebat ;  
 » cœnam ad auroram, prandium trahebat ad vesperam,  
 » reliquum somnus habebat, purpureis accersitus stra-  
 » lis ; quod conviviis luxuriæque superfuerat, quieti da-  
 » tum. Conquisitæ intùs epulæ, peregrinæ species odo-  
 » rum, Bacchus alienigena, vasa aurea, gemmata pocula,  
 » serico vestitus paries, ostro tellus instrata ; hæc inter  
 » sollicita semper familiarum turba discurrens locis om-  
 » nibus aderat ; nulla domûs pars neglecta, nullus  
 » angulus inaccessus ; dùm verritur solum scopis, dùm de  
 » laqueatis trabibus pulvis excutitur, vix usquàm artificii  
 » mei telas sinebat ordiri ; et, quo nihil est tristius,  
 » si cœpissem ; primo rerum apparatu, spem cadutam,  
 » et labores meos irritos videbam. Agebar infelix, præ-  
 » ceps ejiciebar, quærebam latebras, nullæ erant ; soli-  
 » dus nîveo murus ex marmore nulla mihi miseræ di-  
 » versoria relinquebat. Fugi igitur a facie persequentis,  
 » ubivis quietum exilium domesticis sine fine laboribus  
 » prælatura. »

Hæc cùm illa dixisset, respondit altera : « Heu !  
 » quàm multa sunt bona, quæ vel nesciendo, vel negli-  
 » gendo perduntur ! Ignorantia cæcitas mentis est, negli-  
 » gentia torpor est animi. Aperire oculos oportet, et quæ  
 » salutaria sese offerunt, non differre. Ecce nunc ex his  
 » quæ dixi quæque audio, cùm pessimè sit nobis, erit  
 » optimè, si permutemus hospitia : tuus mihi, tibi meus

» hospes aptissimus fuerit. » Placuit consilium ; mutant domos , et ex illo obtinuit , ut Podagra inter delicias , et in palatiis divitum , Aranea in squalore et pauperum turguriis habitaret (1).

PÉTRARQUE , *Lettre 13*, liv. III.

Le Pin et la Courge.

SATA est olim cucurbita juxta pinum , quæ grandis admodum et ramis patulis exstabat ; cucurbita verò , cum multis pluviis ac cæli temperamento crevisset , lascivire incipit , et ramulos audacius porrigere. Jam serpendo pinum ambire , jam surgere , jam ramos et frondes involvere audebat , ampliora folia , candentes flores , prægrandia poma et virescentia ostentans. Itaque tanto fastu et insolentiâ intumuit , ut pinum ausa sit aggredi : et « Vides , » inquit , ut te supero , ut amplis foliis , ut virore præsto , » et jamjam ad cacumen assurgo ! » Tum pinus , quæ senili prudentiâ et robore pollebat , nihil mirata est cucurbitæ insolentiam , sed illi respondit : « Ego hic multas hyemes , calores , æstus variasque calamitates pervici , et adhuc integra consisto. Tu ad primos brumæ rigentis flatus minus audaciæ habebis , cum et folia concident , et viror omnis abierit. » Hoc exemplo cucurbitas monitas velim , quæ , cum habeant plus animi quam roboris , brevi exarescunt , aut decidunt , dum pinus , quam aggredi ambitiosè conantur , vexari quidem atque turbari potest , extirpari autem aut exsiccari nisi longissimo tempore nequit.

Jov. PONTANUS.

(1) Voyez La Fontaine , liv. III-8.

## Le Taureau qui renonce à ses cornes.

AUDIERAT taurus Momum olim Deos incusâsse, quòd taurorum capiti cornua affixissent, quæ humeris multò fuissent aptiora, utpotè in quibus plus virium inesset, quæque, subjecta oculis, possent in hostem acriùs dirigi. Cùmque hoc Momi consilium bovino iudicio comprobâset, enixè procuravit ut sibi cornua exciderentur, humerisque quàm aptissimè agglutinentur; et cùm sibi plurimùm istiusmodi commento placeret, cum tauro rivali ausus est inire certamen. Sed cùm in primo protinùs impetu arma excidissent, alioquin inutilia, quòd neque in dextram, neque in sinistram facili nisu moveri possent, caputque ipsum exarmatum ad declinandos tantùm ictus, non inferendos paratum esset, post multas plagas ex arenâ profugus delituit, serò intelligens vim naturæ afferri non oportere, et Momi consiliis divina præstare.

Coelius CALCAGNINUS.

## Jupiter et l'Abeille.

APIS obtulisse Jovi favum mellis dicitur. Quis offerentis fuerit animus, non satis liquet. At rarò magnis regibus munus obtigit expers sperati fœnoris. Admovit ori dulce munus Jupiter, et, laudatâ volucris solertiâ : « Age, inquit, quid vis ut ego rependam tibi ? » Hic apis dissimulans quos, tacita meditatur, dolos : « Non me, » inquit, hominum ac divùm Pater, avara sollicitat famemes, aut non contenta sorte, quam tu dedisti, majus optârim bonum. Sed gens mortalium avida, per sum-mum nefas, nostras in dapes involat, et, quas paravi-mus aris et mensis Deorum, furatur ac malè perdit

» opes. Ergò, si labores nostros bonus respicis, si nos-  
 » tra magno Jovi non sordent munera, da vindicare  
 » posse prædones improbos, et hosti, quisquis ille sit,  
 » lethalibus inferre jaculis plagam insanabilem. » Votum  
 improbavit Jupiter et iniquas preces; quin et malignam  
 volucris indolem increpans: « Tibi certa mors est, inquit,  
 » si quem læseris, et vulnere in ipso protinus animam  
 » pones. »

*Epimythium.*

Virus malignum quàm sæpè sub donis latet!

P. LEJAY, J.

Le Rat, le Coq et le Chat.

MUSCULO, qui nunquàm lare familiari suo, hoc est, domestici parietis rimis egressus, lucem aspexerat, gallus ac felis, simul atque exiit, occurrerunt. Felis mansueta ac dormienti similis, quasi non vidisset, dissimulare, oculos interdum aliò convertere, locum non relinquere, nullam vocem dare: contra gallus summâ cum festivitate et maximâ voce accurrere, obviàm ei tendere, maximos ludos inire: musculus, eâ voce ac formâ perterritus, arreptâ fugâ, in penitissimam parietis sui partem se conferre. Fortè domi mater aderat, quæ sic fugientem conspicata: « quò te agis, inquit, ô fili! Quid est, quòd te » exanimatum video? » cui musculus: « perii, mater, » oppidò perii. » Mater: « quid tibi est? ait; quid peristi? » cui tandem misellus: « mihi, inquit, domo » egredienti fit obviàm animal nescio quod bipes, cristatum, plumis tectum, ejectâ linguâ, fluentibus buccis, » ardentibus oculis, quod statim in me fecit impetum, » credo, ut integrum devoraret. Sedebat ex adverso aliud

» animal, pellitum, placidissimum, videre velles, mater,  
 » vultu adeò mansueto, adeò venusto, ut nihil suprà; id  
 » loco se nihil movebat, sed oculos, modò graves somno  
 » paululùm dabat, modò, siderum instar, lucidissimos  
 » aliò detorquebat. » Cui mater : « quid audio ? inquit. Hoc  
 » est illud animal, generi nostro adeò infestum, de quo  
 » ego tibi sæpè narravi; neque aliud quicquam illà man-  
 » suetudinis simulatione spectabat, nisi ut te incautum op-  
 » primeret; contrà alterum illud, festivum ac petulans, ef-  
 » fusissimâ istâ lætitiâ ludos tantùm jocosque tibi parabat. »  
 J. NICH ERYTHRÆI ( *Vittorio Rossi* ) *Eudemiæ lib. IX.*

### L'Alouette et ses petits.

ALAUDA, nescio quo casu, seriùs quàm solet amoris  
 dederat operam. Ergò priùs seges maturuit quàm pro-  
 genies. Jam instabat messis. Nondùm tamen evolare  
 pulli et rudibus alis Penates aliò transferre poterant.  
 Itaque cùm pastum exiret mater, anxiosa suorum vicem,  
 admonet etiam atque etiam circumspectare omnia, stare  
 naviter in excubiis, omnia oculis, auribus explorare.  
 \* Si venerit, et ædepol veniet, cum filio dominus, aure  
 » pronâ ebibite quidquid mussaverit; ex ipsius verbis  
 » signum capiemus aliò migrandi. » His monitis, vix abie-  
 rat, ecce aderat cùm filio rusticus. « Hæc, inquit, matura  
 » sunt; jam, Philippe, circumcursa, amicos mone;  
 » cràs adsint instructi falcibus, cum primo lucu, ut  
 » opem nobis accommodent suam. » Ubi alauda redit,  
 nidum reperit pavore et trepidatione plenum: agglome-  
 rare sese matrì singuli, pipilare, obloqui invicem, ob-  
 nuntiare ominosa verba confuso strepitu. Unus incipit:  
 « Cràs, mater, homo jussit adesse amicos; alius subjicit,  
 » cum falcibus; alius, et cum primo lucu. » Tùm silent  
 ab ore matrìs suspensi. Illa serenior et nutu sedans pavo-

rem : « Si nihil ampliùs, ô liberi, nihildùm pericli est ;  
 » tutò manebimus. Sed crastinâ die aures applicandæ  
 » sedulò. Intereâ bono animo vos esse jubeo ; en cibus,  
 » curate corpuscula ; Dii pestem avertent ! » Illi enim-  
 verò cœnæ dant operam, cœnati somno sese componunt,  
 et mater, et tota domus. Nocte totâ siletur.

Redit aurora ; abit mater ; venit ex composito agricola,  
 amicorum nihil. Ille indignari : « O ingrata capita, inquit,  
 » itâne deesse officio amicos ! At sibi deest ipse qui  
 » segnitiam exspectat hominum ejusmodi. Jam tu, fili,  
 » propinquos voca, crastinâ die præstò sint. » Hæc dicta  
 nidum vehementiùs concussère : omnia metu graviore  
 turbari : redeunti matri circumfundere sese certatim,  
 vexare miseram, vellicando, clamitando : « Jam propin-  
 » quos..... Jam tempus est..... Tempus est, ait illa,  
 » quiescere vos ; procul abest periculum si immineat a  
 » propinquis. » Nec falsa vates fuit.

Illucescit postera dies ; cognatorum ne unus quidem.  
 Destitutus tandem omni expectatione rusticus, cùm de  
 more segetem reviseret : « Vah ! socordiam ! inquit ; nos  
 » verò egregiè stolidos, qui alienam opem exspectemus !  
 » Nemini nemo amicior aut propior quàm ipsemet sibi :  
 » hoc tibi, nate, dictum volo, ut memineris ; scin' verò  
 » quid opus facto sit ? Cràs segetem aggredi nos oportet  
 » ambos cum familiâ ; longè certissimum est in falcibus  
 » nostris auxilium. Erit aliquandò suus operi finis. »  
 Quod ubi decretum alaudæ innotuit : « Agite, ô liberi,  
 » inquit, jam fugiendi tempus est. » Datque signum  
 proficiscendi : statim illi, relictis impedimentis, volitando,  
 lapsando, reptando, certatim alii aliis præ trepidatione  
 incurrentes et obvoluti, quasi tergo falx instaret, ex in-  
 festo loco castra moverunt (1). C. LEBEAU.

(1) Voyez les *Leçons françaises*, tom. II, et les *Leçons latines  
 anciennes*, tom. I.



## L'Achat de Chevaux.

**IMPERATOR** *Follis* optimos undique milites ducesque collectos liberaliter tractavit ; invitatis ad se præterea variis illo ævo nominis præcipui philosophis , et ubique cognitam ejus liberalitatem sponte sequentibus. Inductus est ad hoc consilium a *Coqueio* philosopho , qui aptam ad rem præsentem narrans fabellam :

Rex quidam , inquit , gaudebat equis plurimum , quos undique adductos coemebat quantovis pretio. Propterea certos e subditis homines in externa regna dimittebat qui optimos equos quærerent , et in iis unum præcipue , quem audierat velocissimum esse atque ante alios generosum , et intra viginti quatuor horarum spatium mille stadia cursu emetientem. Quo denique reperto , sed jam mortuo , ne prorsus vacui redirent domum , aureis quingentis emunt ejus ossa , regique afferunt. Miratus ille inscitissimam emptionem , primò irascitur ; mox tamen , audito eorum prætextu , placari se sinit , hanc facti sui rationem reddentium : « Nos , inquiebat unus ex omnibus , nos , ô Rex , omni quidem diligentia quæsitum , quem jusseras , equum adeò velocem eundemque vivum nullum invenimus ; scito tamen vivos ejus indolis ad te brevi adductum iri. Cum enim percubuerit , te vel ossa tanti emisse , profectò mercatores , majoris lucri cupiditate allecti , minimè cunctabuntur vivos adducere. » Acquievit his dictis Rex , eodemque anno tres emit equos , qui ultrò adducebantur , eadem velocitate quâ fuit alter , quem frustra quæsierat.

**Martinus MARTINIUS.** *Historia Sinensis.*

## La Paresse et la Diligence.

HODIÈ adolescentem conveni juris studiosum, et quidem pro ætate strenuum; sed somno et culcitæ, ut qui maximè deditum; vixque impetrare potui, ut sub ipsum prandium zothecam aperiret, nosque salutantes admitteret. Reprehensione inparaveram cùm ille me ex ipso vultu intelligens: « Noli, inquit, subirasci, quasi » verò otiosus decumbam. O vitam Jurisconsultorum » infelicem! Litem adhuc audivi magno labore animi, » necdùm video, quomodò satis commodè dirimere » possim. » — Ego verò: « Quid hoc, inquam, litis est » adeò gravis, ut ne dormienti quidem parcat? » — » Tum ille: « Nihil potes cogitare gravius..... Adsunt » mihi quotidie benè mane feminæ duæ acerbissimè » litigantes: Feminam dixi, satis intelligis, rixosum » sæpiùs genus et implacabile. Altera Pigritia dicitur, » altera Diligentia: hæc me somno excitat, jubetque » ante lucem surgere; illa adversariam arcet graviter- » que increpat; et, quamdiù inter se digladiantur de » somni vitiis ac virtutibus, de lecti commodis et in- » commodis, ego inter utramque judex animi pendeo, » nec alterutram condemnare audeo. Prandium intereà » advenit; ampliùs pronuntio. Vide igitur quantæ me » curæ vel eo tempore conficiant, cùm tibi cessare » videor! » Ad hæc primùm risi: mox tamen indignans eâ, quâ par erat, severitate, ingeniosam quidem, at non minùs lugendam, desidiam castigavi, abique graviora comminatus.

Jac. FACCIOLATI, *Litterariorum Exercitationum*  
XIII. 1723.

## Le Singe réformateur.

INCESSIT olim simiam quamdam cupiditas gentis suæ mores feros et agrestes perpoliendi. Ergò peregrinandi consilium capit, Lycurgus alter, ut, cognitis hominum institutis, collecta indè potioris urbanitatis semina domum referret. Age sanè, penatibus vale dicit. Nil recusat laboris. Tandem incidit in laqueos imprudens; capitur misera, in urbem devehitur, venditur. Indulsit tamen vel in adverso fortuna: neque enim circulatori alicui ferreo ac barbaro, sed politæ matronæ contigit, quæ non simiam tantùm in vinculis, sed plurimos etiam amatores habebat, plerosquæ simiâ nostrâ paulò stolidiores. Itaque in intimam dominæ familiaritatem brevè irrepsit festivum animal. Nam cùm totius diei maximum ac sanctissimum opus, comendi capitis cura, heram detineret, tùm illa conservos inter, quos dixi, solertiâ et elegantia excellere. Nemo mollius fingere cincinnos, nemo flabellum collidere lepidius: subsilire hinc et indè inter mundum muliebrem; acu, calamistro, speculo ludere, vultu ridiculo mille jocos agitare, mille facetias. Quin et in circulis, semper a dominâ secundas, interdùm etiam primas partes agere, ubi, quod sæpè fit, obrepserat paulò pinguior festivitas: ipsa omnium in se oculos blanditiasque avertere; egregias simiæ dotes et non vulgare ingenium pro se quisque attollere miris modis. Denique quotidianis laudibus ferox, ubi sese aulicis artibus satls instructam videt, insidiatur occasioni, erumpit e vinculis, silvasque et natale solum repetit, splendoras vestes et opulenti servitii insignia pro peculio auferens, fugitivum mancipium.

Ut patriam attigit, circumfundere se undique densis humeris hispida et villosa silvanorum turba: mirari in-

cessum ornatumque; hic tenue indusium laudare; alter illitam auro tunicam limis oculis intueri; hic elegantem cæsariem; ille tergum totum pulvere cyprio, nivis instar aut pruinæ, conspersum; omnes militarem tæniâ a tergo fluitantem non sinè invidiâ contemplari. Ipsa gestu lepido et alacri in tumulum prosiliens hanc concionem orditur:

« Hûc ego, relictis regibus et tetrarchis, eo consilio  
» reversa sum, ut vos e rustico et horrido cultu ad urba-  
» niorem vitam traducerem. Quæ sit vestræ sobolis  
» dignitas cogitate. Ordinem vestrum humano generi  
» proximum sapientiâ tuemini. Hominibus vos ut corporis  
» habitu, sic ingenio simillimos esse deet. Nos quidem  
» hominum instituta moresque diuturno contubernio hau-  
» simus. Detergatur e moribus vestris pristinus ille squa-  
» lor. Adsum ego magistra et exemplum. Si quis in repu-  
» blicâ velit esse aliquis, has æquis auribus leges accipito.

» Callidâ adulatione in gratiam obrepito; contemp-  
» tum, odium diligenter dissimulato; probitatem, fi-  
» dem, quasi tritum obsoletumque pannum, abjicito;  
» amicitiam ore tenus colito; cæterum eam versatilem ac  
» privatis commodis obnoxiam ducito; ingenium veritate  
» ne constringito; mentiri promptum esto, ubi commo-  
» dum fuat; ad opprimendam virtutem, quasi ad com-  
» mune incendium restinguendum concurrito; hanc  
» maledictis, hanc jocis aspergito, hoc colloquii condi-  
» mentum esto; omnem sibi quisque dotem, artem,  
» facultatem, virtutem audacter assumito: multos habe-  
» bit præcones qui se ipse prædicaverit.

» Hæ legum tabulæ ad omnia compita affiguntur,  
» Cætera e moribus meis judicatote. Novi ego optimates,  
» quorum vitam is maximè referet, qui maximè imita-  
» bitur meam. »

Cum multo ac distortissimo plausu hæc oratio excepta est, omnibusque suffragiis leges perlatae sunt. Hinc simia,

gens malitiâ, fraude, invidiâ, genti nostræ germana;  
mordere vel amicissimos instituit, et nobili æmulatione  
succensa est novâ quotidie nequitia certare.

Ch. LEBEAU.

Le Courtisan et Protée.

EXCIDERAT e gratiâ aulicus quidam, ut sæpè fit, et in villam mœrens secesserat, ubi beatè et placidè vivere cogeatur miser. Enimverò dormire noctes, dies vigilare, nullam insidiandi occasionem habere præterquàm feris et avibus; non posse vel uno aleæ jactu profligare fortunas, salubriter vesci, modestè vestiri, quantum erat miseriæ! Interdum, ut tædium falleret, ambulare in litore maris, quod non longè aberat. Ibi spectare fluctus et procellas, aulicæ quam desiderabat felicitatis imaginem.

Fortè, die quodam cum in orâ spatiaretur meditabundus, ecce haud procul circumactâ in orbem undâ emergit Proteus, deus ille versipellis; statim, ut est nasutus, hominem qui sit intelligit: tum accedens propius: « Eia, amice, inquit, subolet aliquid ex aulâ tuus » ille habitus, incessus; ac videris mihi vir magnæ molis. » Agedum, expedi quiddam quod angit me nonnihil. » Scis quàm ego sim ad omnem formam versatilis ac » propè cereus. Audivi tamen esse in aulâ plurimos me » solertiores. » His dictis, ut artem ostenderet, fit repente serpens, ac sinuoso caudæ volumine squamosam lorica exporrigit, humi subsiliens. Hic alter: « Desine, » inquit, nihil tu ad hoc serpentum genus quos mil- » lies in aulâ vidi: scias verò nihil aulico superbius » ubi licet, nihil etiam humilior. Reptilis verè progenies » gestire ad solem, procellam fugitare, sibilare mali- » tiam, invidiâ rumpi, vestem, ubi opus est, deponere,

» ac novâ pelle ferox attollere caput e sterquilinio nuper  
» exortum. »

Doluit Proteus se primâ jam contentione victum ; atque ut velocitate ac formarum numero suffragium hominis extorqueret, omnes omnium ferarum formas uno ferè puncto temporis induit. Mugit leo , lupus ululat , rudit asinus ; gannit vulpes , ursus minatur ; modò jubas exhibet , modò dentes , modò setas , modò auriculas. Frigidus ad hæc aulicus ac subridens : « Næ ego , nisi in aulâ vixissem , mirarer sanè ; sed in aulâ tiro quilibet ac novitius omnes ejusmodi vultus quotidie assumit ac longè facilius. Lupi quidem leonesque eminent : tum vel amicos ipsos venatu prosequi ; nunc vulpis , nunc ursi personam agere , et modò apertâ vi , modò fraude grassari ; interdum etiam asininâ voce rudere , si quid publicè dicendum sit ; denique a leone ad simiam , nullus vultus est quem non exprimant callidè. » Atque , ut ipse specimen solertiæ daret , in deum impetu facto , eum frustrâ reluctantem constringit vinculis , et ad nativam formam reverti cogit invitum. « Fateri nunc tandem , inquit , aulicorum artibus artes superari tuas. Jam tibi excidit quidquid est doli ; at aulico nunquàm deest quâ evadat , qui nullis vinculis constringi , nullis artibus ad veram faciem redigi potest. »

*Idem.*

#### Les Etats-Généraux de la Mort.

MORTI quondam in mentem venit habere comitia , et ministrum creare qui sibi foret proximus. Ergò solemni quâdam nocte in solium ascendit cum apparatu horribili. Confluxère undique in atrium ingens , constratum calvariis et laqueatum ossibus , pallidi proceres , populus omnis Morborum. Illa mediis in tenebris fuscâ voce sic intonuit : « Hâc nocte summum nobis ministrum eligere

» decrevimus : prodeat unusquisque , et suas ostendet  
 » dotes. Procul aberit partium favor. Hanc referet ex  
 » ebena virgam qui meritis excelluerit. »

Ad hæc verba ingens exarsit ambitio. Omnes arrecti suspensique supino vultu protendere manum, trepidare, ac pro se quisque propositum decus appetere. Procurrit ante alios Febris, exusta siti et macie peresa : « Clamant, » inquit, omnes familiæ quàm fidelem tibi præstem operam. Ubique insidior humano generi, in patinis, in poculis, in lecto, in rhedâ, pediti, equiti; ubi non? Tum verò quàm obstinata! Oppugnata pilulis, sanguinis effluvio revulsa, clysteribus propè demersa, hæreo tamen, et sæpe nullâ vi depellor e præsidio. Quis acrior me miles, quis constantior? » Adrepat deindè Podagra, vix baculo innitens, et laudes decantat suas: quàm celeriter ex unâ corporis parte obrepat in aliam, e pedibus ad caput involet; quàm validis cuneis divellat articulos et membra contorqueat; quàm callidè, ubi depulsa creditur, subeat furtim, per cuniculos sedem animæ sedulò suffodiens, hospes pertinax. Obstrepat loquenti exululans Nephritis; Pleuritis multâ tussi personat; balbutit raucùm Paralysis; Pestis ardentibus oculis et pustulato vultu egregiè gesta prædicat altiùs: se latissima regna vel uno die perequirare, afflatu letali cuncta sternentem. Omnes denique vociferari.

Tandem Regina, dissonis clamoribus nutu compositis, sic incipit: « Mihi quidem spectata satis est vestra erga » me fides. Sed miror nullum hîc occurrere oculis medicum, ut navatam mihi venditet operam. Minimè est » suâ ostentatrix vera virtus scilicet. Itane verò, ne unus » quidem! non deest etenim apud mortales sua eorum » labori merces, haud sanè pænitenda. Itaque virgam » hanc Intemperantia accipiat: hæc medicorum nutrix, » hæc blanda hominum et amica carnifex, quæ lenociniis » inescat mortalium genus, ipsorumque se immiscens

» gaudiis, ridet tantisper donec interficiat ; quanto cæ-  
 » teris mihi charior, quæ vobis omnibus hospitium et  
 » alimenta suppeditat ! » *Idem.*

L'Épingle et l'Aiguille aimantée.

**MULTIPLICEM** in rebus humanis personam egerat *Spinula* quædam, fortunæ, ut fabulosi heroes, ludibrium. Diu primum apud nobilem puellam in mundo muliebri servierat satis honestam servitutem : in pulvino pernoctare, interdium resupinare manicas, aut capillos coercere diffuentes, aut lemniscos concinnare flexu elegantiori ; modò apposita pectori irrequietam hiantemque telam continere, modò, ut fert humanæ sortis varietas, ad pallæ caudam relegari, quod tamen minùs ægrè ferebat, cum et dominæ amasios videret easdem experiri vices. Tandem tam splendido servitio excidit casu nescio quo, et variis jactata fatis est. Nunc in sartoris brachio enitere ; nunc mendicæ mulieris vagientem puerum pannosâ vaginâ includere ; nunc pauperis poetæ braccas colligere ; nunc litigiosas ac plenas forensis calumniæ membranas constringere. Tandem discussa et disjecta loco, in plateâ quâdam jacuit.

Ibi perculsa rerum novitate, circumspectare omnia, interrogare de singulis, ea mirari maximè quæ minimè intelligeret. Erat enim ipsi caput e multis capitibus unum turgens sapientiâ. Fortè inter cætera conspicit aliquid ferri quod e nigro silice dependeret. Quidnam hoc rei est, inquit bono cuidam prætereunti viro ? At ille : *Acus magnetica*. Noverat *Spinula* nomen ; quippè *Acus* habuerat aliquandò contubernales. Hanc ergò compellans quasi unam e plebeculâ : « O bona, ait, siccine » cessas ! Tene sic torpere inertem et peresam situ ? ubi » filum ? ubi industria ? Agedum excute rubiginem ?



» confer te ad urbanæ virginis digitos. Num te decet ista  
» cum ferrugineo lapide societas ? »

« Parce jurgiis , ô germana , inquit Acus : si quid  
» agam nôris , non sanè desidem et inutilem dicas : Au-  
» distin' aliquandò de magnetis virtutibus ? Harum ego  
» fio contactu particeps. Quis ab amico tali discedat ? Hic  
» me erudiit instruxitque artibus ; ego gubernatoris ma-  
» num regere novi , ut scopulos et vada declinet ; ego  
» per maria immensa , non antè tentatas monstravi  
» mortalibus vias. Ego dux Europæ fui ut Indiam  
» utramque subigeret. Si cum vulgo vixissem , id ma-  
» nebat unum ut inter ignobiles digitos consenescerem ,  
» dux fili , inglorio opere attrita , tibi conditione par.  
» Vide quantum momenti attulerit educationis ac disci-  
» plinæ , non varietas , sed præstantia. » *Idem.*

---

---

## ALLÉGORIES.

---

### L'Amour et la Vertu.

**Q**UID esse dicam quòd , accensâ Hymenæi tædâ , fax Amoris sæpiùs exstinguatur ? Facem hanc scilicet mutua conjugum virtus pascit et fovet. Ut amorem virtus sola promeretur , sic amorem sola perpetuum facit. Hoc illud est quod Fabula , veraciter mendax , et sapienter delira , ingeniosè quondâm edocuit poetarum ministerio ; quorum alter , cùm Amorem cæcum , levem , alatum et vagum , ultrò citròque delectu nullo , nullo discrimine tela jaculantem expressisset , adjectis hisce voculis , *quis dirigit ?* Virtutem alter adjunxit Amoris ducem , quæ cæco detrahebat fasciam ; alato resecabat pennas ; tela quidem relinquebat puero , et acuminata , ut pungerent ; sed , ne vibrarentur temerè , arcum ipsa dirigebat et manum. Sic oculatum ex cæco , stabilem ex vago , sapientem ex temerario fecit sagittarium. Fidem Fabulæ ipsa res facit. Cæcus , imprudens , præceps , et vagus amor est , quemcunque virtus ipsa non dirigit.

P. LASANTE. *Regalis conjugii Panegyricus.* 1725.

## Apollon et les Muses.

NON sunt Musæ nostræ ità tristes aut feræ, ut nunquàm hilarescant, nec tantùm abhorrent a jucunditate animi, si rectâ ratione definiatur. O nos profectò miseros, si palatiis regum atque magnatum voluptas omnis ità contineretur, ut nulla ejus pars ad nostra quoque tuguria pertineret! Si suas corpus delicias haberet, animus delectatione suâ orbaretur! Quod si ità est, quid ergò poetæ fabulati sunt Apollinem suum, litterarum, ut vocant, parentem ac magistrum, corpore vigentem, in ipso ætatis flore, ornatu ad lætitiâ composito, omni decoris et elegantiarum genere delibutum? Quare ab his censetis imaginariam illam Musarum sedem in parte orbis pulcherrimâ collocatam, silvarum amœnitate, frigiditate fontium, serenitate aeris, avium concentibus deliciosam? Quid cytharam illam Apollo gestat? quid illi chori saltantium Musarum atque ludantium? quid laurus illa perpetuâ viriditate constans? quid illo demùm fictitio deliciarum apparatu voluisse censetis, nisi invitare homines ad scientiam adminiculo voluptatis, et opinionem illam demere quam videmus imbibisse nonnullos, consuetudine litterarum animos efferari? atque in eâ re majores nostri, prudentissimi sanè homines et attenti, poetis suffragantur, qui scholis nostris suavissima illa nomina indiderunt, academiæ, lycæi, ludi, ut iisdem nominibus, quæ scientiæ domicilium appellarent, voluptas pariter appellaretur.

MARIN.

L'Histoire.

GRANDÆVAM illa Matronæ personam gerit, quòd ævum omne cognoverit; corpore quidem non obeso, cùm superfluis non abundet: visu verò peracuta est, quòd ipsa etiam principum arcana introspectet: nuda quoque pectore, quoniam abditissima quæque expromit, nihil occultans in sinu. Verticem illi sacra cidaris Hebraico formata ritu circumtegit, quòd caput atque initium historiarum omnium Hebræi scriptores attigerint. Zona ejus adstrictior, quippè quæ profusos eloquentiæ mores non induit. Zodiacum insculptum habet, quòd dies et annos adversariis et annalibus digerat, uti sol describit stasis itinerum vicibus. Scribit autem ad facem prælucentem horologio, et stabili cubo impositam: est enim historia lux temporum innixa veritati, quæ una scribendi firmissima basis est (1).

LEO SANCTIUS, l. 2. *Flor. sub tit. Ven. Ant. v.*

Même sujet.

CUM vitæ humanæ prudenter instituendæ rationem proponere vellet Cebes ille Thebanus, picturam quamdam in sede Saturni se vidisse ingeniosè commentus est, quæ tria velut septa contineret. Primum quidem vitam hominis designabat, in quo Opiniones, Cupiditates, Voluptates morabantur; Fortuna regnum tenebat, et aliis quidem munera dividebat, aliis id, quod dederat, auferebat. Quare hi quidem mirum in modum ejulantes, For-

(1) Voyez les *Leçons françaises*, tom. I et II, *Définitions et Allégories*.

tunam malam appellabant; illi contrâ, inani et inconsideratâ elati lætitiâ, prosperam Fortunam vocabant, et quasi impetu quodam abrepti, in Incontinentiâ, Luxuriâ, Avaritiâ, et aliarum cupiditatum domicilium ferebantur; quos mox Poena, Poenam Mœstitia, Mœstitiam Luctus, Luctum Desperatio sequebatur. Paucos eripuit Pœnitentia, qui, cum ad demonstratam sibi veram Eruditionem contendere vellent, a falsâ sunt abrepti.

Igitur secundum septum falsi nominis Eruditio dicebatur, in quo poetæ, dialectici, mathematici, cyrenaici, peripatetici, grammatici, oberrabant. Ex hoc deinde ardua via per tertium septum in altum tendebat ad veram Eruditionem. Ad quam qui pervenisset, tùm demùm ad Scientiam reliquasque virtutes mittebatur, quæ eum suam ad matrem Beatitudinem coronandum deducerent. Hanc autem ego veram Eruditionem in tertio illo septo exhibitam si Historiam esse dixerim, veritatis a scopo non aberrem.

« Vides, inquit senex ad Cebetem, juxta portam stare »  
 » Matronam formosam, constanti vultu, ætate mediâ et »  
 » jam ad senectutem declinante, veste simplici et adsciti »  
 » titii cultûs experte. Insistit autem saxo, non globoso, »  
 » sed quadrato atque immobili : adsunt ei aliæ duæ, »  
 » filiæ ejus, ut videntur. Harum igitur media Eruditio »  
 » est, altera Veritas, altera Suadela. »

Nonne vobis homo sapientissimus ingeniosissimo hoc commento universam Historiæ naturam, quam hic Eruditionem vocat, videtur expressisse? *Formosa*, inquit, *est*; quid enim pulchrius Historiâ, in quâ pulcherrima Virtutis imago orbi spectanda proponitur? *Constanti vultu est*; hoc verò Historiæ proprium, non opiniones, aut in utramque partem disceptabiles dialectorum quæstiones, sed constantem veritatis rerumque gestarum conservare memoriam. *Ætate mediâ et jam ad senectutem declinante est*? et hoc Historiæ convenit, quæ ab ipso

orbis conditi principio canæ antiquitatis non admirandas magis quàm imitandas virtutes complectitur, et ad subsequentium sæculorum defert posteritatem. *Insistit autem saxo, non globoso, sed quadrato atque immobili*; quis hoc Historiæ deneget? quæ in solido certitudinis fixa fundamento, non in volubili imperiti vulgi rumore consistit: sin minùs, non Historia, sed fabula. Denique *adsunt ei glia duæ, filia ejus*, ut videtur, *Veritas et Suadela*; has qui genuinas Historiæ filias esse negaverit, hunc non solum Historiæ, sed omnis humanioris litteraturæ expertem dicere oportebit. Est itaque vera Eruditio Historia, quæ ad scientiam reliquasque virtutes aditum patefacit (1).

Ex Erycii PUTEANI *Suada Attica*.

La Postérité.

CUM olim ego, Fortunæ templum ingressus, inter reliqua votorum testimonia, in tabellâ quâdam animadvertissem Mercurium trahentem benè magnam gravissimorum hominum cohortem, quos ex habitu senatores faciliè agnovisses, eosque cuidam Dearum maximæ ac Reginæ commendantem, quos illa protento digito ad proximam Deam rejiciebat, et, ut eam adirent, admonerat: cùmque totus huic rei vacarem, accedens æditimus opportunè rem totam declaravit:

« In hâc tabellâ, inquit, hospes, votum oratorum  
 » vides, qui se optant, conciliante Mercurio, ab Immortalitate in comitatum et familiam recipi. Ea autem  
 » Immortalitas est, quæ regio ornatu insignis in solio  
 » considet. At hæc non priùs admissura est, quàm illi  
 » se Posteritati approbaverint. Hæc enim una fores,

(1) Voyez les *Leçons françaises*, même partie.

» quæ ad Immortalitatem ducunt, tuetur, et familias  
 » rationarium habet. Illa verò, inquit, Posteritas est,  
 » cujus occiput tantum vides : frontem verò mortali  
 » nemini videre unquam licuit. Huic itaque ante omnia  
 » ritè ac solèmniter litandum est, ut votum assequantur.  
 » Litant autem illi vigiliis, meditationibus, multâ prece,  
 » sepiâ et papyro. »

Cœlius CALCAGNINUS.

Les Grâces.

IN illo muliebri Dearum choro, quibus lasciviebat Religio veterum, tres fuère quas Græci Charites, Latini Gratias dixère. In aulâ cœlesti nihil decentius, nihil tersiusve, aut lepidius; quippè quæ animis, corporibus, toti denique vitæ humanæ decorem, elegantiam, jucunditatem aspergerent, arbitrae suavitatum ac venerum omnium, cultæ a plurimis, paucis faventes ac propitiæ. Has puellæ mater, sibi puella, scriptis suis poetæ et oratores, operibus artifices, omni voto, sæpè nequicquam, invocabant. Nomina ipsis ad ingenium earum mollissimè ficta. Aglaia omni pulchritudine nitens, Thalia ridens recentissimo flore juventutis, Euphrosyne ad hilaritatem apposita : prima nitorem dabat, altera perennis juventæ decus, tertia amœnitates ac risus aspirabat. Has autem, ut omnis concinnitatis artifices, cultas scilicet comptasque esse maximè decuit. Cur igitur solutis negligenter zonis ac fluente pallâ fingebantur? Id verò significabant periti veræ elegantiaæ æstimatores, non ex anxîâ quâdam et elaboratâ venustate, sed ex nativâ simplicitique munditie gratiam efflorescere; itaque ut in corporibus animisque, sic in scriptis nihil esse jucundius quàm ingenuam et felici negligentiaæ proximam curiositatem. Cùm tres autem essent, nulla, ut inter sorores,

invidia, nullum dissidium ; in pari venustate concordēs nunquā a se invicem disjungi ; imō cohærere semper, implexis inter se manibus connexæ. Si quid enim a gratiâ vel paululū discrepat, perit gratia omnis, cujus præcipua vis non in unius aut alterius partis nitore, sed in eleganti inter se consensione posita est.

C. LEBEAU.

L'Ile des Sirènes.

TANTA est oblectatio paulatim acquirenda cognitione rerum sese pascentis animi, ut illâ qui fruuntur, ab iis neque laboris tædium, neque avocantium voluptatum blanditiæ sentiantur. Itaque sapienter poetæ cū cæteros omnes deos Veneris imperio subdidissent, in Minervam modò et in Musas studiorum præsides nihil ei, nihil Cupidini juris esse voluerunt.

Quinetiam illud ab iisdem memoriæ proditum est Jasonem olim cæterosque Argonautas, cū eam insulam, quæ ab amœnitate florumque copiâ nomen invenerat, præternavigarent, periculumque esset, ne molli ac delicato Sirenum cantu, quæ eam insulam incolebant, ad exitium perducerentur, unum in Orpheo perfugium habuisse : qui, cū assedisset in puppi, simulque fides blandis impellere digitis, simul vocem illam, quâ rupes nemoraque traxerat, explicare cœpisset, tantâ simul aures animosque audientium voluptate complevit, ut jam Sirenum vocibus nemo navigantium moveretur.

Quo figmento, quid tandem aliud doctissimi homines, nisi id, quod nos volumus, indicârunt ? Florida videlicet illa insula juvenus est. Eam qui quasi prætervehuntur, magno in periculo sunt, ne Sirenum, id est, voluptatum blanditiis decepti, et a recto itinere abducti, in vada scopulosque deferantur. Quidnam igitur huic tanto periculo



remedii comparatum est? Quid, nisi lyra Orphei, optimi ac sapientissimi vatis? Cujus suavitatem qui percipiunt, ii et Acheloidum cantus pro nihilo putant, et tandem institutum illud iter emensi, vellus aureum, id est, virtutem cum immortalī conjunctam gloriā consequuntur.

MURET, *de Laudibus Litterarum, Oratio.*

La Cour (1).

AULAM describit Italus poeta quidam, matronæ formā, fronte caperatā, facie macilentā, vultu pallido, spem tamen et lætitiā simulante, nigro vestitu, sed asini pelle ( ut Hercules leoninā ) amictam. Collo catenam gestat leviter conferruminatam, quam, si vellet, facile posset excutere. Capiti regium diadema videtur impositum, speculis distinctum. Stramini insidet, pede uno in lupanar, altero in nosocomium protenso. Dextrā numisma fert, cui medio inest cælata Spei imago, quæ una omnes omnium aulicorum labores et ærumnas solatur. Juxtā stat Tempus malè collocatum, quocum ipsas Pollicitationes, quæ de futuro nunquā non mentiuntur, consensescere videre est. Ex adversā numismatis parte cernitur Adulatio, quæ ambitiosos blanditiarum et cæremoniarum ventos in modum folliis inflare satagit. Musæ ibi totæ in sublevandā egenæ medicantisque Virtutis miseriā versantur, quæ tamen oleum et operam perdunt, utpotè et ipsæ intolerabili onere humeris imposito oppressæ, Fortunā undequāque in earum conatus per transversum incurrente. Sinistrā manu hamum præfert aureum, escā delicatissimā et illecebrosā indutum, quæ tamen in plebeium panem demūm convertitur, quem

(1) Voyez les *Leçons françaises*, tom. I et II, *Définitions et Allégories.*

grex aulicus certatim multo cum sudore captat, nec sine amaro molestiarum sapore avidissimâ fauce devorat.

Gasparis ENS *Pausilypus*:

La Politique.

VIRGO duas inter urbes media, pacatam lætis circum agris alteram, alteram bellicosam, denso milite coronatam, civitatum omnium moderatrix est Politice, felicitati humanæ societatis nata; sceptrum manu eburneum, respondente cætero ad regiam majestatem ornatu, gestat: quia una hæc Reges initio creavit. Et nunc etiam, ubi ritè regnatur, hujus unius nutu reges vivunt vigentque, ut verè regum reginam dicas. Ciconiam summo, Hippopotamum imo in sceptro insculptum habet; pacis alterum, alterum belli insigne; quod utrumque illa tempus, si rectè ac providè consultum fuerit, ad publicam felicitatem dirigit (1).

P. BOMBINUS. *In Vest. Coss. Rom.*, pars 1.

L'Opinion.

QUIS principum ampliores terras obtineret aut fideiiori obsequio coleretur, quærebat apud se, compositus ad quietem, Hermias, cum subito somno oppressus est. Tot regum refertus imaginibus, nihil nisi regium cogitare poterat dormiens, neque mirum quod reginam Opinionem sibi finxerit, imperioso ore, judicandi vivendique leges omnibus dantem.

In altissimo solio consederat, sed videbatur instabile,

(1) Voyez les *Leçons françaises*, tom. II, *Allégories*, et *Caractères ou Portraits*.

ut, si quis validè concuteret, citò tota rueret cum suo cultu majestas : verùm nemo in eam audebat, quòd sacra res ac timenda crederetur. Circa eam variæ fortunæ atque ætatis numerosa multitudo ad contraria facillimè propendens, exspectabat quid decerneret. Illa, quia princeps erat, ex usu principum quosdam gratiosos habebat, quosdam aversos, nec fatuis destitutum erat latus qui mœstam oblectarent : nam, jubente illâ, aliqui utres vento plenos labris et ore premebant, quasi nutricum ubera sugerent, moxque inflati mirabantur latitudinem suam, et hos turba vocabat viros amplissimos.

Neque minor erat voluptas, quam ex aliorum ineptiis capiebat : verùm, ut sat vacavit jocis, visa est ad seria converti, jussitque sua promulgari statuta, quibus a nemine reclamaretur. Sed dùm, silentibus universis, legit præco, probanturque magno adstantibus assensu insulsissimæ leges, et ex parte etiam durissimæ, subito comparuit armata Pallas, ad cujus conspectum cùm fugisset trepida Opinio, mutatis omnium animis, ex communi suffragio Dea conscendit in solium, eaque sapientiâ sua decreta proposuit multitudini, ut cerebro Jovis natam nemo prorsus ambigeret (1).

*Somnia Sapientis.*

Même sujet.

UNDENAM, quæso, conversiones et occasus imperiorum? vel ex debiliore imperantium auctoritate, vel ex discordiis civilibus et indocili rebellantium audaciâ, vel ex majoribus hostis externi viribus, vel ex his omnibus causis in unum conspirantibus. Undenam pariter im-

(1) Voyez *Allégories*, en vers; et les *Leçons françaises*, t. II, même partie.

perii ab Opinione usurpāti oriri potest ruina et interitus? ex debili Opinionis naturā, ex intestinis dissensionibus et inconstante clientium ingenio; ex adventitiā et superiore vi. Verbo dicam, ut regnantium imbecillitas, civium discordiæ, vis major hostium evertunt regna; sic et ipsa Opinionis imbecillitas, rerum novarum illecebra, vis externa fortior itā succutiunt Opinionis imperium, nullum ut videre sit et æquè caducum, et occasui tam obnoxium.

Non est igitur quòd imperii potentiam sui jure sibi gratuletur Opinio; in debilitate congenitā præsensissimum habet superbiæ remedium et modestiæ invitamentum efficax.

Ecqua enim istius est Reginæ auctoritas? Levi admodum fundamento nititur, et, ut nidus halcyonum, perpetuò suspensa fluctuat; quippè architectum sortita debilem, humanum nempè ingenium, non tam rationi, quàm præjudiciis auscultare solitum. Sedet illa quidem in solio, sed nutante atque instabili. Quòtquot indè promulgat edicta, si quid habent verisimile, vix quicquam veri, certi nihil in sese continent; nonnihil quidem probabile, sed et improbabile nonnihil aliquandò præ se ferunt. Ex quo fit ut non nisi anxie ac timide se prodant, verita ne irrisores inveniatur plures, quàm obsequiosos asseclas: egregia Majestas quæ vel suos paveat et eorum eblandiatur suffragia!

P. LASANTE, *de Opinionis imperio, Orat.* 1740.

#### Les deux Tonneaux.

FERTUR, cùm Jupiter universa quæ sunt in orbe fabricasset, cælum, terras, maria, tum belluas atque homines, divum diligenter animadvertisse, futurum esse ut, nisi hominum vitam pœnis ac præmiis pensaret, non

solùm ad omne flagitii genus mortales impellerentur; verùm et Deos contemnerent; eâ de causâ jussisse, ut Vulcanus ærea duo vasa fabricaret, in quorum altero bona, in altero verò mala conclusit: fecisse verò ea pen-  
nata, ut ad mortales pro cuiusque meritis transmitti pos-  
sent. At Pandora diva, cùm esset admodùm cupida visendi dolia, reseratis operculis, cuncta bona malaque sivit évolare. Tùm bona per cœlos spargi, mala autem usquè in Tartara descendere; sola autem spes in malo-  
rum, ut suspicio in bonorum doliis, velut illorum ali-  
menta mansêre: quod cum rescísset Jupiter (ut est Deo-  
rum maximè iracundus) vasa ipsa inania in terras dejecit.  
Accurrêre autem mortales omnes, studio novitatis, vacua  
vasa amplexantes, illi bonorum, alii verò malorum: at qui vacua vasa susceperant, nihil minùs et bona et mala apprehendis-  
se crediderunt: verùm neque bona, neque mala ulli mortalium accessêre; sed illis quidem bonorum opinio cum suspicione, aliis malorum cum spe contigit. Ità factum est ut, quemadmodùm in terris Arabum, qui nocte ferrum aut aliud quidpiam frigidum ac læve presserint, exanimantur præ metu, quòd serpentem calcâsse suspicentur, quanquàm reipsâ nihil subierint periculi, jacturæ verò multò minùs: sic mortali-  
um genus boni et mali opinione solâ distorqueatur, cùm solùm apud superos bona, apud Tartara mala sint: eâque de causâ Jupiter postmodùm desiit hominum acta curare. Quæ quanquàm Fabula sit, non tamen minùs rectam bonorum malorumque originem docet, quàm si ex ipsâ Academiâ profecta foret.

Hieron. CARDANI, *de Consolatione*, lib. I.

## Le Vaisseau de la Grammaire.

GRAMMATICORUM classis est. In prætoriâ illâ quadriremi, tanti exercitûs Agamemnon Priscianus, Ignorantiæ arcem expugnaturus, magnis itineribus vela facit. Paupertas et Patientia navigationis hujus odiosæ sunt sidera; pro Cynosurâ lucidas monetas inspicere est, ex quarum observatione gubernaculum regi solet. Porro Priscianus emblemata gestat in galeâ, ferulam, sub quâ legitur hemistichium : *Subde manum*. In prorâ Donatus sedet, adhortaturque suos illâ voce : *Janua sum rudibus*. Proximos Ignorantiæ impetus sustinet et propulsat. Pueri innumerabiles remos impellunt, lacrymantes per verba activa, sæpissimè per passiva etiam, ut non sine causâ flectere verba Græcorum ludimagistri a verbo *τέττω* consueverint. Navis totius malum procerum ac solidum verbum principale subrigit, cui nititur velum latissimum, quod subtilissima textura Latine orationis genitivis, dativis, singularibus et pluralibus immixta contexuit; in quâ, tanquàm in aulæo, picturæ non desunt: constructio figurata conspicitur, in quâ Enallage Zeugmaque, Syllepsis et Archaismus, Prolepsis et Hellenismus, tria paria desultorum choreas instituunt, saltitantque, citharam pulsante Despautero. In carchesio, mali supremâ parte, Superlativa lasciviunt: bracteolas, ornatus gratiâ, concrepantes Pleonasmî conficiunt. Ad imas fimbrias illigata descendit Tapeinosis: asseres subliis concordantiis compacti sunt: saburra de supinis verborum communium. Verbis imperativis nonnisi gubernator et magister utitur. Panis biscoctus dispensatur ab Arte metricâ, ad syllabarum dimensionem. Foruli non scopis, sed ferulis everruntur. Sentina Solæcis-

morum, Barbarismorum scatet colluvie teterrimâ, exhaurienda sæpissimè.

P. Leo SANCTIUS. L. I. *Florid. V.*

La Rhétorique.

STABAT marginato in pulpito femina, quam facile incorruptam virginem ex ipsâ facie habituque cognosceres. Nullus capillamenti ornatus; nullus oris fucus; sine calanistris et cincinnis, sine medicamentis nativæ formæ decor; prorsus qualem pudor fingit, amat modestia. Ea dicentis speciem præferebat; adeò actiosa videbatur procerâ dexterâ, reductoque brachio; pectore projecto ac vultu prominente, tunc maximè perorare magnum aliquid credidisses; manabatque ex ore dicentis fictum ex auro flumen.

P. BOMBINUS. *In Vest. Coss. Rom. Pars. I.*

La double Route de l'Eloquence.

NON sine multâ animi voluptate legere est quod de falsis germanisque oratoribus scripsit Græcorum omnium festivissimus. Juvenem fingit eloquentiæ cupidum, sed ignarum quâ viâ ad illam perveniatur: nam duæ, sed ex adverso occurrebant, et, incertus cui se committeret, adolescens hærebat in bivio. Flexuosa una, saxosaque, nec impunè, ut videbatur, adeunda, spinis undique surgentibus. Hujus in aditu stabat senex, placido vultu, qualem Platoni fuisse referunt: intonsa barba promittebatur in pectus; et his consentiens vestis, modesto nitore præferebat sapientiam.

Adolescentem invitabat quidem tanta species, ut virum compellaret: verùm reverentia deterrebat; quod ut

senior advertit, suaviter in illum intuens: « Si quod iter  
 » instituisti, ô juvenis, inquit, habe me pro Mercurio  
 » ducem. Hic enim adsto, ut inscios viatores peritus ego  
 » viarum meo monito dirigam. » Ad quem ita adoles-  
 cens: « Diù est ex quo ad Eloquentiam iter facere fert  
 » animus; quâ sit viâ certiùs eundum, igitur doce, pa-  
 » ter, neque sine ad honesta properantem irritò labore  
 » confici, aut periculosis erroribus implicari. — Hâc  
 » itur ad illam, refert senex, semitam digito indicans  
 » quæ saxosâ asperitate et dumis passim horrentibus ar-  
 » dua erat; hâc contendit aliquandò Demosthenes, hâc  
 » Tullius, cæterique quotquot apud Græcos Latinosque  
 » dicendi laude floruêre. Verùm, ut optatum finem asse-  
 » quaris, tibi sumendus est animus, adolescens; nam  
 » plurima occurrent quibus patientia lacessatur. Ince-  
 » dendum erit non per diem tantummodò, sed etiam  
 » cùm cæteri mortales somno solventur; neque est quòd  
 » de comitum solatio multùm speres: ibis sæpè omni  
 » consortio destitutus. Hic enim callis temporibus nostris  
 » infrequens est, ut tu vides: quem tamen si constanter  
 » teneas, in ipso calce, defatigatus, et jam dignus qui  
 » quiescas, habebis eloquentiam. »

Ex adversâ parte se via pandebat, trita magis, neque  
 injucunda viatoribus, in cujus aditu sedebat vir quidam  
 distinctâ floribus veste conspicuus. Qui cùm adolescen-  
 tem vidisset colloquentem seni, primùm risit, quòd ab  
 homine, cui sua ætas omnem venustatem ademerat, pe-  
 teretur de eloquentiâ consilium, ac proindè sic ad juve-  
 nem: « Quid cum tetrico isto silicernio tempus con-  
 » teris? Multi eodem animo, quo, tu ad illum accessêre;  
 » sed quàm pauci verboso fidem habuerint, ex ipsius viâ  
 » solitudine conjice, quam tibi necessariò tenendam  
 » ineptè proposuit. Nam quis, nisi mente captus, tanto  
 » labore tantisque sudoribus velit eloquentiam emere?  
 » Antequàm ad illam iter sis eluctatus, aderit senectus:



» et quis ex eo fructus ut serò fias eloquens, id est posse  
 » benè fari ac commodè, cùm vicina mors adeptum te  
 » quod concupieras omninò silere iubebit?

» Molliori itaque viâ uteris, sed et breviori, si mihi  
 » dicto sis audiens, ô juvenis! Pro clivo enim plana ha-  
 » bebis omnia, pro spinis flosculos, pro vastitate amœ-  
 » nitatem : ubique occurret quod capiat oculos, quod  
 » mulceat aures, quod sensus intimos inexpertâ jucun-  
 » ditate deliniat. Ibis non quidem quâ Cicero ac De-  
 » mosthenes, sed quâ pergunt sortis optimæ viri, quibus  
 » exigua litterarum supellex, et mulierculis placendi  
 » singulare propositum. Hos omnes habebis socios, qui  
 » structuram ac suavitatem verborum magis quàm ratio-  
 » num vim aut altos orationis sensus exquirunt : et quàm  
 » putas jucundum in eos incurrisse homines qui tanto  
 » successu venustis studuerunt ! »

Petri FIRMIANI *Somnia Sapientis, Chimæra ;*  
*Somnium V<sup>um</sup>.*

Comus.

NŒCTIS senium erat, et adultâ somni dulcedine, si-  
 mulque imagine involutus, per suburbanos colles opaco  
 mentis itinere errabam. Varia et verna quædam amœnitas  
 tellurem vestierat, pulso hiberni anni squalore : cùm-  
 que in ipso frondosi nemoris aditu Dryadas meditarer,  
 animumque concuterem, scripturus Silvano carmen,  
 in densissimum penè antrum delatus sum, cujus vesti-  
 bulum naturalis arborum series fecerat, et limen reli-  
 giosæ frondes inumbrârant. Juxtâ, atque adeò in su-  
 percilio purissimi fontis, congestæ e cespitibus mensæ  
 erant, sparsim corollæ, et reliquiæ quædam bellariorum.  
 Convivium aliquod fuisse, madens adhuc lacte vinoque  
 solum indicabat. Ab ipso speluncæ penetrali nuptiale

quoddam murmur et lumen exibat; ut omninò appareret, e nymphis aliquam a novo in thalamum sponso esse deductam. Mirabar ego castissimum secretum, et cujus modi in Ithacâ Homerus fabulatur, Veneris Amorisque numinibus impleri, cùm nescio quis humanâ formâ augustior, tanquàm e confinio lucis et umbræ mihi visus emergere, ipsum planè Gratiarum ac Lubentiarum omnium simulacrum. Vestis vultusque Androgynum loquebantur, et e Mercurio ac Venere sexum: reliquus ornatus et effeminare virum poterat, et in feminâ augere molliem. Caput rosis gemmisque distinctum et radiorum quâdam majestate: coma in cirros cincinnosque digesta, perfusa odoribus, auram quoque imbuerat. Sed has delicias crebri acidique halitus, onusti indicia stomachi, deformabant. Conviviorum aliquem genium esse facilè conjiciebam. Nam et multo sanguine facies rubebat, et toto videbatur corpore molliem induisse. Gestu mollis, ætate nondùm ephebus, vino rubens, et, quasi epularum hæsisset in ore reliquiæ, spinâ argenteâ dentes perfodiebat. Mox lævâ facem, dextrâ aureum roscidumque Liberi lepore cornu complexus, identidem libabat. Dixisses et specum lumine et fontem fragrantîâ violari. Ponè puer sequebatur, qui florido vultu, et superbo ornatu luxum referebat. Puella etiam, ne et sequior sine ministerio sexus esset, sed infra sexum mollis, variegatum crotalum sistrumque gerens, et quidquid ad lasciviam prisca Musa, aut voluptas invenit. Hi nutum vestigiumque heri observabant, et medium mox, accepto signo, cingentes, cantillare tanquàm ad Midæ tribunal cœperunt; deindè, solutâ choreâ, mihi, ut sequerer, innuere. Quo facto, specu excedenti, ac circumferenti oculos, occurrit in reductâ valle structuræ quoddam miraculum, cujus limen lauris et lucernis insigne regiam esse Comi insano penè titulo indicabat. Ecce autem repentino clamore ac tumultu

longa se Bacchantium turba explicuit, digessitque obviam Regi suo itura. Jamque gradum admovebat Comus, Luxu Lasciviâque stipatus, ac pompæ ducem se præbuit; cujus hic ordo descriptus erat: Horæ suavissimos veris odores omnemque florum purpuram spargebant. Amorem Gratiae, Deliciae, Lepores, cæteræque Hilaritatis illices sequebantur: Voluptatem Risus Jocusque. Cum Saturitate soror Ebrietas erat, crine fluxo, rubentis auroræ vultu; manu thyrsus quatiebat, ac breviter totum Bacchum expresserat. Juxtà Insania, Furor, Rixæ, Jurgia, Pugnae: tum Vomitus, Cruditas, Morbi, subitæ Mortes, atque intestata senectus. Sed inter hasce maculas nonnulli cum dignitate relucebant, septemviri Epulones, tribuni Voluptatum. In extremo agmine Lurcones, Comedones, Ventres, et Nepotum Apiciorumque turba. Erat etiam qui Sardanapalum, Lucillum, qui Heliogabalum referret, et, ne philosophus deesset, qui Epicurum. Pulchrum scilicet sub sapientiæ pallio luxuriam abscondere, et a specioso nomine vitiis patrocinium quærere, et quoddam velut velamentum. Porro sequebantur, et totius pompæ vestigia premebant cœcâ caligine Nox, Tenebræ, Somnus, Silentium, Torpor, Terror, Horror, qui in limine aut primo statim atrio, tædarum et refulgentis undique metalli splendore dissipati, in præsens evanuerunt.

Erycii PUTEANI *Comus*.

### La Calomnie.

EPHESIUS pictor Apelles suis Calumniam coloribus egregiè depinxit, idque hâc occasione. Apud Ptolemæum regem quasi conjurationis particeps in ejus caput insimulatus est Apelles ab Antiphilo, pessimæ istius artis professore. Rex, nec a se prudens, et inter adulantium voces

educatus, regiam miscet clamoribus, ingratum insidiatorem, conjuratum pictorem clamitans. Et, nisi e captis et conjuratis quispiam indignatus impudentiam Antiphili, et miseri Apellis misertus, affirmâset illum nequaquam sceleris fuisse conscium, Apelli caput abstulisset Calumnia. Sed, re probè cognitâ, pictorem Rex centum talentis donavit, et Antiphilum in servum addixit.

Apelles, periculi memor, Calumniam hâc sub imagine spectandam proposuit : vir prælongis auribus, quales Midæ fuerunt, in solio velut judex considet, et accedenti *Calumniæ* opem largiter promittit. Viro sedenti duæ mulieres adstant, *Ignorantia* et *Suspicio*. Calumnia fucatæ formæ mulier accedit, iram ac rabiem spirans, et manu sinistrâ facem accensam concutiens, dextrâ juvenem capillis prehensum, ac supplices manus cœlo porrigentem trahit. Hanc anteit vir deformis, pallidus, acutum cernens, macilento vultu, exesis oculis, tanquàm si diuturno morbo contabuisset, quem facilè conjicias esse *Livorem*. Quin et aliæ mulierculæ duæ comitantur, quæ Calumniæ ornatrices dicuntur, quarum alteri nomen est *Sycophantia*, seu Insidiæ, alteri *Fallacia*. Infame Midæ tribunal fugit, quæ genibus repit, femina luctum præ se ferens pullâ lacerâque veste ; atque hæc *Pœnitentia* vocatur, quæ, capite in tergum reflexo, madidis oculis abeuntem Veritatē prosequitur. Hæc imaginis effingendæ ratio, quam effigiem optandum esset in omnibus aulis loco patentissimo esse propositam, ut vel hâc quasi monitione calumniandi audacia frangeretur (1).

E Luciano P. DREXELIUS, Soc. J. in opere cui  
titulus Orbis Phaeton, cap. XXXII. 1631.

(1) Voyez, tom. II, *Narrations et Discours*; et les *Leçons françaises*, tom. II, *Allégories*.

## Cærus, ou l'Occasion.

CÆRUS puer erat pubescens, et ipso pubertatis flore, qui se vernantibus membris affuderat, gratiosissimus. Magnâ erat imprimis vultûs dignitate, lanuginem quatiens, et cinninos, quos Favonio quodcumque vellet agitandos permiserat. Ad hæc florido nitebat colore, velut quibusdam corporis fulgetris vernantes rosas explicaret, eratque Dionysio maximâ ex parte similis. At enim frons gratiis emicabat, genæ regii floris instar rubentes juvenili decore fulgebant, ipsis oculis gratissimâ quâdam face ruboris accensis. Stabat autem in globo, summâ pedum plantâ insistens, quâ et pinnis volucer exsilire propè videbatur. Capillus non more solito creverat, verum coma contra supercilia repens ad genas cinninum effuderat, occiput verò, capillorum nexibus liberum, rarissimos tantum pilos a primo ortu insitos ostendebat.

P. Nic. CAUSSINUS, *J. de Eloq. sacrâ et profund.*

## La Fidélité.

FIDES non procul ab Amore captivam se induit in casses, Heroïna illa regiæ nobilitatis : regium quippè est, vel ipsa verba habere fidissima. Media ei est inter adolescentiam ac senectutem ætas, quod illa non satis experta nimium omnibus se credat, hæc verò nulli penè fidat. Frontem ejus verecundiæ regiam putes, ita nil perfrictum aut protervum recipit. Anchoræ speciem ædificatorum crinium figura gerit, argumentum insigne constantiæ. Erumpunt ex oculis benevola modestiæ obsequia. Cinctura e balteo est, nec discingi unquam poterit tam sæpè auctorata beneficiæ sacramento. Manu præfert annu-

lum sponsionis immobilis characterem ac pignus : sed et canis blandus assecla deliciatur ad pedes , quo nullum animal dominis ac domibus magis fidum est.

P. Leo SANCTIUS, J. Florid.

#### L'Amour du Prince.

AMOR in ipso ætatis flore ac robore vegetus , alacer, confidens, præstò est , quòd pro principe sibi charo et facere et pati fortiter omnia feliciter audeat. Caput illi multiformi cincinnorum cumulo variatur, quos non externa ciniflonum opera finxit, sed ad domesticum cordis ardorem industria formavit plicatiles in annulos quibus capit et capitur. Crispi sunt, nec faciliè ventis illos cedere videas, nisi vel Austro vel Zephyro ; Euro et Boreæ ob-sistunt, neque enim adstrictoriis gaudet hic Amor, neque frontibus corrugatis obsequitur. Ejus lumina fasciâ non obvelantur, optimè siquidem videt quid agat, cum se principi devovet. Intimi cordis sensus clarescunt in oculis, nihil enim celare novit : nudo etiam pectore candidus, quippè quem neque fucus ullus, neque dolus infuscat. Et sinistrâ quidem manu claves porrigit, dextrâ verò cor humanum præfert, quasi clavibus tradat jurisdictionem, corde autem etiam tribunal.

*Idem, ibid.*

#### La Bienfaisance.

LIBERALITAS imperatorio laureata serto, vultum Jove juvene ac juvante dignum expromit : qualis Jupiter visebatur antiquitùs adolescentis ore conspicuus, sub dio positus, et in asylo, salutem spondens ac munera. Crines undatim e cervice profusi, pretiosum ventis donarium circumferunt. Unicornem venatrix nostra domat, ferum

animal ac silvestre : nihil enim tam efferum et agreste reperias, quod beneficiis non mansuescat. Porro vestimentum hujus e vestiario siderum ac solis depromptum videtur, tanto candore coruscat vibratque ! Peplum illud est, quod simulacris Deorum veteres injiciebant : Diis enim pares efficit populus liberales viros. Libera tamen ejus cervix et expers monilium est, sicut armillis dearmata brachia : nullâ unionum serie catenatur pectus, nulla sub aures gemmarum momenta librantur; hæc enim omnia dono jam data sunt. Neque tamen illi quicquam desit : ad manus enim Fortuna pedisequa omnis generis opes ministrat amplissimo pollubro (1). *Idem, ibid.*

Temple de la déesse Monnaie.

Mox fanum invenimus Reginae Pecuniæ sacrum, ubi tot mirabilia a me conspecta fuerunt, ut, si narrarem, æquè audientes in stuporem adducere possem, quàm ipse obstupui. Stabat ante januam magnificam satis, et aureis clavis serâque aureâ superbam, Paupertas, dolata e fago, glandiferâ arbore; atque ab unâ parte Fames macie deformis, ab alterâ Sitis patulo ore eam cingebant.

Parietes verò fani exteriores, nitebant intexto ebore, et multi lapides servabant adhuc innatum sibi gemmarum splendorem; imò integrum tectum atque altissima turris ex puro candentique argento erant fabricata.

Ego suspiciebam tantas opes, et meditabar interrogare prætereuntes, quis hominû Deorumve tales sumptus perferre posset, quibus argenteam turrin exstrueret. Dùm hoc consilium mente volvo, ad intimos fani recessus me necopinantem rapuit undanti turbine colen-

(1) Voyez les *Leçons françaises*, tom. II, *Morale religieuse, ou Philosophie pratique*.

tium subitâ vis. Hic artis solertiam itâ certare cum naturâ vidi, ut vix meis ipse luminibus fidem haberem. Postes omnes ex auro erant, cui aliquandò purissimi adamantes, tanquàm maculæ, intermiscebantur tam tenaciter adhærescentes, ut nullâ vi possent divelli; quamvis hîc et illic signa conspicerentur irritæ spei illorum, qui sacrilegium tentaverant.

Trabes quæ tectum sustentabant, et muri, luxuriâ lascivientes, variis picturis insignes nitebant, quarum quædam vetustate Apellem æquabant, vel Zeuxim, qui pulcherrimam Helenam pinxit ex variarum formarum mixturâ, tam egregiè, ut neque Leda cœlesti partu pulchriorem edere, neque Homerus divino ingenio magis exprimere eam potuerit. Hæc, quia omnes referre alias infinitum foret, maximè feriebat meum animum. Jupiter, rex Deorum et hominum, qui juvenis eandem suo patri Saturno injuriam fecerat, e cœlo pellebatur cum Junone conjuge suâ ac sorore, atque aulam ætheream Regina Pecunia non sine fastu occupabat.

In medio templi stabat ara tota ex gemmis; nam videbatur aurum argentumque, cùm strueretur, Dea loci contempsisse, putâsseque non esse satis simplici arâ adorari. Gratæ suâ viriditate jaspides, et crassi coloris smaragdi, et margaritæ albescentes, et cylindri, et amethysti, et translucens pyropi, aliæque quarum nomina ignoro, aciem mihi perstringebant. Ipsum verò numen ostro præcingebatur, insigne erat coronâ ac sceptro, sedebatque in curuli sellâ super aram divino artificio extructam. Lineamenta pinguissimi vultûs, et tuberosissimum corpus, vitam desidem et otiosam faciliè significabant; et oculi, sive hoc a nativitate haberet, sive illam justiores Parcæ proveciori ætate itâ damnâssent, superciliorum velis latebant absconditi. Tamen poterat et annuere votis blandientium, et indignos a se quàm longissimè remove: ante aram procumbebant flexis genibus homines variæ



conditionis, inter quos solis radiis adusti nautæ, atque callidi mercatores maximum conflabant numerum. Accedebant his non pauci causarum patroni qui litem ex lite trahunt, et medici quibus curæ est divitum fatiscentes morbos in proprium commodum diutiùs fovere (1).

JANUS BODECHERUS, *Satyra in corruptæ juventutis mores.*

Le Génie du Siècle.

ÆSTATE mediâ sub vesperam, et ad primæ noctis confinium liberiùs auris spirantibus, ego, uno tantùm comite, quem mihi multis ab annis familiarissimum conciliaverat litterarum ingens amor, et summa morum suavitas, domo processeram, ut simul, optimâ diei parte, remissa calore diurno corpora non sine voluptate reficeremus.

Cœlum tunc omninò absque nubibus, nisi quâ parte cadebat sol, ut non sine pompâ abscederet, et inter vapores purpureos pulcherrimè occumbens oculos intuentium solaretur nobilissimo spectaculo. In illâ voluptate hærebamus, incerti an splendor meridianus potior esset tam venustâ lucis defectione, noctisque præludiis; cùm subitò e montibus, qui non procul eminebant, auditur fragor, qualis est rotarum in subjecta saxa concitatis equis incurrentium, terramque prementium pondere suo. Procellam instare, audito licèt ex alto strepitu, neuter credidit. Nulla enim in apertissimo aere præsagia tempestatis, quibus admoneremur aliquid sinistrum parari, et, quærentibus invicem repentini tumultûs causam, nihil occurrebat quod placeret curiosis.

Dùm sic suspensis animis expectamus donec se natura explicuerit, dùmque errantibus oculis cœlum vestigamus,

(1) Voyez *Allégories*, en vers.

si quâ parte concipit iras, nubem cernimus longo volumine porrectam, sensim emergentem e montibus, atro colore, et proximum imbrem daturam, stipatarum frigore aquarum, nec jam loci superioris patientium cogente gravitate. Ea erat quæ concepto igne jam cum eo luctabatur, vimque suam quasi tentabat, obscuræ adhuc timidæque pugnæ primordiis. Mox velut toto cælo convenisset scenam mutare, aliæ et aliæ nubes itâ diem eripiunt, ut vix in gravido aere se proderet jamfurtiva lux, et per nubium commissuras cum pallore erumpens.

Fortè fuit in illo nubilo, ut aliquot passibus remota arbor fugientes nos exceperit densis foliis, et trunco tam commodè hianti, ut esse posset pro tecto, nubium torrentes æstumve diei in apertâ planitie declinantibus.

Opportunè nacti agreste domicilium, dum gratiâ beneficæ arboris fruimur, fulmen, geminatis ictibus, et inter coactos vapores viam quærens, tam immani tumultu complet aera, ut vi terroris penè exanimes obrigeremus, arborque ipsa, ramis mirum in modum concussis, quateretur a radicibus. Interea solvuntur nubes, dumque ingenti sonitu in fluentem humum præcipitant, victor ignis per suspensi carceris rimas jaculatur proximæ signa libertatis, cervicibus nostris imminens, et quâ cecidisset, injurias incendio vindicaturus. Silebamus pavidî, vitæque potiùs finem quàm tempestatis expectantes, Deo sospitatori vota ritè nuncupabamus; cùm tandem, ultimo impetu scissis nubibus, erupit ignis, sparsusque in diversa, miseros pastores, tactis etiam gregibus, itâ afflavît, ut, vitalibus consumptis, corde, jecore, viscerumque multiplici flexurâ, totum circa corpus nihil læderet. Somno dejectos putâsses, nisi quòd in extincto vultu aberat color, qui dormientibus superest, et fœdè prostrati, non consilio jacere, sed casu, satis ostendebant intuentibus.

Nobis quidem pepercit ignis, nec propiùs quinquaginta-

Leq. lat. mod.

17

ginta passus arbori, quâ tegebamur, advolutus est. Sed pro flammâ nobis fuit portentum ingens: inassuetæ quippè magnitudinis, ut videbatur, homo, tam subitâ præsentia nostris obtutibus objectus est, ut penè diceres e Cadmæis militibus unum, quos olim repentino ictu genuit terra, serpentis dentes seminanti. Spectro dubia vestis, inter virilem femineamque media, et tot colorum quot in iride miramur, ut, si cætera abessent quibus metus incutiebatur, ad aspectum stolæ variantis posset esse nonnulla voluptas. Vultus audax, sed inquietus, qui referret adolescentem fronte vividâ, nisi quoddam genis aspersa canities dubitantes oculos prohibebat certum de ætate, inter tam varia temporum signa, ferre iudicium. Dextra facem gerebat, sinistra Librum sacri ac politici Regiminis, in cuius fronte grandibus litteris exarata hæc verba legere erat: **LICET OMNIBUS**. Non ingratis catenis onerabatur; erant enim ex auro, et velut placeret captivitas, pretiosis vinculis ita corpus impedierat, ut, quamvis motu vario libertatem satis ostenderet, illam tamen videretur aspernari.

Obstupui, fateor, ad conspectum immanis figuræ; sed mox utcunque mihi redditus, rogavi ignotum quid esset, peteretve. Tùm ille clamore valido: « Ego sum, » inquit, Sæculi Genius; ego hanc, quam vides, excivi » tempestatem. Me auctore, solutus aer infelicis spem » coloni, prostratis hodiè jam flavescentibus spicis, » hausit inexpectato naufragio; noxii ignis ego materiam subministravi frigidis vaporibus, ut, accensâ » hostili tumultu flammâ, stragem hanc ederem, gravioris longè calamitatis prænuntiam. Nam ego quod » que, injecto populis superbo legitimi imperii fastidio, » ea alimenta publicis cupiditatibus sufficio, ex quibus » conflatae sensim coalescant civilium discordiarum nubes, et in procellam erumpant subditis non minùs » quàm regentibus nocituram.... » Plura minari videba-

tur, cùm subito, quasi silentio voce suppressâ, non visus est abire; sed in partes scindi, tamque latè diffundi, ut, velut fumus ex angusto erumpens, nec diù stringi se passus, totam dicto citiùs regionem impleret.

Petri FIRMIANI, *Sæculi Genius*.

---

# MORALE RELIGIEUSE

ou

## PHILOSOPHIE PRATIQUE.

---

Cours d'Astronomie morale.

**A**RGUMENTA, ut virtutem suadeam, cœlum dabit. Tota cœlestis machina in opere est et motu, licet velocitatem specie quietis abscondat. Nostrum est animo rerum maximarum capacissimo extra humanæ imbecillitatis angustias spatiari, nec quiescere, nisi in ipso sapientiæ motu. Eadem moles dùm sibi constat, stabilis, perpetua, sibi similis, exemplo est æterna, immensa, optima quærenda esse. Cùm lucidam spectatis, totque ignibus illustrem, errorum et ignorantie caliginem discutite, neque aliâ re magis illustrari mentem credite, quàm lucis Evangelicæ radiis. A magnitudine discite, latissimos esse virtutum et honesti campos, nec deesse usquàm locum tempusve peragendi id quod laudabile est. Saturnum, tardigradum istum observate : monet nos, tardis consiliis res magnas confici, quas præceps consilium perderet. Jupiter si adulter est, si voluptarum illicitarum amator, opponite, quantumvis,

suam ipsâ Jovi castissimam prolem Minervam, id est Rationem. Martem nec damno, nec probô : Quæ enim rerum nostrarum est facies, paratos in utrumque homines esse oportet, et salutem vel bello, vel pace assertam tueri. Quodd si felicissima Sol omnia spondet, si scientiam prudentiamque promittit, ejus quisque sibi auctor sit, et a se impetrare studeat, cujus obtinendi vanam spem faciunt fallacia sidera. Qui vestrum Mercuriales sunt, à Mercurio siderum omnium minimo, at maximo disertorum, fraudis mendacique minimùm, facundiæ plurimùm discere. Venus multùm præsgit mali, et licet currum trahant innocuæ et vinculi conjugalis observantes columbæ, diffidere sibi innuit amantes, cum incesta sit et perfida. Nec Lunam vobis dominari optem, omnium horarum feminam, nocturnam Endymionis pellicem, inertem, instabilem, inopem et insanam. Ascendam altiùs : Draconem videte, non longè ab Ursâ ; vigilantia, acuminis, solertia symbolum. In Persei dextro latere tres insigni fulgore radiant faces, principum duces : prima Pietatis est, altera Justitiæ, tertia Fortitudinis. Hercules verò iste, qui propter Booten stat, monstrorum vos domitores esse vult, intemperantiæ, socordiæ, superbiæ, iracundiæ. Perseus ipse, Andromedæ liberator, regibus insusurrat nefas esse in populi gratiam mactare innocentes, et ad placandam belluam vinculis ligare viros benè de republicâ meritos. Cancer, cum retrogradum solem abigit, retrogredientibus à virtute minatur. Leo generosæ magnitudinis exemplar est : Aries, pugnax animal, quæsi citra necessitatem belli : Taurus, laboris et tolerantia : Gemini, concordiæ : Virgo castitatis : Libram cœlestem studiosiùs respicite, vos libripendes, ne fallatis terrestri. Scorpionum intueamini, quotquot aliis nocere studetis ; Sagittarium, vos, qui fronte simulatis Curios, cetera bestia ; Capricornum, quem Deorum portam vocant Platonici, sibi concilient

infelices et quartâ lunâ nati; Aquarium, qui Jovis sui gratiam aucupari malis artibus quærent. Pisces frigidi ad illos pertinent qui circa virtutum studia frigent et oscitantur. Sic cælum omne, et pars ejus quælibet, Ethicam profitetur.

C. BARLÆI, *de Cæli admirandis oratio*. 1636.

### Importance de la première Education.

HUMANI generis, sicuti cæterorum omnium, præcipua in cunabulis custodia est. In arboribus rami nascentes obsequuntur agricolæ, cujus sedulâ manu deducti, vel in altum enituntur, vel ad terram proni deflectunt. Itâ puerorum animi parentum velut obstetricum manibus fingi possunt, certâ et in secuturam ætatem mansurâ imagine. Semina maximè ac veluti fundamenta virtutum iis maturo præaltoque affectu insinuanda sunt, ut deindè ignorent, naturâ an præceptis acceperint, parentibus obnoxio esse ingenio, faciliq̃ præcipientibus; intemperantiâ, mendacio et fraude velut insolentiâ prodigiorum exterreri; præcipuè vereri vim Numinis, nunc beneficio, nunc vindictâ suspiciendam. Et hæc ipsa non tetricâ aut molestâ ratione urgenda sunt: nam quæcunque pœnarum metu colimus, eadem tristi fastidio solemus aversari; et concepta a puero odia, nescio quâ horroris consuetudine, ad senium usque deducimus. Sed assiduis sermonibus imbuendi sunt de fastigio præmiisque virtutum: flagitia autem cum supercilio ac verecundiâ apud illôs nominanda, quæ omnino nesciant sæpè publicè, nec jam cum infamiâ regnare. Tẫm levibus rudimentis initiati oderint vitia, virtutes verò tanquàm feras rigidasve non timebunt, et faciles ad hæc prima rectæ disciplinæ initia accedent, parentum magistrorumque auspicio, quorum sententiis, veluti divinæ mentis

oraculis, detinentur imbecilli in illis animi, necdùm iudicandi ambitione sollicitati. In hâc autem puerorum disciplinâ, gloriæ quoque stimuli passim infigendi sunt sentientibus animis, ut jam suos honores assuescant suspirare, et sive scholis, sive ludis exerciti eminere inter æquales dulcissimo labore contendant. Præterea sunt cum ætate sensim velut e captivitate deducendi, ut mitior majestas parentum sentiat, et illi non subito aut improvise libertatis incremento lasciviant.

BARCLAIUS. *Iconis animorum Cap. 3.*

#### La Vertu.

CUM inter Deos atque homines tantum intersit quantum norunt omnes, nec solum spatio, sed naturâ, nonne admirabilis virtutis vis hæc est, quod et Deos hominibus conciliat in vitâ, et post mortem illorum coetui eos adjungit? Nam cum virtus medium quoddam sit, extrema quæ videantur in agendo fugiens, quæ maxima illius laus est, hæc certè summa est vis ejus, quod eadem hæc ipsa virtus inter Deum atque hominem medium tenet, quo quidem dempto, nullus est ad Deum aditus, nulla quæ ad eum via perducatur, quæ et ipsa principio Deum cognoverit, et, qui secundum se vixissent, inter Deos retulerit. Cætera cum fluxa et fragilia sint, momento temporis auferri possunt. At virtus firmum et stabile bonum est. Quæ cum nullius sit externæ rei indigens, alia tamen omnia absque illâ manca sunt, hucque atque illuc incerta feruntur. Felicem igitur, qui bene agendo, rectèque intelligendo, perfectam fuerit virtutem assecutus, qui, cupiditatibus frenatis, et quasi extra pericula positus, liber ac securus vixerit! Cumque sibi ipsi lex esset, leges nequaquam timuerit, et tanquam omnia subjecta pedibus haberet, tutus incesserit contra



populi rumores, contra tyrannorum libidines, atque adversus fortunam ita steterit ut eam repulerit ingruentem, neque manum blandienti porrexerit (1).

JQ. JOV. PONTANUS. *Charon*, dialogus.

La véritable Vertu.

EA est veræ virtutis indoles, ut ultrò fugiat hominum aspectus ametque procul a famæ rumoribus in obscuro delitescere. Cum enim, gravissimis rebus intentata, nunquam non quasi Deo teste vivat, adesse sibi ex mortalibus spectatores haud magnoperè desiderat, nullisque aut adhortantium vocibus, aut etiam laudantium præconiis curat excitari. Timeret potius, si maximâ hinc indè avidæ plebis circumfunderetur frequentia, si vel debitis plausibus aperta significaretur gratulatio; timeret, inquam, ne ex tot oculorum intuitu nimium ipsa placeret sibi, adeoque in aliquam mercedis partem etiam minimè quæsitus favor imputaretur.

Latet igitur virtus non invita, imò est in quærendo secessu pertinax. Ah! ne sit eadem in illo inveniendò felix! Optent potius virtutem cognosci, si qui hominum societati consultum volunt, optent eam in altum evehi! quæ quidem quò celsiore in gradu fuerit collocata, eò latius proderit, eò potentiùs ad sese rapiet animos. Quòd si solum etiam ascenderit, et regiæ purpuræ majestatem, quâ non indiget, fulgore suo cohonestaverit, mirum dictu quanta indè, non singulis tantum hominibus, sed ipsis etiam imperiis, et stabiliatur salus, et gloria efflorescat. O verè beatam gentem illam, apud quam virtus sublime illud fastigium obtinet, apud quam ita regnatur, ut quò similiores regnantium cives fuerint,

(1) Voyez les *Leçons françaises*, même partie, tom. I et II.

èd meliores quoque, et ad rectè vivendum instructiores evadant necesse est!

HÉRIVAUX. *Laudatio funebris Mariæ Leszczyńska.*

Union de la Vertu et de la Science.

PLERIQUE, nescio quomodo in hoc errore versamur, studia virtutis et scientiæ parùm inter se congruere, immò etiam quodammodo sibi invicem adversari; cùm tamen constet, sic ista inter se arctissimis esse conjuncta vinculis, ut sine virtute haberi quidem fortassè possit umbra doctrinæ, doctrina verò ipsa, qualem quærimus, hoc est germana, solida, constans, haberi profectò neutiquàm possit.

Cùm magnam esse contendo virtutis ac doctrinæ affinitatem et quasi cognationem, nolim id ità intelligi ut illà præditi qui sint, iis continuò summa doctrinæ laus tribuatur. Inest in ejusmodi hominibus alia quædam excellentior multò sublimiorque scientia, quæ non ingenii viribus elicitæ, non accersita studio, non quæsita laboribus, sed ex ipso, si fas ità loqui, Dei immortalis sinu subito arrepta expressaque feliciter, nihil prorsus habet humanæ imbecillitatis; quæ peritura bona fluxasque res non fallaci et fucato splendore metiens, sed, quæ vera scientia est, ex ipsius rei veritate æstimans humana omnia, quæ nos tanti facimus, divitias, honores, voluptates, nugas putat; quæ supra cognitionem rerum terrestrium et caducarum longè assurgens, Deum contemplatur unum; hujus unius cognitione placidè fruitur, pascitur, occupatur.

Verùm non ago nunc de hujus cœlestis genere doctrinæ. Loquor de istâ scientiâ quæ in investigatione naturæ, et cæterarum tractatione artium tota versatur; quæ, quantum ipsa quoque a Deo pendet, hominis tamen labore

etiam atque industriâ nititur. Contendo igitur rursùm, virtute qui careat, ejusque studia negligat, fieri non posse ut unquàm veram perfectamque doctrinam assequatur.

Et verò quâ posset illa comes otii et amica pacis sapientia existere in medio tumultu cupiditatum, quibus totidem veluti procellis animus continuò agitur? Ad studia doctrinæ quicumque accedit, hoc apprimè sibi necessarium esse cogitet, mentem ut afferat et perturbationis expertem et ab omni curâ negotioque liberam. Cùm enim ea sit rerum discendarum multitudo atque immensitas, ut quamvis acrem diligentiam animique contentionem facile absorbeat; sic in illo semel suscepto opere totum se includat necesse est, sic in illo uno spes, curas, cogitationes, labores terminet suos, ut illum a studio discendi nec insana divitiarum cupido retrahat, nec blandæ voluptatum illecebræ avertant, nec cæca honorum ambitio retardet. Exercitatio litterarum summam animi tranquillitatem quietemque desiderat, strepitum autem ac turbam fugit. Hinc fieri videmus, ut, statim atque increpuit suspicio tumultûs sonitûsque bellorum, excutiantur nobis e manibus præclara studia, artesque illicò nostræ conticescant.

Porro quod bellum huic seditioni par, quam excitant in animis nostris tumultuosæ cupiditates? Fingite, quæso, vobis, fingite hominem qui non habeat domitas rationis imperio compressasque libidines, qui totum se tradat mancipetque vitiis; quem aut avaritia sollicitet, aut libido pungat, aut stimulet ambitio, aut urat invidia; quem nulla denique nec officii ratio moveat, nec tangat cura pietatis. Quid iste homo efficere magnum, quid arduum tentare possit? Nonne, si quid fortè habeat a naturâ boni, id morum perversitate corruptum, totque vitiis obrutum, deficit atque exstinguitur? Nonne, si ejus animus contendere paulò altiùs enitique voluerit, statim

deprimitur ad terram gravi pondere affectuum, quibus parere cogitur, quia imperare nescit? Nonne, si ad scribendum aut meditandum accingat se, animumque intendat acriter, repente incurrens cogitatio, vel deliciarum quibus avidè inhiat, vel honorum quos ardentè appetit, vel divitiarum quibus coacervandis anxie studet, hunc in ipso æstu et ardore mentis inopinantem subito frangit, intercipit, transversum agit?

Quid interim homo vitæ integer scelerisque purus? unè præcipuè intentus Deo, ad quem nimirum per labores suos et studia semper affectat viam; nunquam declinans ab officii religione et curâ virtutis, intra suum munus semet ipse coarctans et definiens, totus incumbit in eas res, quarum sibi cognitionem assumpsit. Hujus quieta mens et placida nihil in se admittit turbulentum: Non patet illa ludibrio fortunæ, non obnoxia est inconsistentiæ atque levitati; non, extra se ipsam quodammodo convulsa violentis affectibus, huc atque illuc incerta errat et vagatur: suarum dominatrix, et, ut ita dicam, regina cupiditatum, semperque nativæ retinens et memor nobilitatis, neque labis quicquam aut gravitatis ducens ab terreni contagione corporis, ex illo suo carcere in quo adhuc inclusa remanet, celsissimas quasque res maximèque arduas contemplatur. Maria, terras, cælum, cuncta peragrat; abstrusas rerum causas et latentes curiosè inquirat, sagaciter rimatur, feliciter eruit. An ejusmodi opportunitates, quas ad doctrinam habet vita integra atque innocens, recipere potest vitiorum fœditate inquinata mens?

Neque verò solùm tranquillitatem ac quietem studiis adedò necessariam abrumpunt insanæ illæ cupiditates, sed hebetant quoque non mediocriter aciem ingenii, caliginemque ei densissimam offundunt. In hac autem nocte et caligine, quæso vos, quæ poterit unquam insidere scientia, quæ noster animus debet suo tanquàm sole et lumine collustrari?

ROLLIN.

## Prix et Difficulté de la véritable Science.

MIRARI sæpè solitus sum et mecum attentius meditando quærere quidnam sit cur ex infinitâ propè multitudine hominum, qui ad eruditionis doctrinæque famam contendunt, tam pauci sint semperque fuerint, quibus ista laus verè ac meritò contigisse videatur. Scilicet majus quiddam est scientia, longèque præstabilius, quàm homines vulgò soleant opinari. Ad hanc opus est egregiâ et excellenti indole, ingenio acri et vivo, singulari industriâ, summâ animi et virium contentione, longo ac pertinaci labore. Hæc autem in uno aliquo homine simul reperiri omnia quàm difficile arduumque est, quàm penè hactenùs inauditum !

Satis multos quidem (fatendum est enim ; neque hæc facienda aut naturæ ipsâ, aut ætati nostræ injuria est, ut existimemus ingenia hominum longâ annorum serie tractuque temporis extenuari sensim atque evanescere : quasi verò divina prorsùs illa vis ingeniorum, et ab ipsius, ut ità dicam, naturâ Dei hausta ac delibata, posset unquàm ullâ vetustate confici) ; satis multos igitur ad maximas quasque artes natura fingit habiles atque aptos. Verùm hanc in se vim homines aut ipsi non agnoscunt, aut incuriâ perire sinunt, aut in vanis inanibusque nugis consumunt. Putant ingenium, etiamsi nec labore excolitur, nec alitur industriâ, satis ipsum suis valere viribus. Accedunt ad studia lentè, frigide, oscitanter ; quasi aliud omninò agentes, non satis animo et cogitatione complexi illius rei magnitudinem ad quam aspirant, adeoque non satis illius appetentes atque avidi ; aliis mille occupati curis, cupiditatusque impediti, semper respectantes ad suas voluptates et delicias, semper ad spem fortunæ amplioris et faciendæ rei curam toto animo attenti atque erecti. Ità variâ et

multiplici contentione distracta mens, quid mirum si nunquam possit veram solidamque doctrinæ laudem assequi, cujus immensa quædam infinitas infinitatem quamdam laboris diligentiaque desiderat (1)? *Idem.*

### L'Emploi du Temps.

UT quò pretiosior est res, hoc et diligentius solet asservari et impendi circumspectius : ita temporis, quo nihil est pretiosius, summa habenda est ratio, ne quid effluat sine fructu. Etenim si curatores dari solent iis qui gemmas et aurum temerè profundunt, quæ tandem erit insania, tempus, pulcherrimum immortalis Dei munus aut otio, aut inhonestis studiis turpiter consumere? Quid enim perdis, cum tempus perdis, nisi vitam? At vitâ quid esse potest charius? Et cum una gemmula periit, jacturam vocas : cum totus periit dies, hoc est, bona vitæ portio, jacturam non vocas? Præsertim cum illa perdita possint aliundè recuperari, temporis jactura nullo modo reparari queat. Præterea illa, cum tibi pereunt, aliis plerumque lucro sunt : at temporis dispendium in nullius transit compendium. Nullum est damnum ex quo non aliquis aliquid emolumenti sentiat, præter damnum temporis. Adde his, quòd illarum opum jactura sæpè saluti fuit. Nam divitiæ plerumque vitiorum materiam ministrant, ita ut præstet, temerè profudisse, quàm attentè asservâsse. Quantò cujusque rei usus honestior, tantò turpior profusio. At nihil pulchrius, nihil præclarius, quàm bonas horas benè collocare. Illa ut quàm maximè serves, sæpenumerò tamen vel casus eripit, vel homo tollit, ut jactura te calamitosum duntaxat, non etiam turpem reddat. At temporis

(1) Voyez les *Leçons françaises*, tom. I, *Définitions*.

amissio, quoniam nonnisi nostro vitio accidit, non miseros solum reddit, verum et infames : pessimum infamiae genus, quoties culpa in nullum conferri potest, praeterquam in eum, qui malum patitur. Illis fundos aut aedes mercari poteris : hoc, praeter alia animi ornamenta, parare immortalitatem. Nulla est tam brevis vitae pars, in qua non magnus aliquis gradus ad felicitatem fieri possit. Postremo, de illis male insumptis, patri fortasse rationem redditurus eras, de horis male transactis, Deo.

ERASME.

Philosophie de Socrate.

IN hoc magno universo, non unum morbi genus est : infinitis laboratur. Alium ebrietas affligit et insanus poculorum amor; alium libido, alium ambitio aut avaritia, alium non flava, sed insana bilis torquet. Nonnulli luxu diffluunt, fastu nonnulli turgent aut invidiam tabescunt. Valetudinarium est hic orbis, in quo non decumbunt aegri, sed pro sanis ambulant. Pauci morbum suum vident, omnes amant.

Ad hanc turbam, si videtur, gravem ac morosum aliquem philosophum adducas, qui e schola nunquam est egressus, qui tonsorem peius quam latronem odit; et in barbæ majestate et amplitudine, scientiae fiduciam ac sapientiae reponit, qui, utcumque gravi ac severo vultu, altero presso, altero elato paulum supercilio, in vitia declamet, et austeram quantum volet eloquentiam cum castigatione morum graviter exerceat : nonnullis quidem sapere, plerisque verò insanire cum ratione videbitur.

At versutus ille, qualem Socratem fuisse novimus, nusquam minus quam in schola versabitur. In viis, in compitis, in foro, in theatro, in porticibus, in templis

occurret : in solem ; in pulverem prodibit. Sicut umbra corpus, hominem sequetur. Mores singulorum callidus assumet, ut emendet : vitia, cum opuserit, mentietur, ut tollat : voluptatem denique ut ex animo eliminet, subsidium ab ipsâ petet. Arrogantiam non armis, sed humilitatis habitu invadet. Nunc se scire aliquid negabit, ut ostendat ; nunc dissimulabit vires, ut resumat. Et ut animalia nonnulla corpus contrahunt, ut pugnent, ita ille sapientiam prudentiamque occultabit, ut putiditatem quasi aliud agens expugnet. Ipsam quoque veritatem non obtrudet animis, sed paulatim instillabit. Quam ubique per vestigia latentem indagabit ; atque, ut obstetrix, in lucem sedulo producet : sæpè ut disputet ex arte, non ut aliquid concludat ; sæpè ut arrogantem lepidè exagitet, aut ejus ignorantiam arguat ; sæpè ut ludat in utramque partem, et certamen, tanquam præpilatis, urbanissimum instituat ; non ut renitentem lædat aut offendant, sed titillet potius ac vellicet, magisque desiderio scientiæ accendat quam erudiendo satiet. Laqueos interrogationum et occulta vincula disponet : quibus reluctari neque optes quanquam possis, serum autem sit cum velis. Per notissima et sensibus comperta, viam ad ignota sibi struet, non ut trahat quidem, sed ut vinctum suâ sponte et intricatum, ac volentem, quò libuerit, perducatur. Muros animorum, non apertâ vi, sed sensim oppugnabit ; et quemadmodum antiqui duces olim quosdam non per portas, sed ope machinarum intrâsse urbes ac sic expugnâsse aiunt, ita ille per cuniculos inductionum mentem non perfringet, sed ludendo occupabit. In familias ac domos, non virorum modò, sed et feminarum, de industriâ se dabit. Ne ad mensam quidem, si vocetur, non accedet, in quâ vel ipso luxu et hilaritate ad suum finem utetur. Simul enim animum patere ac diffundi inter vina senserit, urbano quodam joco, aut lepore non quæsito, sed ibidem nato, sapientiæ amorem affricabit, et in ani-



mis quos tanget, simul desiderium virtutis et aculeum relinquet. Denique, ut hamo suo piscator escam, ita ille sapientiæ, ac disciplinæ comitatem, atque suadam quamdam delenificam prætendit.

Dan. HEINSIUS. *Oratio de doctrinâ et moribus Socratis.*

Bonheur des Monarchies héréditaires.

QUID causæ putatis fuisse, cur illa Romanæ ditionis tam diù, tam latè formidanda moles, intra satis breve temporis spatium collisa communitaque, fictilis instar colossi, dissiluerit? Nullus monstrabatur populis certâ lege constitutus hæres, qui et avidos novarum rerum multitudinis animos compesceret, et inhiantium dominatui factiosorum hominum ambitionem frenaret. Itaque audacissimus quisque ad imperium, veluti prædæ relictum, Thrax, Syrius, Illyrius, Hispanus, alii aliis artibus, quidam etiam per trucidati decessoris corpus nefando respersi sanguine grassabantur. Interim in novicujusque Imperatoris exortu nova foris bella, novæ domi seditiones exurgere. Quippè deerat vis ac majestas imperio, quod a militibus tanquàm precariò acceptum pravâ in eos indulgentiâ ac suâ quâdam servitute redimere cogebantur. Igitur dissolvi paulatim veluti laxis compagibus immane corpus, et, crebro emotum succussu, dehiscere, labefactari, ruere : adeò potentissimis etiam imperiis plus est in unius hæredis pueri animulâ, quàm in classibus legionibusque momenti ! adeò tutior est regni status, cum relictam a patre sedem occupat ipse filius, natus in palatio, in solii gradibus educatus, alumnus prius suorum civium quàm rex, in eamque spem ab ipsâ statim infantiâ populorum oculis propositus ! Quippè illum, ubi necesse est, throno regali succedentem, non recens adscita, sed propè impressa nascenti et ipsâ

oculorum assuetudine confirmata majestas ambit. Eundem collectæ ex longo in patrem pietas, veneratio, fides prosequuntur. Juvat idem retractare nomen, eadem lineamenta noscitare, eosdem animos recognoscere; magis ut alius homo, quàm rex alius imperare videatur (1).

Ch. COFFIN. *In recentem Delphini ortum Oratio.*

La véritable et solide gloire des Souverains.

Si ex communi opinione vulgi et plurimorum judicio æstimanda regum gloria est, nulla eorum magis solida laus, clariorve ad famam commendatio videbitur, quàm quæ ex imperatoriis virtutibus facinoribusque bellicis efflorescit. Inest in illo bellorum fragore et strepitu nescio quid, quod imperatorum ambitioni suavissimè blandiatur. Pulchrum videtur, atque etiam quodammodò humanâ conditione majus, supra cæterorum capita tam insigniter eminere; esse unum in exercitu penè innumèrabili, e cujus imperio et nutu reliqui omnes pendeant; ingenitam cunctis dominandi libidinem supremâ cum auctoritate exercere, ità ut omnium vitæ necisque sis arbiter; circumferre huc et illuc pro arbitrio centena et ampliùs hominum millia; orbem latè universum implere famâ ac terrore nominis sui; conjuratas hostium vires, urbium validissimarum munimenta, regum æmulatorum potentiam, ipsam quoque tempestatum et naturæ vim domando vincere ac frangere: hæc, iterùm dicam, supra humanæ conditionis sortem regum et imperatorum fortunam constituere videntur.

At si rem introspicere penitus, eamque non opinionis humanæ, quæ plerùmque vana mendaxque est, sed incorruptæ veritatis judicio expendere voluerimus, fatea-

(1) Voyez les *Leçons françaises*, même partie, tom. II.

mur necesse est, laudem eam quæ ex victoriis et triumphis existit, quanquam præclara sit, omnium tamen esse procul dubio levissimam, atque ejusmodi, quam ab optimis principibus minùs ambiri oporteat.

Scilicet lætis illis applausibus, quibus eorum triumphus celebratur, obstrepunt semper tacitè et velut transversi incurrunt clamores fletusque miserorum. Dùm illis arcus triumphales populorum grata pietas erigit, suos ipsis in populos amor ante oculos exhibet vastatas incendiis domos, stratas aggerum et turrium ruinis urbes, desolatas ferro et igne provincias, totque millia inno-  
cuorum civium, quos ineluctabili necessitate belli calamitas afflixit immerentes. Ità triste istud spectaculum, quod medios inter triumphorum apparatus animis principum intùs obversatur, mœrore et luctu alterius spectaculi lætitiâ omnem intercipit.

Quenam est igitur vera et maximè solida principum gloria? Omne robur et pondus regiæ auctoritatis adhibere ad compescenda quædam publica vitia; magnificentiam ostentare suam in ejusmodi operibus, quæ ad publicam utilitatem pertineant; curas omnes suas et vires impendere promovendo cultui divini numinis; denique afflictæ et jacenti calamitosorum regum fortunæ fortiter succurrere. Hæc præclara, hæc magnifica, hæc regiâ majestate digna sunt consilia: indè nascitur vera et solida regnantium gloria, non illa quidem quæ posita sit in incertâ opinione vulgi et vanâ adulatione populorum, sed quæ apud Deum pariter et homines firma et stabilis ipsâ veritate nititur, nullâque potest calamitate temporum ipsis extorqueri.

ROLLIN, *Ludov. XIV*, panegyri. II.

## Malheur de la condition des Rois.

MISEROS interdum reges, vel optimè animatos! In medio rerum undique prementium fremitu collocati, cum nulla sit tam universa mens quæ in omnes partes intendi queat, necesse est alienis oculis multa videant, alienis auribus muta excipiant, alienæ fidei multa committant. Circumsidet eos, assidua summarum dignitatum pestis, adulatio ad omnem mentiendi artem erudita, quâ decipi optimus quisque hoc facilius potest, quò minùs esse alios improbos suspicatur: observat illa molles regum aditus, eorum insidiatur tempori, in aures perpetuò insusurrat, in hoc maximè erecta ut veritatis radios, si qui fortè se exerant, prætento velo intercipiat.

Miseros, inquam, reges et calamitosos, quorum innocentiae et virtuti neclitur undique dolus! splendor ille, quo generis humani acies infirma stupet, potentiae fastigium, circumfluens omnis deliciarum generis ubertas, hæc omnia in materiam summæ miseriæ ipsis plerumque vertunt. Nulla pestis est, quæ ad illorum perniciem icto quasi fœdere non conspiret atque coeat. Scribit exercitus urbesque sternit ambitio. Superbia spectaculo millium ex suo nutu in medias mortes ruentium alitur ac tumet. Exsultat ira ferox, et in victoriâ quandòque legitimâ, vi tamen ipsâ armorum elata intemperantiùs, multa vel etiam incertò peccat. Voluptas, illo suo molli et tenero grege stipata, suum eis apparatus explicat delicatissimum: eorum sensus blandissimo veneno inebriat, animam eorum totam suis incantamentis evocat ad se et rapit, eòque efficaciùs, quòd nullus est qui reclamet. O Dignitas regia, quàm, præceps es et lubrica! Subsilire in cælum homines quidem possunt

ex angulo; e tuo culmine in abruptum non cadere vix possunt.

Benign. GRENAN, *Ludovici Magni Laudatio funebris.*

La Modération dans les grandes places.

SUMMAM fortunam summa semper invidia comitata est: ut non tantum mirabile, sed prorsus incredibile videatur, homo citra invidiam fortunatus. Hoc habet magna fortuna, ut, quoniam naturâ insolens atque superba est, impotenter dominari velit. Hoc habet humana indoles, ut, quoniam sensum acrem libertatis nascendo affert, servire nisi coacta non possit. Alii, pro imperandi libidine, saturant se honoribus, quos et acerbe exigunt, et arroganter accipiunt. Alii, pro necessitate serviendi, id ipsum quod exigitur, alterâ manu pendunt, alterâ retinent. In aperto servitus et reverentia, in occulto odium, ira, invidia, et delati palam honoris jucunda clam, nec sine triumpho quodam retractatio. Sic in illâ contentione, hinc retinendæ libertatis, illinc dominationis exercendæ, tota ferè communis vitæ fabula peragitur.

At cum aliquis fortunâ modestè partâ modestius utitur, cum moribus illam suis, non illi suos mores accomodat, cum e gloriæ suæ fastigio descendit sine gloriæ insignibus, cum tanquam privatus ad privatos accedit, vultque inter homines homo numerari, tunc mutati animi derepentè, amorem libertatis quodammodo exuunt, ut ei viro certatim inserviant; deprimunt se ultrò, ut latere volentem e turbâ eripiant; ruunt ad terram ut exstet, ut emineat, et ab eo relictâ dignitatis insignia, cum amplissimâ novi honoris accessione, restituunt.

HERSAN. *Tellerii Laudatio funebris.*

## Utilité de la Censure.

CUM sint principes multis assentatoribus perpetuò velut circumsessi, rarò sua ipsi vitia nôrunt, nec ea possunt emendare, adulationibus corrupti, et fortunâ suâ ebrii: at noscent procul dubio, si magna libertas scribendi de ipsis et loquendi vulgò permitteretur. Atque illud est quòd magnus olim princeps dicere solebat, multam se gratiam debere Atheniensi populo, cujus procacitate verborum melior esset cùm moribus, tùm linguâ redditus.

Neque minorem principem, quamvis non ità antiquum, accepimus ( is fuit Franciscus noster, Engolismensis ), tacitè libenterque etiam ferre solitum, se præcipuosque regni sui proceres, quorum ipse operâ consiliisque utebatur, in fabulis et comœdiis publicis rodi et configi maledictis; tectè id quidem et involutè, sed tamen ut ab omnibus perspiceretur.

Magna enimverò et præcipua utilitas in hâc modestiâ et patientiâ principum, cùm, licentiâ loquendi civibus concessâ, civium animi nudentur, patefiant consilia, prodantur et ejiciantur foràs ipsi primi motus et ipsa semina cupiditatum. Quid in reipublicæ administratione probetur, quid improbetur, quæ ministrorum et magistratuum vitia factave invidiam principi concilient, quæ remedia malis publicis privatisve homines desiderant ac flagitent, omnia per hanc loquendi libertatem intelliguntur, quod nemo sanus neget utilissimum esse principi. Nam quemadmodùm in corporibus ii morbi difficillimè curantur, qui latent falluntque intus inclusi; sic in civitate atque in imperio, sunt illa gravissima, perniciosissimæque odia, quæ cæca atque occulta sunt. Et non aliud respexisse summos quosdam viros ac duces

existimandum est, quos in historiis legimus, veste mutata, nullo conscio, atque ignoratos omnibus, per urbem vel castra vagatos esse, ut hominum sermones de se ipsi audirent, et de rerum statu, de inclinatione animorum certiores facti, quid in posterum optimum esset meditarentur ac providerent (1). BALZAC.

#### Tribunal de l'Histoire.

ERAT in more positum apud Ægyptios, ut, ubi quis e vivis excessisset, in eum publicus surgeret accusator, et mortui vitam ad momenta officiorum omnium, spectante totâ civitate, diligenter expenderet. Si palam factum esset illum aut parum in Deos pium, aut non satis in homines justum exstitisse, turpi judicio condemnatus, tumuli honore privabatur. Neque in homines de vulgo tantum ejusmodi poenâ animadvertebatur; ipsos etiam reges hâc in re cæteris mortalibus legum severitas æquabat, iis antè jam morte æquatos; nec semel accidit, ut illa tanto exstructa sumptu pyramidum spectacula conditoris insepulti corpus desiderarent. Intelligebat prudentissima gens, cum nulla homini damna sint quàm famæ graviora, annisurum pro se quemque ut, illâ saltem parte superstes, memoriam suâ in popularium animis quàm honestissimam relinqueret, et quos virtutis amor non avocaret a vitiis, ab iis infamiæ metu iri deterritum.

Idem omninò præstat Historia. Illa sibi velut supremum quoddam erigit tribunal, ex quo severè in hominum vitam inquirat, testis, accusatrix, judex. Illuc post fata reges ipsi citantur, et suâ jam exuti majestate, pro suorum quisque factorum merito, irrevocabili sententiâ

(1) Voyez les *Leçons françaises*, tom. II, *Allégories*.

vel damnantur, vel absolvuntur. Nusquàm splendidiùs quàm ab Historiâ principibus viris parentatur. Iis recens adhuc adulatio sepulcra superbis incisa titulis moliatur, funebresque laudationes decernat : omnis illa ambitiosarum exsequiarum pompa, omnes ornamentorum apparatus, uno sæpè Historiæ verbo fracta ac comminuta subvertuntur. Adhuc omnium oculis odioque subjiciuntur ; spirant adhuc vivacibus commissa litteris, lasciva Sardanapali mollities, præceps vecordia Cambysis, Tiberii sævitia suspicax, abominanda Neronis crudelitas, Vitellii ingluvies belluina, effrænata Domitiani libidines, neque ullâ re eorum infamia, præterquàm orbis universi ruinis obruetur (1).

C. COFFIN. *De Historiæ utilitatibus.*

L'Histoire, école de l'Homme d'Etat.

JAM si ex regum palatiis egressi regnorum inspiciamus administros, et publica consilia subeamus, ibi quoque Historiam adesse ac dominari videbimus oportere. Enimverò, cum iisdem cujusvis ævi homines cupiditatibus impellantur, atque adeò quidam in hâc mundi scenâ, quasi certis vicibus, eorundem negotiorum circumagatur orbis, undenàm futuri consilium certius venire, quàm ex præterito potest ? Sint igitur illi publicæ rei procuratores quamvis naturâ sagaces et callidi, nisi iidem ex priscom eventuum observatione quoddam captaverint augurium, nunquàm satis ex voto incepta succedent : et quoniàm multa casu agent, multum quoque valeat casus necesse erit. Dicam, non minùs verè, quàm audacter : plurimæ olim non urbes modò, sed etiam imperia fun-

(1) Voyez les *Leçons françaises*, tom. I, *Discours* ; et tom. II, *Définitions*.



ditus interierunt, quòd nemo inter publici consilii auctores Historiæ adiret oraculum, Pythio illo Apolline et Jove Ammone longè veracius.

Ea sæpè et in rebus ipsis obscuritas, et in humanis ingeniis infirmitas est, ut variis consultantium sententiis nihil aliud quàm intricatior deliberatio fiat. Ex his dubitationum ambagibus sese unus expediet qui præteritæ ætatis filum tenuerit; et dùm alii, tanquàm humi strati, vix benè ea quæ ante pedes posita sunt, aspicient, ille in speculâ quâdam quasi senatoriâ collocatus, acrem in omnes partes aciem intendet, atque ex retroactis temporibus, futuros casus prospiciet ac præcavebit; experti gubernatoris instar qui cœli peritus et locorum, si fortè imminensem procellam senserit, dùm intùs omnia inutili tumultu trepidant, ac dissonis clamoribus miscentur, ipse interim quietus, ad clavum sedens, et omnes auras interrogans, modò turgidiora vela contrahit, modò rudentes laxat, modò gubernaculum levi momento hùc et illùc impellens, latentes sub infido marmore scopulos solerter declinat, donec tandem optato portu securam naufragii navem condiderit.

*Idem, ibid.*

#### Utilité de l'Histoire pour les Guerriers.

SI in tenuissimis artificiis, ut scienter exerceantur, studio opus est et doctrinâ, quantò magis enixè id requiritur in eâ arte, sub cujus tutelâ præsidioque cæteræ latent; in quâ virtus, prudentia, mora, celeritas, audacia, consilium, vis, dolus, quies, labor, industria, ità moderanda sunt, ut et reipublicæ parcas viribus, et consulas dignitati; ut nihil omittas quod utile sit, nihil quod supervacuum aggrediaris; ut aliquandò adversariorum impetus retundas fortiter, aliquandò solerter eludas; ut modò cladibus, modò victoriis sapienter utaris; ut

oblatam occasionis opportunitatem nunquàm prætervolare sinas, nunquàm rem immaturam præcipias; ut hostium odoreres consilia, tua opprimas; ut indociles militum animos disciplinæ patientes reddas et imperii; ut eosdem jacentes erigas, accendas languentes, lascivientes reprimas, frangas contumaces; ut necessariae severitati multa humanitatis aspergendo condimenta vites odium, nec tamen pravâ indulgentiâ solvas imperii majestatem.

Quid dicam de lacesseudi, cavendi, explorandi, providendi partibus? quid de struendis et vitandis insidiis? quid de comitatibus, itineribus, præliorum instructionibus, metationibus castrorum? Hanc artem, tam arduam, tam latè fusam, quâ arte cives defenduntur, propagantur fines, imperia stabiliuntur, quomodò tandem futurus dux aut imperator addiscet? Opinor, ordine quodam et quasi cautilenâ vulgarium præceptorum: at hercule ex ejusmodi officinâ nunquàm paulò peritior miles prodiit, nedùm absolutus imperator. Usu fortassè et experienciâ? Nolim equidem illam excludere quam necessariam fateor; sed tamen et sera est, et aliquâ semper parte manca et periculosissimæ aleæ plenissima. Sola historiarum lectio tantæ artis potest arcana mysteria enuntiare. In hâc perpetuâ rei militaris scholâ virum diligentem et attentum certatim edocent haud pœnitendi magistri, Miltiades, Alcibiades, Epaminondas, Philippus, Alexander, Cæsar, Condæus, Turennius, quos ille intuens, animum et mentem ipsâ cogitatione virorum excellentium conformat.

Id probè intellexit et ille Mithridatis victor Lucullus, qui, cum adversus tantum ducem a senatu mitteretur, totum iter et navigationem legendis historiis sedulò consumpsit, quibus id eum assecutum fuisse Tullius affirmat, ut in Asiam factus imperator veniret, qui fuerat Româ profectus militaris rei rudis; et Philopœmen, qui Alexandri res gestas assiduâ manu versabat; et Brutus,

qui Polybii Historias non legebat modò, sed propriâ manu in ipsis castris exscribebat; et Scipio ille Africanus, qui, teste Tullio, Cyri Institutionem de manibus ponere non solebat, ex quo libro affirmare non dubitem illum, quantus fuit, exstitisse. *Idem, ibid.*

### Agrémens de la Campagne.

ELEMENTA ruri omnia intueor. Vim suam usumque palàm et toto, ut ità dicam, sinu in hoc rure nostro effundunt, obscurè et parciter in tuâ urbe. Solem vide : meliùs hìc nitet. Aerem : lætiùs latiùsque diffunditur et ridet. Aquas : puriùs bibuntur. Terram : hìc tantùm cernitur in vero suo vultu. Alibi in planitiem effusè porrigitur, alibi in collem placidè assurgit, aut magis rigidè in montem. Illic herbis et sponte natis arbustis vestitur : hìc fruge fructibusque et feliciore ligno. Quem non delectet tam varius aspectus et cultus magnæ matris? cujus apud vos una facies ædibus pressæ aut pavimentis.

Jam domum si venisti, hìc prorsùs gaudiorum et amœnitatis vera sedes. Manè surrexisti? Ad musicam quidem; nam circumsonant te et velut salutant chori alitum, suaviter fritinnientium, trutilantium, minurientium, ad quos se non æquiparent tibiæ, citharæ, aut ex arte ulli cantus. In hortum prospexisti? oculorum aciem tibi perstringet illà ipsâ nocte exortum agmen florum et herbarum. In pratum? occurrent vere novo arbores odorâ quâdam et canâ nive perspersæ, eædemque sub autumnum aliâ pomorum purpurâ, sive cerâ distinctæ. Propiùs easdem aspice, insitiones mirabere.

Jam ad agros divertisti et tua rura? illic boves lentè pascuntur et oberrant; hìc pecudes magis vagè lasciviunt et hædi. Porcus alibi volutatur et grunnit : alibi cristata cohors concurrit et scalpit. Segetes illic tuas vides, et

siliginis, farris, hordei uberes fascēs, silvā istāc et ad hiemem lignorum strues. Vitem denique alibi florentem, aut maturescentem; et spē jam præbibis sacrum illum alibilemque liquorem. Quorum omnium quæ copia in urbe sit? Quin ne imago quidem satis certa et expressa. Sed ut ii, qui parietem intuentur, ex levi linearum ductu, animalia in eo et facies sibi fingunt, sic vos harum rerum fuitiles quasdam umbras. Itā vivitis in pulcherrimo hoc mundo mundi exsules, nec bona aut dona ejus plenè unquā nōstis.

Postremū fructus mihi superest, de quo quid ambigimus? cū non solū cultus et ornatus plurimū vitæ ab agris sit, sed ipsa vita. Agricultio enim moriatur, et unā humanum genus. Adde illa commoda, agnum aut hædum a stabulo, pullum e corte, porcum ab harā, et tot dapes inemptas, quas vos ægrè et carè præstinatis a foro aut macello. Quòd si opes omninò quæris et aurum, rideo ego et sperno. Et tamen, si quis hæc quoque ambiat, non alibi parandorum uberior materia et seges. Non palatia, aut fora, non scœnora plures ad opes evexère, quā beati isti agri: et addo rei caput, quòd tutò evexère, quòd citò, quòd innocenter (1).

Justus LIPSIUS, *Epistol.*, cent. 1.

Testament de Pierre Pithou.

MORIBUS valdè corruptis ac pravis, sæculo infelicitissimo, quantum in me fuit, fidem servavi. Amicos ex animo colui et amavi. Inimicos benefactis vincere, aut contemnere, quā ulcisci malui. Conjugem ut me ipsum habui. Liberis parū indulsi, famulis ut hominibus usus sum. Vitia sic odi, etiam in meis, ut virtutes in externis

(1) Voyez les *Leçons françaises*, tom. I et II, même partie.

vel hostibus veneratus sim. Privatæ rei servandæ potiùs quàm augendæ operam dedi. Quod mihi fieri nolui, alteri vix unquàm feci, aut fieri passus sum. Injustam aut difficilem gratiam, ut venalem sprevi. Sordes et avaritiam in omnibus, præcipuè verò in religionis ac justitiæ sacerdotibus et ministris, exsecratus sum. Puer, juvenis, vir, senectuti multùm detuli.

Patriam unicè dilexi. Opus potiùs quàm honores aut magistratum amavi; ac prodesse, quàm præesse malui. Privatus ultrò publico studui; ei nihil prætuli, atque in commune consulere potius tutiusque semper existimavi. Statum publicum laborantem prudenter sanari emendarique optavi: perverti, immutari, novari, aut perturbari penitùs, nunquàm cupivi. Pacem vel injustam, quod bonâ omnium bonorum veniâ dixerim, civilibus discordiis belloque potiozem semper putavi. Pietatis et religionis sacrosancta nomina ambitioni atque avaritiæ sceleribusque prætexi et obtendi graviùs tuli. Melioris antiquitatis non indiligens inquisitor, admirator et cultor, novitates faciliè insuper habui. Quæstiones vanas disputationesque subtiliores de iis quæ ad Deum pertinent, ut noxias, odi ac fugi. Simpliciter prudentiâ aliquâ conditam et septam astutiâ et calliditate tutiozem faciliozemque sæpiùs expertus sum. Rectè de rebus judicandi studium eloquentiæ artibus prætuli.

Procul ambitu atque avaritiâ, invidiâque, inter amicos plures, ac bonos potentesque, fortunâ non planè infimâ, sollicitiùs aliquantò vixi, quàm privatum fortassis de-  
cuit: de publicis tamen et amicorum rebus magis quàm de propriis cogitans. Nullam duxi gratiozem diem, quàm quâ publico, aut amicis adesse, aut prodesse, datum est. Mala præsentia quàm metum impendentium fortiùs tuli, extremaque faciliùs quàm dubia. Rectâ, sincerâ et æquabili, atque constanti inter omnes justitiæ administratione, etiam sceleratissimis atque audacissimis os oc-

cludi, manus obligari, vidi, expertus sum. De patrimonio ac bonis meis, quantulacumque illa post mortem erunt, legibus potius quàm mihi iudicium permisi, permittoque. Unum opto et spero, ut quem in me animum charissimæ ac probatissimæ conjugis vivus expertus sum, eundem in communibus liberis educandis, tuendis, curandisque gerat. Sit hæc apud posteros testatio mentis meæ, quam ab illis sic candidè accipi velim, ut simpliciter et ingenuè, ex animi mei sententiâ a me prolata est.

Petrus PITHÆUS scripsi kal. nov. natali quondam meo die, Lutetiæ Parisiorum, anno Christi 1587.

Les Livres, amis sincères.

QUID rerum faciam rogas? amicis (libris) operam do; horum consuetudine gratissimâ memet oblecto. Cum his me concludo in angulum aliquem: et turbam ventosam fugiens, aut cum illis dulcia quædam mussito, aut eos aliquid insusurrantes audio; cum his non secus ac mecum loquor. An quicquam his commodius? Arcana ipsi sua celant nunquàm, commissa summâ cum fide continent, nihil foràs, quæ liberius inter familiares effundere solemus, renuntiant: vocati, præstò sunt; invocati, non ingerunt sese; jussi, loquuntur; injussi, tacent: loquuntur quæ voles, quantum voles, quoad voles; nihil assentantur, fingunt nihil, nihil dissimulant. Vitia tua tibi liberè indicant, nemini obtrectant; aut jucunda dicunt, aut salutaria; secundis in rebus moderantur, solantur in afflictis, cum fortunâ minimè variantur; in omnia pericula te sequuntur, ad extremos usque rogos perdurant; nihil illis inter ipsos candidius. Committo subindè nunc hos, nunc illos mihi adsciscens, omnibus æquus; cum his amiculis sepultus delitescò.

ERASMUS, *Epistolarum Centuria VII<sup>ma</sup>*, Epist. XII<sup>a</sup>.

## Utilité des Ennemis.

CUM prisci mortales adhuc rudi et imperito sæculo satis sibi consultum putarent, si nihil a feris paterentur mali, is demum erat omnium adversus eas certaminum finis, ut earum vim et impetum a se propulsarent. At crescente paulatim hominum solertiâ, id a posterioribus inventum est, ut eas etiam in suos usus converterent, cum earum carnibus vesci, pellibus vestiri, et plurima ipsis adversus morbos remedia elicere instituissent. Neque immerito timeas, ne, si feræ deficerent, inops multo magis hominum vita, inculta societas ac fera videretur. Sic dum in unum sibi proponit vulgus, ut ab inimicorum caveat injuriis, prudentes etiam ex eorum veneno salutem sibi petere didicerunt. Nec falso dixeris ex inimicorum malitiâ boni plurimum in vitam derivari.

Ac primum quidem, quanto cautius et attentius invigilat sibi, si quis inimicos imminere sentiat! Erigitur animus inter insidias; excitatur strepitu virtus, quæ, si secunda esset, inclinaret in somnum et inertiam torpesceret. Obsidet inimicus, et quidquid gesseris infestus explorat. Vitam tuam undique circuit, si fortè præbeas ansam nocendi. Neque tantum aut muros, ut Lynceus ille, aut lapides oculorum acumine penetrat, sed et per amicos et per famulos quid in pectore inclusum habeas speculatur. Tibi etiam ipse obrepit, te scrutatur totum cuniculis. Maximè autem in peccatis hæret, eaque investigat; ac veluti vultures, odore cadaverum allecti, quæ corpora sana sunt, ea hebeti sensu non assequuntur; ita si quid in te virtutis est, id unum fallit ejus sensum; sola vitia movent, ad hæc assilit, hæc arripit, rimatur, dilaniat. Hujus tu primo statim tactu admonitus, id agis ut te omni virtutum genere munitum septumque custodias. Ac quemad-

modum assiduis vicinorum bellis vexata civitas fit robustior, et ad fortitudinem certaminibus acuitur, ita crebro inimicorum conflictu exercitata mens, excussis paulatim vitiis, invictam vim et robur inexpugnabile consequitur.

Neque solum in hoc inimici juvant, quod vitia nostra sedulo explorent, sed in hoc etiam, quod sua patefaciant. Nam inimicorum vitia longe minus fallunt, magisque laedunt oculos, quam vitia amicorum. His autem deprehensis, subit cura, ne iis, a quibus alieni sumus, similitudine affines videamur. Tum in pectus nostrum reflectimus oculos, sinus omnes excutimus, ac quaecunque inimicorum vitiis germana sunt, ea quasi invisi hominis gregem familiamque ejicimus: fitque viri unius odio ut multa mala, multas animi pestes odisse incipiamus. Sit enim durus omnino ac ferreus qui, quae in aliis vituperaverit, ea in se ipso admittere prudens sciensque non dubitet. Quod si inimici contescant, vix unquam ad aures nostras accidat vox veritatis; neque unquam illam nisi aut ab amico probo, aut ab inimico vehementi audiveris; ille admonendo emendat, hic criminando. Sed ea jamdudum mores pestis invasit, ut amicitia ad reprehendendum exili admodum voce praedita sit, in adulando loquax; muta in castigando, quae et ipsa vitia fovet, eaque suavissimis vocibus delinens quasi deosculatur. Non avarum te amicus, sed parcum et virum frugi; non prodigum, sed liberalem; non contumeliosum, sed acrem; non ignavum et inertem, sed placidum dixerit. Nocet susurrus ille tam lenis, eosque invehit animo morbos, qui, nisi inimicorum maledictis, sanari vix possunt. Sicut enim Telephus familiari medico destitutus vulnus hosti sanandum praebuit, ita quos deficit benevolus castigat, ii ut inimici sermonem audiant necesse est, neque maledicentis animum, sed rem ipsam intueantur. Ut enim qui Jasonem Thessalum interficere cupiebat, gladio vomitum



cùm aperuisset, salutem homini, dùm necem pararet, attulit; sic maledictum sæpiùs in contumeliam emissum, animi morbum latentem aut incuriâ neglectum sanavit.

Quid quòd haud ferè præceptor quisquàm effacior virtutis est quàm inimicus? Ecquis enim pluribus te virtutibus instruxerit? Nonne mansuetudine mollitur indoles, si maledicta tacitus feras? Nonne magnanimitate induaris necesse est, si maleficia beneficiis vincere contendas? Quid ad misericordiam te proclivior fecerit, quàm si afflicto et prostrato inimico opem tuleris? Quid te in æquitate constantiorem, quàm si justam ipsi mercedem tribueris? Candorem verò et ingenuam animi simplicitatem nihil unquàm inquinaverit, si ne adversus quidem inimicos dolis ac fraudibus uti assueveris? Quis igitur negaverit plurimùm prodesse posse inimicitias, quæ et curam exacuunt, et vitiorum odium ingenerant et eorum admonent, et animum corroborant exercitatione virtutum maximarum (1)?

*Ex Plutarcho, Car. LEBEAU.*

### Danger des bons mots.

MENTEM peræquè exasperat ac vulnerat convicium, si cum apparatu similitudinis aut metaphoræ vibretur. Hic subit animum recordatio Narsetis illius, qui audivit Italiæ oppressæ vindex et liberator; quippè qui Gothorum gentem universam superavisset cum rege Totilâ, victoriis claro, fortunâque diù propitiâ ebrio tantoperè, ut securus et ludibundus venerit ad prælium ultimum ac decretorium, interque ambas acies, ante conflictum, phalerato equo et auratis armis conspicuus, obequitaverit, sæpiùs mittens in aerem jaculum, atque id rursùs accipiens, dùm relaberetur.

(1) Voyez les *Leçons françaises*, tom. II, même partie.

Dux ille igitur, qui Totilam et Gothos vicerat, feminæ unius imbellis amarulento et salso dicterio victus et prostratus fuit : quandò nimirum, ex muliebri livore, monuit eum Sophia Augusta, desineret tandem regnare in Italiâ, et rediret Byzantium, ad colum et fusum, in Gynæceo, inter lucubrantès ancillas, tractandum æquiùs quàm Romæ sceptrum.

Nullum tam acutum telum, nec tam venenatum antehac hostes barbari contorserant in Narsetem. Pupugit animum translatio petita ex lanificio muliebri; nec par fuit ferendæ huic ignominie homo conditione quidem servus et eunuchus, sed victoriarum laude nobilitatus. Respondit verò nere ac texere in regiâ domo se quidem olim didicisse; at, licio jam præparato, brevì orditurum se ejusmodi telam, quam nec ipsa Augusta, nec Justinianus, uxorius imperator, unquam retexerent. Et tùm Alboinum, regem Longobardorum, e Pannoniâ, ut, uno avulso bellicosissimæ gentis duce, alter succederet, in intima imperii Romani viscera accersivit.

Atque ita unus eunuchus, adversus viros plus quàm vir, adversus feminam minùs quàm femina fuit : non tulit convicium quod illa armaverat metaphorâ, seu similitudine artis ignavæ, et in quo exprobrationem emasculati animi tanquàm fulmen vibraverat. Perstrinxisset et pupugisset leviter alia quævis comparatio; hæc patefecit locum vulnèri magno, hæc animum totum exhaustit.

P. Silvestris PETRA SANCTA, Soc. Jes. *De Symbolis heroicis*, lib. VI. 1634.

Trésor trouvé en songe.

HESTERNÆ noctis somnium referam tibi. Videbar mihi, incertum undè, nihil enim tale vel cogitare sum solitus, vel loqui; videbar, inquam, in agello meo,

Leç. lat. mod.

19

quem ad fontem Sorgiæ habeo, thesaurum inventisse, monetæ pervetustæ aureæ non mediocrem cumulum. Unâ spatiabamur soli, ut noster est mos; te itaque confestim evocans, digito rem designo. Ambos, ut fit, gaudium, stuporque defixerat: mihi quidem ut eram, memini enim, occurrebat illud Annæi: « vitate quæcunque placent, quæ » tribuit casus, ad omne fortuitum bonum suspiciosi, et » pavidi subsistite: et fera, et piscis, spe aliquâ oblectante » decipitur; munera ista fortunata, quæ putâris, insidiæ » sunt. » De hoc ergo consultantes parumper hæsitavimus, læti trepidique. Quid multa? ultimæ insanix visum est, quod per terras ac maria, tantis laboribus, tantisque periculis quæri solet, id oblatum ultrò contemnere. Mox certatim oneramur auro, domum clam taciti convehimus, additis pro tempore, quæ exportari uno fasce non poterant; hoc semel, hoc iterum et iterum facimus, et semper avidius; semper enim, ut natura rerum habet, cum pecuniâ sollicitudo; cupiditasque crescebant.

Ferit aures interim murmur invisum; secretum nostrum, nulli licet creditum, sponte suâ in vulgus eruperat, nec ita multò post, nescio quis major dominus locorum aderat, vindicans sibi jure thesaurum; obnitimur. Hinc primum longa et inamœna colloquia, indè lis minæque, et semper litibus juncta convicia, illo acriter urgente, nobis indignantibus in nostro agro reperta nobis eripi, propitiæ dona fortunæ. Mille subindè rerum motus et mille consilia, nunc matura et cauta, nunc temeraria et acerba, cum jam ad resistendum nos non tam nostra cupiditas, quam inexorabilis adversarii superba durities, inflammaret. Jam ab otio ruris, ad urbana negotia, jam a studiis ad arma translati, novis curarum turbinibus agebamur, jam pro intentione pervigili, et inquisitione pulcherrimâ novarum rerum, pernox odium atque ira successerant: postremò jam res e litigio adbellum se verterat.

Ità mutatus animorum status, et sæpè reperti auri pœnitebat; philosophabamur in insomniis. Ubi vitam serenam atque tranquillam linquimus? Quis nobis has curarum superinduxit nubes? Quis in has procellas nos impegit? An ignorabamus, in auro speciosam ærumnam, et splendidam esse miseriam? Necessitas cum divitiis crescit, et fugit cum mediocritate felicitas. Occurrebant acervatim exempla eorum, qui vel in divitiis infelices, vel in paupertate felicissimi fuissent. Spernebantur inutiles opes Crœsi, et funestum Midæ aurum, et Dionysii Crassique spolia templis avulsa: laudabatur Cincinnati, Curii, Reguli, Fabricii felix et gloriosa pauperies: accedebat acies hominum nostrorum, qui nudi in solitudine, solibusque et frigoribus adusti, radicibus herbarum et silvestribus baccis pasti, pro tecto cœlum, terram habentes pro cubiculo, cum voluptate torrentem turbidum hauserunt, asperoque et angusto calle gradientes, spe patriæ melioris, omnia prorsus mortalia contempserunt. Cæterum quò plura hujus generis ingerebantur exempla, eò gravius dolebamus, non vidisse nos in tempore, sed in tergo, ut aiunt, oculos habuisse.

Denique sic eramus, ut jam, ne cœpto vellemus absistere, solus reddendi pudor obsisteret, et jam supremi certaminis instabat alea, cum repenti medio noctis, irâ metuque anxius expergiscor; gelidus sudor corpus omne perfuderat. Ità me divinitas saivum velit, ut ego perindè fessus animi, fessusque membrorum eram, ac si grave durumque negotium, non somnians, sed vigilans agitâsem. Nec facile dici potest, quàm lætus fui, ubi sensi me thesauro simul et sollicitudine liberatum, et tantum habere quantum alit, non quantum angit; quantumque vitæ sufficit, non quantum affluit.

PÉTRARQUE, *Lettre* 13, liv. III.

## La Colère.

IRA perturbationum omnium atrocissima maximè hominum dedecet. Naturam hominis in truculentam mutat feram. Et cùm quævis perturbatio mentis aciem et judicium omne obscurat, tùm ira tenebras densissimas offundit, ut nec verum, nec utile, nec decorum possit intelligi. Id cogit facere, quod illicò pœnitentia consequatur. Jam in facie quàm turpis mutatio? quæ tempestas? oculorum ardor? dentium stridor? despuinatio et totius oris pallor? fæda linguæ titubatio et clamor? ut ille qui iratum se ad speculum aspexit, non sine causâ dicatur se non agnovisse. Ob hanc torvitatem vultûs, atrocitatem dictorum, crudelitatem factorum, adimitur viro omnis auctoritas, omnis benevolentia: diffugiunt amici, decedunt obvii, solitudo undique; omnes oderunt, omnes detestantur. Quo fit ut maximi viri nihil caverint magis, vel texerint sollicitiùs, quàm iram et irati opera, adeò ut naturæ etiam suæ repugnârint et vim attulerint. Quid enim ridiculum magis, quàm tantulum, tàm imbecillum animalculum sic furere ac fremere; et tantas tragœdias, tàm atroces, vilissimis de rebus excitare? ut de corporeis, de fortuitis, etiam, si Diis placet, de uno verbulo. Iram facilè domabis, si illud animo perceptum ac fixum tenueris, injuriam non fieri, nisi lædatur animus, cui à nēmīne noceri potest, nisi à semetipso, si modò istud vitii admiserit.

J. Lud. VIVÈS, in *Introd. ad Sapientiam*, sub  
titulo de virtute et affectibus.

## Le Duel.

Si quæ Gallorum est extra patriam suam labes, adhuc fœdius in Galliarum visceribus peccant, qui passim, tanquàm gladiatores ad arenam damnati subitis odiis, armisque privatis, ad ultima discrimina committuntur. Rem immanem, et ad istius sæculi probum ! leve iur-gium, solâque altercantium ambitione increscens, aut innocens re verâ jocus, plerùmque autem turbulenti ingenii præceps ad famam impetus, sæpè ad tristissimas cædes et familiarum orbitatem lymphatam juventutem propellit. Hinc toties miserorum parentum intercepta consilia, spesque occisæ, et propemodùm frustrâ pax in Galliis, et quæ vix minùs patricii sanguinis, quàm si bello certatum esset, in hâc arenâ hausit. Quæ hæc autem dementia, ritu ferarum, non ratione, sed impetu, injurias ulcisci, rerumque suarum iudicium permittere penè scenicæ arti, fortunæque sæpè fallenti ipsam artem, ut, quicumque felicius, ille et iustius arma sustulerit? Feræ gentes, et ab ipsâ venientes barbariâ, orbem supra aliquot sæcula suis moribus infecerunt.

His auctoribus quondam factum, ut in dubiis iudiciis, cum utrinque argumenta essent obscura, armis litigantium crederetur. In circum arenamve dimissi pugnabant, victus pro nocente habebatur; et indè vesaniæ origo hanc in ætatem gliscientis, quæ jam auctis finibus, cum olim in arbitrio magistratum esset, hodiè ad privatorum libidinem desævît. Isti autem gladiatoris arti prætextus est, nescias magnificentia, an utilitate acceptior, peritia pugnandi. Nam cum arte gladio ferire, vel deflectere destinatos sibi ictus, quis neget ad rem militarem pertinere? Hoc Græci Romanique, et omnis gens armis strenua, cum ambitu quæsiit.

Nunc verò non tanquàm in angustia prementium sese cuneorum, ut justis in praeliis solet, sed velut in apertæ arenæ libertate, per cursus recursusque, per omnem corporis habitum, per longam et disparem oculorum manuumque fallaciam, quis non potius privatorum odiorum crudelitatem erudire, quàm publicæ pietati suam fortitudinem parare videatur? Et verò nihil jam ad amentiam aut impietatem residuum in propinquos amicosve sævientibus. Sive sanguinis, sive familiaritatis jure conjuncti, non atrocibus injuriis, sed inani superstitione verborum, et propemodùm gratis, dissociati, alterno cruore imbuuntur : quodque ultimum furoris gradum putes, ne inter se quidem læsi, sæpè aliorum inimicitiis tantum nefas tribuere amant, et in gratiam nihil ad se pertinentium odiorum se ipsos et amicorum charissimos immolant; quippè a pugnaturis, qui perire soli nolunt, velut ad theatrum aut scenam, ità feralem ad hunc ludum invitati, ultrò subeunt, et quidquid hominibus aut dulce aut charum est, violare non dubitant, ineptissimo desiderio famæ : ut jactentur magno vitæ contemptu in arenam processisse, id est truculentissimum facinus ausi esse barbarâ ignoratione virtutis (1).

*Ex J. BARCLAY, Iconis animorum Cap. 3º.*

Même sujet.

QUÆ maxima habentur inter homines necessitudinum vincula, patriæ dulcedo, charitas amicitiae, affinitatis propinquitas, naturæ sanguinisque conjunctio, parentum ac liberorum pignora, ipsa etiam innata cunctis hominibus, quamque omnium postremam nec nisi cum ipsâ vitâ nostrâ exuimus, vivendi cupiditas : hæc omnia

(1) Voyez les *Leçons françaises*, même partie. tom. I et II.

contra hujus monstri furorem et impetum infirmi sunt obices: adeò invaluit latè receptus per populos, et in hâc præsertim Galliâ dominans ferus ille mos de minimis rebus levioribusque rixis per vulnera, et sanguinem, et mutuas cædes decernendi. Tentaverunt pluri reges huic crudeli carnificinæ civium obsistere, sed irritis semper conatibus. Invalida legum auxilia; spre-tusque principis nutus, morbi vim tantum et dominationis imbecillitatem nudaverunt. Ferocior indè licentia, atque insolentius, sese efferens, sicut fera bestia, ipsis irritata vinculis, deindè emissa.

Non tantum pretiosi sanguinis longa bella exhauriunt, quantum sæviante duellorum licentiâ cruenta pax absorbit. Neque enim grassatur, ut plurimum, hæc delicata insanæ gloriæ cupiditas per abjecta et vilia capita, sed insidet in optimo quoque et generosissimo, ipsumque nobilitatis florem depopulatur, hoc est præcipuam spem posteritatis et certissimum imperii columnen evertit.

Addite luctuosis juvenum nobilium funeribus desolatas domos mœrentesque insolabiliter parentes propinquosque occisorum, quos duplici morte extinctos quis potest esse lugendi modus? Spem enim afflictis parentibus et consolationem maximam relinquit casus eorum qui pro patriâ, pro rege, pro religione pugnantes, immaturâ sed honestâ morte occubuerunt, mœroremque eis et lacrymas paulatim abstergit non solum præsens suorum gloria; sed etiam debita tali morti beata immortalitas.

At in hâc dirâ orbitate quam privati duellorum casus afferunt, ubi juvenem in ipso furoris æstu, spirantem adhuc scelus et vindictam, inimicâ, sæpè etiam amicâ manu confossum, repentina mors freudentem et rabiosum occupat; in hâc, inquam, dirâ orbitate, quocunque te convertas, seu præsens tempus seu futurum intuearis, nihil non lugubre funestumque apparet, nec quicquam relinquitur miseris parentibus, præter mœ-



rorem in omni vitâ sempiternum, et ferè certam salutis suorum desperationem.

Potest omnia magnorum regum auctoritas armata pœnis et præmiis apud aulicos et nobiles, plerùmque ambitiosos, et quorum omnis fortuna pendeat e nutu principis, præsertim si res justa ac legitima imperetur, adsitque imperanti immobiliter constans animus et propositi tenax.

Cedat severis fracta legibus quamlibet dura et pervicax animorum obstinatio. Vanam gloriæ opinionem duellis affinxit impotens hominum furor, pravæque consuetudinis imperiosa lex; veram iisdem ignominiam addat sapiens regnantis providentia. Illius aversa mens, clausus in omnem vitam ad honores aditus, exilium, carcer, supplicii infamia, inustum etiam mortuorum nomini dedecus, hæc sit proposita duello merces. Frustrâ opponantur præclara avorum nomina, natalium splendor, navata plurimis in bellis fideliter opera, cognatorum preces et lacrymæ, dignusque veniâ juventutis error delusæ vanâ specie gloriæ; contra hæc omnia benè immansuetus et immisericors opponat surdam et inexorabilem edictorum severitatem.

Quot putatis, hâc, si itâ loqui fas est, piâ crudelitate principis servatas fore regno illustres familias, quas in ipsâ stirpe excisas hæc sæva pestis penitùs exstinxisset? Agent illi gratias immortales, quòd ipsas prudens severitas ab hoc insanabili luctu et ferè ineluctabili pernicie vindicaverit.

ROLLIN, *Lud. XIV. Panegy. II.*

Danger des Romans pour le goût et pour les mœurs.

NON leviores eloquentiæ plagam imponunt scripti de fictis heroum casibus libri, qui, si aliâ nullâ re noceant, quàm quòd adolescentes ad se rapiant multos, et e stu-

diorum optimè instituto cursu transversos agant, id ipsum satis fuerit cur eos eloquentiæ vel perditæ vel imminutæ manifestè reos peragamus. Annon satis brevis est vita hominì præsertim, cui tantum in manibus negotium est, nisi eam breviorē faciant steriles nugæ, distrahantque in particulas inanes et tanquàm in frusta concidant? Si spatium vitæ in duplum exeat, diligenter tamen, imò avarè custodienda res pretiosissima fuerit, ut rebus suppetat necessariis, nedùm spargatur in supervacuas, et rei vilissimæ modo intemperanter effundatur. Quanquàm, ne summo jure agere videar, concesserim sanè oratori futuro, ut, quoniàm alternâ quiete retendendus animus est, hoc laxamenti genere severiora studia dispungat, si modò totum intra certam temporis jacturam staret dispendium. Sed habent isti libri undè noceant multò præsentius.

Atque, ut a moribus ordiar, sine quibus facultas dicendi, aut nulla est, aut, quod pejus, mala, quantum illis afferunt mali! Quàm potenter cupiditates illas, quarum sensus præcipuè in adolescentiâ est acerrimus, non furtim et per ambages, sed ex professo et de industriâ exsuscitant! Quæ in sicco et solido vacillat ætas, quomodò consistet in lubrico?

Quòd si quis tam sinistræ mentis reperiatur, ut ei facilis jactura sit morum, disertusque malit esse quàm probus, næ ille falsus est, si quem indè ad eloquentiam fructum captat. Fateor equidem ex his libris nonnullos, cùm superiore sæculo in lucem exorti sunt, haud parùm favoris in vulgus nascentes habuisse. Sed, sive id assimilata quâdam virtutum specie assecuti fuerint, cometarum similes, qui perfidâ luce oculos perstringunt; sive gustûs publici morbus quidam et quasi hebetudo fuerit, hæc ipsa popularis approbatio a sapientibus et limati judicii viris inter gravissimas pestes numerata fuit, quæ potissimum eloquentiam affligerunt. Quantum enim meretrici

dispar est et discolor matrona, tantum illi, qui in hoc genere perfectissimi habentur, libri a recta eloquentiae forma distant.

Et verò sermonis genus hæc postulat sincerum, solidum, grave, dignitatis plenum; sermo apud illos fucatus, iners, fractum quiddam et supinum præ se ferens, exquisitus putidè, qualis feminarum esse solet, quas in comœdiâ exagitatas videmus. Fastidit hæc ambitiosum ornatum, flores nisi oblatos sponte et ad manum positos libenter prætermittit. Si quid cultus lætioris res aut locus exigat, nolet cincinnis adornari, cerussâ aut minio pingi, neque hæc lenocinia putabit ad dignitatem suam pertinere. Sed, quemadmodum his pigmentis facile carebit, quæ bonitatem corrumpunt formæ magis quam adjuvant, sic nihil omittet earum venerum, quibus sine notâ commendatur decor.

Quid simile apud illos? ornamenta enixè collecta; flosculi non distributi suo loco, sed temerè sparsi, et ad nauseam ingesti; lascivientes sententiolæ verborum cincinnis implicatæ; venustas, non illa quæ eminere solet ubi vultum bonus colorat sanguis, sed destituta succo, et colorem, quem e sanguine non habet, e fuco mendicans; cultus, non ille nobilis et legitimus, qui viro adjicit auctoritatem, sed mollis et dissolutus, qui possit infamare mulierem; adeò ut, si alterutrum eligendum sit, vel plebeiâ togâ minùs displiceat indutus orator, quàm istis undique delibutus unguentis.

Quid præterea? parùmne illa eloquentiæ nocent, nihil ibi personis accommodatum esse, nullum exstare naturæ vestigium, nullam rationem haberi ejus quod deceat; fortissimos heroas, virtutum exempla, imò miracula, velut contactos magico carmine, aut Circæo poculo madefactos, converti repenti in vilissimam hominum faciem, et, quos incorrupta rerum gestarum monumenta plus quàm viros ostendunt, eos, perversâ fingendi licen-

tiâ, minus quàm feminas ostendi? Quam de Cyro vobis finxistis imaginem? qualem haud dubiè fingi decuit de illo Rege, *quem Dominus vocaverat ad partes suas, cujus apprehenderat dexteram, ut subjiceret ante faciem ejus gentes, et dorsa regum verteret, et aperiret coram eo januas, et portæ non clauderentur.*

At nolite, nolite in hâc eum fabulâ ampliùs quærere; alius factus est. Deposuit feritatem Persicam; spiritus militares, cupiditatem gloriæ, sanguinis sitim Mars ille alter, ut Historiæ volunt, deposuit. Perpoliverunt eum novi scriptores, hominemque reddiderunt; urbanusque jam, elegantis madens, veste pictus, de capsulâ totus, apud amicam lamentatur, gemit, lacrymis exstillat, quolibet Sylvandro, vel Celadone haud paulò insanior.

At non eo tantùm nomine graviter illi libri peccant, quòd legentium animos vulgò dimittunt veri, quo præsertim eloquentia constat, inopes et jejunos; sed etiam quòd antiquitatis sanæ fastidium, imò contemptum inducunt. Sicut enim bellaria saccharo et melle condita, si convivis apponantur, palatum hujuscemodi cupediis corruptum hebescat quodammodò, et solitas dapes rejiciat, sic animus horum scriptis veluti sesamo et papavere sparsis illitus severas profuturasque lectiones, undè cibum pararet solidum, reformidat. Quod autem accideret ei, cui, subducto vero pabulo, unum hoc permetteretur lautitiarum genus, ut citò fluxæ vires corpus exsuccum relinquerent, itidem eloquentiam recentium deliciis malè pastam cadere prorsus necesse est, veterumque desertam subsidiis, tanquàm detracto vero pabulo, enervari.

Benig. GRENAN. *De corrupto dicendi genere Oratio.*

---

# LETTRES

---

## PRÉCEPTES DU GENRE ÉPISTOLAIRE.

QUI in epistolis unum aliquid vel requirunt, vel rescribunt, ii mihi de re tam mutiplici propèque in infinitum variâ, nimis angustè atque arcuè videntur agere. Neque sanè ità multò minùs facere eos existimo, quàm si sutor omni pedi crepidam velit ad eandem formam consuere.

Negant epistolam ferendam esse, nisi quæ intra exilem dicendi figuram sese contineat; nisi quæ illaborata dissolutaque fluat, et omnibus contentionis nervis careat; nisi quæ verbis vulgo mutuatis contexta sit; nisi denique quæ brevitate ipsâ epistolæ nomen mereatur, potiùs quàm voluminis.

Ergò mihi blatero quispiam, arreptâ censoriâ virgulâ, Solonis leges dictabit, clamabitque delendam esse epistolam, quæ non intra duodecim versiculos constiterit: hanc enim epistolari modo præfixam esse metam. Obliteremus igitur, hoc censore, plerasque Platonis, Ciceronis, Plinii, Senecæ, Divi Hieronymi Epistolas, contemptis istorum limitibus, ad justum usque volumen porrectas.

Quid? si argumentum varium et amplum objectum erit, tu nihilominùs me cohibebis, et circulum istum

tuum magicum egredi vetabis? Fabius scribit absurdum fore, si quis Herculis personam et cothurnos infanti tribuat: verum, multò videbitur absurdius, si infantis fasciolas calceolosque Herculi coneris accommodare. Gravius est periculum in re copiosâ contrahi, quàm in re non amplâ copiosiore fieri; propterea quòd super-  
vacua fortassè cum tædio leguntur, certè necessaria non nisi magno damno prætereuntur.

Neque rursus hos probare volo, qui, ridiculè copiam affectantes, emendicatis vocabulis, et malè consutis sententiarum centonibus epistolam infarciant. Nihil enim infantiâ loquacius. Quid tandem est brevitem præstare? nempe maximam rerum vim, quoad fieri potest, in pauca conferre; non autem pauca scribere, quod alioqui vel indoctissimus quisque desidiosissimusque facillimè possit.

Nulla epistola non brevis videbitur, in quâ, sine argumenti dispendio, nihil adimere queas; quæ sic est scripta, ut, sæpius relecta, tamen non satiet; cum tua interim, vel intra duodecim versiculos consistens, adeò brevis non sit, ut Iliade quoque videatur prolixior.

ERASME.

Muret à Sacratius.

OTIOSUS sum, non sæpè usurpare mihi hoc verbum licet. Ut igitur, si unà essemus, quicquid daretur otii, tecum libentissimè consumerem, ita nunc tecum absens per litteras colloquar. Sed, ut inter præsentem, cum sermonis argumentum deest, quærere alter ex altero solet, ecquid novi audierit, ut inde nascatur sermonis occasio: ita fingam te ex me nunc quæsiisse numquid novi Romæ acciderit.

Utrum autem respondeam, incertus sum: novane multa quotidie et accidissem et accidere, an nihil omnino

novi. Nam et multa nova, insperata, inopinata quotidie eveniunt, et alia quâdam ratione vetera, vulgata, usitata omnia. Hic, quem nuper nemo aspectu, nemo sermone dignabatur, repente dives effectus, colitur ab iis, qui eum haud ita prudenter ne resalutandum quidem esse duxissent: fastidit eos ipsos, quos nuper horrebat; aditur per epistolam ab iis qui nudius tertius eum, si quid peteret, postridie redire jussissent. Quis non hoc miretur ut novum? Fit ille ex gregario milite episcopus, alius mulos stringere ac defricare solitus, tanquam ex fonte aliquo biberit, qui prudentes et rerum multarum experientes efficiat, in consilium de maximis rebus adhibetur, supercilii ac capitis motu de maximi momenti negotiis, nemine ridente, decernit. Alius, cujus mane exituri atrium cohortes clientium obsidebant, cujus aures precibus obtundebantur, manus oculis conterebantur, ab iis, quos nuper aspectu beabat, insalutatus præteritur. Cui non hæc nova et admiranda videantur? sed hæc qui mirantur, nunquam eis, quod mirentur, defuturum est. Vetera sunt, quotidiana sunt, obsoleta sunt. Non tam mirandum est quod eveniant, quam mirandum esset si non evenirent. Quam multos, qui diu jacuerant, in altum repente sublatis; quam multos, cum multum in sublimi stetissent, momento dejectos vidimus! Qui talia mirantur, solem vespere occidere, eundemque mane redire mirentur. Ego si in quempiam virum antiquæ fidei ac probitatis inciderem, qui et aliis honesta præciperet, et ipse ad regulam suam viveret; qui sine ambitione, sine simulatione, sine malis artibus ad virtutem et ad honestatem totâ mente ferretur, clamarem: Porro, Quirites, id mihi novum, inusitatum, admirabile videtur. Ægrotare hunc, illum mortuum esse; alii natos liberos, alii mortuam uxorem, illum iter ingredi, hunc in urbem redire: hæc ita communia et translatitia sunt, ut mirer esse, qui talia mirentur. Sed nonne divinaveram, ut non diu otiosus

essem? Ecce tibi nescio quis fores cubiculi pulsat. Quicumque est, exspectabit tamen, dùm has litteras obsignavero. Multùm illi debes, quisquis est. Oneràssem te hodiè tam multis nugis, ut petiturus fueris a me, ut potiùs nihil omninò scriberem. Sed iterùm ac tertio jam verberatæ sunt fores. Valebis igitur, et ineptias meas æquo animo feras.

Ange Politien au Pape Innocent VIII.

Etsi me pudor prohibet, hominem tenuis fortunæ, nulliusque propemodùm auctoritatis, litteras dare ad te, Dei maximi Vicarium, Principemque generis humani; tamen in tanto, vel privato meo, vel publico totius nostræ civitatis gaudio, facere non possum, quin tester apud te, Summe Pontifex Innocentî, subitum hoc animi gaudium, profitear lætitiâ, gratias agam privato quoque nomine tuæ Sanctitati, quòd adolescentem nostrum Joannem, Laurentii filium, Florentinæ reipublicæ delicias, tuorum numero fratrum summique Senatûs collegio adoptaveris; quòd civitatem florentissimam, familiamque nobilissimam, tam insigni munere, tamque eminenti dignitate cumulaveris. Tùm gratulor etiam tibi; quòd hâc acerrimi judicii constantissimâ fide immortalem cæteris egregiis virtutibus gloriam conciliaveris.

Ut enim Laurentium ipsum taceam, quem tibi in perpetuum, Sancte Pater, beneficio isto tanto devinxisti, quid ipso tandem Joanne cardinali nostro perfectius, aut quid omnibus numeris absolutius? Non indulgebo amori meo, non tuo judicio blandiar, Pontifex; nota cunctis et testata loquar. Ità natus et factus, ità altius atque educatus, ità denique eruditus, atque institutus hic est, ut nemini secundus ingenio, nec æqualibus industriâ, nec præceptoribus litteraturâ, neque gravitate senibus con-



cesserit. Nativa in eo probitas et genuina, diligentia quoque parentis ita impense culta est, ut ex illius ore, non modò non verbum dictu foedius, sed ne levius quidem unquam aut etiam licentius exciderit. Non actio, non gestus, non incessus in illo notatus, non aliud postremò quod in deteriorem partem conspiceretur.

Sic in viridi ætate cana maturitas, ut qui loquentem senes audiant, proavitam in eo, nos paternam certè indolem agnoscamus. Cultum pietatis et religionis penè etiam cum lacte nutricis exsuxit; etiam tùm ab incunabulis sacra meditatus officia, quandò nondùm editum eum tamen Ecclesiæ jam genitor providentissimus destinaverat. Protinùs autem quàm est in lucem susceptus, multis magnisque præsagiis in hanc erudiri spem cœpit. Et quoniàm tale de se specimen dabat, ut istius jam tùm virtutis faceret fidem, compulsus famâ, Ludovicus ille, Francorum sapientissimus idemque sanctissimus Rex, ne summi quidem archiepiscopatûs fastigio indignum hunc ipsum planè adhuc puerum est arbitratus. Illum tu igitur habes Regem, collatæ istius dignitatis prælusorem. Telam Rex maximus exorsus est, quam Pontifex maximus pertexeret.

Audires utinàm voces fausta tibi nunc et prospera ominantis Florentini populi! Aspiceres gestientem ubique et concursantem in atriis nostris, ac lætitiæ suæ impotentem civium multitudinem, plebemque ipsam vix gaudium capientem animis. Non senes gravitas, non matronas pudor, non pueros infirmitas ab officio retardat. Confluunt in ædes Mediceas sexus ætasque omnis, omnis huc ordo, ut ad privatas necessitudines properant. Pro se quisque primi haurire oculis aspectum novi Cardinalis festinant, exsultant, vociferantur, manus ad cælum tendunt; propitium tibi Deum, prospera secundaque omnia comprecantur. Pro tuâ vel salute, vel dignitate vota prorsùs ab omnibus suscipiuntur. Nec est quòd annos

ac natales Cardinalis nostri numeres; virtus illi ante diem contigit.

Ne dubita, Pontifex, implebit utique augustam purpuram. Non sub galeri pondere anhelabit, non fulgore caligabit nimio, non indecorem eum tanto senatui, non imparem tanto fastigio recipies. Jam nunc ampla majestas, jam solito major species. Constat ratio collegis latius suffragii, nec te unquam, Summe Pontifex, iudicii poenitebit. Hoc tibi nomine, quod unum valeo, gratulor agoque gratias. Quos aliquandò pedes istos beatissimos præsens exosculabar, iisdem nunc illis absens lætitiæ plenus advolvor. Deumque precor ut diù tuo te perfrui beneficio gaudeamus, ut prospera incœpta prosperrimi consequantur eventus. Quod autem ad me attinet (quandò non alia pro animo meo facultas est), dabo operam certè, quamdiù vires suppetent, ut istiusmodi tua benefacta, Sancte Pater, in omnem posteritatem sempiternâ litterarum memoriâ propagentur.

Erasmè à Léon X.

Si celsitudinis tuæ ratio habeatur, beatissime Pater, nemo vel summorum principum inveniatur, qui non veriturus sit ad te scribere. Quis enim non metuat eum compellare litteris, qui, quantò cæteri mortales pecudibus antecellunt, tantò ipse mortales universos maiestate superat, et inter homines prorsus cœleste quoddam agit numen? Attamen singularis quædam naturæ tuæ bonitas, et incredibilis humanitas, quâ quidem illam ipsam superas magnitudinem tuam, non solùm publicâ totius orbis voce prædicata, verùm etiam ipsâ, quod aiunt, fronte, totoque corporis habitu relucens, mihi verò, cùm olim agerem Romæ, domestico etiam congressu degustata, tantùm addit fiduciæ, ut nec ipse, infimæ penè sortis

Leç. lat. mod.

20

homuncio, dubitare sublimitatem tuam meis interpellare litteris. Vidéo passim, audio passim, quâcunque patet orbis christianus. summos pariter atque infimos sibi de tali Principe gratulari. Quod quidem cùm omnes meritissimò faciant, nullos tamen æquè id facere par est atque eos, qui veræ pietatis et optimarum litterarum studio ducuntur: primùm, quòd nobilis illa et nominis immortalitate semper victura Medicium domus, cui Leonem debet orbis, semper excellentium probitate ac litteris virorum et altrix fuerit et ornatrix. Ex quâ nobis, velut ex equo Trojano, tot eximii in omni doctrinæ genere procures, paucis jam annis exsilierunt, ut vel hoc unum omen studiosos omnes summam in spem debeat erigere, Numinum providentiâ Leonem orbi datum, sub quo præclaræ virtutes, sub quo bonæ artes omnes reflorescant. Jam verò ab isto tuo genere adeò non degeneras, ut domûs alioquì multò omnium laudatissimæ gloriam tuis superâris virtutibus, atque hoc ipso reddideris illustriorem, quòd illius lucem ornamentorum tuorum splendore quodammodò obscurâris. Nimirùm ad optimam indolem optima accessit institutio: felicissimo ingenii tui solo longè bellissimus obtigit cultor, politissimus ille Politianus: cujus operâ, non spinosis istis ac rixosis litteris, sed veris illis, nec sine causâ bonis appellatis, ac mansuetioribus, ut vocant, musis es initiatus, quæ ferum etiam ingenium mite ac placidum solent efficere, neque initiatus tantùm, verùm etiam absolutus. Itaque verò duæ res, quas in principe civitatis requirit Plato, naturæ bonitas, et recta educatio, sic nobis constant in totius Ecclesiæ Principe, ut amplius ne votis quidem concipi possit. Neque verò defuit hisce tam egregiis primordiis, vel tua ipsius industria, vel Numinis divini favor. Quibus rebus factum est, ut, cùm urbis Romanæ libertas integerrimos quoque viros non rarò soleat aspergere, tu ut vitam, ità et famam modis omnibus illibatam ad istam

attuleris dignitatem, ad quam usque adeò nullis pecuniarum, aut factionum præsidiis penetrâsti, ut nec ambiens, nec exspectans, non tam hominum suffragiis, quàm divini Numinis calculo delectus fueris atque adscitus. Neque verò mediocriter illustravit laudum tuarum decus, illa Fortunæ sævientis iniquitas, quæ sanè Superùm consilio videtur incidisse, quò nimirum animi tui genuina virtus, velut aurum igni exploratum, spectatio mortalibus evaderet. Egregium nempè nauclerum adversa tempestas arguit. Insignis sculptor, quò duriorem ac minùs obsequentem nactus est materiam, hoc majus artis suæ miraculum præbet. In quovis rerum statu explicat sese virtutis illa genuina vis, nusquam tamen clarior, quàm quoties noverca Juno suum Herculem omni genere majorum exercet. Quanquam illud sæpenumerò videmus accidere, ut qui res adversas fortiter pertulerunt, fortunæ blandientis indulgentiâ corrumpantur; at quam integritatem in rebus afflictis semper præstiteras, eandem hactenùs ad summum rerum apicem evectus præstitisti. Nisi quòd nunc tuam bonitatem magis sentimus postea quàm ad summam benignitatem, summamque sapientiam par accessit potentia: ut, quantum pro tuâ bonitate prodesse vis, quantum pro tuâ singulari sapientiâ, quâ ratione succurrendum sit rebus humanis, perspicias, tantumdem pro summi Pontificii fastigio possis. Ut enim nihil possit accidere pestilentius, quàm si pravitas ac stultitia summi magistratûs armetur auctoritate: ita non alia res æquè salutaris a Superis dari potest mortalibus, quàm si ad cuncta moderantis Dei similitudinem, tria hæc in Principe copulentur. Itaque sensit illicò mundus Leonem rerum gubernaculis admotum, repente sæculum illud plus quàm ferreum, in auream ætatem versum: ac tanta subito rerum omnium commutatio, ut nemini non palàm esset, hæc auctore Deo geri. Compositæ bellorum undæ: cohibitæ Principum inter ipso

minæ: acerbis odiis dissidentes maximorum regum animi in christianam adacti concordiam: ut sileam interim, quòd aliquot Italiæ Principes suis civibus, quòd complures cives in exilium actos suæ patriæ reddidisti: quòd tuam familiam diù Fortunæ injuriâ vexatam restituiisti: quòd Florentiam civitatem tuam, quæ majorum tuorum prudentiâ diù florentissima fuit, multò præstitisti florentiorem. Hoc nimirum erat gentilitio *Medicis* cognomini respondere, tot tùm immedicabilibus penè totius orbis malis subito mederi, idque non vi, neque severitate, veluti sectionibus, inusturis, aut alioquò tristibus pharmacis, sed consilio, sed prudentiâ, sed mansuetudine. Ut maximum declarârit Julium totus penè orbis ad bellum excitatus, certè majorem testatur Leonem orbi restituta pax. Quid enim pace dulcius, præsertim post gravissimos ac diuturnos bellorum tumultus, quibus inter nos, immensâ christiani nominis jacturâ, ingenti bonarum mentium dolore collidebamur, quorum ad ipsam temporum recordationem inhorrescit animus? Quod superest, confidimus fore, ut, quemadmodum Sampsonis ænigma jam perspeximus, nempè melleam ex leoninâ fortitudine dulcedinem, ita, Christo res tuas benè fortunante, mox et illud Apocalypseos in te quadret, *Vicit Leo de tribu Juda*. Hoc nobis de te pollicentur virtutes istæ tuæ jam incomparabiles: hoc utrumque nomen ominatur, et quod ad summum Pontificium attulisti, et quod creatus Pontifex adoptâsti. Etenim, cùm *Joannem* audimus ac *Leonem*, quid aliud intelligamus, quàm eximiam animi bonitatem cum invicto animi robore conjunctam? Bona, inquam, omnia nobis promittunt, non modò nominum ipsorum haudquaquàm contemnenda auguria, verùm etiam hæc quæ jam abs te præstita videmus, quæ videmus apparari. Felices rerum orsus felicem portendunt exitum.

Video jamdudum, beatissime Pater, quàm ingens lau-

dum tuarum campus se nobis aperiat; sed longè impar est hujus ingenioli vis rebus tantis explicandis; ad tam divina facinora nostra non aspirat eloquentia, vel potiùs infantia. Et tamen nescio quo pacto mihi vehementer gestit animus pro virili omnes ingenii nervos in hoc explicare, ut, quanta exstiterunt Leonis in christianam gentem merita, tanta et posteris habeantur, ac celebrentur, nullo unquàm tempore intermoritura. Quà de re diù cogitanti mihi, cùm exploratum haberem, nequaquàm ingenii nostri præsidio confici posse, propemodùm visum est fieri posse, ut hâc ratione utcunque, quod conor, liceat assequi, si ad id efficiendum immortalis alicujus per se nominis adminiculo fuerimus usi. Cùm igitur nihil sit Hieronymiano nomine celebrius, nihil ipso comprobatius, duxi facinus pulcherrimum, si Hieronymus apud Latinos theologorum facilè princeps, dignissimus quidem qui legatur ab omnibus, sic depravatus verò, sic contaminatus, sic conspurcatus, ut nec a doctis posset intelligi, a mendis repurgatus, orbi christiano tandem nostrâ curâ restitueretur. Leonis verò gloriâ quanquàm nihil luculentius, tamen haud mediocris, nî fallor, huic adjungetur accessio, si tam rarum, tam ingens, tam inclytum opus, felicissimo tui nominis auspicio, veluti denuò renatum, in lucem et in hominum manus exeat. Et pulchrè videtur convenire, ut omnes bonæ litteræ, quæ pacis alumnæ sunt, per eum pontificem reflorescant, per quem otium et pax studiorum altrix orbi terrarum parta sunt.

Sanctitatem tuam nobis et universæ Reipublicæ christianæ, quàm diutissimè servet incolumem, semperque felicibus incrementis in majus provehat idem qui te donavit orbi Deus optimus, maximus. Datum Londini, 28 aprilis anno 1515.

Ange Politien à J. Teixera, grand-chancelier du Roi de Naples,  
Ferdinand I<sup>er</sup> d'Arragon.

CONATUS persæpè sum scribere ad te, vir clarissime, quò tibi meus animus, studiumque et voluntas innotescerent. Verùm nescio qui semper, ingenuus dixerim, an rusticus, obstitit pudor, ut qui nec me tibi satis notum sciebam, et virtutis, fortunæque tuæ quodam quasi fulgore deterrebar. Sed impetravit a me tandem qualescunque has litteras vel mei officii ratio, vel tuæ humanitatis opinio.

Quod igitur epistolæ hujus, vel mihi accommodatius, vel tibi acceptius fore argumentum sperem, quàm si de tuis liberis iisdemque meis discipulis ex vero quid sentiam perscripsero? Misisti tu quidem illos in Italiam, vir excellens, ut moribus, ut litteris, ut omnibus denique ingenuis artibus ad summæ fortunæ cultum formarentur. Sed eos domo secum, credo, paternos attulère mores, ut exempla non magis accipiant ipsi, quàm præbeant cæteris. Nihil in illis ineptum, nihil improbum, nihil immodestum, nihil durum. Non inverecunda frons, non elatum supercilium, non licentes oculi, non protervior lingua, non inconstans vultus, non aliquid postremò vel in facie totâ, vel in gestu, vel in statu, vel in incessu, quod offendant, quod molestum, quod putidum, quod odiosum sit. Ædes quotidie sacras frequentant, magistris operam dant, non assiduam modò, sed et alacrem. Doctiores condiscipulos humanitate sibi et obsequio devinciunt: quos moribus obfore vel famæ credant, eorum consuetudine penitus abstinent. Nullum inter ipsos, nisi de studiis ac de iis perpetuum certamen. Nullibi sæpiùs aut libentiùs, quàm aut in oculis præceptorum, aut in cœtu condiscipulorum versantur. Horas quoque tempestivas

bonæ valetudini dedicant, eamque ob id prosperrimam tuentur. Ingeniis autem sic excellunt, ut facile se (ne multa dixerim) tuos esse liberos declarent. Percipiunt facile quæ traduntur, pronuntiant eleganter, retinent fideliter, imitantur feliciter.

Jam de studio quid dixerim? Nihil equidem ego ardentius, nihil vidi perseverantius. Tantos ergo jam in linguâ utrâque fecere profectus, ut ipse quoque non imperitissimus ingeniorum magister obstupescam. Quem verò eis domi custodem, moderatoremque dedisti, sic eos prudenter, amanter, diligenter curat, excolit, gubernat, instituit, ut omnino nihil desiderari possit. Non fallo equidem te, sed nec ipse rursus fallor; ita esse rem vel admirans invidia fateretur. Quocirca multum equidem fortunæ istî tuæ, non minus animo tamen propositoque gratulor. Nec enim levis hinc ad te quoque redundat honos, filios tot ac tales imbecillâ adhuc ætatulâ tam procul abesse a tuis oculis, a Laribus, a patriâ, tamque diù, non quidem sænori multiplicando, nec mercibus commutandis, ut nostri solent, sed ut optimis institutis, ut optimis artibus, ac disciplinis imbuti, viaticum sibi ad senectutem parent, in quod ipsa quoque Fortuna nullum jus habeat. Quæ res tibi jam non modò supra spem, sed opinor, etiam supra vota succedet. Mihi autem crede, vir magne, non tibi illi apud nos minus acquirunt gloriæ, quàm sibi literaturæ. Jam equidem vel tuâ, vel ipsorum causâ sic eos amo, sic me redamari sentio, ut in tuum penè mihi locum videar amore et diligentia successisse. Quâ fiducia videlicet ausim rogare te, clarissime vir, ut epistolæ meæ, quæ judicium regis tui, tanquàm Apollinis subitura, jam nunc tota tremit atque horrescit, tantum favoris impertias auctoritate quâ polles, ut indulgentiam potius, quàm censuram tantæ illius majestatis experiatur. Vale.



Le même à J. Pic de la Mirandole.

QUAM vellem te quoque hodiè nobiscum Paulus Ursinus invitâsset ad epulas, vir ut in omni militari gloriâ celeber, itâ nec abhorrens a litteris, nec a litteratis. Filiolus est illi Fabius undecim natus annos, insigni cùm pulchritudine, tûm virtute : flavi puero crines in terga molliter fluentes, alacres oculi, facies liberalis, vultus ingenuus, status elegans, decorus habitus, atque is militaris. Ut ergò discubimus, canere quædam jusus notata musicis accentuunculis carmina, simul cum peritis aliis statim suavissimâ quâdam voce sic in nostras aures illapsus, imò verò in præcordia est, ut me quidem (cæteros nescio) penè extra me rapuerit, certè sensu tacito divinæ prorsùs cujusdam voluptatis affecerit.

Pronuntiavit heroicum deindè carmen, quod ipsemet nuper in Petri Medicis nostri laudem composuerat. Id ab ipso reverà, non (quod ego tamen suspicabar) ab alio factum, signis evidentissimis argumentisque postea cognovi. Roges, quale carmen; quale ferè nec meum dici sanus recusem. Vox ipsa nec quasi legentis, nec quasi canentis, sed in quâ utrumque sentires, neutrum discerneres : variè tamen, prout locus posceret, aut æqualis, aut inflexa, nunc distincta, nunc perpetua, nunc sublata, nunc deducta, nunc remissa, nunc contenta, nunc lenta, nunc incitata, semper emendata, semper clara, semper dulcis; gestus non otiosus, non somniculosus, sed nec vultuosus tamen ac molestus : Rosciolum prorsùs aliquem diceres in scenâ versari.

Postulârunt subito quidam, carmen ut illud in pro-  
sam retexeret, et oratione solutâ totum rursùs ut argu-  
mentum colligeret. Cunctatus paululùm, quasi delibe-

rabundus, cœpit mox dicere, verecundè quidem, sed tamen admirabiliter. Et fluebant ex ore tenello verba lectissima, tanto cursu, quantum facilè nec stylus ipse suppeditat. Miraris hæc, Pice? Dabo aliud majus, magisque quod mireris. Impleverat hoc jam munus, et eum pater jusserat ibidem cibum capere stantem, non enim solet aliter. Jam secundæ mensæ, cùm proponere jubeor, quot et quæ argumenta epistolarum velim, quas ille simul pluribus dictaret ex tempore, proposui quinque duntaxat (non enim plura libuit, ne fortè puerum fatigarem, plura ille tamen blandè adhuc deposcebat), sed quæ proposui nata ibidem statim sunt varia, nova, quædamque ridicula, sic ut ad ea comparare se prius non potuerit. Collocati quinque igitur per ordinem librarii, cum stylis et pugillaribus, excepturi quod ille dictasset. Consistit in summo puer, terram intuens modestè, cogitat aliquantulum, mox tamen oculos attollit, imperat ei, qui summus consederat, ut jam scribat; ubi pauca dictavit, innuit et secundo, dictat et huic alterum argumentum; pergit ad cæteros deinceps, donec ad infimum; rursus quoque ad primum revertitur; sarcians quod omiserat, fulciens quod pependerat; dissidebat ibi nihil, claudicabat nihil. Ità sæpius in orbem remeans epistolas uno tempore (quis credat?) quinque absolvit.

His actis, equos conscendimus, ut concurrentes hastatos, inque iis Petrum Medicem nostrum spectaremus: Ibi res accidit, quæ sicuti me statim maximè turbavit, ità divinitatem penè quamdam postea pueri hujus ostendit. Vehebatur equo Fabius, quo plurimum delectabatur, pulcherrimo illo quidem, sed qui nimium freno repugnet. Hoc persultare campum solet, hoc decurrere; citat, flectit, ut scienter, ità ferociter. Ibat ergò mecum sermonibus captus, ac fabulis inhians litteratis, auresque mihi penitus, animumque dederat, cùm repente

collapsus equus in limite quodam super equitem ruit ipsum resupinus. Clamat puer, quiritatur, ut in extremo periculo; accurrunt undique famuli, pro se quisque sublevatum, quorum unus etiam, dum salit incautius, sibi miser crus defregit. Plena omnia tumultu, me terror, horror obstupescerat. Pater adest, hortatur animo bono sit. Ille ubi patrem videt ( ut generosi spiritus facile indolem cerneret ) nullum ultra clamorem, nullos gemitus edere, tantum hortari, pedetentim cautimque agerent, ne forte ipsum gravius, dum consurgere conatur, equus affligeret. Abscissa igitur cingula jacenti equo, substractusque ita Fabius, nobis multum pavefactis incolumis restitui, quanquam tamen vexatus nonnihil, atque ob id in ædibus deinde relictus. Ego vix mei compos, omisso spectaculo, nec mihi ipsi adhuc de salute pueri satis credens domum sum reversus, penè attonitus ac periculi tanti metu quasi præsentis exanimatus.

Habes diei unius historiam de Ursino Fabio, qui, si superstes fuerit, ætatisque numeros ( quod ille sinat Deus ) impleverit, si jam quo gradu cœpit ad excellentem gloriam perrexerit, auguror evasurum talem, qualis tu solus, mi Pice, nostro sæculo esse videris, hoc est, ut eum quoque propter admirabilem virtutem mortales omnes, tanquam si cœlitus demissus, venerentur. Vale.

Coelius Calcagninus à Olympia Morata.

DEFENSIONEM, quam pro Cicerone nuper elaborasti, legi summâ cum voluptate: tum quod abs te proficeretur, cujus studiis jam pridem plurimum faveo; tum quod in eâ mirum in modum veneres et gratias paternas expresseris. Accessit hæc quoque privatim commendatio, quod eam mihi munus esse voluisti, idque adeo gratum et jucundum, ut in interiorem bibliothecam

cam receptum sit a me, et inter sanctiones thesauros collocatum.

Gratulor igitur isti felicissimo ingenio tuo, pleno leporis, pleno eruditionis; cujus mihi certissimum testimonium dedit felix illa et prædices verborum supellex et argumentorum copia, quam in illam admirabili artificio congessisti, ut omnes oratorias lecythos propemodum reluisse videaris.

Auget admirationem quod, cum cæteris virginibus ille mos sit peculiaris ut vernos flosculos hinc atque inde decerpant, unde sibi versicolore coronam intexant, tu non jam flosculos illos qui suis horis expirant ac brevi commoriuntur, sed planè immortales amaranthos e fecundis Musarum viretis legisti, quibus, ceu tessellis vermiculatis, totam orationem adornares atque interspergeres. Quibus ea est etiam prærogativa propè divinitus data, ut nunquam flaccescant, sed ætatis beneficio fruantur, et quotidie magis revirescant.

Musas iratas habeam, nî mihi hoc certum ac persuasum est, Ciceronem, si ad ejus manes tam exultæ defensionis fama pervasit, gratias ultrò acturum, atque adeò habiturum sillographis et calumniatoribus illis suis, qui tibi elucubrandi bellissimam istam orationem occasionem dedere. Cum igitur adversarios Ciceronis sis tam gravi stylo persecuta, cum tanto studio Ciceronis partes defenderis, vide ac tecum cogita, quantam de te expectationem concitâris, quantis denique te prædibus obstrinxeris, ut jam tibi non liceat mutare sacramentum, neque militiam, cui semel religiosè nomen dedisti, abjurare. Te itaque in castris Ciceronis assiduam ac frequentem esse oportet, donec justa stipendia confereris, atque ad primos ordines perveneris. Idque eò libentiùs atque accuratiùs facere debes, ut Annæ (1),

(1) La princesse Anne d'Est.

principis lectissimæ, cujus in regio comitatu adscripta es, plenius favorem promerearis, ejusque studia imiteris. Quæ cum omnes summas virtutes in hac tenerâ ætatulâ amplectatur, tum maximè Græca et latina studia, et ipsam imprimis eloquentiam, tanquam puellares jocos, suas delicias putat. Benè vale.

Ange Politien à Jean Pic de la Mirandole.

Næ tu homo es lepidus, qui me cum tuis amoribus committere tentes, quique adeò severè et tetricè à me homine haud sanè rugosæ frontis tam bellos accipi pueros postules. Unus, aiunt, Amor Pana Deum palæstrâ provocatum supplantavit. Tu me concertare cum toto Veneris grege quî putas posse? Sed tamen hoc tu exigis, tu, inquam, Pice, cui denegari quicquam sit planè nefas. Quare aliquot exoravi ex iis, ut se à nobis vexari paulum paterentur. Neque ego judicis (itâ me semper ames) sed Momi personam indui, quem ferunt sandalium Veneris tandem culpasse, cum Venerem non posset. confodi igitur versiculos aliquos, non quòd eos improbarem, sed quòd tanquam equestris ordinis, cedere reliquis veluti senatoribus videbantur atque Patriciis. Plebeium nihil offendi. Sed et in his non tam judicium tibi quàm voluntatem defuisse certò scio, quandò et Nasoni tuo decentior, ut aiunt, facies videbatur, in quâ nævus esset. Remitto ad te eos, atque addo stoicum comitem, quem utinàm talione tantum referiant ipsi ac non planè habeant ludibrio. Utcunque erit, habet hic senecio superciliosus, ubi patientiam suam exerceat. Non erit jam quòd clames: ô Jupiter! plue calamitates. Non Bithus et Bacchius melius compositi. Reliqui, quos petis, negant ferre lucem. Tu me ama, id quod mutuò facies. Vale.

Léon X à Raphaël d'Urbain.

CUM præter picturæ artem, quâ in arte te excellere omnes homines intelligunt, is a Bramante architecto etiam in construendis ædibus es habitus, ut tibi ille rectè Principis Apostolorum templi Romani a se inchoati ædificationem committi posse moriens existimaverit, idque tu nobis, formâ templi confectâ, quæ desiderabatur, totiusque operis ratione traditâ, doctè atque abundè probaveris, nos, quibus nihil est propè antiquius quàm ut fanum id quàm magnificentissimè, quàmque celerrimè construat, te magistrum ejus operis facimus cum stipendio nummum aureorum trecentorum tibi singulis annis curandorum a nostris pecuniarum quæ ad ejus fani ædificationem erogantur, ad nosque perferuntur, magistris : a quibus id stipendium æquis pro tempore portionibus dari tibi, cum petieris, sine morâ, etiam mensibus singulis jubeo. Te verò hortor ut hujus muneris curam ita suspicias, ut in eo exercendo cum existimationis tuæ ac nominis, quorum quidem in juvenili ætate bona fundamenta jacere te oportet, tum spei de te nostræ paternæque in te benevolentia, demùm etiam fani, quod in toto orbe terrarum longè omnium maximum atque sanctissimum semper fuit, dignitatis et celebritatis, et in ipsum Principem Apostolorum debitæ a nobis pietatis rationem habuisse videare. Dat. kal. aug. anno secundo. Româ.

Petr. BEMBUS.

Le même au poëte Arioste.

SINGULARIS tua perque vetus erga me familiamque mean benevolentia, egregiaque bonarum artium et litte-

rarum doctrina, atque in studiis mitioribus, præsertim-  
que poetices elegans ac præclarum ingenium jure propè  
suo exposcere videntur, ut quæ tibi usui futura sunt,  
justa præsertim et honesta petenti, ea tibi a me non  
libenter modò, sed etiam liberaliter concedantur. Quare,  
cùm libros vernaculo sermone et carmine de Gestis Erran-  
tium, quos appellant, Equitum, ludicro more, longo  
tamen studio, et multorum annorum curâ vigiliisque  
confeceris, eosque conductis abs te impressoribus in  
manus hominum edere statueris, ut, ex tuâ diligentia,  
probiore exeat, tùm, ut si quis fructus eâ ex re percipi  
potest, is ad te potiùs, qui conficiendi poematis laborem  
es perpersus, quàm ad alienos deferatur: edico et mando,  
ne quis, te vivente, eos tuos libros imprimere, aut im-  
pressos venundare, ullis in locis, audeat, sine tuo jussu et  
voluntate. Qui contra mandatum hoc nostrum fecerit, is  
universæ Dei Ecclesiæ toto orbe terrarum expers esto.  
Dat. duodecimo kalend. jul. anno tertio. Româ.

*Idem.*

Erasme à François I<sup>er</sup>.

Cùm inclitum Franciæ regnum, omniumque consensu  
longè florentissimum, plurimos ediderit principes, pietate,  
bellique gloriâ præstantes, Francisce, regum optime juxtâ  
ac maxime, tu tamen in primis speciosissimum illud et  
Gallorum regibus peculiare christianissimi agnomen mihi  
præstare videris. Etenim cùm Christus ipse regum Rex  
haud alio insigni, symboloque suos dignosci voluerit,  
quàm mutux inter ipsos cõcordiæ, tu, posteaquàm,  
bello adversùs Helvetios gesto, quàm tibi nec animus,  
nec apparatus ad bellum gerendum deesset, declara-  
veras, tamen hùc totis nervis incumbere maluisti, ut,  
compositis in æternum bellorum tumultibus, præcipuè

christianæ ditionis principes perpetuâ jam pace inter se conglutinentur : nimirum prudenter illud animadvertens , ex regum inter ipsos dissidiis simul omnium rerum bonarum pestem ac perniciem , contrâ , malorum omnium colluviem in vitam mortalium invehi : quorum animos et opes si pax et amicitia sincera conjunxerit , mox futurum , ut jam , aureo velut quodam sæculo , pietas , optimæ leges , et quicquid est honestarum artium simul efflorescat , quæ semper pacis et comites esse solent et alumnæ.

Intelligit , videt , perspicit animus iste tuus verè regius ità maximè fore te principem felicem et eminentem , non si quàm plurimis , sed si quàm optimis ac felicissimis imperes. Illud igitur quò magis efficiat vigilantissima tua Majestas , cùm tot habeas in regno tuo viros , omni virtutum ac litterarum genere præcellentes , tamen undique præmiis amplissimis adsciscit , quò regnum per se ornatissimum talibus ornamentis reddat ornatius , haud ignara istiusmodi decoribus , multò veriùs ac pulchriùs illustrari ditionem suam , quàm opibus , tropæis , pyramidibus , aliisque quantum libet magnificis substructionibus.

Porro , quòd inter hos me quoque tua benignitas dignata est honestissimis præmiis sollicitare , video sanè quantum debeam animo tuo non minùs humano quàm excelso. Atque utinàm adsit mihi tanta vis ingenii et eruditionis , ut aliquâ saltem ex parte tanti Principis expectationi respondere queam ; tantum autem eloquentiæ , ut heroicas istas virtutes tuas , eximiaque decora , dignis aliquandò præconiis posteritati commendem , atque in primis hoc divinum restitutæ pacis beneficium , te præsertim adnitente , partum orbi christiano ! Precor Deum optimum maximum , ut , posteaquàm illi complacitum est pulcherrimos istos impetus animis vestris immittere , idem provehat , benèque fortunet. Verè profectò scripsit Rex ille pacificus , *Corda regum in manu*



*Dei esse*, et illius arbitrio hùc et illùc impelli. Quis enim dubitet istam mentem hujus afflatu vobis dari? Proindè spes est fore, ut qui novam hanc felicitatem orbi christiano largiri cœpit, idque per te potissimùm, idem munus suum vestrà pietate constantiâque, quàm maximè diuturnum ac proprium velit esse. Is Majestatem tuam, Rex excellentissime, diutissimè felicem, ac rebus omnibus florentem, regno, imò orbi terrarum servet, ac tueatur, cui me totum trado dedicoque. Antuerpiæ, 21 febr. 1516.

Le même à Charles Utenhove.

QUÀM multos videmus hodiè juvenes, Carole, gentis Utenhoviæ decus, qui præter majorum imagines nihil habent nobilitatis, neque in aliud valere putant gentis claritudinem, quàm ut sub hujus umbrâ licentiùs et impunè magis indulgeant otio, lusibus, amoribus, comensationibus, reliquisque nequitiae partibus, judiciis adeò perversis, ut, cùm ex virtute profecta sit omnis nobilitas, sibi persuaserint, virtute nobilitatem amitti, gentisque decus obscurari: quod meâ sententiâ nihilominùs absurdum est, quàm si quis affirmet solem tenebras invehere, noctem rebus lucem infundere! Siquidem tàm crasso tenentur errore, ut existiment, otium, ignaviam, liberalium omnium disciplinarum inscitiam, mores luxu perditos cæteraque vitia non modò licere, sed etiam decere benè natos, quæ nullum omnium mortalium non dedecent. Atquè longè turpius est progenitorum claritati tenebras offundere, quàm obscuris natam esse. Neque enim in cujusquam est potestate, ex qualibus nascatur; sed quemadmodùm ea laus propria nostra est, si disciplinis ac rectè factis efficiamus, ut a nobis initium sumat nobilitas, ità nostrum propriè dedecus est, si partam a majoribus virtute nobilitatem degenerare vitâ obscuremus. Sed

his quoque sunt deteriores, qui se mendaci nobilitatis titulo venditant, quò magis liceat quicquid animo collibuit.

Ab horum tum ingeniis, tum moribus, immane quantum abes, ornatissime Carole, quem, licet eà florentem ætate, cui vita solutior vitio verti non solet, generis dignitas, et opulentia rei familiaris adeò non dejecit ad ineptas voluptates, et otium omnis nequitiae magistrum, ut ad disciplinarum integritatisque studium potius erigat atque inflamment! Sic enim tibi persuasit philosophica ratio, ut parum te dignum ducas progenitorum stemmatibus, nisi eos veris animi bonis vel æques, vel antecedas. Sollicitat nimirum verè generosam indolem tuam domesticum exemplar, clarissimi viri patris tui Nicolai Utenhovii, qui, præter exactam juris peritiam, tantà modestiâ, prudentiâ, judicio, animi moderatione atque integritate fuit ornatus, ut multis annis nemo Gandavi primario totius Flandriæ concilio gloriosius præfuerit. Et si quid in tanto causarum undique strepentium tumultu contigisset otii, id evolvendis sacris voluminibus impendebat, frequenter et noctis aliquam partem huic studio decidens, homo tot virtutum luminibus illustris, ut in illo claritatis minima pars videatur generis decus.

Hujus ad exemplum properanti non possum non magnoperè gratulari, utinàm et aliquid adjumenti possim afferre, qui mihi videris non solum eò destinasse conatus tuos, ut parentem laudatissimum imitatione referas, verum etiam ut æmulatione antevertas! Neque enim verè legitimi sunt filii, sed nothi potius, qui parentes non alio referunt, quàm corporis lineamentis, animi speciem tantò præclariorem adeò non exprimentes, ut sint etiam dissimillimi. Porro, cum triplex sit nobilitatis genus, unum quod nascendi sorte contingit, alterum quod parit liberalium disciplinarum cognitio, tertium, eximia virtus, et ingentia in rempublicam merita, perspicuum est eum

inter nobiles esse nobilissimum, qui circulum hunc suis numeris absolverit.

Id quemadmodum a patre tuo vides egregiè perfectum, ità laudis hujus stadium ingressus, summo studio conmitteris, ut ad eandem metam pervenias. Quemadmodum autem nulla est absoluta doctrina sine peritiâ linguarum, ità nulla est perfecta virtus absque pietate, quæ vel sola potest et nobilem et beatum præstare, cum eruditio religionis expers cadat et in scelestissimos animos: porro, absque his, sanguinis nobilitas nullum habet usum, nisi quòd vel ad virtutem enitenti domesticis præluceat exemplis, vel de majorum instituto degenerantem traducit. Quisquis autem scelere clarus est, ille profectò plus quàm ignobilis est. Quis enim non malit nullum habere nomen, quàm cum Thersite, Phrynondâ et Cecropibus celebrari? Etenim, qui nihil habet quo se commendet hominum memoriæ, quàm proavorum imagines, quibus atriorum parietes ornantur, potius quàm is qui jactat, nihilò decentius dicatur nobilis, quàm si quis vocetur dives ære alieno.

Le même au comte Guillaume de Montjoye.

**PARVENIMUS** tandem et quidem incolumes, tametsi invitis, ut apparet, et Superis et Inferis. O durum iter! Quem ego posthàc Herculem, quem Ulyssem non contemnam? Pugnat Juno, semper poeticis viris infesta: rursum Æolum sollicitarat; nec ventis modò in nos sæviebat, omnibus armis in nos dimicabat, frigore acerrimo, nive, grandine, pluvîâ, imbre, nebulis, omnibus denique injuriis: hisque nunc singulis oppugnabat, nunc universis. Primâ nocte, post diutinam pluviam subitum atque acre obortum gelu viam asperrimam effecerat; accessit nivis immodicâ vis; denique grando, tum

et pluvia, quæ, simul atque terram arboremve contigit, protinus in glaciem concreta est. Vidisses passim terram glacie incrustatam, neque id æquali superficie, sed colluculis acutissimis passim exstapibus. Vidisses arbores glacie vestitas, adeoque pressas, ut aliæ summo cacumine imum solum contingerent, aliæ ramis laceræ, aliæ medio trunco discissæ starent, aliæ funditus eversæ jacerent. Jurabant nobis e rusticis homines natu grandes, se simile nihil unquam in vitâ vidisse antea. Equis interim eundum erat, nunc per profundos nivium cumulos, nunc per sentes glacie rigidos, nunc per sulcos bis asperos, quos primum gelu duraverat, deinde et glacies acuerat, nunc per crustum quod summas induxerat nives, quod quidem mollius erat, quam ut equum sustineret, durius, quam ut ungulas non scinderet.

Quid inter hæc animi Erasmo tuo fuisse credis? Insi-debat attonito equo eques attonitus, qui quoties aures erigebat, ego animum dejiciebam : quoties ille in genua procumbebat, mihi pectus saliebat. Jam Bellerophon ille poeticus suo terrebat exemplo, jam meam ipse temeritatem exsecrabar, qui mutæ belluæ vitam, et unâ litteras meas commissem. Sed audi quiddam, quod tu credas ex veris Luciani narrationibus petatum, nî mihi ipsî, Batto teste, accidisset. Cùm arx jam fermè in prospectu esset, offendimus omnia undique glacie incrustata, quæ, ut dixi, in nivem inciderat. Et erat ventorum tanta vis, ut eo die unus atque alter collapsi perierint. Flabant autem a tergo. Itaque per declive montium me dimittebam, per summam glaciem velificans, atque interim hastili cursum moderans. Id erat clavi vice : novum navigandi genus. Toto ferè itinere obviis fit nemo, sequitur nemo ; adeo non solum sæva, sed etiam monstrosa erat tempestas. Quarto vix demùm die solem adspeximus. Hoc unum ex tantis malis commodi excerpimus, quod latronum incursus timuimus minùs : timuimus tamen, ut homines

pecuniosos decebat. Habes iter meum, adolescens generosissime, idemque candidissime; quod ut durissimum fuit, ita reliqua fuere secundissima.

Vivi pervenimus ad Annam principem Verianam (1). Quid ego tibi de hujus mulieris comitate, benignitate, liberalitate memorem? Scio rhetorum amplificationes suspectas haberi solere, præsertim iis qui ejus artificii rudes non sunt. At hic me nihil allevare, imò re vinci artem nostram, mihi credas velim. Nihil unquam produxit rerum natura, aut pudentius, aut prudentius, aut candidius, aut benignius. Hæc scribebam in patriam concessurus, deindè istic continuò adero, atque adamatam Lutetiam repetam, et ipsas litteras fortassè præcurram. Cæterùm de nostro convictu nihil certi scribere licet. Tum consilium ex tempore capietur. Hoc unum tibi persuade, neminem vivere qui te magis ex animo amet, quàm tuus Erasmus. Cura, mi Gulielmè, ut quàm optimè valeas. Ex arce Tornenhensi, 3 febr. anno 1497.

Paul Manuce à Camille Paleotti, à Bologne.

DE oleis quid expectas? Eadem quæ antea: aspectu pulchræ, sapore perquàm gratæ: pleniores etiam quàm anno superiore, cœline munere, an hoc delectu, visæ sunt. Agerem gratias, si tua ferret humanitas, et nisi jam inter nos, pro veteri amicitia ac familiaritate, putidum id esse videretur. Tuam quidem industriam, quòd eas tuâ

(1) Anne Bersale, ou plutôt de Borselle, fille du maréchal de France de ce nom, et de Charlotte de Bourbon-Montpensier, avoit épousé le seigneur de Beuvres, fils naturel de Philippe-le-Bon, duc de Bourgogne. Elle faisoit sa résidence ordinaire dans sa terre de Tournenhens. C'est là qu'Erasme la vit pour la première fois. Elle lui fit une pension de cent florins.

manu severis atque alueris, nec admirari satis, nec laudare possum: quòd verò istius industriæ fructum ad amicos etiam absentes pervenire vis, et quòd in eo me numero locas, utrîque nostrûm æquè gratulor. Nam de nomine, oleæ ne poma sint, in quo tu mihi, susceptâ grammatici personâ, quasi litem intendis, ipso a te munere delinitus non contendam. Quanquàm si nuces et amygdalæ, quæ ipsæ quoque oleum efficiunt, poma sint, quod, opinor, non negabis, cur oleas inter poma referri non liceat haud equidem intelligo. Sin tu, de earum nobilitate laborans, ut ferè suum opus amat omnis artifex, fruges appellari mavis, indulgebo non invitus, ne te mihi, tanquàm tuis muneribus detrahenti, subiratam liberalitatis tuæ cum aliquo fortassè meo damno pœniteat. Vale, v, non. jan. M. D. LXXIII.

Tanneguy-Lefèvre à M. Chevreau.

DECREVI, ô noster, gallinarium posthàc instituere; ità mihi istæ meæ populares gallinæ placent, quas ad me nuper misisti. Non Catonem illum censorium, non Varronem, non Columellam denique, ad hanc villaticæ pastionis partem quod attinet, mecum esse comparandos existimabis. Nil equidem vidi nobilius: neque fieri potuisse arbitror, ut aut Jubæ uxor, aut Sôphonisba Syphacis, pulchriores unquàm habuerint gallinas. Quippè istas Africani generis esse facilè adducor ut credam. Nam et ebeno nigriores sunt, et capite cristato superbæ, et rostro amplo insignes, et Africanâ magnificentiâ per cortem obambulant; queis signis originem suam satis probare videntur. At ille, ille gallus, quem iis maritum esse voluisti, animal est planè Martium, Hercules inter populares suos, magnus Hippalectryon Aristophanis, Bucephalus inter mannos; pugnax, vigilax, mordax,

trahax, et tamen, quod vix satis credibile, nondum adultus est :

Quid, cum illum matura virum jam fecerit ætas?

Denique, ut paucis multa complectar, nihil nisi Laodunense spirat. Expectas scilicet postea, a me ut tibi agantur gratiæ: Non fiet, ô noster; verum, id quod multò tutè ipse fatebere majus, tibi aliquid ex penitissimâ historiâ repetitum dabo. Hoc itaque mihi credas, licet: legisse me apud scriptorem anonymum, sed venerandæ antiquitatis, Publium Avienum Gallum, primipili centurionem, postquam in urbem vestram deducta a Julio Cæsare colonia fuit (per illum enim haud dubiè *Juliodunenses* estis) cum in Africam trajecisset, ubi multa strenuè pro partibus Julianis gessit, ex eâ redeuntem ad præfecturam suam biennio post, vel si mavis, triennio, istud gallinarum genus tam bonæ notæ secum advehi curasse: quod nemini cognitum scio, nisi qui eundem planè librum habuerit, quem nos habemus: sed posthac, si quid mihi fidei sit, credetur, et in annales urbis vestræ referetur. Et isthæc quidem ad gloriam tam nobiliū bestiarum dicta sunt, ô noster!

Quod jam a me addetur, id verò ad agri Laodunensis utilitatem pertinebit maximè: et consilium habeo, si quod aliud, civibus tuis salutare: ut ad eum scilicet, cujus patrocinio in aulâ utitur civitas vestra, hujusmodi munus mittatur, quod Diis regni præsidibus offeratur: ii vos fortassè tandem respicerent. Jam enim diù est, ut audire videor, cum intra tenaces τοῦ μυσίου κατὰ πύλον τρελεσέον (1) canculos miserè et inextricabiliter hæretis. Fac modò periculum: nihil certè in illo consilio est, quod metui debeat. Sique illa res (si fortè dico, neque enim ullum Deum habemus, quem tibi vadem dare pos-

(1) *Milles detestati portorii.*

simus) benè vobis et ex animo cesserit, tu mox pro tuâ fide et studio auctorem consilii in publico urbis conventu laudabis: scis quid indè eventurum sit: scio ego quoque et jam nunc gaudeo. Sed satis nugarum est, satis. Vale multùm.

Le même au Marquis de Chandenier.

ITA me amet Deus! Vir illustrissime, nil usque adhuc magis commodum expertus videor, quàm ejusmodi amicos parare, qualem te mihi bona sors obtulit. Nam, ut nunc quidem de amplissimo honore nil dicam, quem ex tuâ in me benevolentia natum soleo prædicare, quis unquam amicum nactus est, undè tam multiplex fructus, tamque varia beneficiorum seges proveniret? Modò enim focum nostrum elegantissimâ suppellectile instruis, modò politissimis et satrape dignis pugillaribus memoriam adjuvas, modò aliud, modò aliud: Nuper autem et culinam, ô rem scitam et bellam! numerosâ cuniculorum lepusculorumque accessione (sed hæ nugæ sunt), perdicum etiam, ac coturnicum nimbo impluisti. Nulla igitur, quod et *posterî credent*, tugurioli nostri pars est, in quâ tui in me amoris signa non appareant. *O Sancta Saturitas*, quàm miserè nunc talis amicitiaẽ honorem mihi invideret nobilissimus ille tuus antistes, ille Heluonum rex Apicius, si viveret!

At tu, illustrissime Marchio, gratiarum a me actionem nullam expecta; sed in earum loco tamen dicam tibi boni aliquid. Benè enim dicere, si meditati locus detur, fortassè non nequeam; at boni aliquid *facere* beatiorum est quàm nos sumus. Verùm audi, nisi molestum; decrevi, vir illustrissime, si tamen possim, tibi in posterum persuadere, esse me locupletiorum multò quàm vulgò putent; id quod in hunc diem gra-



vissimis de causis celatum te volueram. Ei autem rei, quæ, ut suspicari quis possit, tibi primâ fronte non satis probabilis videbitur, si fidem minùs fecero, aliò me convertam, tibi que, *quod inter nos dicendum siet*, ingenuè fatebor (id quidam unà mecum affirmabunt), esse me gloriosiusculum paulò, neque semper dona libenter admittere.

Sin eâ viâ efficere haud potero (et, ut ego te novi, non perficiam), quominùs posthàc leporarium et aviarium tuum meâ causâ exhaustas, tùm ego te porro magnoperè orabo, uti memineris decretum mihi esse ædes tuas brevì petere, ibique dies sanè complusculos commorari, ut a te probè fartus et bonâ fide saginatus redeam. Quare, si nihil aliud impetro, at certè illis Medææ popularibus, Phasianis dico, qui Colchici generis sunt, misellis, inquam, Phasianis, quibus in postremâ tuâ epistolâ malam rem minitari videbaris, intereâ parcito. Vale plurimùm, vir illustrissime. Salmuriæ, an. M.DC.LVII. kal. novemb.

Coffin à un ami.

TEMPERARE mihi non possum quin totus penè adhuc illius Indicæ volucris adipe madidus ac nitens, grates tibi de integro referam, ejusque non jam præceptam oculis, ut nuper, sed exploratam gustu bonitatem attester. O delicatam escam, dignamque quæ vel regales mensas oneraret! O saporem nunc quoque benè memori palato suavissimè blandientem! Quàm dispar hæc avis ab reliquis id genus pullastris fuit! Harum nervosa caro gutturi plerùmque responsat, nec nisi acri dentium tritu subigitur. Illa mollis et tenera, vix expectatâ malarum impressione, in ore ultrò liquescebat. Facessat jam ille tam ab Horatio celebratus Ionicus attagen. Illum ego

præ hæc alite Normanicâ fatuum juraverim. Ut paucis omnia complectar, scire te velim toto prandio, quod satis diû productum est, unum fuisse inter litteratos homines de ave nostrâ sermonem. Alius prodigiosam illius molem mirabundus extollebat, neque avem esse hanc, sed ovem potiùs affirmabat: alius nidorem eximium totis naribus avidè trahens, exclamabat: O suavem halitum! Alius, fretus certiori palati iudicio, nullum se aiebat unquàm lautius ferculum gustâsse, idque omnes re multò efficacius quàm verbis comprobabant. En laudes omnium consensu in tuum munus congestas, quas non remittere tibi, hominis esse duxi vel inertis, vel ingrati. Fruere illâ qualicunque tam exquisiti obsonii usurâ, et quoniàm illius succo tua te liberalitas fraudavit, saltem regustatâ beneficii tui voluptate pascere: Vale.

Balzac au Cardinal de Richelieu.

Quòd ad te scribam rariùs non pecco, Princeps Eminentissime; peccare mihi viderer, si, gravissimâ rerum procuratione districtum, inani verborum strepitu obtunderem. Ideò contineo ego me, et, cùm semper de te cogitem, vota que, uti debeo, pro salute nuncupem tuâ, ea plerùmque tacitâ quâdam et verecundâ religione concipio. Nunc verò cùm universum, quâ patet, christianum orbem laudum tuarum theatrum effeceris, iique imprimis de quibus benè meritus es, tuam illarum rerum gestarum gloriam et magnitudinem tibi coràm gratulatum eant, vix viderer ingrati animi notam posse vitare, si saltem causam apud te non agerem absentiae meæ, nec significarem tibi quàm non libenti animo pulcherri-  
mo spectaculo caream.

Hic me igitur, Eminentissime Princeps, domestica

quædam negotia morantur, nemini alioquâ in hac communi bonorum omnium lætitiâ, vel officio, vel cupiditate concedentem. Cùmque adeò totus essem in profec-tione adornandâ, e latebris suis prodière exercitatæ mili-tiæ veteratores, qui parentem litibus implicarent, neque paterentur innocentissimum virum quietâ frui senectute. Laboranti itaque præstò esse, et sustinere ætatem jam inclinatam, et tueri injuriæ opportunum, meæ esse cre-didi pietatis. Quæ nisi erga sanctum mihi nomen officia suo jure ipsa natura postularet, diù est quò me, alieno etiam anni tempore, nec valetudine satis firmâ, longæ ac difficili viæ commissem.

Quid enim optimarum partium civi, et tui studiosis-simo, possit esse jucundius, quàm in mediâ gloriæ tuæ luce versari, inque tuo augustissimo vultu acquiescere, qui præcipuè meruisti ne sæculum hoc antiquioribus invideret; qui a Rege, post hominum memoriam maxi-mo, in societatem consiliorum assumptus, intra volven-tem annum res gessisti in omne ævum omnium scripto-rum ingenia fatigaturas; qui in arte militari, non alienis præceptis, sed tuis imperiis eruditus, indè cœpisti, quò pervenire difficile est; per quem denique florentissima quondam Gallia, quæ omnem veteris dignitatis succum atque colorem amiserat, brevissimo tempore ornamenta sua omnia splendoremque pristinum recuperabit.

Neque verò id mihi novum atque insolens de te tam altè, tamque magnificè sentire ac loqui: id palàm crebris neque obscuris sermonibus usurpabam, cùm tui unâ et reipublicæ hostes locum tibi debitum occuparent, eam-que virtutem, quam nunc colit humanum genus consen-tientibus omnium votis, non ea quæ debebat fortuna sequeretur. Cùm ergò mihi qualis quantusque es jam a decennio, velut per nubem apparueris, atque hæc om-nia multò antequàm fierent, quasi ex aliquâ speculâ, futura præviderim, ardeo cupiditate incredibili ut de

toto meæ divinationis eventu certior fiam, eamque temporum felicitatem meis usurpem oculis, quam ante aliquot annos animo meo concipiebam: quâ ego voluptate fruiturum me spero, ut primum a paternis negotiis animus liber erit, quæ longè a studiis meis abhorrentia occupatum me hactenùs et exercitatum habuerunt.

Audeant interim confidentissimi mortalium profanâ temeritate foribus sacris obstrepere, et insidentur temporî jam non tuo, sed propriæ rei publicæ possessioni. Aliter mihi, Eminentissime Princeps, officii mei ratio constabit, et modestam hanc, quam optare fas est, voluptatem intra terminos non molestæ tibi contemplationis coercebo. Absit ut occupato negotium facessam otiosus. Nec proptereâ tamen me tibi penitus excidisse, omnemque meâ memoriam te deposuisse unquàm putabo. Tua nimirum singularis sapientia divinam imitatur, quæ non sic volvendis cœlestibus illis orbibus, cæterisque nobilioribus naturæ partibus intenta est, ut non sponte etiam inferiora respiciat, et de minimarum animantium salute sollicita sit; quæque nullam rem, neque tam magnam, ut sibi difficilis, neque tam parvam putat, ut parùm se digna videatur. Quare mihi persuasum est, tibi haud grave futurum, vel in summis occupationibus tuis, me meaque primæ admissionis amicis, Fiatio et Buthillerio, commendare, atque unico nutu tuo timidiori homini gratiam facere dinturnæ petitionis. Et profectò si is non sum cujus absentis ratio haberi debeat, tu is es tamen, Eminentissime Princeps, cui ubique et ab omnibus in posterum gratiæ habeantur. Vale.

Tanneguy-Lefèvre à un Ami qui venoit de perdre son père.

CHEVRÆUS noster, Guiralte clarissime, ad me. modò scripsit, parentem tuum, virum optimum et priscæ virtutis cultorem, nuper explēsse mortalitatem; te verò incredibili luctu perculsum amicorum exspectare solatia. Gratum est quòd me mei officii admonuit, qui sciat quantoperè te amem; sed ego in re tàm atroci tàmque inopinatâ quid afferre possim, undè tibi animus firmior fiat et erectior? Nam et ipse per te longo usu didicisti (efficax autem in his rebus usus est) quid a naturâ, quid a fortunâ in hoc calamitatum genere metuendum sit.

Prætereà, sæpè in aliis casibus fortis fuisti; sæpè solatiis tuis parentum animos, uxorum, affinium, amicorum deniquè, recreâsti, refecisti, et ad vitæ, quam sibi ingratam deplorabant, amorem revocâsti. Non dubito autem quin quoties tale aliquid acciderat, toties et tibi ipsi dixeris: Hæc eadem me manent; *seriùs, ocyùs, sors exitura*. Habes prætereà circa te collegas, viros clarissimos, habes totum amicorum agmen, quorum aspectus et colloquia dolorem tàm contumacem frangent, teque tibi restituent. Nam veterum quidem præclarè dicta in tàm latè patenti argumento si commemorem, non tàm equidem tibi consolationem scribere, quàm injuriam facere videar, qui isthæc et legeris sæpiùs, et sis otiosè meditatus.

Nihil igitur habeo, vir clarissime, quod afferre ad istum tuum dolorem leniendum possim, præter lacrymas, quæ tamen et ipsæ vim consolandi interdum habent, ubi veræ creduntur. Tales autem tibi videri nostras æquum est. Ut enim jam pridem est cùm confido me abs te amari (nam ne dubitem, facit singularis ille candor, qui in te præter multos est), sic tibi hoc, nō

mihi iniquior es, persuadere debes, te a me et amari et coli: sicque istâ tuâ calamitate tangi me et permoveri, ut acrius non possim. Vale plurimum, vir clarissime, semperque facito ut memineris, nil eo verius esse, quod olim ab Euripide dictum fuit, *qui necessitati se morigeros præbent, eos unos sapientes esse*; et qui aliter faciat, eum (Menandri verba sunt) adversus Deum bellum gerere. Salmurii.

Le même au Président de Lamoignon.

CUM primum ad te scribere ausus sum, vir illustrissime, et hoc, immeritus licet, mihi sumpsi, ut dubias et fluctuantes amici mei res tibi commendarem, jam tum de gratiarum actione cogitandum mihi esse arbitratus sum, ut, quemadmodum singulari tuâ humanitate dignum erat, id tam otiosè fieret et accuratè, quàm justa officii ratio postulabat. Sed reipsa expertus intelligo, quantò tibi pronius sit et facilius benefacere, quàm mihi beneficium tuum verbis æquare. Nam unum quiddam orabam; tu et illud, vir illustrissime, et alterum etiam, quod longè amplius est, concessisti. Quippè angustiis rei familiaris auctoritate tuâ subvenisti: tum, quod supra vota mea esse debuerat, mihi in amicorum tuorum numero locum esse, palàm et multis audientibus, cum e curiâ exires, professus es, meque eo nomine cohonestasti, quo nullum mihi speciosius illustriusque esse possit. Quid enim splendidius quàm a laudato viro, et ab eo laudari, qui, ad primariam imperii nostri dignitatem evectus, major etiam repertus est? Unicâ igitur voce mihi famam, mihi honorem gloriamque tribuis, quo munere et priorem liberalitatem superasti, et id præmium ingenii mei litterarumque mediocritati, concessisti, quod vel florentissima scriptorum ingenia vix satùs mereantur. Quamob-

rem, vir illustrissime, magnitudine beneficii tui, quod ex honorificentissimo iudicio geminatum est, vides ipse, vel tacente me, quò redactus sim : infans pudor facit ut cogitata proloqui non possim ; nam et quidquid dicerem minus esset. Sed , mî patrone, quod verbis haud solvetur, totum id fidelis animi grati memoria præstabit ; et quæ non agentur gratiæ, illæ tibi, quoâd vivam, habebuntur, integræque apud me manebunt. Faciat modò Deus ille, qui singularem benignitatem tuam mihi adjutricem excitavit, ut me et munere dignum et splendidissimo iudicio, quod de me ipse tulisti, præstare possim. Vale diù, vir illustrissime.

---

---

## DIALOGUES.

---

Nauclerus, Nautæ, Jonas.

NAUCLERUS.

**P**ROH Jupiter! quanta sævit tempestas, quanti undarum fluctus nostram navim undique verberant! Dicas Neptunum et cælum, omnesque adeò Deos in nostram conjurasse perniciem. Ne sævi tantoperè, aquarum præpotens Neptune; ne eos perde qui se tuæ fidei mandaverunt. Tu quoque, ò Æole, cui potestatem in ventos dedit Jupiter, cohibe tam effrænatum eorum impetum.

NAUTÆ.

Dii immortales! quid habetis in animo? hūccine venisse nos, ut tam miserè periremus! Parcite, quæsumus, parcite: nos vobis sacra faciemus; tibi, Neptune, taurum, vobis agnam, Tempestates, mactaturi: tantum liceat hinc salvis evadere.

NAUCLERUS.

Ledæ proles, Castor et Pollux! amica nautis sidera! obsecro vestram fidem, reddite nobis mare tranquillum, reddite faustam cœli serenitatem.

NAUTÆ.

Nihil agimus, video; tam surdi sunt Dii, quàm est ipsum mare.



NAUCLERUS.

Quid superest?

NAUTÆ.

Ut jacturam faciamus.

NAUCLERUS.

Durum.

NAUTÆ.

Sed necessarium. Extremo enim malo extremum adhibendum est remedium; atque utinam vel sic evadere liceat! Age, dejiciendas curemus has merces. Præstat rem perdere, nonnihil spei retinentes, quàm cum re certum exitium expectare. Vobis, ò cœli marisque potentes Dii, hâc nostrâ vobis miserâ satisfiat: quid mortem insuper intentatis? Hei mihi! magis magisque strident venti, ingravescit tempestas, irritantur Superi, nedùm nostris votis ac precibus acquiescant. Quò jam, quò me vertam?..... At erat hîc peregrinus nescio quis. Quid nunc agit?

NAUCLERUS.

Sertit ad infimum navis latus.

NAUTÆ.

O supinam securitatem!... Heus! heus! hospes, quem tandem dormiendi modum facies? Potes in his rerum angustiis indulgere somno? Quin tu surgis, et tuum in hoc temporis articulo Deum invocas, si quis fortè Superum existat qui malum a nobis hoc avertat, et præsens ferat auxilium!

NAUCLERUS.

Frustrâ desudamus: causa tanti mali perscrutanda est. Oportet aliquem inter nos adesse, qui se nefario aliquo scelere obstrinxerit, propter quem tantoperè irascantur Dii. Sortiendum est quis sit in causâ.

NAUTÆ.

Placet : ducantur sortes. Euge ! sors istum peregrinum designat..... Vides te, hospes, accusari. Dic, sodes, undè tantum in nos malum ortum sit, quod vitæ genus sequaris, undè, et quò eas, cujas sis, et quâ gente natus.

JONAS.

Jamjam nullum superest effugium : teneor manifestò. O ineluctabilem Dei vim !..... Ego sum Hebræus, Jdvæ optimi maximi cultor, qui et mare et terram fabricatus est. Is me Niniven ire jusserat, ut eum populum, otio et luxu diffluentem ac perditum, meâ admonitione ad meliorem frugem et saniozem disciplinam deducerem. Cujus ego muneris tristitiam effugiens, statueram Tarsum in Ciliciam me conferre, et ejus conspectum fallere ejus oculis omnia subjecta sunt.

NAUTÆ.

Periimus funditus. Inscitè prorsus, homo, et perperam abs te factum. Sed postquàm factum quod est infectum fieri nequit, quid in te nunc censes statuendum, ut placatiore mari utamur, quod vehementius semper agitari vides ?

JONAS.

Vos verò me in mare detrudatis, si id sedatum vultis. Nam certò scio ego, meâ unius causâ, vos hâc tam violentâ tempestate conflictari.

NAUTÆ.

Avertant Superi, ut tuâ morte salutis nostræ consulamus ! Non faciemus ; agite, viri fortes, incumbamus remis, nitamur ad terram appellere : eia ! adhibete summas vires : eia ! rumpamus hos fluctuum cumulos..... O rem miseram ! crescit assidue malum, neque ulla datur attingendæ terræ copia.

Leç. lat. mod.

22

JONAS.

Frustrâ oblectamini invito Deo.

NAUTÆ.

Quid ergò est? Tene nos in mare?

JONAS.

Nisi mavultis mecum unâ perire:

NAUTÆ.

O desperatissimum perfugium! Sed tamen satius est te solum quàm nos tecum et propter te interire. Faciendum est, socii; nulla alia ad evadendum via est, video; efferatur mare, rumpitur navis, mors nobis versatur ob oculos. Agite, piacularem hostiam demergamus. Obsecramus te, Jovâ, ne pereamus ob hujus catharmatis mortem, neve pœnas sanguinis ejus a nobis expetas. Vides nos necessitate impulsos facere, et tu omnia tuo arbitratu moderaris. — Jaciatur..... O rem admirabilem! videtis ut subito sedata sit, eo dejecto, tempestas! Videtis maresic tranquillum, ut nunquàm tranquillius! Agnosco, agnosco ego immensam Jovæ potestatem: is nimirum Deus est; cæteri nequicquàm precibus interpellantur. Unî, unî debetur gratia, cui adeò sacra vota que nuncupemus. Sébastien CASTELLION, *Dialogues sacrés*.

L'Espérance, la Raison.

SPES.

Multâ spero.

RATIO.

Multâ in spe multa est vanitas multusque fallendi datus fortunæ aditus.

SPES.

Multâ sperandi locus est.

RATIO.

Spem multiplicem multa destitunt.

SPES.

Valetudinem bonam spero.

RATIO.

Mortalitatis oblivionem.

SPES.

Spero longam vitam.

RATIO.

Diuturnum carcerem, ubi multa ferae, multa vides;  
quæ nolis.

SPES.

Membra vivacia.

RATIO.

Vincula tenacia, grata tamen, quæ solvi metuis;

SPES.

Formam corporis elegantem.

RATIO.

Voluptatum stimulos.

SPES.

Annorum prosperos exitus.

RATIO.

Pudendi materiam dolendique.

SPES.

Peccandi licentiam.

RATIO.

Infelix gaudium, diuturnam poenitentiam.

SPES.

Ultionis occasionem.

RATIO.

Aditum sævitæ.

SPES.

Agile corpus ac validum.

RATIO.

Mancipium rebelle et contumax.

SPES.

Divitias multas.

RATIO.

Gravem sarcinam ex lappis tribulisque.

SPES.

E diversis terrarum tractibus venturas naves.

RATIO.

Latè dispersam sortem intra monstra maris ac scopulos,  
agitata fluctibus, pulsam ventis, tractam funibus.

SPES.

Lucrum de conceptis mercibus.

RATIO.

Escam, quæ te perpetuâ sollicitudine capiat, lucroque  
unico in multa credulum damna præcipitet.

SPES.

Honestas filiae nuptias.

RATIO.

Nulla fermè res tam crebrò fallit et tam graviter.

SPES.

Magnam potentiam.

RATIO.

Invidiosam miseriam, opulentam inopiam, pavidam  
superbiam:

SPES.

Regnum et imperium.

RATIO.

Culmen præceps ac lubricum, fuscum stellanti sub

## DIALOGUES.

341

diademate supercilium, cor anxium, vitam infelicem,

SPES.

Honores fori.

RATIO.

Pulverem ac strepitum.

SPES.

Conjugium ac sobolem.

RATIO.

Litigium et curas.

SPES.

Mihi militiam, et uxorem nato.

RATIO.

Tibi laborem, ac dilecto pœnam.

SPES.

Ingenium, linguam, litterasque.

RATIO.

Incudem, malleum et massam, quibus tibi atque aliis  
somnum frangas.

SPES.

Laudationem funeri.

RATIO.

Philomelam surdo.

SPES.

Auream pyramidem.

RATIO.

Domum pictam cæco.

SPES.

Gloriam post fata.

RATIO.

Leyes auras post naufragium.

SPES.

Nomen apud posteros.

RATIO.

Testimonium ab ignotis.

SPES.

Hæredem mihi.

RATIO.

Patrimonio amicum tuo, et, tibi, ne redeas.

PETRARCA, *De Remediis utriusque Fortune*,

l. I, dial. CXXI.

La Vertu, Mercure.

MERCURIUS.

Virtus dea per epistolas oravit modò ut ad se me conferrem. Eo ut perconter quidnam de me velit, illicò ad Jovem rediturus.

VIRTUS.

Salve, Mercuri, ago tibi gratias, quandoquidem tua in me pietas atque benignitas efficit, ut non penitus despecta ab omni cœtu Deorum sim.

MERCURIUS.

Expecto quid narres : tu modò age paucis : nam edixit ut confestim ad se redirem Jupiter.

VIRTUS.

Etiamne tecum nobis non licebit nostras ærumnas exponere? Quos igitur habebo vindicēs injuriarum, si non modò apud ipsum maximum Jovem, verum et apud te quem semper in fratris locum habui, colui, observavi, condolendi facultas negatur? O me miseram! ad quos confugiam? undè auxilium petam? Me quidem, cum ita despiciar, malo esse truncus nescio quis, quàm dea.

MERCURIUS.

Tandem effare, dùm præbeo operam.

VIRTUS.

Viden' quàm sim nuda et foeda? Hoc ità ut sim, efficit Fortunæ deæ impietas atque injuria. Aderam sanè ornata apud Elysios Campos, inter veteres illos amicos, Platonem scilicet, Socratem, Demosthenem, Ciceronem, Archimedem, Polycletem, Praxitelem, et ejusmodi viros doctos, qui me, dùm vitam agebant, piissimè atque religiosissimè coluère. Intereà loci, cùm jam non pauci salutatum ad nos advolàssent, e vestigio Fortuna dea insolens, audax, temulenta, procax, maximâ armatorum turbâ consepta atque stipata, properans ad nos, jactabunda: En, inquit, plebeia; tune majoribus Diis adventantibus non ultrò cedis? — Dolui injuriam nobis immeritis eo pacto fieri; ac nonnihil irâ concitata, inquam: neque tu, maxima dea, his verbis me plebeiam efficies, neque, si majoribus cedendum est, tibi turpiter cedendum censeo.

Illa verò illicò in convicium sese effert adversum me. Prætereo hîc quas contumelias in me primùm, dùm hæc inter nos geruntur, effuderit: idcirco Plato philosophus contrà cœpit nonnulla de Deorum officiis disputare. Illa excandescens: Apagete hinc, verbosi, inquit; non enim decet servos Deorum causam suscipere. Cœperat et Cicero orator plura velle suadere; at ex turbâ armatorum erupit, Mercuri, Antonius præpotens, latera illa sua gladiatoria ostendens, gravissimumque pugnum in os Ciceronis intentavit: hinc cæteri mei amici perculsi metu, fugâ sibi properè consuluère: neque enim Polycletes peniculò, aut Phidias scalpro, aut Archimedes radio, aut cæteri inermes adversus audacissimos armatos, eosque prædis atque homicidiis suetos bello ad sese tuendos valebant. Ergò me infelicissimam, ab ipsis Diis omnibus qui tùm aderant atque hominibus desertam, pugnis et calcibus



totam confregère, vestes meas discerpère; in lutum prostratam reliquère, ac demùm ovantes abierunt.

Ego verò ità malè mulctata, cùm primùm licuit, hùc conscendi, ut Jovem optimum maximum his de rebus facerem certiorè; jam quidem mihi ut intromittat exspectanti mensis elapsus est; dùmque, id ut impetrem, omnes Deos exeuntes atque redeuntes precor, novas semper excusationes afferunt: aut enim Deos aiunt vacare, ut in tempore cucurbitæ florescant; aut curare ut papilionibus alæ perpulchrè varientur. Quid? igiturne verò semper aliquid habebunt negotii, quo nos exclusas teneant, ac floccipendant? tùm etiam et villicus dudùm suscepit curam, ne cucurbitæ siti pereant. Nos tamen neque Diis, neque hominibus cordi sumus. Has ob res te iterùm atque iterùm precor obtestorque, Mercuri, qui semper apud Deos ipsos interpretis exstitisti, et ut causam hanc meam justissimam atque piissimam suscipias. Ad te confugio, te supplex oro, in te omnis mea sita est spes atque exspectatio. Da, quæso, operam, ne, dùm a vobis excludor, ipsis quoque mortalibus sim ludibrio. Nam erit quidem dedecus Deorum ordini, ubi homunculi me, tametsi infirmam deam, floccipendant.

#### MERCURIUS.

Audivi; doleo: verùm, pro vetere nostrâ amicitia, unum admoneo, duram nimis atque difficilem causam te adversus Fortunam suscepisse. Nam et Jupiter ipse, ut cæteros omittam Deos, cùm et ob accepta beneficia nimium Fortunæ debere se sentiat, illius vires atque potentiam veretur. Ea enim ad cælum Diis ascensum præstitit, atque ubi velit, valens suâ armatorum manu ejiciet. Quâ de re, si sapis, inter plebeios Deos ignota, quoad Fortunæ odium extinctum sit, latebis.

VIRTUS.

Æternùm ergo latitandum est; proinde ego et nuda et despecta abeo (1).

Charon, une Ombre.

CHARON:

Tu cujas et quis sis, eloquere.

UMBRA.

Men' compellas?

CHARON:

Imò teipsum.

UMBRA:

Hetruria mihi patria fuit, nec quicquam curæ aliud, quàm ut nunquàm dolerem, nunquàm irascerer. Ut quis uxorem ducebat, ridebam; efferebat quis filium? ridebam: insanibat amore alius? ridebam. Ridebam ubi quis nimis sumptuosè se vestiret, nimis magnificè ædificaret, ubi prædia nimis ampla emeret. Ridebam demùm omnia. Semel autem in omni vitâ me flere memini, quòd, matre fato functâ, ubi illam sepelirem, terra mihi emenda in sancto fuit; tùm nimis graviter hominum conditionem flevi, ac sum de ipsâ religione conquestus. Sed tamen haud multò pòst dolorem hunc compressi, atque ad naturam redii, meque ipsum ridere cœpi, qui non et id quoque risissem.

CHARON.

Sub hujus risu latet nonnihil sapientiæ.

(1) Ce dialogue se trouve sans nom d'auteur, à la fin de l'édition de Lucien, publiée en 1619, par Benoit.

UMBRA,

Quid tute tecum mussitas?

CHARON.

Rem mihi gratissimam feceris, si vitæ tuæ genus ordine explicueris.

UMBRA.

Quod ipsum te et me vehementer juvat. Quid enim juvare magis aut potest aut debet, quàm ubi quis, suæ vitæ cursum repetens, nihil invenit, cujus pœnitere jure debeat? Principio, cùm viderem rempublicam nostram ab improbis ac seditiosis civibus administrari, publicis abstinui muneribus, meque ad privatam vitam contuli, nulli rei præterquàm agro colendo intentus : siquidem mercaturam exercere nolui, ne aut fœnerandum, aut alea fortunæ continuè timenda. Nec servilem quæstum probavi aliquem; in suburbano mihi vita fuit. Rarò ad urbem accedebam, atque eò cùm venissem, decretum erat mihi, nemini molestum esse, nocere nulli, nihilque molesti ex aliorum dictis factisque capere. Ridens ingrediebar urbem, ridens exibam : ubi quem amicum notumve conspicabar, salutabam illum, curabamque congressus nostri ut essent quàm jucundissimi. Si quam de re publicâ facere mentionem cœpisset, statim eum valere jubebam. Tempa castus mane adibam; neque cum sacerdotibus arctiori initâ familiaritate, ubi rem divinam fecissent, exhibam illicò. Doctos quosdam amore præcipuo colebam, qui non tam acuto essent ingenio, quàm recto judicio, quos disputantes libens audiebam. Si quis e notis aut familiaribus, quos habere haudquaquàm multos volui, adversi quid accepisset, solabar illum, meique ut similis esset enixè rogabam; nam et Fortunæ ludos ridendos esse, et naturæ necessitatem nullo pacto dolendam. His actis, referebam me in suburbanum, ubi partim legendo, partim deambulando, aut aliquid in agello

agendo, dies conficiebam : noctu, nisi quantum quieti dandum esset, cæterum tempus lucubrando transigebam. Exibam interdum in quadrivia; atque ubi festi essent dies, ibi villicos de prognosticis temporum, de naturâ soli, de insitione, de seminibus, de irrigatione, deque aliis rei rusticæ ministeriis disserentes audiebam, fierique studebam eorum sermone prudentior. Et quoniam cognoscerem res hominum tam diversis ac variis periculis esse expositas, si quid vel in agro, vel in domo adversi accidisset, ubi conditionem risissem humanam, curabam arte id industriâque corrigere. A litibus verò semper abhorruï et forò; nec convivia non fugiebam; quippè tenuissimus mihi victus erat, non ut naturam defraudarem, sed ne multum indigerem medico : ac ne te multis morer, ita me semper gessi, ut qui non humanis me rebus, sed illas mihi subjectas vellem.

CHARON.

Igitur, qui omnia ridebas, de morte nunquam fuisti sollicitus?

UMBRA.

Semel in omni vitâ de morte cogitavi, licet eam quotidie ante oculos haberem, reputantique et quid illa vellet sibi, et quod ego adversus eam possem comparare præsidium, unum tandem hoc in animo mihi sedit, ut honestè tranquillèque ætatem ducendo viverem.

CHARON.

Quod adversus paupertatem invenisti remedium?

UMBRA.

Ut judicarem pauperem esse nequaquam posse, qui secundum naturam viveret.

CHARON.

Quod adversus honores atque ambitionem?

UMBRA:

Quòd gravissimi casus nonnisi ex alto essent loco.

CHARON.

Quod adversùs falsos rumores?

UMBRA:

Rectam conscientiam.

CHARON:

Unquàm te movit superstitio?

UMBRA:

Deum ubi perspexissem, hominum commentis aures occludebam.

CHARON.

Quo modo cum invidiâ?

UMBRA:

Qui doluerim nunquàm, riderem omnia, quo pacto inviderem?

CHARON.

Ecquandòne iratus fuisti?

UMBRA:

Seinel in omni vitâ: neque meâ causâ, sed quòd viderem insontem hominem injustè plecti; maledixi civibus, qui de iniquo iudicio non provocarent: quos ubi sensi mussitare, ac potentiorum vim reformidare, statim me repressi, atque ad risum redii.

CHARON.

Liberosne suscepisti?

UMBRA:

Quos statim extuli, et quòd benè actum cum illis iudicarem, Deo gratias egi.

CHARON.

Igitur et uxorem duxisti.

UMBRA:

Non tam meâ quàm parentum gratiâ : ea, cùm triennium mecum exegisset, morte diem obiit, ex quo cælebs vixi.

CHARON:

Cur non alteram duxisti?

UMBRA:

Quia nōssem temeritatem non semper felicem esse; quod benè in illâ successisset, veritus sum in secundâ periculum facere, meque asserere in libertatem volui.

CHARON.

Quàm sæpè cum illâ litigabas?

UMBRA.

Nunquàm : nam et illa virguncula ac suavis erat, et ego ridere assueveram domi, non minùs quàm foris.

CHARON.

Quid de hominum rebus sentiebas?

UMBRA.

Vanitatem ac stultitiam esse omnia.

CHARON.

Felicem te, qui ista noveris!

UMBRA.

Nec felicem quemquam, nec sapientem dixeris : nulli enim tot affuere unquàm bona, ut non ei plura defuerint : nec quisquam tam sapiens habitus est unquàm, ut non et illi ad veram perfectamque sapientiam defuerit multum. Nam cùm humanæ res imperfectæ sint omnes, quid earum possit esse perfectum? Cùmque nihil sit in eis constans, felix quisnam esse potest, cui momento interdum adversa plurima eveniant?

CHARON.

Non dixi te felicem, hospes; sed felicem, qui ista noveris.

UMBRA.

Non ex honorum cognitione humana existit felicitas, verum ex eorum possessione et usu,

CHARON.

At ego te felicem ex hoc judicaverim, quod, cum intelligeres neminem esse posse felicem, ita tamen ipse vixeris; et sapientem, quod in tanta hominum vanitate atque ignorantia sapientem te non minus videri volueris, quam posse esse judicaveris. Sed quis hic est tam molestus et impudens?

UMBRA.

Noli, quæso, ei irasci: amicissimus hic mihi fuit.

CHARON.

Miror quæ inter duos tam dissimilibus moribus ulla potuerit esse familiaritas.

UMBRA.

Si amici proprium est prodesse amico, hic quam in amicum plura in me contulit. Nam tribulis meus cum esset, et quotidie litigaret cum uxore, primum docuit cavendas esse secundas nuptias: deinde, cum nullâ non in re et mihi et vicinis cæteris esset molestus, patientissimum me reddidit mortalium omnium. An quod majus in amicum conferri ab amico beneficium potest, quam ut rectè ab illo instituat? Jure igitur hunc amavi, et mihi amicum esse duxi.

CHARON.

Ex omni parte sapientia se prodit tua, qualem nasci huc usque mihi perrarò contigit. Quotus enim ex iis, quos innumerabiles quotidie transveho, non seipsum incusat? non stultitiam, quanquam serò, non queritur suam? Quò magis, hospes optime, tibi gratulor, qui et in agendo, et in perspicendo veritatem sic secutus atque adeptus fueris, ut quam a vulgi ignorantia longissimè

recessisti, tam ad felicitatem proximè accessisse videaris. Sed jam, ut vides, cursum confecimus, et me trajiciendis aliis opus est regredi. I ergò felix, et quo animo vitam traduxisti, mortem etiam feras, per quam es jam immortalitatis viam ingressus.

Jo. JOV. PONTANUS. *Charon, dialogus.*

Mercure, Diogène.

DIOGENES.

Hoc unum etiam dic, obsecro.

MERCURIUS.

Jam unum hoc ad decada excrevit.

DIOGENES.

Sed tu nos et decada unum esse docuisti.

MERCURIUS.

Quo verò in gymnasio?

DIOGENES.

Italica sanè : cui Pythagoram præfecisti ; nam et unum esse plures, et plures unum docebas, nunc actu, nunc potestate.

MERCURIUS.

Mitte argutias, et apud negotiosum atque aliud agentem fac verbis compendium ; jam enim mihi aures attrivisti. Quid tandem est quod a me velis ?

DIOGENES.

At me libens audi, bellissime Mercuri.

MERCURIUS.

Dic aliquandò, alioqui me actutum in pennas dabo.

DIOGENES.

Expone sit ; quid est quòd histrionibus, morionibus,



planis, et id genus insanientibus favet arridetque adeò Jupiter, ut eos propè habere in deliciis, sapientes verò et philosophos non modò aspernari, sed et infensos habere, et inopiâ magnisque calamitatibus persequi videatur?

MERCURIUS.

Mysteria petis à me, Diogenes.

DIOGENES

Sed enim initiatus sum.

MERCURIUS.

Initiatum planè te putabo, si per Canicipitem Anubim dejeraveris, te hæc in arcanis habiturum.

DIOGENES.

Et per Anubim, et per Sirium, et per Procyona, et per Herculem, auctorem nostri dogmatis: per totum denique Cynosarges, quæ mihi sanctissima sunt sacramenta, me nunquàm mysteria editurum in vulgus adjuro.

MERCURIUS.

Nunc itaque brevi rem audi. Philosophorum genus quale putas?

DIOGENES.

Divinum et longè supra hanc mortalitatem.

MERCURIUS.

Falleris, ô bone! Inane est, nugivendum; Diis invisum: nam et de Diis multa mentiuntur, et plerumque pessima sentiunt. Et hos, cum omnem ætatem in figmentis vel Dei, vel naturæ, in rancidis et puerilibus controversiis absumpserint, neque arent, neque serant, neque merces commutent, neque reipublicæ vacent, neque quicquam afferant vitæ commodi, miraris tamen et egere, et pro somniis somnia metere?

DIOGENES.

Rem certè novam aperis, Mercuri. At ego nullos Diis gratiores philosophos putabam, qui de ipsis quotidie magna quædam et nova commentantur.

MERCURIUS.

Rem tenes. Imò verò, nisi ego sæpiùs intercessissem, de ejiciendis ablegandisque philosophis Deorum senatûs-consultum confectum esset. Dicunt enim dii non esse e republicâ, ut philosophi mortale genus infatuent, commodiùsque simplicitatem quàm philosophiam apud homines versaturam.

DIOGENES.

Esto sanè de philosophis, quod dixisti : de histri-  
onibus verò et morionibus et id genus aliis quid offers?

MERCURIUS.

An tu gratiam beneficiis referendam putas?

DIOGENES.

Planè.

MERCURIUS.

Atqui nulli hominum magis debet Jupiter.

DIOGENES.

Quî pote?

MERCURIUS.

Studistin' Jovem statim natum ab Ope matre dissimulatum, suppositumque pro illo lapidem, et objectum Saturno devorandum?

DIOGENES.

Audivi sanè : sed quid tùm?

MERCURIUS

Cùm ejus itaque furtim mandanda esset educatio, sapientes primò viri, mox cæteri suo ordine rogati sunt

Leç. lat. mod.

23

ut Jovis curam susciperent : sed alii alia causati operam suam negavêre ; soli histriones , moriones , plani , et istius generis cæteri , quos Curetas et Corybantes appellamus , et tripudio , et tympanis , et omni sedulitate tùm Jovem tutati , tùm Deos omnes promeriti sunt. Quare hos Jupiter et liberalitate et munificentia præ omnibus maximè prosequitur : quâ in re cùm aliquandò à Momo culparetur , itâ palàm professus est , si grassatorum et sicariorum ope , in tuendâ suâ salute ac dignitate , usus esset , talibus se quoque gratiam relaturum.

Sed hæc tu cave cuiquam efferas. Nam si ista in vulgus prodeant , periculum est , ne gymnasia et diatribæ , in quibus ego color , destituantur , et planè omnes ad histrioniam desciscant.

## DIOGENES.

Ne dubita , Mercuri. His enim quæ modò aperuisti , solus ipse mecum in sinu gaudebo , et posthac philosophos , quos priùs admirabar , vanissimos putabo , et simplici admodùm genere utar , et me quasi humani generis histrionem esse profitebor.

Cælius CALCAGNINUS.

Durerius Pictor , Gryneus , Velius.

## DURENIUS.

Facessite hinc , nam vos nihil emetis , sat scio : et estis mihi impedimento , quominus accedant emptores propius.

## GRYNEUS.

Imò verò , nos volumus emere , modò vel pretium relinquo nostro arbitratui , et tempus ipse præscribas : aut contrà nos tempus , tu pretium.

DURERIUS.

Bella negotiatio ! Mihi nihil est opus tricis hujusmodi.

GRYNEUS.

Cujus est hæc imago, et quanti indicas ?

DURERIUS.

Imago est Scipionis Africani, et indico nummis quadringentis, aut non multò minoris.

GRYNEUS.

Quæso, priusquàm verbo uno eam addicas nobis, examinemus artem picturæ : et hîc Velius est sesquiphysicus, peritissimus humani corporis.

DURERIUS.

Jamdudùm intelligo me a vobis intricari ; sed, interea dùm mercatores nulli adsunt, nugamini quantum libuerit.

GRYNEUS.

Nugas tu vocas peritiam artis tuæ ? Quid faceres alienæ ?

VELIUS.

Primùm omnium, verticem contextisti capillis multis et planis, cùm vertex dicatur quasi vortex, a vertendis capillis, ut in fluviis videmus, cùm aqua se convolvit.

DURERIUS.

Inepte, non cogitas eum esse malè pexum, more illorum temporum ?

VELIUS.

Brechma habet inæqualiter deflexum.

DURERIUS.

Acceperat vulnus miles ad Trebiam, cùm servavit patrem.

GRYNEUS.

Ubinàm id tu legisti ?

DURERIUS.

In Decadibus Titi Livii amissis.

VELIUS.

Tempora sunt nimis tumentia.

DURERIUS.

Cava essent signum dementiæ.

VELIUS.

Occipitium vellem videre.

DURERIUS.

Verte tabulam.

GRYNEUS.

Cur dixit Cato inter cætera oracula : Frons occipitio prior est ?

DURERIUS.

Quàm estis fatui ! Annon in quovis homine priùs cernis frontem quàm occiput ?

GRYNEUS.

Quosdam priùs video aversos quàm adversos.

DURERIUS.

Et ego libenter ut tales emptores et milites.

VELIUS.

Cato sensit præsentiam domini pòtiorē esse ad res curandas, quàm absentiam. Cæterum, cur antias adeò longas ?

DURERIUS.

Loqueris de his caproneis ?

VELIUS.

Etiam.

DURERIUS.

Non habuerat multis mensibus tonsorem ad manum, velut in Hispaniâ.

VELIUS.

Glabellam hanc cur, contra ipsius verbi etymon, hirtam fecisti?

DURERIUS.

Tu ipse volsellis pilos detrahito.

VELIUS.

Et vibrissas exstantes extra nares? Sed tu, quæ tua est versutia? culpam abs te rejecies in tonsorem.

DURERIUS.

Inscie, non animadvertis eos fuisse ætatis illius mores severos, tristes, rusticanos.

VELIUS.

Imperite, non legisti Scipionem hunc ex omnibus sui temporis hominibus excultissimum et politissimum fuisse, et amantem elegantiarum?

DURERIUS.

Expressus est cum exsularet Linterni.

GRYNEUS.

Supercilium hoc est grande et conveniens Latio; cilium habet nimis cavum, et genas depressiores.

DURERIUS.

Ex vigiliis castrensibus.

GRYNEUS.

En non solum pictor es, sed rhetor, valde versatus in translatione criminum.

DURERIUS.

Et vos, quantum intelligo, in criminationibus.

VELIUS.

Malas habet nimium tumentes et buccas istas.

DURERIUS.

Inflat classicum.

GRYNEUS.

Et tu inflabas calicem, cùm hæc pingeres.

VELIUS.

Imò verò utrem : sed alibi fecisti pilosum ; palpebras ferè nullas appinxisti.

DURERIUS.

Ex morbo illi deciderunt.

GRYNEUS.

Quo morbo ?

DURERIUS.

Quære ab illius medico.

GRYNEUS.

Jamne intelligis, ob tuam tantam imperitiam, detrahi debere de summâ centum sestertios ?

DURERIUS.

Imò ob vestras cavillationes et interrogationes adeò molestas, addi ducentos oportere.

VELIUS.

Pupulas habet hic glaucas ; atquæ ego audiui cæruleas habuisse.

DURERIUS.

Et ego cæsias, ut Minervam bellatricem.

VELIUS.

Hirquos fecisti nimium carnosos, et sinus tumentes.

DURERIUS.

Flebat accusatus a Catone.

VELIUS.

Mandibulæ sunt nimis longæ, et barba densissima ac profusissima : tùm pilos dicas setas porcinas.

DURERIUS.

Vos sine modo ullo estis loquaces et argutuli cavilla-

tores. Abite hinc : nam tabulæ non fiet vobis ampliùs copia.

VELIUS.

Amabo , mī Durerī, dūm alios non habes lícitatores , sine nos hīc cavillari.

DURERIUS.

Quā mercede.

VELIUS.

Ascribemus ambo hīc tibi singula disticha , quò tabula fiat vendibilior.

DURERIUS.

Nihil opus est arti meæ vestrā commendatione. Nam periti emptores , et picturæ intelligentes , non emunt versus , sed artificium.

VELIUS.

Sed nares habet nimium patulas.

DURERIUS.

Erat iratus accusatoribus.

VELIUS.

Non videmus valleculam.

DURERIUS.

Latet sub barbâ , ac ne mentum quidem cernitis , neque anthereonem.

GRYNEUS.

Horum omnium fecisti tu compendium , beneficio grandis barbæ:

VELIUS.

Collum placet mihi rectum et musculosum : item juguli.

DURERIUS.

Gratulandum est Superis , quòd tibi aliquid probatur.



VELIUS.

At ne nihil in hoc quoque desiderem, jugulos non habet satis cavos, quod in Socrate Physiognomon annotatum tardi ingenii signum esse pronuntiavit. Armos istos voluissem paulò erectiores et ampliores.

DURERIUS.

Non tam erat miles quàm imperator. Non audivisti apophthegma hujus? de quo cùm milites quidam dicerent, non adeò eum valentem esse militem ac imperatorem sapientem, is respondisse fertur; Imperatorem me genuit mater mea, non militem. Sed discedite, si non esti empturi: nam video accedentes quosdam negotiatores publicanos.

*Entretiens familiers de Jean-Louis VIVÈS. 1540.*

L'Alchymie.

SPES, RATIO.

SPES.

SPERO alchymiae prosperos exitus.

RATIO.

Mirum undè id speres, quod nec tibi unquam verò contigit, nec cuiquam; et si contigisse nonnullis fama fuerit, ab his facta quibus id credi expediret.

SPES.

Arridet futurus alchymiae successus.

RATIO.

Et quis, quæso, præter fumum, cinerem, sudorem, suspiria, verba, dolos, ignominiam? Hi sunt enim alchymiae proventus, quibus inopem nunquam ad divitias evectum, multos a divitiis ad inopiam detrusos sæpè

vidimus. Non tamen illud attendis; tam blandum est sperare et falli! Huc agit te avaritiæ stimulus, et præceps dementia, ut verum opineris quod optas, falsumque quod cernere est. Nonne animadvertisti prudentes in reliquis aliquos istâ insaniâ laborare; quosdam opulentissimos istâ vanitate consumptos, dumque opibus crescere student et fædo quæstui inhiant, benè parta prodigere; censuque omni in supervacuis effuso, tandem vel rebus vitæ necessariis destitutos, alios, civitate depositâ, mœstos semper atque anxios, dum nec cogitare aliud quàm folles, et forcipes, et carbones, neque aliis quàm farinæ suæ conversari didicerunt, in silvestres penè homines evasisse; nonnullos denique, primùm amissis animi luminibus, in isto exercitio corporeos oculos insuper amisisse?

SPES.

Promissum ab artifice aurum spero.

RATIO.

Refert cujus artis artifex quid promittat. Sunt quibus pollicentibus nulla fides adhibenda sit; eòque minùs si promissum jurisjurandi religione firmaverint. Sed ô lugenda magis an ridenda hominum cæcitas? Parùmne erat vir in metallis, quæ terra celat, furere, nisi vos mendacio defossa torquerent? Parùmne a virtutibus aberrâsse, nisi errori damnum, damno labor, et labori pudor accresceret? Ille, qui suum tibi aurum spondet, cum tuo aufugiet improvisus. Novi nihil narro: mos est publicus, et quamvis igne commissa fraus sæpiùs igne purgetur, nihilominùs tu delusus deceptoris tui supplicio non indemnior, sed notior remanebis, digitoque monstraberis avarus ac stolidus, exhaustus flando, flammis afflatus, aspersusque fuligine.

SPES.

Magna me sperare jubet alchymista.

RATIO.

Jube ea sibi præstet quæ pollicetur aliis, suamque primùm arte pellat inopiam. Est enim ferè mendicium hominum genus: cùmque se pauperes fateantur, ditare alios volunt, quasi aliena sibi quàm propria molestior sit egestas: adeò ut miseri se alios miserari dicere soleant impudenter, et ignotis etiam interdùm mira polliceri. O turpe promissum! O stulta credulitas,

SPES.

Chrysopœiæ artem edidici; dives fiam.

RATIO.

Imò quidem si fuisti, esse desines. Ars nempè quam memoras, nullam esse nisi mentiendi artem ac fallendi dicimus. Age autem, quandò ità fert animus, et incumbere gnauiter. Num scire aves quid ad te lucri ex istà arte maneat? Domus tua miris hospitibus mirisque plena erit impedimentis. Aderunt tibi omne esorum et potorum genus; idque haud immeritò quos ignis excibit et cupiditas. Aderunt sufflandi, decipiendi, deridendi artifices; omnis ædium angulus pelves habebit ac lebetes, et olentium aquarum phialas; herbas prætereà exoticas, et externos sales, et sulphur, et distillatoria, et caminos; quibus denique omnibus quid aliud tibi quàm curas inutiles et stultitiam cordis, oris obscœnitatem et squalorem corporis, et caliginem oculorum, et anxiam conflaveris paupertatem; quodque multò pejus dixerim, turpe circulatoris nomen, et nocturnis in tenebris atque infames inter latebras furum vitam?

SPES.

Effectum propositi jam votis præcipio.

RATIO.

Sperare hinc forsitàn et gestire dabitur, non gaudere.

SPES.

Adest, instat propositi terminus.

RATIO.

An mercurium congelâsti? an quid aliud vanitatis?  
Nunc maximè a proposito abes; semper rebus aliquid  
defuerit, nunquàm dolis.

*Petrarcæ de Remediis utriusque fortunæ, l. 1, dial. cxi.*

Le Mot et la Chose.

BEATUS, BONIFACIUS.

BEATUS.

SALVUS sit Bonifacius.

BONIFACIUS.

Etiam atque etiam salvus sit Beatus; sed utinàm esse-  
mus uterque quod dicimur, tu dives, ego formosus!

BEATUS.

Itànè parùm tibi videtur habere nomen magnificum?

BONIFACIUS.

Mihi quidem minimi momenti, nisi res adsit.

BEATUS.

At plerique mortales aliter affecti sunt.

BONIFACIUS.

Fieri potest ut mortales sint isti; homines esse non  
credo.

BEATUS.

Homines sunt, ô bone! nisi putas etiam nunc sub hu-  
manâ specie camelos et asinos obambulare.

BONIFACIUS.

Hoc citiùs crediderim, quàm homines esse qui pluris  
nomen faciant, quàm rem.

BEATUS.

In certis rerum generibus, fateor, plerique malunt  
rem quàm nomen; in multis contrà,

BONIFACIUS.

Hoc quid sit, non satis assequor.

BEATUS.

Atquæ penes nos ipsos exemplum est. Tu Bonifacius diceris, et habes quod diceris: sed si esses alterutroq; spoliandus, utrum malles habere malam faciem, an pro Bonifacio dici Cornelius?

BONIFACIUS.

Equidem malim vel Thersites dici, quàm habere prodigiosam faciem: an bonam habeam nescio.

BEATUS.

Item ego, si dives essem, et aut res, aut nomen esset deponendum, malim Irus dici, quàm re spoliari.

BONIFACIUS.

Assentior vera loquenti.

BEATUS.

Idem usu veniet, opinor, in his qui sunt prospera valetudine, aut aliis corporis præditi commodis.

BONIFACIUS.

Probabile est.

BEATUS.

At quàm multos videmus, qui mallent nomen eruditi pique viri, quàm esse docti bonique!

BONIFACIUS.

Plurimos istiusmodi novi.

BEATUS.

Annon apud nos plus habet momenti nomen, quàm res?

BONIFACIUS.

Videtur.

BEATUS.

Jam si quis nobis adesset dialecticus qui scitè definiret

quid sit rex, quid sit episcopus, quid magistratus, quid philosophus, fortassis et hîc inveniremus qui mallent nomen quàm rem.

BONIFACIUS.

Ità profectò, si rex est qui legibus et æquitate populi commodum spectat, non suum; si episcopus, qui totus invigilat gregi dominico; et si magistratus est, qui ex animo consulit reipublicæ: et si philosophus est, qui, neglectis fortunæ commodis, tantùm studet bonæ menti parandæ.

BEATUS.

Hic vides quantùm hujus generis exemplorum possim aggerere.

BONIFACIUS.

Sanè plurimùm.

BEATUS.

An hos homines negabis esse homines?

BONIFACIUS.

Vereor ne nos ipsi citiùs nomen hominis amittamus.

BEATUS.

At si homo est animal ratione præditum, quantùm abest hoc a ratione, ut in commodis corporis potiùs quàm bonis, et in externis, quæ fortuna dat simul et eripit cùm libet, rem malimus quàm nomen; in veris animi bonis nomen pluri faciamus quàm rem.

BONIFACIUS.

Præposterum, mehercule, judicium, si quis attendat.

BEATUS.

Eadem autem est ratio in contrariis.

BONIFACIUS.

Exspecto quid dicas.

BEATUS.

Idem judicandum est de nominibus rerum fugiendarum, quod dictum est de vocabulis expetendarum.

BONIFACIUS.

Apparet.

BEATUS.

Magis enim horrendum est esse tyrannum, quàm tyranni nomen; et si malus episcopus, juxta sententiam evangelicam, fur est et latro, non tàm hæc nomina sunt nobis detestanda, quàm ipsa res.

BONIFACIUS.

Convenit sanè.

BEATUS.

Tu de cæteris similiter colligito.

BONIFACIUS.

Prorsùs intelligo.

BEATUS.

Nonne fatui nomen aversantur omnes !

BONIFACIUS.

Et quidem maximè.

BEATUS.

Nonne fatuus esset, qui aureo piscaretur hamo, qui vitrum anteponeret gemmis, qui chariores haberet equos, quàm uxorem ac liberos ?

BONIFACIUS.

Is esset quovis Choræbo stultior.

BEATUS.

Annoh tales sunt qui procurrunt in militiam, spe lucri non admodum magni, corpus et animam exponentes periculo; qui student congerendis opibus, cum animum habeant omnium bonarum rerum egenum; qui vestes et

ædes exornant, cùm animus neglectus ac squalidus jaceat; qui corporis valetudinem anxie tuentur, animam tot capitalibus morbis laborantem negligunt; denique, qui fugacissimis hujus vitæ voluptatibus cruciatus merentur æternos?

BONIFACIUS.

Ipsa ratio fateri cogit plus quàm fatuos esse.

BEATUS.

Atquē his fatuis cùm plena sint omnia, vix invenias qui ferre possit fatui vocabulum, cùm adeò non abhorreant a re.

BONIFACIUS.

Sic est profectò.

BEATUS.

Age, scis quàm sint apud omnes invisæ vocabula mendacis ac furis; sed vix aliud nomen auribus nostris videtur intolerabilius, quàm mendacis.

BONIFACIUS.

Novi qui istud convicii cæde sint ultī.

BEATUS.

Sed utinàm pariter rem abominentur! Nunquàm accidit tibi ut, qui promiserat se mutuum ad certum diem redditurum, falleret?

BONIFACIUS.

Frequenter, etiam cùm id dejerasset; neque semel, sed iterum atque iterum.

BEATUS.

Fortassè non erant solvendo.

BONIFACIUS.

Imò erant, sed commodius esse ducebant, non redere crèditum.



BEATUS.

An hoc non est mentiri?

BONIFACIUS.

Planissimè.

BEATUS.

Auderes istiusmodi creditorem sic compellare : « Cur » mihi toties mentiris? »

BONIFACIUS.

Non, nisi paratus essem ad pugnam.

BEATUS.

Annon simili modo quotidie verba dant lapidæ, fabri, aurifices et vestiarii, pollicentes ad certam diem, nec tamen præstantes, etiamsi magni referat tuâ?

BONIFACIUS.

Mira impudentia! sed adde his advocatos pollicentes operam.

BEATUS.

Potes addere sexcenta nomina; nemo tamen horum laturus sit mendacis vocabulum.

BONIFACIUS.

Hoc genere mendaciorum plena sunt omnia.

BEATUS.

Itidem furis nomen nemo tolerat, cum a re non perinde omnes abhorreant.

BONIFACIUS.

Exspecto ut dicas clariùs.

BEATUS.

Quid interest inter eum qui rem tuam tollit e scrinio, et eum qui depositum abjurat?

BONIFACIUS.

Nihil, nisi quod sceleratior est, qui spoliât etiam fidentem.

BEATUS.

At quàm pauci sunt qui depositum reddunt, aut, si reddunt, non dant integrum?

BONIFACIUS.

Opinor esse perpaucos.

BEATUS.

Nemo tamen istorum ferat furis vocabulum, cùm rem non horreant.

BONIFACIUS.

Admodùm.

BEATUS.

Jam mihi reputa, quid vulgo fiat in tractandis pupil-  
lorum bonis, in testamentis ac legatis, quantùm hæreat  
digitis tractantium.

BONIFACIUS.

Frequenter totum.

BEATUS.

Furtum amant, vocabulum detestantur.

BONIFACIUS.

Maximè.

BEATUS.

Quid agant qui res fisci tractant; qui monetam publi-  
cam cudunt deteriore; qui, nunc auctâ, nunc diminutâ  
nummorum æstimatione, privatorum rem accidunt,  
fortassè nobis non admodùm liquet: de his, quæ quotidie  
experimur, loqui fas est. Qui sumit mutuum, aut qui  
conflat æs alienum hoc animo, ut reddat, si liceat, nun-  
quàm, quantulùm abest a fure.

BONIFACIUS.

Cautior fortassè dici potest, melior nequàquàm.

BEATUS.

At horum cùm ingens sit ubique numerus, nemo  
tamen tolerat furis nomen.

Leç. lat. mod.

24

BONIFAGIUS.

Animum solus novit Deus: proinde apud homines *obærat* dicuntur, non fures.

BEATUS.

Quantuli refert, quo nomine dicantur apud homines, modò sint fures apud Deum? certè suus cuique notus est animus. Ad hæc, qui, cum debeat multum, quod obtigit pecuniæ, nequiter prodigit; qui, posteaquàm decoxit in unâ civitate, delusis creditoribus, fugit in aliam, hospites quærens quibus imponat, idque facit crebrius, nonne satis declarat quo sit animo?

BONIFACIUS.

Satis superque; sed tamen isti solent fucare colore quod faciunt.

BEATUS.

Quonam?

BONIFACIUS.

Multum multisque debere, prædicant sibi cum magnatibus, atque adeò regibus esse commune; eoque, qui sunt hoc ingenio præditi, ferè nobilitatis opinionem affectant.

BEATUS.

In quem usum?

BONIFACIUS.

Dictu mirum quantum equiti licere velint;

BEATUS.

Quo jure? quibus legibus?

BONIFACIUS.

Haud aliis quàm quibus præfecti maris vindicant sibi quidquid ejectum est naufragio, etiamsi exstet dominus: quibus alii suum esse volunt, quidquid apud furem aut prædonem deprehenderint.

BEATUS.

Idiusmodi leges possent ipsi fures condere.

BONIFACIUS.

Et facerent, si queant tueri; et haberent quod excusarent, si bellum indicant prius quàm furentur.

BEATUS.

Quis hoc juris dedit equiti potius quàm pediti?

BONIFACIUS.

Militiæ favor. Sic enim exercentur ad bellum, quò promptiores sint ad spoliandum hostem.

BEATUS.

Sic, opinor, Pyrrhus exercebat suos ad bellum.

BONIFACIUS.

Non, sed Lacedæmonii.

BEATUS.

Abeant in malam crucem cum suo exercitio. Sed undè nomen hoc tantæ prærogativæ?

BONIFACIUS.

Quibusdam obvenit a maioribus, alii mercantur ære, quidam adsciscunt.

BEATUS.

An licet adsciscere cuilibet?

BONIFACIUS.

Licet, si mores respondeant.

BEATUS.

Quis?

BONIFACIUS.

Si nihil bonæ rei gerat; si splendide vestiatur, si incedat annulatus, si aleam ludat assidue, si certet chartis; si computationibus ac voluptatibus ætatem absumat; si nihil loquatur plebeium, sed arces, pugnæ, ac bella mera cre-

pet, Thrasonica omnia. Isti sibi permittunt bellum, cui velint, indicare, etiamsi pedem ubi ponant non habeant.

BEATUS.

Equites mihi narras equuleo dignos. Atquæ tales habet non paucos Sicambria.

Des. ERASMUS. *Colloquia.*

La Fortune, le Courtisan.

AULICUS.

AN! Fortuna, quàm egregiè spem meam fefellisti! habueram te loco numinis, aras tuas victimis oneraveram, ut felicem aliquam mihi annueres vitæ conditionem, in quâ summâ cum jucunditate conquiescerem.

FORTUNA.

Numquid non abundè satisfactum est voto tuo?

AULICUS.

Quî fieri potest? At ego nullam unquàm dormivi noctem satis ex animi sententiâ.

FORTUNA.

Nullam omninò noctem? Fucata est igitur aulicorum prosperitas. Nullum tamen opinabar hominum genus cui magis ea arrideret.

AULICUS.

At nullum est, cui non sit requies major!

FORTUNA.

Quid? Vos, aulici, estis inter delicias.

AULICUS.

Imò inter angustias.

FORTUNA.

Hocce credibile est sericatis comitem esse miseriam?

AULICUS.

Sericeis pannis operiuntur sexcentæ calamitates.

FORTUNA.

Hoc divitiæ sinunt?

AULICUS.

Quænam illæ, quæso, divitiæ?

FORTUNA.

Aurum et argentum, quo vos omnes sericati consuevisis abundare.

AULICUS.

At sericati illi, byssoque et purpurâ divite induti, plerique nec obolum habent undè restim emant.

FORTUNA.

Nonnullis vestrum quotannis aureorum millia suppetunt: An tantas opes absumit ventriculus?

AULICUS.

Vah! non illud est.

FORTUNA.

Quid ergò?

AULICUS.

Quid? Alea, fritillus, sphæristerium, luxus, equorum phaleræ.

FORTUNA.

Nihilne aliud?

AULICUS.

Domestici latrones, œconomi fingunt se talento misse, quod unico tamen aureo emptum est. Præterea adulatores, qui caudâ blandiuntur, qui cervices confricant, qui percutiunt palpo, qui nos palam plenis buccis ad cælum ferunt, qui virtutem in nobis commendant, et hirudinum instar exsugunt quidquid possunt.

FORTUNA.

Vos tamen nunquàm video, nisi sericatos gemmatosque.

AULICUS.

Totum hoc creditorum est, quibus si stagna, silvas, fundos et prædia vendiderimus, non satisfaceremus dimidiatim. Vis dicam? Nos animam debemus.

FORTUNA.

Semper tamen utimini sternacibus et præstantissimis equis.

AULICUS.

Sic paupertatem dissimulamus, cum nostrum permulti sint qui non habent undè asinum nutriant.

FORTUNA.

Sed non æstimas plurimi illas epularum delicias, illos electiles cibos, ut pavos e Samo, Phrygias attagenas, grues Melicas, hædos recentes, pelamides Chalcedonias, murænas Tartessias, pectunculos Chios, Rhodios helopes, scaros Silices, nuces Thasias, quæ mensis vestris quotidie solent apponi?

AULICUS.

Egregie dicis: habemus interdum scarorum jecinora, phasianorum et pavonum cerebella, linguas phœnicopterum, plerumque murænarum lactes, cæterasque patinæ Vitellianæ cupedias: sed hoc ipsum non facit ad voluptatem.

FORTUNA.

Quidni?

AULICUS.

Primum omnium, non est certa hora prandii aut cœnæ. Vivimus non nostro, sed domini arbitrio: non prandemus, nisi cum ipsi lubet: si cœnam aut ludum proroget in multam noctem, sumus in expectando.

FORTUNA.

Quid? interim non dormitis?

AULICUS.

Vah! piaculum est non expectare dominum : nefas est dormire priusquam venerit. Si liceat, erunt parasiti qui vigilabunt, et gratiam ac favorem præripient, et in benevolentiam domini se profundius intrudent.

FORTUNA.

Semper tamen est lauta vobis culina ; semper mensa dapsilis.

AULICUS.

Sit ita : tribuis hoc magnæ felicitati ventrem saginare, neque quicquam aliud proficere?

FORTUNA.

Interim tamen vivitis.

AULICUS.

Et canes victum reperiunt : sed, ut lautè vivamus, putas tamen securas esse, quas comedimus, dapes?

FORTUNA.

Undè emereret discrimen?

AULICUS.

Undè? Proh Jupiter! ab insidiis malevolorum.

FORTUNA.

Quid dispendii afferre possunt tales insidiæ?

AULICUS.

Quid! nescis aulicos omnes emendicasse a Longobardis veneficia?

FORTUNA.

Hoc si ita est, tamen promptum est vobis præcavere.

AULICUS.

Quoniam illud modo?



FORTUNA.

Si fideles sint vobis famuli.

AULICUS.

Imò tot habemus hostes quot familiares.

FORTUNA.

Il tamen omnes vos utroque genu complicato salutant et reverentur.

AULICUS.

Alterâ manu ferunt lapidem, alterâ panem ostentant.

FORTUNA.

Adduci nequeo ut istud credam.

AULICUS.

Est ut credas : quàm multi enim amicitiam verbis palàm simulant, qui sub columbinâ specie teterrimam tegunt caudam scorpionis !

FORTUNA.

Et quamobrem familiares vestri vobis insidiarentur?

AULICUS.

Invidiâ.

FORTUNA.

Persuadere mihi vix possum invidiam vobiscum habitare.

AULICUS.

Hoc tam fabulosum est quàm si dicas Jovem esse sine liberis. Scias autem nusquàm gentium, nullibì terrarum majores esse invidiæ flatus.

FORTUNA.

Dic ergò, undè livor iste?

AULICUS.

Quandòque ex fumo, ex re nihili : Si dominus serene vultu huic arriserit quàm illi ; si Taratallam sa-

lutet, insalutato Mystillo; si arcanum aliquod committatur Fabulino, absente Nasicâ; si Terlidianum propius quàm Gellium corpori suo admoverit; si dextram porrexerit Diodoro, relicto Corbulone.

FORTUNA.

Saltem qui benevolentiam dominorum sibi comparant, felices putandi sunt.

AULICUS.

Felices utcumque, si favor ille sit pertinax et diuturnus.

FORTUNA.

Quid? nonne sibi constant principes?

AULICUS.

Vis paucis dicam? Sunt muliere leviores, versatiliores cothurno, et Proteo mutabiliores.

FORTUNA.

Quamobrem tam inconstanti sint animo?

AULICUS.

Ah! nefas est percunctari causam.

FORTUNA.

Semper tamen habent pædagogos doctrinâ et sanctitate præditos.

AULICUS.

Ego verò nescio cui mortalium hodiè sit habenda fides. Nam qui severos illis et tetricos palàm se ostentant pædagogi, iisdem nudato capite blandiuntur intùs, et appellant reges tragicos.

FORTUNA.

Si concessero has in aulicâ vitâ esse calamitates, non fatebor tamen vos esse propterea miseros.

AULICUS.

Ecquid obstabit ne fatearis?

FORTUNA.

Aliæ felicitates plurimæ.

AULICUS.

Quænam sunt illæ?

FORTUNA.

Videturne tibi modica voluptas, diversas regiones circumspicere, hominum mores intueri, lustrare urbes, et ubique terrarum nullam non experiri voluptatem? quæ omnia vobis aulicis contingunt quôtidie.

AULICUS.

Quid, si perferamus miserias?

FORTUNA.

Utinam miseri omnes nihil aliud paterentur infelicitatis!

AULICUS.

Felicitatem vocas imbre madere, in lutum provolvi; in tenebris ambulare, equo uti strigoso et macilento, jacere in cubilibus, quibus scabiosi, ulcerosi, podagrici, paralytici fortè jacuerunt?

FORTUNA.

Atqui plura, opinor, non toleratis quam vestri principes; quos tamen aiunt inter delicias culcitris subalaribus, perdicum plumis molliter quiescere.

AULICUS.

Ut video, non satis nosti miseriam nostram. Quam ut intelligas, illud imprimis compertum habe, vix unicuique esse dominum in familiâ, qui benè quiescat.

FORTUNA.

Alii quid?

AULICUS.

Nullus ordo, sed sempiternus horror. Omnes impetare volunt, parere nulli. Hic ait suâ tantum interesse

vinum hero præministrare; alius cubicularium se vocat, alius œconomum. Non reperitur, qui ea curare velit quæ aliquid præ se ferant vile.

FORTUNA.

Verùm liberum est vobis per otium stare in templis, et ab aurorâ usque ad vesperum cum diis versari.

AULICUS.

Date mihi pelvim: hæc verba nauseam excitant stomacho. Aulici refugiunt templa non minùs quàm carceres.

FORTUNA.

Video tamen permultos ire nonnunquàm.

AULICUS.

Hoc ergò faciunt ne impii videantur et religionis contemptores; aut, si qui fortassè illuc divertant, eunt, non ut orent, sed ut ingurgitatum plus æquo cibum longâ deambulatione concoquant, aut perniciosum saturo ventre somnum fabulosis arceant colloquiis.

FORTUNA.

Verùm est alia felicitas, cujus nondùm memini: generis vestri nobilitas quantam vobis laudem parturit!

AULICUS.

Nobilitas nostra cogit ut, velimus nolimus, vitam nostram objiciamus periculis, quidquid reges delirant.

FORTUNA.

At cum degitis in aulâ illâ regiâ, et populus vos videt sericatos, paludatos, purpuratos, gemmis ornatos et monilibus, vos suspicit ac veneratur.

AULICUS.

At cum in pagos nostros redimus, aureæ vestes commutantur in penulas, gemmatae caligæ in soccos, et si præcedens aulicæ vitæ luxuria rem nostram penitus

exhauserit, paganos ad cutem radimus; extorquemus quidquid possumus, converrimus omnia cum pulvisculo.

FORTUNA.

Quid, si subditis pecunia desit?

AULICUS.

Extorquentur gallinæ, tauri, arietes; et quidquid agrestis gazæ comperire est. Prægnantibus interdum agrestium mulierculis auferimus lectum et culcitram, et solum stramen relinquimus.

FORTUNA.

Tene istud movet, quod in aulâ principum est saltem boni futuri magna spes?

AULICUS.

Spem non video.

FORTUNA.

Dant tamen aliquandò per luxum.

AULICUS.

Frequentius per vim extorquent.

FORTUNA.

Quem semel amârunt nunquàm relinquunt indotatum.

AULICUS.

Hodiè te ament, cras vitrum ruperis, odio prosequuntur. Proptereà, ô potentissimum numen, si vis mihi gratificari, eripe me his ærumnis ac miseriis.

FORTUNA.

Non constitui tibi quicquam aliud largiri.

AULICUS.

Vado ergò; nam certum est mihi unamquamque potius aleam experiri, quàm diutius Sisypheum hoc saxum volvere.

*E RAYISII TEXTORIS Dialogis.*

Assaut de fourberies.

PANURGUS, FURINUS, postea OENOPOLA et PASTIFER,

PANURGUS.

QUID, per Deos immortales! In hunc vaframentis mihi fuerit contendendum, qui bardus est et Amphistide stultior?

FURINUS.

Men' bardum appellitas? Egon' tibi Amphistide magis delirus videor? Erras maximè, si verbis tuis mihi terrorem incuti credas.

PANURGUS.

Terrorem tibi incutere si possim, nolim: pudet dolis et stratagematibus tecum congredi, qui nec in mari quidem aquam reperias, nec in silvis arbores.

FURINUS.

Mihi herclè difficilior fateor aquam in mari reperisse, quàm in te quicquam salsuginis.

PANURGUS.

Tu naso tenès quæ futura sunt conspicias.

FURINUS.

Tu verò occipitio tenès quæ facta sunt advertis.

PANURGUS.

Sed quid unquàm fraudis gloriâ dignum commentos es?

FURINUS.

Tu verò, qui tantoperè gloriaris, quas unquàm tragulas in homines fabricasti?

PANURGUS.

Astutiâ meâ saliariter et opiparè vixi semper, nec tamen obolum profudi.

FURINUS.

Vulpino stratagemate, nitidis semper vestimentis indutus sum; neque tamen quicquam sutoribus, veteramentariis, aut alutariis impertivi.

PANURGUS.

Id ego mihi persuaserim scilicet.

FURINUS.

Periculum, si voles, face.

PANURGUS.

Jam primùm omnium, si nobis vino fuerit opus, poteris Œenopolam, tabernæ vinariæ magistrum, technis quibus eludere?

FURINUS.

Sancta Laverna! Quidni? Illustre.

PANURGUS.

Isthuc igitur properè fiat: videam verum nec nesiet quod tu satis prædicas.

FURINUS.

Heus! Œenopola.

ŒENOPOLA.

Quis me vocat?

FURINUS.

Adesdum, paucis te volo.

ŒENOPOLA.

Dic igitur uno verbo, quid est quod me velis.

FURINUS.

Actutùm cuncta recensuero; istinc ego foràs et peregrè quidem profecturus sum.

ÆNOPOLA.

Quid demùm?

FURINUS.

Nostin' pestilens nescio quod contagium passim locorum serpere?

ÆNOPOLA.

Novi.

FURINUS.

Et aerem maximè vitiatum?

ÆNOPOLA.

Id est quod dicis.

FURINUS.

Huic autem malo nullum magis efficax dari posse remedium, quàm si quis rejectâ formidine domesticos parietes nunquàm jejunos egrediatur?

ÆNOPOLA.

Et id ego expertus sum.

FURINUS.

Velim igitur, si quod in penu, aut ænopolio tuo vinum regale et nectare dulcius tibi exstiterit, actutum mihi deferas, quo desiccatum jam guttur irrorare valeam.

ÆNOPOLA.

Faciam quod dixti.

FURINUS.

Experire tu nunc, commanipulo, quibus artibus ego utar.

PANURGUS.

Si fuero expertus, molestè non feram.

ÆNOPOLA.

Heus! tu qui mihi vinum deferri præceperas, adedum.



FURINUS.

Auspicatè veneris : estne bonum ?

ÆNOPOLA.

Optimum, herclè.

FURINUS.

Anniculum, an bimum ?

ÆNOPOLA.

Imò trimum.

FURINUS.

Pretium accipe.

ÆNOPOLA.

Turoni duo supersunt.

FURINUS.

Duodeno id tantillum vœnit ?

ÆNOPOLA.

Vœnit ædepol.

FURINUS.

Ideò igitur optimum : abi, abi, nihil aliud te volebam. Nunc degustabo et pytissabo, ut experiar quale siet.... revertere, revertere, inquam, tabernarie fraudulente.

ÆNOPOLA.

Quid aliud est ?

FURINUS.

Quid aliud est ? Scelus !

ÆNOPOLA.

Perperàm quicquam egi ?

FURINUS.

Tun' rogas ? Promiseras te vinum optimum esse daturum, quod non minùmo vœnit pretio.

ÆNOPOLA.

Et herclè dedi.

FURINUS.

Dedisti, furcifer? Imò verò acetum stypticum et acidum : pytissa, fraudulente; corripite, satellites, latronem hunc; hic unumquemque deludit. Sic rudes et ignaros fallit ruricolas. Corripite, inquam, et ad furcas nunc primùm ducite.

ÆNOPOLA.

Hei! Domine, ne sic tam graviter velim in me succenseas. Aliud ibo quæsiturus, nec tamen abs te pecuniæ quicquam exigo, quin etiam acceptam tibi restituo.

FURINUS.

Pol! ad furcas duceris.

ÆNOPOLA.

Inopis, oro, te miserescat meū.

FURINUS.

Aliud igitur, longè melius, quæsiturus propera.

ÆNOPOLA.

Immortales tibi gratias ago, qui me veniâ donâris.

FURINUS.

Festina, inquam.

ÆNOPOLA.

Festino.

FURINUS.

Qui tibi videtur, tiruncule, qui me fraudis ignarum prius duxeris? Vinum habeo optimum: gratis quidem, aliud nunc primùm habiturus, neque obolum quidem daturus unum.

ÆNOPOLA.

Euge, aliud tibi vinum longè præstantius, quod nec renuat Jupiter, afferro.

Leç. lat. mod.

25

FURINUS.

Ne me denuò fallas, te præsentē, pytissabō. Placet istud, discede. Sed cave unquā ad hunc vomitum redeas.

ŒNOPOLA.

Cavebo, ne dubita; vale.

FURINUS.

Vale, inquam. .... Hem, ô bone, numquid ignarus fraudis tibi videor? Nunc ego periclitari velim quam ipse fraudem noveris.

PANURGUS.

Cui vis nunc illudam?

FURINUS.

Vinum suppetit: habendus est cibus; egregium stragema faterer, si quem pastiferum posset eludere.

PANURGUS.

Potero, et citiùs quàm tu Œnopolam fefelleris.

FURINUS.

Agedum igitur.

PANURGUS.

Heus! pastifer.

PASTIFER.

Ho, ho!

PANURGUS.

Quid ho? Rustici me Dominum vocant.

PASTIFER.

Domine.

PANURGUS.

Estne tibi farcimen aliquod delicatum?

PASTIFER.

Quatuor, quinque, sex, si velis, omnia Joyis cerebra dulciora.

PANURGUS.

Istinc igitur quoddam optimum quæsiturus propera.

PASTIFER.

Actutum rediero ; quinque relaturus.

PANURGUS.

En qui OEnopolam emunxisti, vide quo dolo claream.

FURINUS.

Videam, precor.

PASTIFER.

Adest quod petis.

PANURGUS.

Frigidiusculum mihi videtur istud.

PASTIFER.

Alterum, si voles, aliquantò calidius ibo quæsiturus.

PANURGUS.

Propera, ut vel utrumque capiam, vel alterutrum eligam.

PASTIFER.

Propero.

PANURGUS.

Ego tantisper dùm redierit, istud subterforaminabo, et quidquid intus succi et carniū latet, clanculū extraham. Benè est.

PASTIFER.

Alterum tibi offero ; nisi igitur velis utrumque, alterutrum eligas.

PANURGUS.

Istud novissimè allatum potiùs habeo. Sufficiet, ut opinor. Quanti constat?

PASTIFER.

Tribus duodenis.

PANURGUS.

Ha! tu rides, scilicet!

PASTIFER.

Da duos propter nostram antiquam necessitudinem ;  
accipe, benè vale.

PANURGUS.

Quid ais?... quid ais?

FURINUS.

Hominem egregiè fefellisti : ne Laverna quidem ipsa  
litem inter nos componat.

*Idem, ibid.*

---

---

# DISCOURS

ET

## MORCEAUX ORATOIRES.

---

### PRÉCEPTES DU GENRE.

---

L'Eloquence des anciens, *ou* la véritable Eloquence.

**Q**UAM eloquentiæ formam probandam censeatis? quam recenti quorundam et comptulæ opponendam dicimus? Illam videlicet quam penitus tinxerit veri gustus et sapor. Hoc est illam quæ cum in verbis pingendis, tum in sentiis illuminandis nihil affert nisi veritatis notâ percussus; quæ non respuit ornamenta, sed simplicia et ex re nata seligit; quæ artem sic adhibet, ut natura melior fiat, non dissimilis et hoc ipso deterior; quæ partes ita exornat singulas, ut universis admirationem non adimat; quæ pro rerum varietate variando, et ipsa repetitionis effugit tædium; quæ se concitat, remittit, attollit, deprimit, extenuat; uno verbo, quæ tota ad naturæ veritatem exacta est, ita ut non delectet tantum, sed etiam sine satietate delectet.

Dùm veram vobis eloquentiam adumbrare conor, quid aliud quàm sanæ antiquitalis imaginem penè aliud cogitans adumbravi? Ubi enim ingenua illa nativi candoris gratia, animorum suavissima eadem et potentissima expugnatrix, purius quàm in veterum scriptis elucet? Ubi natura sine sordibus et vilitate simplicior, sine fuco et cincinnis ornatio, sine tumore et superbiæ magnificentia explicat se et augustius triumphat? Neque profectò aliud causæ est, cur eorum eloquentia illibatum decoris florem, et annorum victricem gratiam ad nos usque tanto intervallo detulerit, quàm quòd naturæ, quæ mutari non potest, radicibus innitatur; cùm interim fucata, et idcirco brevem nuperinæ quorundam eloquentiæ formam, eadem, quæ peperit dies, eadem, inquam, hora vulgò præcerpat.

Verùm illud sæpissimè accidit, ut, qui antiquitatem minùs nòrunt, ei se, ut plurimùm, minùs æquos præbere soleant; sicut interdùm maximos viros sine ullâ honoris dignatione præterimus, utpotè incognitos nobis, suâque modestiâ involutos. Sed liceat subire propius; liceat illos e propinquo speculari eductos e suis integumentis, omnique virtutum genere cumulatos; quanta pectus implebit admiratio! quàm venerabundi atque, ut ità dicam, religiosi, ad illos accedemus! quàm dimittemur inviti! quantis virtutum exemplis et stimulis incitati! Similiter, qui contulerit se ad antiquitatem, qui eam non raptim et obiter adspexerit modò, sed in intimum ejus sacrarium admissus fuerit, non dubito quin ardentissimo amore correptus, tandem exclamet: Pœnitet me harum formarum quotidianarum; omnes alias dicendi veneres et formas penitus e memoriâ deleo (1).

Benign. GRENAN, *de corrupto dicendi genere,*  
*Orationis pars altera.*

(1) Voyez les *Leçons françaises*, même partie.

## La fausse Eloquence.

AD naturæ verique legem, undè nos misera ingenii ostentatio infeliciter detorsit, reflectendi sumus, si suam eloquentiæ volumus constare sanitatem. Ecquam enim artis præstantissimæ imaginem optimi nobis magistri reliquerunt? Quam illi imponunt personam? quas partes attributas volunt? An ut verborum tinniat inani strepitu, et escas, ut ait ille, auribus colligat? ut modulatis et sibi invicem respondentibus sonis ludibria excitando, plausum auramque popularem captet? ut adulterinæ, si ita loqui fas est, monetæ commercium instituat, ubi fucatas merces tumidus explicet orator, gloriolam pro pretio ablaturus suâ futili merce vaniorem? Malè profectò de hominum genere mereatur eloquentia, si in hoc comparata sit, ut, et suo, et aliorum otio, ad inanem suâ jactantiam ambitiosè loquax abutatur.

Non in hoc tam dissimili et propè scenico habitu venerabilem disciplinam agnoscat Quintilianus, quam sensibus et prudentiâ niti maximè jubet; utilia speciosis præponere; curam verborum minimam habere, rerum maximam; veritate nitere, non fuco; armis pugnare, non tympanis; resque in animis, potius quàm in auribus sonos relinquere.

Hanc porrò sapientiam, quæ respuit inania, ut solidis hæreat, unus induere potest veri gustus et amor. Ille nos docebit speciem ab utilitate nunquàm dividi; nihil esse vanius eloquentiâ illâ, si tamen ita sit appellanda, quæ verborum vel ornatissimorum osseam compagem rebus tanquàm spiritu destitutam nobis exhibet: multò satius esse, si alterutrum eligendum sit, res afferre fructuosas cum minore gloriâ, quàm plausum nugis redimere sterilibus et canoris. Quanquàm ne vos illud con-



turbet, quasi gloriæ decessio futura sit, si plus utilitati detur quam ostentationi. Hoc ipso ingenii laudem augebit orator, quod prodesse magis quam delectare voluerit.

At non satis est futilitatem depellere ab eloquentiâ, et in vacui, ut ita dicam, simulacri locum res, quasi animam, reponere, nisi aptus et concolor unicuique tribuatur ornatus. Non enim fortassè magis suam eloquentiæ veritatem detrahit, qui canoras inopesque rerum nugas affert, quam qui nugatorio puerilique cultu rerum pondus enervat. Quid? si publicæ cladis acerbitas amarâ comploratione prosequenda erit, tu mihi bellulus prodibis in comicâ veste, et quæ risum excutiat? si atroci gladio vitia confodienda erunt, tu delicatulo pugione ludes magis quam feries? si adornanda virtus, calamistros adhibebis, qui pudorem injiciant virtuti? Non in has ineptias abibit orator ille noster; sed æmulus naturæ, quæ rerum diversitatem suis quamque insignibus notat, ita diversis ille argumentis suum cuique ornatum dabit, sacris venerabilem et augustum, sublimibus magnificum, gravibus comiter severum, lætis modestè nitidum, flebilibus lugubrem et atratum, omnibus simplicem et ex naturâ petitem. Id enim veram demùm et diuturnam pulchritudinem ostendit, quod a naturæ veritate, aut saltem imitatione non recedit.

At quotus quisque hanc in dicendo naturam aut sequitur, aut imitatur? Obsolevit, ut in vitâ, sic in oratione simplex decor; nihil plerisque placet nisi quod affectationis lasciviâ corruptum est. Quàm verè dicant, quàm ad rem aptè, nihil interesse putant, dummodò hilariter dicant et festivè. In acuminibus, in sententiolis versantur. Suum hoc patrimonium et fundum; in illis cupiunt, metuunt, dolent, lacrymas etiam, si Superis placet, sibi excidere cavebunt, nisi cadant ad artem et quodammodò argutè. In quo fallit eos quòd ingenii palmam protinùs ad se delatum iri putant. Malè, inquiebat ille, olet, qui semper

olet benè. Malè ingeniosus est, imò nusquàm ingeniosus est, qui vult ubique haberi ingeniosus.

Esto sanè : ejusmodi ineptiis abundant ficti ad mulierularum oblectationem libri, quos Romanenses vocant. Sed in gravissimis rebus, quæ dignitate et pondere tueri se debent, etiamne suum sibi locum festivitates vindicabunt? Quid suum dico? Etiamne sine verecundiâ eminebunt densiusque stipabuntur, cum non possent ne in lætis quidem argumentis citra satietatem affluere et dominari? Nihil gemmis lucidius : (non ipsi, credo, molestè ferent suas delicias cum re pretiosissimâ comparari.) Quis tamen vestem ferat gemmarum perpetuitate rigidâ collucentem? Nihil divitum horti festivius habent illis aquis, quarum aliæ, in teli morem emissæ, fortiter assurgunt; aliæ, conchis exceptæ, per varios gradus subsultim descendunt; aliæ mille formas joculariter exprimunt : quis tamen ex isto elegantiarum genere hortum sibi constare totum velit? Quis imò non talibus lautitiis libenter careat, quæ, etsi primo aspectu brevem injiciunt delectationis quasi aculeum, oculos maturè plenos et satiatos relinquunt? *Idem, ibid.*

Eumène aux Argyraspides.

Hûc, inquit, convertite oculos, ô tetrissimi Macedonum! Stans in conspectu vestro captivus dux vester quid aliud quàm tropæum est, quod vestris ipsi manibus de vobis excitastis, eo longè fœdus, quod tot bellis, tot nequicquàm præliis Antigonus hostis concupivit? Nonne autem satis turpe fuit, impedimentorum causâ, prodere victoriâ, vosque victos fateri, quasi verò in pecuniâ, non in armis, victoria sita sit, nisi ducis etiam vestri capite sarcinas redimeretis? Ergò invictus ego ad supplicium trahor; victor hostium, a militibus meis proditus! At

vos, per Jovem imperatorem ac deos sacramenti testes; hîc me ferro, quod, me duce, tot confodit hostes, occidite. Illic enim si fuero trucidatus, non minùs apud vos sceleris residebit, nec vobis succensebit dominus vester Antigonus, cui interfecto Eumene, non vivo opus est. Sin vestræ torpent manus, harum alteram mihi reddite; ad quærendam gladio libertatem alterutra satis erit. Quòd si gladium Eumeni credere formidatis, objicite vinctum belluis; id si feceritis, en ego vos quasi fidelissimos sanctissimosque erga ducem milites omni scelere libero (1).

C. LEBEAU

Les Tribuns du peuple contre Claudia.

QUÀM impiam, quàmque detestabilem vocem (2) Claudia jecerit, non ignoratis, Quirites. Neque enim testimoniis opus est, confitente reâ : neque etiam illa negare, si vellet, posset, quod palàm in publico, non Jovem, cùm sub dio hæc diceret, non multitudinem ipsam civium, quam incusabat, reverita, effudit. Quorsùm igitur, cùm de crimine constet, de pœnâ dubitamus? Parùmne diligenter legibus cautum est? an nos verba legum numerantes, mentem earum circumveniri patimur? Feminam hoc judicio peti novum esse contendunt. Esto : novum enim etiam est, feminam hoc pacto delinquere : necdùm enim ullam tantâ improbitate mulierem urbs nostra tulerat.

Atque utinàm ne nunc quidem novum exemplum statui opus esset! Mallemus profectò nullis delictis quietam ac veluti conditam legum aciem pati, quàm adversus no-

(1) Voyez les *Leçons latines anciennes*, tom. I, même sujet.

(2) Cùm nimîâ turbâ premeretur, *utinàm*, exclamavit, *frater meus revivisceret, atque iterùm classem amitteret!*

centes, utili quidem, sed tamen acerbo rigore distringere. Cæterum civitati stare volenti necessaria legum est custodia: quas utique minimè deberent subvertere, qui reipublicæ nostræ principes et columnina haberi volunt. Quos profectò juris omnes peritissimos latere non potest, cum pluribus in legibus nulla sit expressa mulierum mentio, verbo *si quis*, et similibus, non minùs illum sexum, quàm masculinum contineri. Quid igitur mirum, si leges, quæ de majestate latæ sunt, ad utrumvis sexum pertinere credimus, cum exemplo sit isthæc Claudia, ab utrovis in eas peccari posse? Sed elevant illi rem, parvumque videri delictum volunt, quòd ultra verba non processisset. Hoc enim restabat, ut conatum, studium, facta conjungeret, cum Pœnis consilia sociaret, centuriaret homines, armaret servitia, occuparet Capitolium, et pestem, quam civibus verbo voverat, opere quoque ipso et manu inferret?

Atquè legibus profectò non facta magis, quàm consilium et animus patrantis puniuntur. Neque enim, si quid furiosus aut infans nocuit, jure adversus eum prodita est actio; animi verò cujusque multis in causis non minùs certa ex verbis, quàm ex operibus, indicia petuntur. Quæ sic optat, quid faceret, si facere quod optet in ejus manu esset? Quòd si aliorum quoque hominum judicia non contemnimus (cur autem contemnamus?), etiam alibi pro scelere habitum vindicatumque est impium votum. Athenis, quæ Græciæ civitas præ cæteris sapientiæ laudibus clara habetur, damnatus est qui magnum lucrum optaverat, cum necessaria funeribus curandis venderet, quod consequi posse non videbatur, nisi multi mortales interfissent, et tamen illis in verbis locum habere poterat mitior interpretatio: hæc non ambigùe neque perplexe exitium civibus, cladem exercitui, calamitatem reipublicæ optavit. Utinàm frater meus revivisceret! Votum improbum, etiamsi fratris causâ sic optavisset.

Cur enim illi reddenda vita esset, cujus operâ tot

civium millibus erepta est, qui rempublicam non minùs per superbiam despexit, quàm per temeritatem afflixerat? qui prædamnatus omnium hominum sententiis, non infamiam ejus judicii, sed pœnam casu effugit? Hunc tu, si sapes, optares reviviscere? cujus si memoriam eodem tumulto potuisses obruere, quo cineres teguntur, nihil antiquius habere debuisses. Quemadmodùm enim fratrum egregiorum famâ aliæ matronæ non ineptè gloriantur, ità tibi hic pudori esset, si quicquàm apud te pudoris remaneret.

Sed ignoscamus feminæ nobili, si fratrem stultè fortassis, sed tamen piè desideravit. Immò absolvit eam, si tam insolens ineptumque votum, quàm causa optandi abominabilis fuit. Cur enim voluisti fratrem reviviscere? ut aspectus propinqui hominis te recrearet, ut opera ejus utilitati, auctoritas præsidio, honores ornamento essent? Nihil horum. Quid igitur? ut iterùm classem duceret. Hoc enim erat, ô scelestissimum caput! cur, quantum in te fuit, suscitare mortuos, naturam in ordinem cogere, inferorum refringere claustra cupivisti, ut reperires per quem periremus.

Hæc est, Quirites, cujus misereri vos jubent, qui, dùm bonos se propinquos probant, vix satis cavent ne mali cives habeantur. Et tamen intercedit nemo, quin ipsorum arbitrato misereamini, si cujusquam vestrùm illa miserta est. Sin verò aliis interitum, aliis luctum et orbitatem, omnibus calamitatem, cladem, pestem imprecata est, tam ineptâ mansuetudine quisquam erit, ut animum tam hostilem, tam infensum, tam inhumanum, ullâ misericordiâ dignum existimet? Nuper cùm lustris confecto civium numerum censores edidissent, qui gemitus hominum! quanta mœstitia fuit! Quanquàm multa prosperè per annos istos evenerant, vix tamen bonis viris satis salva videbatur respublica, quæ minùs nunc civium numeraret, quàm superiore lustris habuisset. At hæc illorum jacturâ,

qui periêre, nihil movetur : hoc dolet , quòd aliqui superfuerunt , nimiam Romæ turbam esse queritur ; reviviscere optat eum ipsum , cujus maximè culpâ superioris censûs rationes decrevêre. Sed ipsa quidem mulier indigna est misericordiâ vestrâ. Cæterùm , si quid peccavit , majoribus ejus et patri condonabitis!

Hoc igitur jus in civitate nostrâ statuemus , ut si quis patriæ quoquo modo profuisse dicatur , ejus posteri possint eamdem illam patriam impunè lædere? Minimè profectò sic sensêre majores nostri , qui M. Manlium de saxo dejecerunt , cùm Capitolium , ultimam tùm spem Romani generis , non pater ipsius aut avus aut progenitorum aliquis , sed ipse servavisset. Non debebat quidem adjutæ reipublicæ præmium uberius quæri , quàm facti conscientia : sed tamen si quâ bonam ei operam Ap. Claudius præstitit , mercedem abundè recepit , locupletatus opibus , satiatas honoribus , quibus ad ultimam usque senectutem perviguit. Quanquàm fortassè satius fuisset Appii et superiorum Claudiorum mentionem prætermittere , quàm admonere vos injuriarum , quas domus illa , ab extremâ origine minimè popularis , atroces vobis sæpè et acerbis intulit. Quem enim Appium vos meminisse volunt? aliumne quàm illum qui semper commodis vestris inimico animo adversatus est? qui potius cum exercitu perire voluit , quàm a plebeio consule , collegâ suo , servari? qui censuram ultra legitimum tempus gerere , invitis ordinibus omnibus , perseveravit?

Si jam placet , ulteriùs merita Claudie gentis populo Romano exprobrent , et ad decemviralia usque tempora procedant , vel ad ultimam usque generis istius originem : reperient profectò potiùs , quomodò superbiâ et contumaciâ mulierem istam majoribus suis similem esse ostendant , quàm ut , illorum in gratiam , huic parcendum esse demonstrent. Quid igitur causæ cur hæc mulier impunè peccare debeat , vel isti attulerunt , vel afferre quisquam

potest? nisi fortè metuitur ne tam salutaris exempli feminam ex civitate nostrâ amittamus. Quod si vos etiam veremini, Quirites, retinete, retinete hanc Claudiam; ut, cum matronæ nostræ, dubiis reipublicæ temporibus, ad pulvinaria deorum supplicatum ibunt, illarum pia votâ contrariis votis hæc moretur : ut, cum illæ salutem militibus vestris, hæc exitium optet : illæ incolumes videre, hæc audire oppressos, concisos, trucidatos voveat : illæ sollicitent deos, ne multi in bello pereant, hæc incuset si multi revertantur.

Retinete mulierem, quæ, sicut aliæ matronæ clarorum virorum æmulatione liberos propinquosque solent ad virtutem, ad amorem patriæ, ad charitatem civium incendere; suos exemplo P. Claudii pugnare temerè, fugere turpiter, cives scelestè perdere, rempublicam contumeliosè despiciere doceat. Hæc ab infantiâ meditanda proponat nobilibus pueris, hæc imitanda adolescentibus; sic imbuantur quibus classes vestras, quibus exercitus commissuri estis.

JO. FREINSHEMII *Supplem. in loc. lib. XIX Liv.*

Tamerlan à Bajazet, avant de le faire enfermer dans une cage de fer.

QUIBUS adversus nos animis Angoriam (1) veneris, et quid mihi patiendum fuerit, nisi superbiam virtus devicisset, meministi; nequetibi ignotum est te, mihi quamvis obnoxium, quàm miti tamen clementique captivitate habuerim. Ut enim dignus esses qui sævissima patereris, tamen non ego dignus eram qui facerem. Nunc quoniam tuum insanabile ingenium est, neque, victus armis, vinci

(1) Autrefois Ancyre, dans la Natolie, où Bajazet fut défait et pris par Tamerlan.

beneficio potet; at tu, bellua, trucem istam ac ferinam indolem in ferreâ caveâ contrusus circumferes, spectaculum insigne documentumque mortalibus. Audiant provinciæ rugitus inclusi leonis a quo vastatæ sunt; hoc sibi solatium habeant spoliati reges proculcatique populi, ut tibi jam captivo illudant. Me quidem, ut adhuc fecisti, allatrare non desine. Triumphalis cantus est sævientis captivi convivium.

C. LEBEAU.

Viomade exhorte les Francs à rappeler Chilpéric.

NIHIL patienti acerbius quàm fuisse miseræ suæ artificem; auget pœnam culpa, et molestiam causa quòd ipsi malum nobis confecimus. Hic infixus hæret in animis Francorum aculeus quòd calamitatem ipsi suam pepere- rint, aluerint, et servitute corroboraverint. Quid enim externum Gallum et Romanum imposuimus cervicibus nostris, quasi parum sit externo servire, nisi et Romano servo mancipemur? Majores nostri tam dura passi sunt, tanta ausi, primum ut Romanum jugum excuterent, dein ne cui principi nisi nostræ gentis obsequerentur; amantissimi quippè libertatis, tutelam ejus suo potissimum sanguini tradiderunt. Nos regem expulimus, quem natura, lex, vota omnium throno evexerant, ut peregrinum tyrannum substitueremus. Quid ergò querimus si compedes ipsi procudimus, si ultrò dedimus manus in vincula? Sed malè querimoniis culpæ sanantur: petenda est ab ipso crimine medicina, et facta factis emendanda, non verbis. Audio Chilpericum frugem jam ad meliorem se recepisse, mutatam indolem cum fortunâ, et in miseriis bonam mentem repertam. Quin eum arcessimus? Quin beneficio culpam expungimus? Pellendo externum hostem ulciscemur, reducendo Francum extorquebimus crimini veniam.

DE BUSSIÈRES, J.



Les Députés des Exilés français supplient Théodoric I<sup>er</sup> de leur permettre de rentrer dans leur patrie.

Tui cives, clementissime Rex, nos ad te oratores mittunt, ut quod perpetuis precibus continentibusque lacrymis a Deo optimo maximo petiverunt, id abs te impetrent. Non orant magistratus, non divitias, non magnum in aulâ tuâ vel gratiæ vel potentiæ locum, quamvis, te liberalissimo rege, hæ preces non inverecundæ videri possint: sed liberos, conjuges, parentes, domum, patriam, cælum, solumque: ut, ubi nati sunt, ibi cum quod vitæ reliquum est egerint, te rege, moriantur, ne in exilio, sed tuo in regno sepulti æternum conquiescant. Si quid repentini periculi eis ab aliquâ externâ vi impenderet, æquum foret illos abs te rege suo auxilium implorare; teque in uno collocare spem vitæ ab omni calamitate tegendæ. Nunc domûs desiderio acti, tuam unius fidem mansuetudinemque obtestantur. Eos procul absentes contemplari oculis nequis: sed finge animo te cernere illos flentes, ad genua tua advolvi, pedibusque tuis circumfusos, causam suam tibi commendantes: tametsi malint in te lenitateque tuâ, quàm in causâ ipsorum, suam versari fiduciam: ut homines nati, vel errore suo, vel communi temporum calamitate, vel insuperabili vi fatorum ac necessitate patriâ excesserint potius quàm pulsi sint. Quod grâviora eorum errata videri possunt, eò major tibi, mitissime Rex, gloria erit miseros populares tuos in fidem recepisce, acceptosque servare; ac si dicendum ita est, peccato vel furore suo extinctos ad vitam e sepulcro revocare. Vera enim mors dicenda ea est, vel, ut verissimè dicam, vita morte durior. Eo potissimum tempore, quo tu regnas, domo, suis, seque ipsis carent. Ad te incrimines venissent, restique collo circumjectâ illaqueati,

ut te vel eâ specie lacrymisque moverent, qui pro tuâ clementiâ levioribus permoveris, vel tandem, morte jussu tuo obitâ, semel vitæ finem ac malis pariter facerent : sed veriti sunt, si ad extremam veniæ petendæ spem conditionemque descenderent, ne cui videretur animus tuus immitior eis videri, quàm qui posset nisi extremis remediis mitigari. Per oratores agi, dignum mansuetudine tuâ et spe suâ duxerunt. Eorum preces fletusque supplices deferimus. Tu Rex eorum, tu patriæ civiumque tuorum pater et propè creator, certè quod majus est, vitæ restitutor recreatorque sis, per majestatem regiam, per sanctissimum hujus regiæ nomen, ac, si verè dici pateris, numen, per humanitatem, lenitatem, facilitatem, indulgentiam. Hæc una mihi ac civibus tuis miseris calamitosisque adsit apud te deprecatrix. Finem ego dicendi faciam, illa tecum, Rex clementissime, loquatur. Illam tu audi, quam et audire, et in consilium adhibere non rariùs quàm cæteras præstantissimas virtutes tuas soles.

PAULI ÆMILII, *de Rebus gestis Francorum* l. I.

Charles-Martel aux Français, avant de livrer bataille aux Sarrasins.

LÆTOR, milites, incidisse tempus, quo, nullo nostro periculo, ingentem gloriam parare, et patriam tutando, orbis terrarum defensores et numinis vindices a genere humano vocitari possimus. Gens in quam pugnaturi sumus, solâ multitudine freta, in campum descendit, quasi ipso conspectu debellatura. Cæterùm, si non numero, qui nimius rei militari obest, sed pectore dextrâque virtutem metiemur, non vanum pectoris mei augurium, certam sibi vobisque victoriam spondentis, profectò sentietis. Ruunt ultrò in ferrum spe obruendi aciem hostium, quos si primorum se morti devoventium pertinaci strage

cæcum reliquorum impetum cohibueris, veluti muta pecora trucidantur, ut citius cæde quàm certamine lassitudo satietasque subeat. Nullam regionem nisi vel domesticis malis ruentem, vel externis bellis exsanguem occupavêre. Et nunc ita proditos a suis Visigothos superavêre, ut ab Asturibus Cantabrisque pulsî in nos ferantur, tanquàm Asturibus Cantabrisque virtute bellicâ ac religione cedamus, et certiores tutioresque sedes sibi conjugibusque ac liberis inter nos quàm apud illos habituri sint, cæci cupiditate prædæ, latrociniis non justo bello victitantes. Nec, quòd ingenti numero vagentur, ducesque et castra et signa habeant, idcirco minùs prædones. Quæ illis causa belli, quæ ira, nisi ut templâ diripiant, humanum genus deleant? In eunuchos aut servos Orientis regum pugnare soliti, in Franciâ viros armatosque nos sentient, non congressuri, nisi, quæ maxima omnium pœna exigitur, mentem illis Deus optimus maximus abstulisset, ut tot nefaria scelera suo suorumque sanguine luerent, et numen a nobis staret. Est quoque occultum in eos telum (1) paratum, quod nunc sileri satius sit. In ipsâ dimicatione cognoscetis me nihil ad victoriâ reliqui fecisse. Tantùm pleni humanâ divinâque spe in certamen procedite, memores patriæ, quæ, etiam antequàm christiana efficeretur, nunquàm christiani nominis hostis exstitit; quod nescio an ulli aliî genti usu venerit; et semel veram pietatem professâ, nullum hæresis monstrum genuit; et quæ prima omnium pro religione, non votis tantùm ac sanctitate, sed armis, exercitu, periculoque capitis sui cum Christi hostibus signa contulit, Arianorumque potentissimum ac ferocissimum regem in acie occidit, exemplumque pietatis virtute tuendæ mortalibus præceptum præbuit: ut quicquid

(1) L'accord avec Eudes, duc d'Aquitaine, qui vint prendre les Sarrasins en queue, et contribua ainsi au gain de la bataille.

deindè sanctæ æmulationis apud exterarum gentes existit, id omne illi unum acceptum ferri conveniat. Et cum aliæ nationes documenta a maioribus nostris ac veluti præcepta piorum bellorum petierint, ea ut domestica et ingenita, et quæ evelli insita non queant, nunc nobis vindicanda et promovenda sunt adversus hos hostes, qui ab ultimis terrarum oris, in Franciam acerrimam religionis propugnatricem irrumpunt, et in eam, nondum pacatâ Hispaniâ, cum conjugibus liberisque et imbelli aliâ multitudine generatim commigrant, nec conatibus suis quicquam prosperè cessurum incolumi Francico nomine arbitrantur. Nobis igitur, quamvis explorata virtuti de turbâ et colluvione latronum sacrilegorumque victoria, necesse est viris fortibus esse, ac meminisse quibus parentibus, et in quam gentium de nobis spem orti simus, et quænam terra nos genuerit, exceperit, aluerit, armarit. Nullus est nobis receptus; aut, quam dedit nobis natale solum, vita illi reddenda: aut qui maioribus de impietate triumphatoribus nati sumus, id quod futurum est, vincendum: nec pacis spes cum istis belluis concipienda: cruor hauriendus et campi cæde sternendi. —

Hæc Francus inter suos.

*Ex PAULI ÆMILII; de Rebus gestis Francorum, libº IIº.*

Abdérane à ses troupes.

NEC Abderama rex trahere ulteriùs tempus poterat, commeatibus tantæ multitudini jam deficientibus, et omnibus circà evastatis. Lætus igitur apud suos cupiditate pugnæ ardentes, et, si differrentur, sui ducis injussu præliaturos ita exorsus est:

« Vestra, milites, alacritas nullam postulat orationem: hostium verò mens malesana facit, ut pauca dicenda sint. Dimidiam Galliæ partem nostram effecimus. Eadem

Gallia quæ se universa tutari, rebus suis integris illibatisque, non potuit, nunc imminuta semianimisque videri vult id valere, quod florens vigensque se posse diffidebat. Et qui Galli imperio populi Romani per tot sæcula inviti paruere, nobis illius victoribus ac propè eversoribus obsistere conantur; flumine Ligeri freti adversus nos, qui maria domuimus, Rhodum cepimus, Siciliam spoliavimus, diversissima freta, Herculis, Hellespontique trajecimus. Sed brevitate fugæ, ac propinquitate Turonum urbis aliquid audent. Cùm verò singulos se cum denis pugnatuos videbunt, qui vix deni singulis tot gentium victoribus pares essent, tunc quam spe præceperunt fugam capessent, nec latebris claustrisque urbis tuti a nobis, qui Carthaginem magnam, qui tot urbes arcesque tam invictas inexpugnabilesque ceperimus. Quam igitur nunc video in vobis alacritatem, et certam victoriæ spem, eam in aciem ferte, freti virtute ac felicitate vestrà, et fortunâ fatisque Saraceni nominis ac gloriâ parentum, memoresque non pro laude tantum deimperiisque nos dimicatuos: sed, cùm tam procul a domo, tanto terrarum tractu disjuncti, marique divisi cum conjugibus ac liberis absimus, ad virtutem etiam vincendi necessitatem accessisse. »

*Idem, ibid.*

Pélagé exhorte les Espagnols à secouer le joug des Maures.

**CCELERITATE** et audaciâ opus est, ut, qui causâ superiores sumus, hostes virtute vincamus. Civitates singulæ modico Maurorum præsidio tenentur: civium multitudo nostra est, omnesque viri fortes totâ Hispaniâ navare nobis operam et studium cupiunt: nemoque erit (quem quidem christianum nominare fas sit), qui non continuo in nostra castra se conferat: tantisper modò sustentemus, et recuperandæ libertatis spem in nostrorum animis auda-

ciâ et virtute alamus. Hostium exercitus in varias manus dissipatus est; pars multò maxima in Galliam abiit. Nunc animis et virtute audendum: nunc pro veteri belli gloriâ, pro aris et religione pugnandum, pro liberis, uxoribus, propinquis et necessariis, qui indignâ et gravissimâ servitute premuntur. Eorum calamitates, nostrasque ipsorum ærumnas et pericula memoriâ repetere grave est, oratione recensere, prosequi lacrymis vanum: opem aliquam et remedium adhibere, salutare; tantùm vos viros esse ostendite ex nobilissimo Gothorum sanguine prognatos. Secundæ res voluptatesque debilitârunt, et injuriæ opportunos præbuère: nunc asperæ et profligatæ acuant. An belli pericula adire grave est? At multò illa graviora, liberos, conjuges in servitutem abstrahi, immensæ hostium libidini servire (ô magnum atque intolerandum dolorem, ô gravem acerbamque fortunam!), vos ipsos interfici, quod sit necesse victis accidere. An privatarum rerum amor et otii cupiditas tenet? erratis si, republicâ oppressâ, singulorum fortunas stare posse putatis. Incendii vis, mihi credite, velut ex continentibus tectis in alia trajiciendo cuncta pariter vastabit. An locorum munitione confiditis? Sed neque desides et otiosos hæc montium claustra tuebuntur; nec, si maximè hostes cessabunt, tantam multitudinem, quanta se in hæc loca recepit, solum sterile, et rebus omnibus indigens alere potest. An paucitas nostra despectui est? sed præteriti temporis memoria, et ancipites bellorum casus victoriam non numero stare, sed virtute, satîs declarant. Deo, cujus antè numen irritavimus, et nunc placatum confidimus, facile est numerosas hostium copias paucorum armis prosternere. Tolerabili fortassè conditione, ut in malis, hosti servire consultius fore putatis? Quasi perfido hominum generi ulla fœdera sancta sint, fideique constantia sit a barbarâ gente exspectanda. Cum hominibus enim crudelibus nobis res est, an cum feris et immanibus belluis? Ego quidem,

vobis adjutoribus, laborem et periculum grave quamvis et maximum, suscipiam tamen pro communi salute libentissimè : et, dùm vixero, hostis ero, non barbaris magis, quàm si qui ex nostrâ gente arma conferre et sacram militiam suscipere recusabunt, nobiscumque aut vincere aut mori non malint, quàm in tantâ vitæ acerbitate, ignominiâ et calamitate versari; et suppliciorum magnitudine sanciam, ne hostes maximè metuendi ignavis esse videantur.

MARIANA, *Hist. d'Espagne*, liv. VII, chap. I.

Un des conseillers d'Alphonse, roi de Castille, le dissuade de porter la guerre dans les Etats du roi de Tolède, dont le père lui avoit donné un asile, lorsqu'il étoit proscrit et fugitif.

Quo jure, ô Rex, quo ore civitatem eam armatus invades, quæ te domo profugum, egenum, sine lare familiariter vagantem excepit hospitio, omnibus officiis coluit, undè tibi ad regnum, quod obtines, factus est gradus? Quæ pietas ejus filio bellum indicere, sit ille quamvis nequissimus, qui te, cùm in potestate esses, suis opibus adjutum, patriæ et loco, undè excideras, reddidit? Nimirum instar filii benignè accepit habuitque, ut ejus posteris fratrum loco esse tibi putares. Neque enim minor voluntatis et officii conjunctio, quàm naturæ necessitudo esse debet. Suadere Principi quod decet, multi laboris est: assentatio sine periculo peragitur; ut quisque est animo ignavus (absit invidia), ita procax ore: bella, victorias, urbium eversiones loquitur; ignavissimè cujusque consilio bellum suscipi potest, strenuissimi labore et periculo geritur. Quanta sit Toleti firmitas, quantis munita sit operibus, nemo ignorat. At invitamur a civibus! Quasi multitudini fidendum sit levissimæ et inconstanti, atque eò vela convertere solitæ, undè sibi aliquis favoris et

melioris spei flatus aspiraverit ! At tyrannidem evertere pulchrum est ! Honesta scilicet species minimèque fallax, nŕ simul humanitatis et grati animi leges everterentur. At Hissemi ( patris ) morte jurisjurandi religione soluti sumus ! Verum : sed Superos utriusque voluntatis et perpetuæ benevolentiae, quam pacti estis, testes fallere non possumus ; eosdem ne ultores sentiamus providendum est. Hæc non eò pertinent ut laborem et periculum defugiamus, ô Rex ! Idem animus nobis est, qui fuit semper, promptus ét alacer ; inermes quoque, nudi et exsanguis, si stat sententia pugnandi, ad bellum sequemur : sed in consilio dando accipiendoque nobis libera vox, tibi propitiæ aures esse debuerunt.

*Réponse du Roi.*

Non ignoro, viri nobiles, multa esse quæ animos ab hujus belli cogitatione abducant : plura per hosce dies de industriâ a quibusdam ad terrendum esse jactata. Sed neque improvisa vobis esse debet mendacii vanitas. Ignavia metusque omnia in majus auget. De religione non dicam, ac ne de ingrati quidem animi notâ, quæ nobis opponitur. Hyaia ( *Regis Toletani* ) sceleribus procurandis satis utrumque credimus expiari ; patre judice et arbitro, qui pœnas gravissimas daret, eumne æquum est, paternæ amicitiae respectu, liberum evadere ? Urbis fortissimæ difficultas objicitur ; sed virtuti vestræ omnia pervia erunt ; sic magnam Hispaniæ partem, nostra et Sanctii fratris auspicia secuti, armis subegistis, barbaros acie sæpè vicistis ; munitissimas urbes et arces virtute vestrâ cepistis. Omnia virtuti prona, quæ ignavis ardua sunt. Hostium multitudo opponitur ; nunc scilicet primum inconditam sustinebitis turbam, quæ ipsa se suâ multitudine impedit ? Imbelles sunt quibus bellum inferre paramus, et longâ armorum desuetudine enervati.



**Jam** Toletō captā, quominus longissima spatia emensi ad Hispaniæ finem, atque laborum metam perveniamus, nihil obstat; nomini christiano, regnoque nostro, et vobis ipsis, labore non maximo, gloriam immortalem parabit. Cavendum ne cunctando metuendoque agendi tempus elabatur; et, quod evenit in tardis consiliis, optima deinceps videantur, quorum opportunitas effugerit.

MARIANA, *Hist. d'Espagne*, lib. IX, c. XV.

Léopold, duc d'Autriche, accuse Richard-Cœur-de-Lion, devant l'empereur Henri.

**REDUX** a bello sacro Ricardus, Angliæ rex, cum Adriaticum mare cum suis teneret, exoritur fœdâ tempestate, disjectâque classe, ipse fluctibus in Illyrici oram ejectus, depositâ majestate, perpaucis comitibus, sumpto Templari habitu, Germaniam, quâ proximus erat, petit; Francum, a quo maximè insidias vimque timebat, vitaturum se ratus. Aliundè malum ei conflatum. Facies orbi terrarum nota fallere non potuit; et conspectus in digito regius annulus ab hospite illum indicavit prodiditque. Cognitum igitur Ricardum Lupoldus, Austriæ dux, cujus populares in Asiâ res gesserant, simulatesque cum Anglis exercuerant, divinitus sibi oblatum, de quo pœnas repeteret, ratus, Ad Henricum Augustum duxit, atque ita verba fecit:

« Hic est, Auguste, Ricardus, qui in Siciliâ res perturbavit, ubi sublevatus cultusque ipse ac miles fuerat. Turcis bellum inferre se jactans, cum Christianis gessit. Nullum locum christianum nisi hostili animo adiit; Cyprum, christianum regnum, armis evastavit, prædæque totum dedit. In Asiâ, cum Philippo Franco, rege optimo, tibi ac tuis amicissimo, simulatam gessit. Ne Christianos a Turcis captos permutatione reciperet, dedititios

illorum ad Ptolemaidem propè omnes interemit; reliquos, ditissimum quemque quæstui habens, pecuniâ vendidit; Hierosolymitanum iter ingressus, medio ex itinere nullâ novâ re adactus rediit. A Saladino munera litterasque nullo non die accepit; ac jam propè fœdere jungebatur. Germanos cives nostros, quicumque in Asiâ res gerebant, ad eò impotenter habuit, ut atrociorẽ hostem Ricardum quàm Saladinum experti sint.

» Hæc tibi, Auguste, orbique terrarum nota sunt literis, nunciis, celebri terrarum famâ. Si quid eorum negat, paratus sum armis fidem facere, ac virtute judice, hæcque dextrâ decernere. » Hæc dux.

*Réponse de Richard.*

« Neque ego, Auguste, res in Siciliâ turbavi, neque turbatas lætor. Sororem meam viduam dote suâ fraudari, ac ludibrio esse quibus minimè æquum erat, pati tacitus non debui: et sic quoque quàm mitissimè potui rem transegi, nullo graviore motu per me facto. Cyprum procellis impulsus impactusque, cùm, quassatâ laceratâque classe, littorum appulsu prohiberer, necessaria sumpsi arma, Latinorum hostes lacessitus edomui. Ingentem de illis prædam parere quî poteram, quos Græcorum imperium et Turcica amicitia exhausterat? in eos cæde non sævii: regem iis Latinum dedi, qui abs te mutari possit, si fortè ejus te, Auguste, pœnitet.

» Cum Philippo rege simultatem exercuisse insimulor, qui conqueri justius possum quàm accusari debeo. Ille, dùm religioni milito, fertur ducatu Normanniæ ditionis meæ imminere. Quos Barbarorum occidi, Saladini injuriâ perfidiâque adductus occidi; quandò quidem neque sanctam crucem reddebat, neque pacta satraparum suorum rata volebat. De hostibus hostis supplicium sumpsi; optarem de Saladino sumere licuisset. Quod a dimissis

aurum accepi, id divisi militibus Latinis. Aspice quas, excepto hoc annulo, mecum divitias nudus inopsque referam. Neque deserui socios, ultimus procerum, ac post accusatores redeo. Ab Saladino fœdus, litteras, munera quo pacto accepi, qui ne suorum quidem ducum fidem persolvit? Eodem animo ab Saladino munera quo famem, pestem, diras, inferos acciperem. Germanos cur superbè in Asiâ tractâssem? Satis negotii mihi Angli reliquique mei dabant.

» Famæ Asiaticæ, Cæsar, ne credas: falsa insidiosaque est a Saladino Turcisque, ut inter nos bella serant, conflata et ad nos emissa. Fama percubuerat me percussores Franco Regi paravisse. Hæc initio credidit Philippus, latusque suum munierat, nec quemquam nisi excussum admittebat. Convictâ mendacii famâ, animum suspicione, latus custodibus, suos metu liberavit, testatusque est Asiaticæ famæ nullam fidem habendam. In Asiâ nullam de nobis nisi nobis pestiferam famam nasci puta. A Turcis gignitur, a nostris imperitis excipitur, educaturque; illa magnis ultrò gaudens incrementis, fanda nefandaque affingit. Nos oracula credimus, in vulnere nostra quàm in salutem proniores.

» Si quis Germanus miles a me avarè superbèque habitum se queritur, prodeat: quicumque infectâ re Asiâ redimus, fortunæ, hominibus, terrisque omnibus, et nobismetipsis irati redimus: omnia incusamus. Nihil a quoquam in nos nisi hostiliter profectum arbitramur: et ipse fortassis, nisi accusarer, accusarem.

» Quòd autem ad Martis iudicium vocor, suscepam crucem pro religione tutandâ: si quis eam oppugnat, dimico; pro capite meo, nisi regressus domum, non dimicabo. Satis in Saladinum pugnavi: tot millia hostium religionis acie occidi, quot secundùm magni Gotthofredi victorias nullus. Coegi hostem inducias in quinque annos piis dare.

» Desertæ proditæque rei christianæ insimulor tantisper, dùm et Joannes frater minor regium nomen invadere dicitur, et Philippus rex Normanniam tentare. At tu, Auguste, patriæ me, mihi patriam restitue; ut, ex quâ movit me studium religionis defendendæ, in eam mansuetudine tuâ revehar; et, ut pro nomine ac decore christiano arma indui, ex Angliâque profectus, extremum propè Orientem petens, in Saladinum pugnavi, ità pro te imperioque tuo et majestate nominis tui, meo meorumque sanguine, ubicunque jusseris, pugnem, ac vitam, si res ferat, profundam. »

Nihil motus his Germanus duodeviginti menses Anglum in custodiâ habuit, nec dimisit nisi centum millibus ac quingentis pondo argenti redemptum.

*Ex. P. ÆMILII Histor., lib. VI.*

Le Président du Conseil de Flandres au faux Baudouin.

REGENTE res Flandricas Annonicasque Joannâ Ferdinandi uxore, eadêm Balduini Græcorum Augusti filiâ, qui pro mortuo comploratus fuerat, ac, consternatâ malis Flandriâ, exstitit repentè qui se reducem Balduinum Cæsarem esse prædicaret. In Annoniâ res jam moverat, quòd id natale solum Balduini ac paternus dominatus foret, tæderetque feminei dominatûs, eaque gens sit Francorum imperio subdita. Eum Flandria modico comitatu finibus recepit, sed nondùm Comitem Cæsaremve agnovit vel salutavit. Ipse gravitatem oris, quàm maximè fieri potest, præ se ferebat, dùm venerationem suâ captat, conciliatque majestatem. Joanna in conspectum admittere noluit: tantùm ei sanctius concilium datum est. Cui qui præerat, velut quæsitior, eum gravibus fatigare percontationibus ausus, « Si verum te, in- » quit, Balduinum jactas, si non falsum Græcorum

» Augustum te gloriaris, interrogo cur rem Constanti-  
 » nopolitanam, fidei tuæ creditam, eo destituisti tem-  
 » pore, cùm tuo consilio ac virtute indigeret? Cur opti-  
 » mè meritos de te duces, qui te toto ex orbe terrarum  
 » unum delegerant, et in arce gentium collocârant,  
 » ferocissimis hostibus objectos deseruisti? Ut, etiamsi  
 » verè Balduinus fores, æquius esset nos dissimulare et  
 » ignorare quàm, cùm sis commentitius, agnoscere.  
 » Cur, re totius Orientis, ut humeris tuis innixa susti-  
 » neretur, tibi creditâ, per te perditâ, mortem simu-  
 » lâsti, vitam dissimulâsti? Quæ tanti mendacii merces?  
 » Quæ digna tanti commenti causa? Si mortuus credi  
 » voluisti, cur te vivum credamus? Cùm viginti annos  
 » nusquàm fueris, nullus fueris, cur, Philippo rege  
 » vivo, vivisque iis qui te coarguere mendacii possent,  
 » non rediisti? num te e sepulcro excitâsti? Quibus  
 » tenebris lucem tuam faciemque generi humano notissi-  
 » mam occuluisti? quod novum os gerens, tot annos  
 » mortalium oculos quibus præstigiis delusisti? Simul  
 » illud quæro nùm tantò post deploratum verum Baldui-  
 » num Augustum, cuiquam dicenti: Balduinus ego  
 » sum, fidem continuò habendam censeas? Fuerintne  
 » aliquandò ignobilissimi homines, qui nobilissimorum  
 » imperatorum nomen invaserint? Secundùm discessum  
 » veri Balduini tot orbes temporum, tam multas rerum  
 » vices experta est Annonia: sensit Flandria: passi om-  
 » nes fuimus: ecquam spem in bello, ecquid solatii in  
 » calamitate tulisti? Hæccine te terra civem, principem,  
 » comitem, agnoscat, quam rebus dubiis nec patriam,  
 » neque altricem agnovisti? »

*Réponse du faux Baudouin.*

Ille ingenti fiduciæ ostentatione, non ut respondere  
 jussus, sed velut castigans increpitansque, vel magnitu-

dinem suam, vel audaciam tegebat: se domi inclementiores populares nactum, quàm foris hostes; se ad Adrianopolim egregiè pro decore patriæ, imperioque civium, qui nunc se insectentur, decertantem, ut res bellicæ ferunt, inclinatis ad iniqua rebus, circumventum ab hostibus, majestate tamen nominis et sui et publicè Flandrici tectum, nihil ignominiosi, nihil duri perpesum: asservatum cultumque per duodeviginti annos apud eos fuisse; et longâ die remittente se custodum curâ, et ope divinitus latâ, sibi occasionem elabendi datam. Cùm domum refugeret, rursus ab aliis Barbaris captum, ignaris quem comprehenderent, nec se quis esset aperientem, itâ in Asiâ ductum, ac velut vile mancipium Syris quibusdam ab iis se venundatum: in ergastulo bienium fuisse: quibus manibus bella gessisset, sceptrâ tractâset, coactum opus rusticum fecisse: cùm Germani mercatores per inducias inter Latinos barbarosque Asiaticos factas, fortè quo in agro foderet, per eum contenderent, inter seque (ut ad levandum laborem itineris assolet) verba facerent, se, qui germanicè sciret, illis revocatis aperuisse, quis, quo casu ad id miseriarum pervenisset: ab his non magno se redemptum, ac domum remissum, audire probra in se a suis, quæ non Græci bello petiti, non Thraces finitimi ferocissimi, non Scythæ effera gens, non barbari Syri, quibus pretio venisset, jactâssent. Nunquàm rem Flandricam ampliores magnificentioresque quàm se Comite; nunquàm augustiorem gloriam nominis Flandrici quàm se principe domi peregrè exstitisse: ingrati patriam, ingratos populares: se reducem, tot fluctibus jactatum, insuper indiginitate verborum insectari: mutatos profectò mores degenerâsse a patribus illis qui, se duce, jura Græcis dederint: nec mirandum, absente se, patriis institutis repudiatis, novis exortis, afflictam Flandriam, quæ, se administrante, floruerit.

Addebat graviora, cùm concilium a quæsitore dimittitur, quòd nullum decretum maximis de rebus, nisi exploratâ Joannæ voluntate, facere consueverant. Illa hominem maximè aversata, simul anxio erat animo, quòd non parva Flandricæ nobilitatis manus Comitem eum Augustumque salutantes jura ab eo peterent, qui fidem majestatis suæ faciebat, nomina commemorans, nobilitatemque et egregia facinora majorum natu, stemmataque familiarum, a quo quisque progenitus foret. Mulier ad Regem Francum oratores supplices misit, ut Balduini avunculi augustam sanctamque memoriam ab ignoti hominis audaciâ vindicaret, sibique beneficiariæ et rex et amitinus opem ferret. Dies igitur ei dicta; præstò fuit magno comitatu: simul atque introductus est, cùm regem salutasset:

*Louis VIII au faux Baudouin.*

« Quonam te, inquit Rex, nomine resalutem, nondùm mihi compertum est. Balduinus fuit idem et avunculus meus, et Flandriæ Annoniæque comes, omnium comitum nobilissimus, simul et Græcorum Augustus. Hunc ego adolescentulus luxi, ejus morte allatâ: frater vir fortis ei in imperium, filia in comitatum successit; et meâ in fide est Flandria, Franciæ contributa. Optarem, si fas esset, si facta infecta votis reddi possent, avunculum mihi, amitinæ patrem, Francis nobilissimum beneficiarium, rei latinæ Augustum apud Græcos nomen regredi domum, si nondùm diem obiit, aut reviviscere si decessit. Famæ mortis tam constanti, tot annorum rumoribus temerè fidem non derogo. Testimonio enim mortalium, quæ una famæ vox est, res humanæ imperiaque constant; quem haberi te velis effare. Si avunculum te vis esse, id aliquo monumento documentoque confirma. Nihil mihi, quò inexpectatius, eò

et grätius 'jucundiusque erit, quàm falsò defunctum luxisse, reddique avunculum, quem parentis loco habeam. Brevis percontatio te eundem et testem et judicem tantâ in causâ faciat. Interrogo, tene pater meus Rex beneficiarium vocitârît, ac jure Flandriæ vestierit? quo loco, tempore, ritu, teste; balteo ne te, militiæque insigni donârît? Tibi quænam femina ex Francicâ nobilitate, quo conciliante, quibus auspiciis, quo loco, quâ celebritate nupserit? Hæc de se ignorare verus Balduinus non potest. »

Tunc hære visus, nec responsa explicare. Fide publicâ venerat. Dimissus ab Rege, cùm in Annoniam rediret, a Joannæ ministris comprehensus, reste suspenditur, famâ ancipiti, jure an injuriâ.

P. ÆMILIUS, *de rebus gestis Francorum*, lib. vii.

Un Evêque fait l'éloge des soldats morts à la bataille de Dorylée.

NULLUM unquàm, invictissimi duces, ac fortissimi milites, prælium majori virtute commissum gestumque est, quàm quod hesterno die cæsis cæli hostibus profligâtis. Omnia Orientis regna opulentissima validissimæque vos alieno in orbe terrarum circumventos domi ipsa suæ adorta, dignam furore suo mercedem tulère. Dominor gentium exercitus a vobis victus, cæsus, stratus. Nobilissimus dux fusus, fugatus, nihil sibi relictum arbitratus, quæ ipsius modò fuerant, tanquàm nostra effecta, diripit, incendit. Prædas hominum pecorumque abigit, qui, velut alter Alexander, jura humano generi dare in animum induxerat. Immortalem gloriam, summumque nominis decus vobis dextrâ peperistis, qui clausum piis Orientem ferro aperuistis. Sed admirandæ virtuti uberissima præmia, fructumque ævi longi Deum optimum



maximum, pro quo dimicâstis, daturum confido, ut et victoriam dedit et eâ superstites vos perfrui voluit, quò majores animos ad reliquias belli, si quid fortè superest, persequendas gereretis. Sed erit semper locus de incredibili fortitudine vestrâ prædicandi, nec erit ulla solitudo tam muta, nulla regio tam inculta, nulla, consenescente mundo, tanta temporis diuturnitas vetustasve quæ de vobis conticescat, vos non admiretur, vos rerum columnen non fateatur.

Nunc de iis, quos fato functos ab oculis nostris raptos immortalitas consecuta est, paulò plura dicenda sunt, ut justum eorum desiderium gratâ laudum commemoratione leniamus : eò etiam æquiore animo, quòd decoris maxima pars vobis cum illis, ut inter commilitones, et gloriæ conatûsque socios, communis erit. Hi enim vobiscum religione adducti, primi omnium mortalium veræ virtutis speciem animo concepère, et homines nati majora humanis consiliis et ausi sunt, et perfecère. Diversi disjunctique inter se patriâ, genere, linguâ, moribus, institutis, tantâ pectoris tamque Germanæ mentis consensione conspiraverunt ac coaluerunt, ut unius urbis cives omnes viderentur, ut fratres inter se essent, ut Iberus, Rhodanus, Rhenus, Tamesis, Tiberis, Danubius, Albis, unius ejusdemque omnes civitatis, unius alvei amnes credi possent : et quos natura cardoque cœli diremerat, ii causâ, voluntate, militiâ, signis jungerentur, clarissimis quidem ducibus, sed compluribus, neque uno penes quem in cæteros jus imperiumque et arbitrium sit. Qui tamen ita divinitus unanimes facti sunt, ut terrarum adhuc incolæ velut cœli consortio collegioque perfruantur.

Horum ducum vocatu, commilitones vestri, quos fato gloriosissimè functos, ô milites, oratione mortali, dignos omnium sæculorum præconio, celebramus, non legibus humanis, non usitato delectu, tantâ alacritate nomina dedere in Christi militiam, tantâque constantiâ bellârunt

pugnâruntque, quanta nemo unquàm pro patriâ, pro parentibus ac liberis, pro se ipso dimicavit. Ducum imperiis ut Numinis oraculique voci dicto audientes fortissimi, dùm vitam inter nos agerent, sanctissimi æternitate partâ. Vivunt gloriâ, vivunt rerum perpetuitate, vivent memoriâ sempiternâ; vivent sensibus nostris sacri, vivent meliore suâ parte. Non enim corpore vita constat, re mille quotidie casibus obnoxia: spiritu, animo, mente, quæ numine afflatur impleturque, ævum degunt. Cadaveribus quæ terræ matri debebantur redditis, nullâ mole gravante, leves expeditique, quò sua eos virtus numenque ferebat, se cœlo inseruere sole lucidiores. Vivitis felices, Superûm consortes animæ. Emeritis vitæ stipendiis, præmia, honores, commoda veteranorum invictissimorum percipitis. Sanguine vestro fusi, fugati, cæsi, strati sunt hostes templorum, ararum Numinis. In tuto nos collocastis. Quod longè maximum difficillimumque erat, nec, nisi a vobis parique vobis virtute, fieri poterat, Orientem universum vicistis, superastis, fregistis: nobis cætera facilia pronaque præstitistis. Tantùm fremens frendensque, sed exsanguis, edomandus nobis hostis, arma longiùs ferenda, erigenda Crucis tropæa, Hierosolyma recipienda, exempla vestra nobis proponenda. Vestigiis vestris insistendum. Vicistis, nobis victoriâ vestrâ utendum. Quod majus patriæ decus, liberis patrimonium, parentibus gloria, uxoribus solatium relinqui potest, quàm inimitabilis propè virtutis memoria, ut vos, cœlestes nunc animæ, antè strenui milites, reliquistis? Quos nos, vestri modò socii commilitonesque, æquare forsitàn possimus, posteri magis admirabuntur, quàm assequi se posse confidunt.

Hæc de sanctissimis militibus, qui hesterno prælio cùm ad cælum evoluturi essent, divinam virtutem inter nos præstiterunt, delibâsse satis sit. Cùm pro dignitate celebrari ore non possint, vos, milites, exempla ab his

religionis fortitudinisque petatis, horum virtutem imitemini; posteri vestram imitabuntur. Memoria horum omnibus horis, sed precipuè in pugnâ, vobis sancta sit, oculis vestris obversetur, pectus vestrum afficiat. Ità in bello perficiendo felicitatem sperate, ac Numen secundum propitiumque, si divinitus ad sacrum bellum vocati ducibus a numine datis parueritis, et sanctorum militum præclara facinora æmulamini. Quos ut majori religione in acie imitaremini Deus optimus maximus cœlo imperavit, memoriâ eorum vobis ut summo munere relictâ, quorum imaginem sempiternam in imas pectoris vestri aras demitteretis (1).

PAULUS ÆMILIUS, *de rebus gestis Francorum*, l. vi.

Charles VIII à l'armée française, avant la bataille de Fornoue.

Si quam alacritatem hactenûs in propulsandis hostium injuriis ostendistis, eandem retinetis, certam jam vobis spondeo victoriam, milites. Enimverò quin retineatis, neque mihi unquàm dubium fuit, neque magnitudo animi vestri, multis magnisque rebus perspecta, vereri sinit. Cum iis hostibus res nobis et, quorum si nunquàm vires experti essemus, hærendum nobis fortè esset. Jactitare enim et rei militaris peritiam et proavos magno fastu soliti sunt. At, quò magis facta dictis potiora sunt, eos toto hoc itinere superatos a nobis meministis. Si Neapolitanum principatum, quem se nobis hoc prælio adepturos putant, retenturi demùm essemus, satîs equidem ampla essent operæ pretia. Nunc depulsis hostibus, et ille fixus manebit, et quicquid Veneti tot fraudibus

(1) Voyez plus bas; et les *Leçons latines anciennes*, tom. I, *Discours*.

versutiisque partum habent, in nostram fortè venturum est potestatem. Equidem, cùm totâ hâc peregrinatione nostrâ Neapolitanâ ut hospites amicissimi undique reciperemur, nullum pretium tanti itineris vigiliarumve referre vos angebar. Veniebat enim in mentem præmio excitari magnorum etiam virorum animos. Nunc verò illuxit dies, quâ, spoliatis ditissimis, sed inertissimis hostibus, digna tandem tot laboribus præmia recipiatis. Nec quàm multi hostes in nos irruere dicantur, anxie quæsieritis. Sæpè multitudo ipsa mole suâ corrui. Totæ illæ copiae ex ignavissimis hominibus coactæ sunt, qui, languidi vino, confecti cibo, debilitati stupris, eructare sermonibus suis cædem nostram audent : sed pœnas jamdudum perfidiæ inertiaeque debitas hodiè persoluturi sunt. Nobis adsunt Helvetii, fidelissimi socii, equites expeditissimi, machinæ bellicæ instructissimæ. Quòd si, quam fremitus iste vester alacritatem ostendit, eandem retinetis, vicimus, milites; atque ità vicimus, ut hic dies in posterum et Gallicum nomen hostibus formidolosum redditurus sit, et nos posthàc a talibus eorum conjurationibus liberaturus.

Conclamatum est a toto exercitu felicibus auspiciis prodiret : futurum ut per hostium cadavera viam aperirent.

ARN. FERRONUS, *de rebus gestis Gallorum*, l. 1, 1550.

Lisle-Adam exhorte les habitans de Rhodès à se défendre contre les Turcs.

MAGISTER equitum ne quid imparatum inexpertumque sineret, paratis omnibus ad bellum necessariis, cives ad se in prætorium vocatos in hanc sententiam allocutus est :

« Magnanimi viri, civesque optimi, audimus hostem

Turcam, perimagno ex diversis gentibus collecto exercitu, ad nos properare. A cujus innatâ crudelitate, solitâque perfidiâ nisi nos ferro vindicemus, mihi equitibusque meïs ac vobis etiam unum et commune periculum est, siquidem unanimi conspiratione et operâ res ejus graviter terrâ marique affliximus, prædâ ex agris ejus vi abactâ estis locupletati. Gentem ei subditam hodierno etiam die gravi servitute opprimimus; injuriâ ille, nos jure optimo dicimus; siquidem illius majores, specus subterraneos et tenebrosa antra Caucaseæ rupis ampliùs non ferentes, nullo jure, nullo titulo, nullâ causâ, solâ avaritiâ et dominandi cupiditate, odioque sanctissimæ nostræ religionis irritati, Christianos e Syriâ expulerunt. Deinde Græcis suam Græciam, sed non unâ morte gentis contenti (ut semper fera et immanis est barbaries), animam variis exquisitisque suppliciis eripuerunt. Quos iste supra ætatem malus et arrogans puer, omnibus gravis accola, Arabiæ, Syriæ, Ægypti, regni Persarum, magnâ parte totius Asiæ dominatu, tot prætereâ locorum ac populorum imperio non contentus, tyrannide, cæde, bello, rapinis, perfidiâ, odio, impietate erga Christum et homines superare conatur, et nostras insulas, terrasque Christianorum universas occupare mirum in modum laborat, ut tandem rerum omnium et mundi dominus, diruat christianas urbes, Christianos obtruncet, christianum nomen sibi tantoperè invisum penitus deleat.

» Quam non ferendam injuriam ut propulsaremus, sedem potissimùm in hâc Rhodo insulâ delegimus, quòd hic locus ad bellum Barbaris inferendum visus sit cæteris opportunior. Fecimus quantum in nobis fuit. Adjutis a vobis: experimento cognovimus quanta sit virtus, quanta fides vestra; quam ne nunc mutetis, nulla suspicio. Quapropter non agam multis, ut in fide et officio permaneatis; nec longâ ambage ad virtutem vos hortabor, quam fortibus verba nec addunt, nec demunt.

De me et equitibus meis, divo Joanni devotis, parcè quædam loquar. Sum cum his quibus, ut spero, aderit principum christianorum et aliorum equitum meorum qui in Occasu sunt, peropportunum auxilium, paratissimus defendere vos, liberos vestros, conjuges, fortunâs, fanâ, monumentâ majorum vestrorum, et cœlestium delubra. Quam opinionem ut fixam immotamque vestris mentibus retineatis, efficere possunt, ne quid dicam aliud, fidele ingenium, in bello nec segne omninò, nec rude corpus, sanâ et perpetuâ valetudinè ferendis laboribus et exubiis aptissimum, equitum meorum nobilitas et amor erga vos, inimicitia in hostes, urbis prætereâ robur, quam hic sacer et nobilis ordo ingenti pecuniâ adversus omnem tormentorum vim atque impetum sic egregiè munivit, fossâ, vallo, muro, mœnibus, turribus, propugnaculis, ut nulla sit civitas quæ huic, nedum præferri, sed nec æquari possit. Ad hæc armorum telorumque incredibilis copia, vinum, caro, frumentum sub terris conditum, ne humor, aer, gurguliove corrumpere possit, mirè abundat. Hominum ad bellum aptorum haud parvus numerus; lignorum magna undique strues; aquæ saluberrimæ, quæ inclusis obsessisque plurimùm ad varias necessitates utilis esse solet, largâ et indeficiens ubertas: quæ omnia certam victoriam, certissimum et optatum belli eventum nobis spondent.

» Addo quòd ex nostrâ parte pugnabit necessitas, pugnabit fides, pietas, constantia, pugnabit amor patriæ, amor libertatis, amor parentum, conjugum, liberorum. Illic voluntas magis ducum quàm militum, perfidia, impietas, inconstantia, cupido vestræ servitutis, odium parentum, conjugum, liberorum vestrorum. Procul dubio, carissimi cives, non sinet Deus optimus tot tantasque virtutes ab istis vitiis superari.

» Estote ergò animo pacato et securo, nihil hostile, nihil ominosum metuentes. Tantùm in fide, quam tot an-

nos difficillimis bellorum et fortunæ casibus impliciti sacro militari ordini illæsam servâstis, permanete : et, si necessitas postulet, armis dextrisque virtutem vestram hostibus ostendite; fidem facite Hispanis, Gallis, Pannoniis, Italiæ, Britanniæ, Rhodios homines posse Turcarum spiritus reprimere, illorum classes et exercitus ab Italiâ avertere, cui tot annos ferrum et flammæ minantur : ad quam mirabiliter festinant, et pervenient, si, quod animus abhorret effari, hi vicerint. Neque enim ambitiosus iste puer, animo, perfidiâ, crudelitate Annibalem superans, Annibalem imitabitur, qui, factâ ingenti ad Cannas Romanorum strage, victoriâ uti nesciverit : sed continuò, Julium Cæsarem celeritate vincens, expositis omnibus opibus Ægyptiis, quas pater in direptione Cairi reperit, Apuliam, Calabriam, Siciliam magnâ classe, magnis exercitibus invadet. Indè in Gallias irrupet, mox petet Hispaniam, cæterasque Christianorum regiones, et omne crudelitatis genus in universos exercebit.

» Sed latiùs me rapit oratio quàm velim, aut opus sit. Fides enim et virtus vestra, magnanimi cives, in tolerando et oppugnando hoste firmior est, quàm ut oratione indigeat; constantior, quàm ut malis, quæ inclusos obsessosque pati necesse est, confringi possit, quanquàm illa quæ verè mala sunt, famem et sitim omninò non sentientis. Excubias in stationibus agere necessarium erit, domorum ruinas, si tormentis ejaculata saxa inciderint, æquanimiter tolerare. Sed ea mala sunt quæ reparari possint, et minora, quàm ut ideò deditionem hosti faciamus, in cujus clementiâ et fide nulla spes est. Præterquàm enim quòd naturâ crudelis et perfidus est, tum nobis, qui tot illi mala intulimus, a quibus solis sibi, ut ait, dominatori terræ et maris, quo eum sæpè deturbavimus, resisti dolet, nullo modo mitis fidelisque esse poterit, quos toties Marte aperto, vi publicâ, ingenio,

astu, dolo, fraude adortus est, verum semper conatu irrita, opitulante nobis Deo optimo maximo, quem ante omnia velim propitiemus. Nisi enim ille custodierit civitatem, frustra vigilant custodes (1). »

Jac. FONTANUS, Brugensis, *de bello Rhodio*, lib. 1 :

Un ami du premier Président du Parlement d'Aix le dissuade de mettre à exécution la sentence portée contre les Vaudois de Merindol.

CUM horrendâ admodum et supra modum atroci sententiâ Valdenses in Galliâ a senatu Aquensi damnati essent, præsidente tum senatui Bartholomæo Cassanæo, magni nominis jurisconsulto, Nicolaüs Alenius, ex Arelatensi nobilitate vir probus, et litteris non mediocriter imbutus, ridiculâ quidem, sed personæ accommodatâ oratione, rem distulit. Is, Cassanæo perfamiliaris, cum judicii iniquitatem ægrè ferret, in colloquium privatum admissus, his verbis nutantem præsidem aggredditur :

« Qui de sententiâ nuper in Merindolianos latâ sermones ubique jactentur non ignoras; nec mei est aut animi aut officii, de iis pronuntiare; quippè qui probè nôrim, quanti reipublicæ benè constitutæ intersit suam judiciis auctoritatem constare, nec temerè illam in dubium vocari. Sed, perpensâ rei gravitate, an pœna differri, et morâ interpositâ mitigari judicii acerbitas debeat, id verò quæritur. In quo cum variæ, eæque magni momenti rationes afferantur, pro arctâ, quâ conjuncti sumus, amicitia, tecum quoque familiariter et tuis argumentis agere constitui. Meministi quid olim, cum adhuc in minoribus subselliis Augustoduni in Heduis sederes, in causâ mu-

(1) Voyez plus haut, *Narrations*.



rium senseris. Id enim et libris editis consignasti, et te, quâ animi modestiâ et candore es, libenter istorum temporum memoriam recolere animadverti. Sic autem rem enarras :

« Cùm in Heduenſi præfecturâ murium ingens multitudo corrosis paſſim ſegetibus magnum detrimentum afferret, nullum præſentius remedium novo morbo populares invenisse, quàm ſi epiſcopus ejusve vicarius mures diris devoveret. Igitur, re cum epiſcopi vicario communicatâ, illum cenſuiſſe ternis mures præconiis forenſibus in jus vocandos. Quo facto, tamen noluiſſe de conſilii ſententiâ judicium fieri, niſi priùs muribus patronus daretur, iſque pro abſentibus cauſam diceret. Quapropter te murium patrocinium ſuſcepſiſſe, in eâque cauſâ, pro perſonâ quam ſuſtinebas, multis rationibus perſuaſiſſe judicibus, haud ritè atque ordine in jus vocatos mures ; atque ut iis de integro diem curiones in ſingulis parœciis dicerent, impetraſſe, propterea quòd eo judicio murium omnium ſalus ageretur : quo impetrato, ruſſus in brevius tempus comperendinatum judicium demonſtraſſe, quàm ut mures adeſſe poſſent ; quibus per omnes vicos inſidias a felibus ſtructas eſſe conſtaret. Plurima deindè quæ ad murium deſenſionem pertinerent, e ſacris litteris adduxiſſe, et ut diem latiùs judices proferrent, tandem obtinuiſſe, eoque facto magnam æquitatis et juris peritiæ laudem te conſecutum. »

» Nunc ad tuum te librum, ad tua te argumenta voco: Quid enim magis hominum auribus et animis inauditum, quàm ut, qui in murium cauſâ ordinem judiciorum ſervandum duxeris, cum, cùm de vitâ, ſalute et fortunis hominum agitur, pervertendum existiſſes? Cave ergò ne in ignavorum lanistarum aut gladiatorum culpam incurrere dicaris, qui, cùm rudibus batuunt, gladiatoris artis præcepta ſervant, et victores sæpiùs evadunt ;

ubi stricto ense cum inimico res est, furore aut perturbatione incensi, artis obliviscuntur, et se plerumque confodiendos præbent. Quod in ludicro judicio servastis, cum adhuc juvenis ac ferè privatus esses, id in re tam seriâ istuc ætatis et dignitatis in quâ tantam de te omnium opinionem concitasti, non servabis? Adeòne viles tibi tot miserorum hominum animæ, ut duriorem sortem, te nunc judice, quàm olim mures, te patrono, experiantur? De eorum innocentia non loquor. Sed scis ipse quàm multa illis per calumniam affingantur, alioqui sedulis Dei cultoribus, et dominis sua jura, principique et magistratui tributum et obedientiam præstare nusquam detrectantibus. Quamobrem pro necessitudine, quæ inter nos est, iterum te etiam atque etiam rogo, ut hæc argumenta maturè perpendas, tibi que persuadeas, nunquam de morte hominum, salute et bonis nimis longam esse cunctationem. »

Hoc sermone Alenius apud Cassanæum pervicit, ut res differretur, copięque, quæ jam magno numero convenerant, dimitterentur, donec sententia Regis exquiri posset, adeoque omni vi et injuriâ abstineretur.

DE THOU, liv. VI.

Charles-Quint à Philippe II son fils, en abdiquant la couronne d'Espagne.

Si hæc provinciarum possessio ad te morte meâ pervenisset, meritis aliquid essem apud filium, relicto tam opulento auctoque per me patrimonio. Nunc, quando non necessitatis hæc, sed voluntatis hæreditas est, et præmori patrem libuit, ut mortis beneficium anteverterem; quicquid mihi pro hac anticipati temporis usurâ plus debes, id in horum amorem curamque populorum ut transferas jure postulo. Reliqui reges se filiis vitam

tradere, regna se tradituros gaudent. Ego posthumum hoc donum præripere fato volui : geminatum gaudium arbitratus , si te non magis viventem ex me , quàm ex me regnantem , vivus aspicerem. Exemplum hoc meum pauci imitabuntur : nam et ego , quem sequer ex omni retrò antiquitate vix habui. Laudabunt certè consilium , ubi te dignum comperient , in quo prima hæc documenta monstrarentur. Id efficies si , quam adhuc coluisti sapientiam , si dominatoris omnium timorem , si catholicæ religionis patrocinium , si juris legumque tutelam , vera utique regnorum firmamenta , perpetuò retinueris. Unum superest , quod voveam ad extremum pater : ut tibi proles hujusmodi adolescat , in quam regna transferre possis , necesse non habeas (1).

STRADA:

Alphonse , Roi de Naples , abdique la couronne en faveur de son fils Ferdinand.

Quo in statu res nostræ sint , viri nobiles , mecum pariter consideratis. Hostis ferox et validus pro portis. Nostri in fide parùm constantes. Haud majori celeritate Galli irrumpunt , quàm provinciales deditionem faciunt : urbes et oppida in eorum tradunt potestatem , vexillis hostium passim sublati. Auxilia externa longinqua : et qui opem maximè afferre debuissent , hos nostra calamitas , periculum , et ignominia parùm movent. Hostes amicosve incusare ejus est , qui vivere et regnare velit. Plura dicere argumentum ignaviæ. Meis delictis iram coelestem irritatam fateor : qui deliquit , pœnas is dato justissimas , morte , ignominia , omnibus malis. His suppliciis si placantur numina , si expiantur noxæ , satis

(1) Voyez , tom. II , même partie.

habeam. Vitæ fines præscribere non licet : neque verò ex hâc veluti custodiâ migrare dei injussu, qui pro voluntate vivendi spatia restringit et laxat. Quod meum est tamen, regiam hanc coronam quâ sum indignus, hoc sceptrum pono ; peccatorum hoc piaculum esto. Alii diutiùs hoc imperium tenuerint : nemo libentiùs reliquerit, nemo fortiùs. Filium tamen pro me (quâ spe, quibus virtutibus et prudentiâ!) Regem in posterum jubeo, haud iniquâ permutatione, pro sene et valetudinario, florenti ætate juvenem, corpore firmo, invicto animo. Quàm cuperem uti eo in statu res nostræ essent, quo orbi terrarum probarem quanti facerem ea, quæ prima ad felicitatem putantur! sed quandò eam animi magnitudinem ostentare non licet, certè non erit minoris prudentiæ cedere necessitati, cujus invictæ sunt vires. Hinc posteritas de nostro ingenio statuât. Neque enim semper prudens nauclerus fœdâ procellâ inflatis fluctibus obsistit. Sed demissâ antennâ versâque in obliquum navi exspectat dùm, ventorum violentiâ transactâ, pelagi sævitia componatur. Hæc nostra sententia est, certa que voluntas, et quandò patriæ charissimæ præsidio esse in periculo non possum, quod instar mortis est, eâ relictâ in exilium abire deliberatum habeo. Regni equidem paulò antè florentis atque domûs nostræ ruinam non videbo : fortassis etiam hoc quasi sacrificio Deum placabo, vindicta ut levior sit; hominum misericordiam commovebo, ut majori animo in nostræ causæ patrocinium incumbant. Vobis, qui præsentis estis, quique absunt, obsequium erga novum regem commendare supervacaneum fore arbitror : ne ipsi quidem præcipere ut cives omni comitate et benevolentia complectatur vestrisque meritis magnis et perpetuis debitam gratiam rependat.

MARIANA. *Hist. d'Espagne. L. xxvi.*

Le Prince d'Orange à ses soldats, au siège de Bréda.

QUÆ hæc cunctatio, milites? Vos, hostem, me, intuemini: vos, quorum manu capta belli præmia habemus urbes validissimas; hostem, qui certa virtutis vestræ est materies et cos magnanimitatis, quem vinci posse tot triumphis comprobatum; me, qui nec dux vobis desum, neque imperator, eandem toties vobiscum belli fortunam expértus. Non facit dictatura ut animos sumam imperandi vobis, sed communis necessitas. Hoc loco iidem omnes sumus. Uno vobiscum nomine appellari cupio, id est militis. Alibi Auriacus vocer, alibi Nassavius; hîc, quia eundem cœptæ obsidionis eventum exspectamus, ea conferte quæ in aliarum urbium expugnatione contulistis.

Si quod quemque facere oportet, facietis gnaviter, vos vincetis, Breda expugnabitur. Si quid militari experientiâ videt in futurum imperatoris mens, nostra urbs est, favente numine. Alii, gladiis ante pedes positos, glebas accumulate, valla perfodite; alii, districto ense, impetum invadentium excipite. Ubi pilas illi jecerint, et effusi portis instantes vos eruperint, cogitet vestram quisque, Deum esse qui juvabit, Deum esse qui, secundis auspiciis, vos in prælium misit. Angustis spatiis pugnamus, sed spe amplâ. Non patet via, nisi quam aperient ensis et ligo. Trahere bellum, nec vacat mihi, neque expedit patriæ. Gloriam victoriæ fortis celeritas dabit et præceps fortitudo. Hærete ad quodvis certamen intenti: collato pede pugnate: terrorem redintegratis copiis inferte: invectique stationes obsessorum impetu et consilio invadite, vestras defendite. Hæ per vos, non vos per ipsas, tutæ esse debent. In urbe istâ stare vos volo, quæ ante oculos est; in arce istâ, quæ spei nostræ fiduciæque arx est. Paucorum passuum intervallum

est, quod vos ab illâ dirimit. Brevis hic est vel decoris vestri vel dedecoris isthmus. Vix jactu lapidis abestis a victoriâ. Audacia pro scuto sit, et jam transiistis. Non de sterili pulvere pugna est, sed de eâ urbe quæ imperii vel nostri, vel Hispaniensis arx est et propugnaculum. In hoste plena omnia animorum ac roboris, miles veteranus, Hispanica præsidia, regi suo fidissima. Tantò cordatiùs pugnandum vobis, quantò major fiducia aggredientis quàm propulsantis. In dextris vestris futuri temporis spem geritis, pacem aut majoris victoriæ pignus. In theatro terrarum orbis vos positos credite, ubi suam cuique virtus aut laudem pariet, aut pugnæ finem.

C. BARLÆUS. *De Bredâ expugnata oratio panegyrica.*

Les Députés belges viennent offrir à Henri III, roi de France,  
la souveraineté des Pays-Bas.

Quos hîc vides apud te supplices, potentissime Rex, a fœderatis Belgarum provinciis legati, oratum venimus, ut cum patrocínio nostri adversùs instantem hostem, Belgii principatum eâdem potestate, quâ Carolus V imperator, accipias tibi, tuisque in regnum Galliæ successoribus. Multa nos ad te movent : fama tuâ, supra reges alios externis audita, nobis te minor spectata ; Hispanorum sævitia, quâ læsis Gallicum antidotum natura providit : cognatio Galliæ Belgique, non vicinitas modò, aut amicitia, nam et nos Gallicâ origine gloriamur, et prisci olim Gallorum Belgarumque populi unum corpus fuère : denique opportunitas auxilii a Galliâ transmittendi non ad Neapolitanum regnum recuperandum, aut transmarinas ad expeditiones repetendas. Ad quæ loca traducere militem per longinquas hostilesque vias, anceps ac tardum : tractum procul alere,

armatis circa gentibus, operosum; et, ubi viceris, servare tam longè posita perquam rarum. In Galliâ tuâ est Belgium: tantum porrigere dexteram, Belgium sublevabis. At conducibile non fuerit, irritare in præsentia regis Philippi potentiam ex Lusitanicâ victoriâ, tantâ orbis terrarum parte, prævalidam! Verum non semper intenditur potentia, dum extenditur. Et nos videmus navigia, quæ mole suâ modum excedunt, regi non posse. Sed creverint Hispano vires! Propterea et tibi pluris hæc facienda est, quæ in tempore venit, accessio provinciarum, quibus imperio tuo circumdatis, impervia profectò Gallia quibuscumque regum viribus futura sit. Quot sunt apud nos urbes viris militaribus refertæ, quot arces ingenio ac naturâ inexpugnabiles, quàm multa e mercaturis opulentia, quanta ex portubus, amnibus, marium recessibus opportunitas, quàm latè fusus ex bellicis navibus, nauticisque hominibus in omnes terror; hæc omnia defendendo Gallico regno adversus communem tuâ nostrique Hispanum hostem perpetuò excubabunt. Quamobrem, quod benè tibi, Galliæque et Belgiæ vertat, age, Rex magne, junge populos, non indecores Gallico nomini futuros, nosque volens ac libens in fidem tuam recipe. Sic et Belgium, ne Hispanorum ad servitium redeat, prohibebis, et regnum validâ provinciarum adjectione adversus novam æmuli potentiam ipse Gallici amplifictor imperii constabilies.

Famianus STRADA. *De Bello Belgico*, decadis secundæ lib. v.

Elisabeth, reine d'Angleterre, à l'ambassadeur de Marie Stuart, reine d'Ecosse, qui lui propose de déclarer cette Princesse son héritière.

Si quidem ego quicquam attentâsem, quod Reginæ vestræ jus imminueret, tùm demùm justa fuisset postulandi causa, ut secùs facta corrigerentur. Hæc autem postulatio, ut viva mihi sepulcrale linteum ante oculos proponam, exemplo caret: neque simile quicquam ab ullo principum unquàm est petitum. Animum tamen nobilitatis vestræ, in petendo, boni consulo: eòque magis, quòd hinc intelligam, Reginæ suæ colendæ ejusque dignitatis promovendæ illis esse studium. Nec minùs prudentiam amplector, quòd et suæ securitati prospiciunt, et a fundendo sanguine christiano abhorrent: cui (ut fateor) parci non posset, si qua se factio objiceret, quæ regnum sibi vindicaret. Sed quæ tandem illa erit? aut quibus viribus freta? Sed, his omissis, finge me ultrò in eam partem propendere, ut istî populationi assentiar. Existimasne, me procerum voluntati potiùs quàm ipsî Reginæ id gratificaturam? Verùm, et alia sunt plurima quæ me ab hâc transactione avocant. Primùm, quòd non ignorem quàm sit periculosum hanc movere Camarinam: ac jure mihi semper abstinuisse videor, ne regni jus in disceptationem vocarem. Toties enim jam sermonibus multorum jactata est controversia, de matrimonio justo, deque nothis et legitimis liberis, dùm pro ingenio quisque aut huic, aut illî parti studet, ut et ego ipsa, ob has disputationes, hactenùs ad nubendum fuerim cunctatior. Semel, cùm publicè coronam accepi, matrimonium cum hoc regno inii: cujus pignus hunc annulum perpetuò fero: utcunque autem hæc se habent, quoad vixero, Regina Anglorum ero. Ego ubi defuncta fuero,



in meum locum, qui jure potior erit, succedito. Ea si Regina vestra est, nullâ interim in re obero: sin alteri jus est potius, iniquum erit postulare, ut a me apertè afficiatur injuriâ. Si qua vestræ Reginæ lex obest, mihi quidem ignota est, quod non libenter hâc de re exactiùs disquiro. Sed si qua est, ego cùm regnum inivi, civibus meis juravi, me leges eorum haud immutaturam.

Quod autem secundo loco sumebas, ex hâc successio-  
nis declaratione arctiùs inter nos amicitiam coituram,  
vereor ne hinc sit potiùs odiorum seminarium. Credis-  
ne tu me libenter mei funeris apparatus semper ante  
oculos habituram? Regibus hoc ferè peculiare est, ut  
erga liberos nascendi jure sibi successuros, alieno sint  
animo. Carolus VII, Galliarum rex, qualis erga Ludo-  
vicum XI fuit? Aut is rursùs, erga Carolum VIII? Aut  
Franciscus nuper adversùs Henricum? quo igitur animo  
verisimile est me fore adversùs propinquam meam,  
semel hæredem judicatam? eo ipso videlicet, quo isti  
erga suos.

Accedit illud in quo ego longè gravissimum pondus  
inesse statuo. Novi ego populi hujus inconstantiam:  
novi quàm præsentem rerum statum fastidiant: novi  
quàm intentos habeant oculos in proximè successuros:  
scio naturâ comparatum esse, ut plures (quod dicitur)  
solem orientem, quàm occidentem adorent. Id autem, ut  
aliorum exempla omittam, ex meis ipsius temporibus  
didici. Cùm soror mea Maria regnum teneret, quibus  
votis plerique petebant, ut ejus in solio collocatam me  
viderent! Quo studio in me provehendâ ferebantur!  
Neque ignoro, quibus periculis subeundis homines  
eventum consiliorum suorum attentâssent, si mea volun-  
tas ad eorum cupiditatem adjuncta fuisset. Nunc autem  
iidem illi fortassè non sunt eodem erga me animo, non  
secùs ac pueri qui, inter quiescendum poma sibi per som-  
num oblata videntes, exsultant, mox exporrecti manè, ac

suâ spe decepti, gaudium in lacrymas commutant; ita qui me, cum Elizabeth modò vocarer, summâ benevolentiam complectebantur. Et, si quos fortè alacriore vultu eram intuita, secum cogitabant, statim atque regnum adepta essem, se pro suæ cupiditatis potiùs quàm officii mihi præstiti modo, remuneratum iri: nunc verò, cum eventus expectationi non respondeat, quidam eorum non gravatè novam rerum mutationem in spem melioris fortunæ ferrent: nullæ enim principum facultates, quantumvis magnæ, insatiabiles hominum cupiditates explere poterunt. Quòd si animi civium nostrorum erga nos languescant, aut voluntates immutentur, ob temperamentum nimis largitionibus adhibitum, aut aliam leviculam ob causam, quid suspicabimur futurum, si certum regni successorem malevoli cives haberent, ad quem animi sui deferrent ægritudinem, aut ipsi se irati conferrent? Quanto me judicas in periculo versaturam, tam potente et propinquâ principe successurâ, cui quantum ego virium in successione confirmandâ adjicerem, tantum meæ securitati detraherem. Hoc periculum neque ullis cautionibus, aut aliis legum vinculis averti potest; nec faciliè principes, quibus regni spes oblata est, sese intra juris et æqui terminos continebunt: ego verò si de meo successore orbi constaret, nunquam res meas in tuto collocatas existimarem (1).

G. BUCHANANUS. *Rerum Scotticarum*, lib. XVII.

L'amiral Hemskerke à ses capitaines de vaisseau, avant de combattre les Espagnols.

INGRESSUS jam fretum, nec procul Calpetano sinu, Hemskerkius, vocatis in concilium navium ducibus:

(1) Voyez les *Leçons françaises*, tom. I, même sujet.

Quâ de causâ hâc ventum sit, scitis, inquit, commilitones. Clara patribus nostris parva mari decora, sed domi. Populati sunt insulas, clausêre portus, fortuitò concurrerant alii. Primi omnium regiam classem et in ipso Hispaniæ limine oppugnatum ultrò venimus, ostensuri gentibus, quàm falsò hostis in illâ superbissimâ titulorum serie Oceanum sibi ascribat. Non potuit ad gloriâ optari locus illustrior. Spectanda Deus Batavorum robora statuit in ipso Europæ Africæque confinio. Hinc hostes ipsos habebimus certissimos virtutis nostræ suis cladibus testes: altero in littore Turcæ Maurique sunt, quibus vix auditi hactenùs innotescere, nisi clarissimo facinore, non debemus. Sumite modò eos animos, quos Berga olim, Middelburgum, quos Frisici maris sinus vidêre. Eadem vos orbe toto fortuna sequitur. Difficile est nobis mari non vincere. Nec quemquam hostilium navium magnitudo terreat. Quin illa ipsa moles, vertigique inhabilis, et ad vulnera patens, exitio erit. Illud verò vel præcipuum, quòd apud nos nautæ pugnant, apud illos milites, quos ego mihi videre videor, ut sunt delicati, sentinæ odore ac jactatione fluctuum propè exanimis in vertiginem dari. Nihil autem a quoquam posco, nisi, cujus ipse daturus sum, exemplum. Tu mecum, Lamberte, in prætoriam invehere. Quæ ab hâc secunda est, vestras, Brassi atque Alterasi, manus sentiat. Cæteras cæteri aggredimini; bini singulas. Leviores navium circumvectabuntur, quò fugam hostium impedian. Sed ubi cœperit prælium, mementote vos navibus depugnare, captos omnes cæsosque, nō vincitis. Expediamus procerùm super re summâ ancipites curas. Aut hic dies ingens auspiciu dabit in bella redeuntibus, aut faciet ut pacem Hispanus seriò velit. Tùm ponere an retinere arma rectius deliberet victor Batavus. Felices nos interim famæ, seu maritimi triumphihinc numerari incipient, sive inter pacis causas nunc quoque censebimur, et quadraginta propè

annorum bellum nobili ad posteros sine claudemus (1). »

Hug. GROTIUS. *Hist. de Bello Belgico*, lib. xvi.

Des Sénateurs suédois dissuadent Gustave-Adolphe d'entreprendre la guerre contre l'Empereur.

ADDEBANT præterea Suecici senatûs primates nonnulli, aut perosi bellum, aut pacis cupidi, aut qui ordinis proprii patriæque libertatis amantiores, succrescentem Regis potentiam verebantur :

« Satis jam bello operam datam fuisse, domos viris, ærarium auro vacua; non adesse indigenam militem ad externa bella, regnum aliàs pecuniæ penuriâ laborans, tunc omninò exhaustum, ad externos milites cogendos tributa conferre non posse; bello stabiles labare respublikas, pace labantes stabiliri: vana vanorum hominum legatos memorare, etiamsi deteriora essent quàm fingerentur. Sueciæ regnum a Germaniâ periculosissimò mari dissitum, terrâ ob nemora et montes perpetuis nivibus obsessos inaccessum; neque Waltestainum ulteriùs tentaturum quàm Cæsar vellet; nec Cæsarem, quamvis Catholicæ fidei addictum, alioquin pium principem, plus ausurum quàm conscientia jusserit. Quos sedibus ille perpulerat, meritò, uti perduelles et inquietos homines, pepulisse; nec crederet bellum patratu tam facile; stare adhuc res Cæsaris, imò tunc potissimùm temporis vigere; præstò esse in Italiâ et Germaniis invictos numerososque exercitus; hos ipsos, qui se ad bellum invitabant, cum inciperet, sibi hostes fore; levissimum hominum genus Cæsarem odisse præsentem dominum, nescire quid cupiat; velle interim alieno periculo propriæ

(1) Les Hollandais furent vainqueurs; mais ils perdirent leur brave amiral.

curiositati, an perfidiæ consulere. Servaret vindicandas ad maiorem temporis opportunitatem, si quas a Cæsare accepisset, injurias; reciperet intereà vires, et cognatos aut affines sineret quas sibi arcessivissent, proprio, non alieno discrimine ulcisci: quod de religione causarentur, illam Deo curæ futuram, nefas esse fingere hanc præliorum cædiumque ducem; armis, barbariem, impietatem, non religionem, homines edoceri; faciliè insuper bellum omne sumi, ægerrimè debellari, neque in ejusdem potestate initium et finem ejus esse; licere cuivis, etiam ignavo, bellum incipere; deponi, cùm victores velint. Se verò non hæc ideò prætere, quòd aut belli tædeat, aut tributorum pigeat; statutum sibi regis ad libitum vivere, sed quæ protulissent ipsum rerum statum ut mente suggererat, hæc fidei consentanea ex ore expressisse. Eximeret se tandem Rex armorum procellis, seque patriæ, uxori, natæ servaret. Quid de his futurum, si bellum in Germaniâ gerens fato concederet? quod Deus averteret; at si quid humanitùs accidisset, patriam in cas ipsas manus relapsam e quibus redemerat, depulsam solio viduam uxorem, orbatam patre natam, spoliata paterno regno, patriâ extorrem, ludibrium denique orbi totû factam animo revolveret. »

Petrus Baptista BURGUS, Jennensis. *De bello Suecico Commentariorum*, lib. I. 1643.

Le grand Condé aux compagnons de son exil.

Tot bellorum superstes Condæus, de summâ rerum certior factus, ut cuique ætas aut dignitas fuerat in castris, comiter appellatos, in hunc ferè modum allocutus est :

« Septimus annus agitur, commilitones, ex quo, fatis iniquis agitatus, post ultima sævitæ exempla, carceris

tenebris liberatus, salutem meam arinis tueri coactus; toto illo tempore, mea fata et fortuna domûs in manu vestrâ posita fuêre. Nunc neque ut affectus vestros in amorem meî ulteriùs accenderem, neque ut animum ad nova virtutis documenta cohortarer (utraqûe enim egregiè supersunt), sed hûc venio, a vobis postulaturus temperamentum vestræ fortitudinis et erga me modum caritatis; scilicet ut partæ tandem humano generi quieti acquiescatis, neque vestras aliorumque fortunas spe versemus irrequieti; quandòquidem, urgentibus Galliæ fatis, nihil præstare majus possumus. Pax gentium et mea salus cum vestrâ et Belgii incolumitate est; tutò in Galliâ et decora gentis meæ, et possessos honores, et relictâ a sancto parente bona recipio; res meæ eo loco sunt, ut neque solatio, neque ultione opus habeam. Ego et fortuna experti invicem sumus. Certatum diù est; ne plus certemus, per me exemplum erit. Alii civilibus bellis diutiùs implicati; nemo tam fortiter finivit. An ego tot egregios exercitus, tot duces patiar sterni rursùs, et hanc virtutem vestram ultrò periculis objiciam? Eat hic animus tanquàm perituri pro me fueritis, sed este superstites; quantò plus spei ostendistis, si bellare placeret, eò pulchrior pax erit: sed cùm tot laceros artus, tot vulnera intueor, illud est quòd mentem distrahit; quòd exsanguis senectus se conferet? Quæ sedes futura emeritis? Quæ præmia infructuosæ militiæ? Quandò vestris in me meritis impræsentiarum gratias referre prohibeor, quod unum habeo, hoc rerum cardine, gratitudinem æternam et imaginem vitæ meæ vobis relinquo. Tempus erit cùm forsàn domus mea sufficiet donativo. Hæc interim accipite, parva quidem monumenta, sed quæ perpetuum nostrî amorem testentur (1). »

Indè viritum sparsum quod supererat pecuniæ. Post-

(1) Voyez, dans Tacite, le discours d'Othon.

quàm cœtus secum incerta diù fremuit, **Marcinus Ebu**ro, nomine cohortium, nullo orationis lenocinio, militariter ità locutus est.

*Marsin répond au nom de ses camarades.*

« **Gallici** nominis maxime Rector, invictissime Princeps, parendo potiùs quàm ducum imperia sciscitando, res militares continentur. Nobis arma et animus, tibi consilium et virtutis nostræ regimen relinquimus. Non nostrum est inquirere causas pacis, neque scrutari penitùs reges. Fides famaue illæsa ad hunc diem nostra erga te permansit. Discrimina et incerta præliorum ex æquo partiti sumus. Tu viam periculorum calcâsti semper primus; nos signa tua secuti, didicimus toties a te scire mori. Ad nos scelerum exitus, ad te bellorum gloria pertinet. Blanda et clemens fuit apud te nostra servitus; commodâsti veniam erroribus, ignovisti lapsis, neque unquàm supplicia nostra aut contumelias disciplinam vocâsti. Ne cures præmia nostra, nec quò ituri sumus; fata viam invenient; grande habemus gloriæ monimentum, quòd de nemine queri potes. Abi sanctus et misericors, fortis et invictus: votorum et affectûs aurâ æternùm te prosequemur. Dii immortales hoc tibi concedant, ne nostrî cogaris unquàm meminisse. »

Benj. PRIOLUS. *De rebus Gallicis*, lib. XI.

Le doge Brignolé exhorte les Gênois à soutenir un siège après l'expulsion des Autrichiens.

Non negaverim, Genuenses, me ultrò ad vos, tanquàm ad homines diuturnitate belli defatigatos, hortandi causâ processisse; sed tanti ego facio frequentiam hanc vestram, quâ in hunc locum rogati convenistis, eam in vultu

omnium atque oculis eminere video patriæ alacritatem defendendæ, ut gratulatione mihi potius, quam hortatione utendum esse intelligam. Quid enim eos horter, quos intueor paratissimos? Est verò, quod patriæ, quæ cives genuit fortissimos, est quod vobis, qui patriam servastis pulcherrimam, est denique mihi ipsæ quod gratuler, cujus imperii nomen multò illustrius perveniet ad posteror. vestræ commendatione virtutis. Quanquàm haud scio, an hæc ipsa gratulatio supervacanea sit, cujus est usus confecto bello reservandus, ne fortunæ beneficium præripuisse videamur. Quæ erunt igitur meæ partes? Illud unum vos admonere ut vestri similes sitis, idque efficiatis ut principiis extrema consentiant. Nam quid minùs conveniret, Genuenses, quàm, collocatæ cùm essent in cervicibus nostris victrices Austriacorum legiones, vos privato consilio (nec enim aliter fieri potuit), ejectis illis, sustinuisse solos labantem fortunam reipublicæ, et nunc auctore senatu, consentientibus omnibus, adiuvantibus regibus potentissimis, animo deficere? An hostem ut videamini timere, quem fugastis? aut aliquid ab eo æqui sperare, qui stare sibi non posse videtur, nisi hæc eversâ et deletâ civitate? qui non pecuniam, ut antea, sed jam iratus sanguinem vestrum concupiscit? nullâ magnoperè læcessitus injuriâ ad pacatos, ad deditos accedens, nihil sceleris, nihil crudelitatis prætermisit? Quid hic faciet dolore ardens amissæ prædæ, et grandi læsus ignominiâ, quâcumque ratione in urbem hanc redire potuerit? Sed, ut spero et video, non poterit. Eos habemus socios reges, quos eadem nobiscum artissimè causa conjungit, eos regum legatos, jam senatûs constantiam, eum omnium ordinum consensum, ut vehementer sit hostibus de victoriâ desperandum: qui neque pauci tantæ urbis oppugnandæ molem sustinere queunt, et quò plures sunt, pluribus rebus in nudo atque aspero solo egere necesse est. Non Britanni, una



aut alterâ interceptâ naviculâ, commeatus auxiliaque nostra impedire; non Subalpini, paucis commissis cohortibus, ad summam belli multùm proficere possunt. Atque hos ipsos jam ad respicienda cuique domestica mala belli per vos excitata fortuna, et Borboniorum in Belgio Italiâque victoriæ convertent. Quid autem sine his Austriaci poterunt, omnium egentes rerum, et quotidianis deminuti præliis? Tolerate, Genuenses, paucorum dierum molestiam, et tantum hunc oppugnationis apparatus ad nihilum propediem recidere videbitis. Nolite interim aut stultâ aliquâ spe aperire ad occasionem locum hosti, aut vano metu animique imbecillitate, patriam omnem prosternere, eorumque etiam auxilio, vobis trepidantibus, spoliare, qui, vestræ salutis causâ, maris atque hostium periculum neglexerunt. Quæ Hispani, quæ Galli milites pro vobis gesserint atque gerant, ipsi videtis. Quo socii reges, quo in primis Galliæ rex sit animo in rempublicam, quâ fide, adest qui vobis ostendat nobilissimus legatus ipsius Bouffertius, regiæ testis voluntatis et vestræ idem æstimator virtutis. An patriam peregrini vestram studiosiùs defendent, quàm cives? An pœnitet vos, quòd, republicâ recuperatâ, famam estis apud omnes gentes atque immortalem gloriam consecuti?

Quòd si, his omissis, causam belli spectare, eamque judicare meliorem velimus, quam etiam cœlestes adjuverint, quænam esse potest, Genuenses, causa justior bellandi, quàm quæ adversùs teterrimos patriæ oppugnationes civium armat manus? Aut quisnam illud sine divino evenisse consilio existimet, quo factum est ut exercitissimi paratissimique hostes vincerentur a vobis, qui propè eratis inermes, et nullum certè rei militaris usum habebatis? Superis igitur hominibusque juvantibus, incumbite, Genuenses, in optimam causam, eamque nunc meliore belli conditione retinete virtutem, quam a principio perditâ ferè fortunâ præstitistis. Qualis

erit vestra in bello virtus, talis erit hujus urbis et totius nominis Genuensis sors. En ego vester dux pro patriâ , pro vobis , quos mihi charissimos , atque in liberorum loco habeo , non solum vigilare , adesse , providere , sed etiam pugnare et mori paratus. Equidem me ducis nomine patres appellârunt , ego patriæ miles dici volo ; et si regius hic ornatus impedimento mihi est quominus vobiscum unâ in aciem prodeam , date gregale sagulum quo , turbæ immixtus præliantium , vitam meam hostium telis objiciam. Nam neque grata est dignitas quæ vitam servat incolumem ad intuendam patriæ eversionem , neque acerba mors quæ , naturæ debita , patriæ donatur.

Castrucius BONAMICUS. *Commentaria , de Bello Italico* , lib. III. 1750.

Les Lettres à Pie IV, à son avènement au pontificat.

CUM tibi , Pontifex optime , ad istam dignitatem nuper divinitus elato , quâ sublimius aut præstantius inter homines nihil est , mortales quàm plurimi , alii absentes litteris et nunciis , alii coram vultu verbisque gratulentur ; non dubitamus quin nos quoque , altrices tuas , in maximo gratulantium numero ad tuos sanctissimos pedes officiosè projectas , excipias : et eò benignius , quòd alii , quia pervenisti ad eum finem , infra quem cæteri fines sunt , gratulantur ; nos autem , quia scilicet , ut pervenire posses , ipsæ perfecimus. Non est ad gloriam lata quædam et communis via : perangusta fuit semita , paucorumque notata vestigiis , quâ ierunt et heroes illi veteres , in christianâ militiâ fortissimi viri , et maximè quidem omnium , patrum nostrorum memoriâ , Pius ille pontifex , cujus tu nomen in eadem sede meritò collocatus , et cum nomine virtutem refers , in istam olim semitam , ferentem ad æternum decus , nos te puerum adhuc , sed

puerum præclara cupientem, manu prehensum duximus : neve quis te error avertere, nè qua morari posset offensus, alacriter procedenti quasi lumen prætulimus. Confectum jam iter est : ultrà, quò progrediaris, non habes. Inter te, et Opificem æternum, cujus ministræ nos sumus, nulla jam interjacent humana. Quare, quoniam eò te perduximus, quò sine nobis pervenire felicitatis non est; et quandò de longâ viâ ità fessas esse intelligis, ut consistere vix possimus; redde præmium bonè merentibus, et sine nos in tuâ pîxas beneficentiâ conquiescere. Nam si tibi Deus opt. max. hoc elargitus est, ut in omni vitâ, præter rectum et honestum, nihil spectares : quis te laudabiliter antea cogitasse probaverit, nisi nunc, cùm est ad voluntatem adjuncta facultas, idipsum, quod cogitasti, re perficias? Si te ambitio delectaret, proponeremus illa inania, quibus ii, qui ex hominum sermonibus pendent, excitari solent : fore, si nos jacentes erexeris, ut orbem terrarum tui nominis fama pervagetur : ut oratorum et poetarum de te prædicantium vocibus aures tuæ personent; denique ut imaginem tuarum virtutum, æternis excellentium virorum laudibus expressam, ipsa posteritas intuens cupiat imitari. Speciosa ista quidem videntur, et sunt omninò; sed a splendore tamen veræ laudis absunt. Nam rectè facere, non ex iis quæ consequuntur, sed ipsum per se sapientibus viris amabile videtur. Qui cùm innocenter sanctèque vivunt, minimè illi quidem de præmiis cogitant, ne probitas mercenaria videatur; aut, si cogitant, non ad hæc humana, quæ sunt locorum et temporum angustis sanè terminis circumscripta, oculos demittunt; sed ad illa divina suspicientes, beatam immortalemque vitam expetunt unam, et unam expetendam esse persuasum habent. Quod tu semper institutum probasti, probavit Paulus ille III, omnium sæculorum memoriâ celebrandus, qui de humano genere vel hoc potissimum nomine

optimè meritis existimatur, quia in suo pontificatu effecit, ut tu Pontifex esse posses : probârunt hodièque probant sodales olim aliquot tui : quorum alii, non, ut vulgò vocantur, mortui, sed, ut sapientes propriè loquuntur, mortali vitâ liberati, nunc incolæ cœli Deoque fruentes, non tam, quia te Pontificem intuentur, gaudent, quàm quia te facturum ea prospiciunt, quæ sunt optimo pontifice dignissima : alii verò, nondum sanè ab hac terrestri materiâ discreti, aut simplicem naturam assecuti, sed ita tamen in terris commorantes, ut bonitate simplices animos referant, non dubitamus, quin tibi nostram causam unanimes commendent, eoque studiosius, quòd et ipsi alumni nostri cum sint, officio non solum laudabili, verum etiam debito fungentur. Satis jam exagitata, satis inopiam et solitudinem passæ, ab omnibus ferè principibus neglectæ, supplices ad te confugimus, quid petentes ? honestum otium. A quo petentes ? a Pio Pontifice. Piusne ille noster, cujus animum ac mentem saluberrimis præceptis ad omnem laudem conformavimus atque effinximus ; cui comites in omni ætate atque in omni fortunâ non solum jucundæ, sed etiam perhonorificæ fuimus ; qui, ut hoc tempore plus quàm omnes homines prodesse nobis unus possit, idipsum a nobis habet, isne nos, aliquantulam tanti beneficii gratiam reposcentes, ab sese rejiciet ? Non hoc illius natura, non doctrinâ, non consuetudo feret. Sint sanè mutabiles eorum animi, neque satis in colendâ virtute sibi constant : fit enim sæpè ut voluntates simul cum fortunâ commutentur : in te, Pontifex optime, non cadit hujus inconstantiae suspicio : tua est benè agendi perpetuitas : nihil in vitâ tuâ varium, nihil flexibile, nihil mistum cognovimus : semper idem tibi, semper directum quiddam placuit et simplex. Non te rerum humanarum ficta et fucata forma, non illæ, quibus plerique falluntur, insidiosæ voluptatum illecebræ cepe-

runt : non tu in tabulâ pictâ, inani colorum specie captus, oculis immobilibus hæsisisti. Non sericam vestem, non argenteum vas, non aurata tecta paulò cupidius aspexisti : denique ne singula persequamur, cùm plerique hominum, sive gratiâ, sive metu, ab officio deducantur, nunquàm te vel ità gratia delenivit, vel ità metus deterruit, ut pietatem religionemque desereres. Quid mirum? virtutum radices non ità leviter bonorum in animis inhærent, ut eas evellere aut commodi spes, aut periculi dubitatio possit. Quare tuæ consuetudinis et constantiæ memores non petimus a te, ut aliquid agas nostrâ causâ quod, cùm egeris, non consentire cum tuis superioribus factis videatur; sed id petimus, quod a te non modò ipsa res, sed etiam consuetudo tua postulat, ut in vetere illo tuarum actionum laudabili cursu pergas, quod cùm facies (acturum enim, quia te novimus, non dubitamus), complecteris nos eodem studio, quo ipsæ te aluimus, et in eum locum restitues, undè nos adversariæ nostræ Inscitia simul et Avaritia, comites perpetuæ, detruserunt. Vale.

Paul MANUCE. L. v. *Lettre I.*

#### Eloge des Lettres.

MAGNA omninò vis, magnumque momentum positum est in litteris, ad conservandas bonisque augendas omnibus civitates. Nam cùm felicitas publicâ, ad quam humana omnia referenda sunt, e singulorum civium felicitate constet, singulorum autem felicitas in excolendâ exercendâque virtute præcipuè sita sit; et, ad perfectam virtutem consequendam, necessariam quamdam præcursionem adhibeant litteræ, illud profectò consequitur ut, nisi in quâ litterarum cultura vigeat, florere omninò civitas nulla possit. Ponite vobis ante oculos

omnes ætatis humanæ partes , omnem publicorum temporum varietatem ; omnes instituendæ vitæ rationes et vias animo et cogitatione percurrite : nullam planè reperiatis , quæ non ità litterarum auxilio indigeat , ut , eas si quis sustulerit , solem ipsum de mûndo sustulisse videatur. Eæ nos , ubi primùm firmiùs incedere , atque articulatiùs loqui cœpimus , de ipso propè nutricum acceptos sinu , titillatione quâdam honestissimæ voluptatis alliciunt , allectos præceptis imbuunt saluberrimis , complures non tantùm benè dicendi , verùm etiã benè vivendi , commonstrant vias ; excitant in animis nostris igniculos gloriæ : quantus sit in virtute splendor , quanta in vitiis deformitas , edocent : quæ qui semel penitùs imbibierint , ii nunquàm non postea et vitii turpitudinem omni studio refugient , et officii honestatisque rationem rebus aliis omnibus anteponent. Ut autem in semente posita spes messis est , ità totius reliquæ vitæ expectatio ab educatione , pueritiæ pendet. Ut verò infirmam illam ineuntis ætatlæ teneritatem robur adolescentiæ excepit , quæ tandem alia res , aut animum præclararum rerum studio accendere , aut efferentibus sese cupiditatibus , quibus ea vitæ pars insigniter agitari solet , frenos injicere , præter litterarum tractationem , potest ? Themistoclem olim , cùm somnum capere adolescens non posset , dicere solitum tradunt , se Miltiadis tropæo quiescere volentem excitari. Quantò eos acriùs incendi atque inflammari necesse est , qui quotidie , non unius , sed innumerabilium hominum virtute præstantium tropæa , non e marmore constituta ad exigui prædicationem temporis , sed ad omnem æternitatem commendata litteris intuentur (1) !

MURET. *De laudibus Litterarum , Oratio.*

(1) Voyez les *Leçons latines anciennes*, tom. I, même partie.

## Eloge des Fleurs.

Non immerito sanè affirmaveris, ex ingenuis mortaliū oblectamentis, honestius esse nullum, quàm quod ex florum curâ culturâque percipitur. Vix enim procreatam et velut infantem humanitatem Hortus voluptatis inter floreas cenas excepit, ut erga flores amorem à vetustissimis incunabulis traheremus. Ipsum quoque divinum humanæ felicitatis domicilium peregrino Paradisi nomine hortum redolet. Quin etiam cœlestis amœnitatis adumbrate rudesque imagines, terrena viridaria, tùm veteri, tùm recenti ætate, principes viros ad speciosam sui cultionem, inhalatæ suavitatis illecebrâ, invitârunt. Non est cur auribus ingeram recentia exempla, quæ oculis quotidie usurpamus. Veterum aliqua non ab aspectu modò, sed à memoriâ etiam remotissima commemorando videamus. Verùm ne Romæ, laudum omnium fertilissimâ in urbe, externa decora demeremur, omitto plausibili invento hortensia rura civitate donantem, interque flores suaviter philosophari doctentem Epicurum : prætereo reges Adonidem et Alcinoûm, regaliû inter curarum spinas, hortorum florido studio beatos, nec tam aculeato sollicitas in punctiones auro, quàm explicato in arridens blandimentum flore coronandos : taceo reginam Semiramidem in pensilis viridarii præcelso miraculo, quàm in regiæ sellæ humiliore fastigio magis suspiciendam : parco narrare Persarum regum ædibus hortos, quos illi Paradisos vocabant, fuisse conjunctos, ut regibus ipsis florum cultura semper hæreret : non dico pretiosissimæ texturæ auctorem Attalum à regni administratione ad hortuli transisse culturam, quod floream purpuram decentius, quàm Attalicam vestem elaboraret : non repeto centies audi-

tam Cyri vocem apud Lacedæmonium legatum Lysandrum, inter infinita regię gazæ spectacula, sese consitorem esse unice glorientis : relinquo aureum Hesperidum pomarium, ne videar aurum illinere mendacio. Una, miraculorum omnium theatrum, Roma olim adolescens reges habuit, qui moderationi populorum culta proluderent : ex quorum numero Tarquinius non tam superbus fuit, quin ad hortensia papavera educanda sese demitteret : quid regno deflorescente nobilitas consularis ? nonne in hortensi areâ, quàm in forensi arenâ diutius effloruit ? certè, si quid respublica detrimenti pateretur, auxilios duces imperatoresque petebat è villâ, quam duodecim etiam Tabulæ hortum appellârunt, quod ibi, qui capere arma possent, orirentur. Ut mirandum nemini sit, illam diu rempublicam stetitisse florentissimam, quæ cultissimis hortis, quæ fortissimis cultoribus abundârit : quorum aliquis oratorum flos, ut amœnitatem omnem etiam nomine complecteretur, ab horto dictus est Hortensius. Sed unus instar omnium prædicetur colonus, alterum belli fulmen, Scipio Africanus, qui summam triumphali gloriæ manum à se tum addi existimabat, cum domitricem Africæ dexteram in subigendo Linterni hortulo exercebat. Quid si veteres Sallustii, Luculli, Mecænatis, ac Cæsarum hortos memoriâ repetamus ? Num dubitabimus amœnissimæ indolis patricos Quirites super florum studio cum vernante naturâ specioso certamine colluisse ? Quod igitur semel voce, Lesbium oraculum, Theophrastus, hoc sæpius reipsâ docuit gentium regina Roma dignam esse homine libero agriculturam. Verùm adeò non modò summos, sed infimos quoque homines amor tangebatur hortorum, ut paupercula urbana plebecula Babylonis amœnitatis pensile sumptuosumque miraculum æmulata de fenestris olim (quod nostræ etiam ætatis vulgus usurpat) hortensia rura suspenderet. Urbem orbis epi-



tomen, plura decora complectentem, quàm quæ pos-  
sent unico nomine concludi, triplici quondam insignitam  
fuisse accepimus, pervulgato scilicet Romæ, robur græcè  
sonantis; arcano, ut quidam putant, Amaryllidis, vel  
ab amore latinâ origine, vel ab incilibus, quibus Argei  
campi Romana palus siccata est, græcâ significatione  
deductæ; sacro demùm atque in sacrificiis usurpato  
Anthusæ, hoc est Floræ, sive Florentiæ, undè sacra  
Floralia nominantur: ut videlicet urbs et rerum ges-  
tarum gloriâ, et florum studio florentissima ipso etiam  
nomine floreret, utque floribus operam dare Romanum  
esse gloriemur.

Jo. Bapt. FERRARIJ, Soc. Jes. *De Florum  
cultura*, lib. I. 1633.

L'Eloquence invoque Dîcé (la Justice) contre ses corrupteurs.

Si me luctu et squalore deformatam, parens optima,  
non agnoscis, saltem ex eo inimicorum meorum crude-  
litate agnosces, qui me, venustissimâ specie virginem,  
ad eam malorum acerbiter redederunt, ut ipsis paren-  
tibus penè videar ignota.

Ego illa sum (me miseram! quid dico?), non sum,  
sed fui, regina terrarum Eloquentia, haustus de tuo fonte  
rivulus, imago tuæ mentis, simulacrum gloriæ, portio  
divinitatis. Ego illa sum, quæ tuo jussu ac numine, e  
cœlesti beatorum domicilio in terras veni, ut hominum  
sublevarem miseras, et non modò necessariis ad tuendam  
salutem præsiidiis instruerem, sed etiam cœlestibus ad  
conciliandam dignitatem vestirem ornamentis. Feci quod  
jusseras. Mortales inveni turpes, hispidos, longâ macie  
torridos, qui sub quercu glandem ructabant, belluis  
omniñò quàm viris similiores. Cœpi ego venam misero-  
rum tenere, sensus intimos delibare, affari blandissimâ

oratione, solari, illustrare, hortari, excitare; ad summum agrestia ingenia ita dedolavi, ut ab ista morum barbarie paulatim ad elegantiora defluerent, agros excolerent, urbes sepirent mœnibus, et sanctam inter se colerent societatem.

Per me constitutæ sunt civitates, leges natæ et adultæ, firmata militiæ præsiidiis oppida, sexcentarumque artium et scientiarum amœnitate collustrata penè ad ipsius cœli gloriam effloruerunt. Non tot prata floribus, non tot margaritis fulget Erythræum mare, non tot micantium stellarum ignibus tuus ille princeps orbium æther est vermiculatus, quot civitatibus, viris, academiis per me mundus colluxit. Heu! ubi illa tempora, quibus ego curru aureo, niveoque candore fulgentibus quadrigis invecta triumphabam? Ubi tot reges, qui me mearum virtutum stupore perculsi admirabantur? Ubi fecunda illa summis ingeniis sæcula, quorum nomen ne appellare quidem audeo?

Exciderunt Demosthenes, Lysiæ, Hyperides, Cicerones; natum est hominum genus audax, amens, impudens, qui me deformarent plagis, et velut in cruce distorquerent; anni fermè mille sunt et sexcenti, ex quibus quotidie distrahor improborum fabula et ludus. Alii me sufflant, alii macie enecant, alii concidunt, alii enervant, alii Hecubam faciunt, alii Helenam, alii unam ex Furiis. Dici non potest quot formas induam, in omnibus tamen informis. Jam mihi credite, Proteus ille fabula jam non erit, siquidem poetarum figmentis meæ fidem dederunt miseræ. At quod in multis acerbitatibus acerbius est, virtutis nomen vitium occupavit, et quod antea turpitudinis erat, id totum est gloriæ, ut, eâ lenocinante, ad facinus cupiditas depravatæ mentis quemque prolectet. Postquam ventosa illa loquacitas juvenum animos ad magna surgentes veluti pestilenti quodam sidere afflavit, dulce fuit omnibus desipere, puduit etiam aliquos non

insanire, et eò devenerunt amentiae, ut nescio cujus Asini sordes, purpuras suas esse dicerent. O tempora ! & mores ! Nunquam licebit unâ et nobili plagâ defungi ? Quid opus est enim ut vivam ? an ut lugeam, et inter quotidianas vulturum lacerationes centies moriar, ne semel inteream ? Tu me saltem in extremam barbariem relega, ne consocios habeam oculos calamitatis meae. Grave est torqueri a suis, gravius in patriâ, in eo ipso loco, ubi cum honore antea vixeris, gravissimum. Me quidem dicentem vires ac latera deficiunt, et adversariorum non mediocriter conturbat audacia, qui hanc fori lucem, hunc gravissimum iudicium consessum audent sustinere, neque impudentiae suae saltem pudentem exitum quaerunt. Vos eorum latratus, si lubet, audietis. Ego nec audire, nec sustinere possum. Qui pro me respondebit meus Tullius, si vobis, vestro nomine, vestraeque sapientia digna dicere videbitur, ipsum audite ; sin autem, ad hoc tribunal hodiè jugulabimur (1).

P. Nic. CAUSSIN, Soc. Jes. *Eloquentia  
sacra et profana.*

Apologie de Socrate.

CUM vir innocentissimus probissimusque Socrates, nemini adversus aut gravis, morum ac vivendi publicus magister, in republicâ ac vitâ inculpatus, domi ac militiae invictus, ad quem juventutem gratis emendandam urbs tota mittebat, in vincula coniectus esset, ipse nec scriptam a Lysiâ orationem admisit, utpotè minimè sibi convenientem ; Plato autem, pulpito, ut memorant, consenso, exhibitus supersedit. Mihi verò sapientia ipsa divini illius viri patrocinium suscipere eo tempore

(1) Voyez le deuxième morceau de cet article, *Discours*.

videtur debuisse, quæ hoc modo plebem, et corruptos opinione pessimâ judices affari potuit :

« Viri Athenienses, quas res geritis? Socratem hunc  
 » Sophronisci filium, Melitus accusat, Anytus op-  
 » pugnat, Lyco persequitur, calumniatur Aristophanes.  
 » Vos verò quid? Credo, damnabitis. Crimen ergò  
 » quod affertur? Novos Deos introducit. Atqui vestri  
 » ne sunt Dii quidem. Edunt, bibunt, pugnant, rident,  
 » plorant: denique, si vestræ credimus theologiæ, cœlum  
 » deserunt, abnoctant, virginum pudicitia insidiantur.  
 » Juventutem hanc nostram corrumpit. Quamne ad pie-  
 » tatem, temperantiam ac frugem, toto vitæ tempore  
 » vocavit? Libertatem ferre non potestis, at majorem in  
 » comœdiâ laudatis. De pœnâ nunc videamus. In exi-  
 » lium mittetur? Ille ubique natum se existimat. Vos  
 » Alopecensem esse creditis, unî populo astringitis.  
 » Mihi crede, ne Atheniensis quidem est. Civem uni-  
 » versi hîc videtis. Quòcumque ablegaveritis, cœlum  
 » hoc dignissimum philosopho spectaculum habebit: so-  
 » lem hunc, hanc lunam intuebitur: in sublimem illum,  
 » et quâcumque parte aspicias, simillimum sibi aerem,  
 » mentes et oculos immerget. Quòcumque autem veniet,  
 » terram aliquam calcabit, aquam bibit. Animum in-  
 » victum, immobilem, ingentem, excelsum, indefessum  
 » habet, omni loco, omni vitæ ac fortunæ parem. Bonâ  
 » subducentur? Ne possedit quidem ulla unquam: unam  
 » togam, calceos plerùmque nullos habet; ecce nudis  
 » pedibus incedit. Etiam hoc tempore quo reus est, for-  
 » tunam proficitur, non accusat. Postremò sola virtus  
 » divitem, paupertas securum efficit. Huic quicquam  
 » eripi non potest, ista detrahi nequit. In carcerem con-  
 » jicietur? Ille academiam putabit. De æternitate animo-  
 » rum, de felicitate post hanc vitam, ut Athenis solet,  
 » lætus securusque disputabit. Compedes ac vincula in-  
 » jicientur? ille liber animo non civitatem modò ves-

» tram, sed et campos Beatorum, quos Elysios vocatis,  
 » pervagabitur ac suaviter describet. Venenum propina-  
 » bitur? Quid, si istud tanquàm vinum hauriet? Mors  
 » sequetur! Quid, si hanc felicitatis portum totius vitæ  
 » tempore vocavit? Memoriam delebitis! Omnium jam  
 » eam animis impressit. Alii vos immites, crudeles, bar-  
 » baros judicabunt: nulla dies, nulla ætas, nulla tem-  
 » porum vis notam hanc delebit. Ille quid? Si vel nunc  
 » verum audire didicistis, pueros nunquàm non existi-  
 » mavit. Fabâ judicem creatis; calculo virtutem aut dam-  
 » natis, aut quibusdam testulis proscribitis. Sic Miltiades  
 » a vobis, sic Aristides, sic Themistocles ex hâc urbe  
 » ejecti sunt. Socrates, ut leges vestræ ferunt, lethale  
 » poculum hauriet. Ille verò, ô inepti, morem geret  
 » vobis, et, ut inter ebrios ac temulentos vestros nemo  
 » Regi se opponit, cujus omne imperium cum mensâ  
 » tollitur, itâ ille, tanquàm a convivii magistro nunc  
 » damnatus; vobis, inquam, morigerabitur: bibet. Pau-  
 » lô post a vobis se subducet, et in locum omnibus com-  
 » munem hinc secedet, ubi neque pacta, neque stipu-  
 » latiunculas, neque fabas, neque testas, neque calcu-  
 » los, nec familiare ac domesticum hîc animal, syco-  
 » phantam, ampliùs videbit; ubi legem, non Draconis  
 » vestri aut Solonis, sed quâ mundus iste regitur ac dis-  
 » ponitur, inveniet, ex quâ lege actor Socrates, rei sunt  
 » Athenienses. »

Dan. HEINSIUS. *De doctrinâ et moribus Socratis, Orat.*

Eloge des Guerriers morts au siège de Bréda.

AD vos jam orationem confero, heroes et milites  
 generosissimi, qui Bredæ sub mœnibus oppetiistis, et  
 cum corporibus illustre fecistis divortium Vos in animis  
 nostris et gratæ posteritatis memoriâ vivite. Stamus in

urbe hâc, sed beneficio vestro. Laborum fructu, quo caretis mortui, fruimur vivi. Certâstis pro patriâ et libertate, quæ, si vestra non sunt bona, sunt vestrorum. Sibi pugnat qui suis. Est aliqua solatii pars morientibus; illic cecidisse ubi famâ superstitute vivitis; illic sepeliri ubi immortalitatis vestræ causas quisque colligit et miratur. Quæ prælia, quæ certamina inivistis, inivistis gloriæ. Quas terras, quos cuniculos, quas vineas subiistis, cœlo vos vindicant. Quos extruxistis aggeres, vallos, munimenta, virtutis vestræ fideique publica fuere theatra. Maluistis per fortitudinem emori, quàm per dedecus cedere loco quem elegeratis. Maluistis cum Epaminondis et Deciis ire per acuta belli, quàm deserere nutantem urbis fortunam. Idem circus, eadem castrorum corona funera vestra vidit et præmia, pericula et fidem, vulnera et constantiam. Non salutem in fugâ posuistis, sed in armis et robore, edocti in præliis maximum esse periculum maximè formidantibus. Socordiam et ignaviam proscripsistis longè. Non dies solùm, sed et nox et vespera armatos aspexit et pugnantes.

Poteratis nonnulli domi vivere splendide et ætatem agere securam. Sed quia ingloria hæc viris et fœda videbatur, ultrò viam inire decrevistis, quâ ad famam itur. Stipendia sprevistis, immortalitatis avidi; nec conducti mercede militâstis, sed gloriæ pretio. Qui alibi vitam in occulto egissetis, coràm jam facta cuncti loquimur. In accessus, in vineas, in fossas missi, non murmurantium edidistis vocem, sed de præcipiendâ laude contendentium. Superesse multorum, gloriosè succumbere paucorum credidistis. Suasit commune periculum et salus instare obsessis, et in re trepidâ tantùm animi et audaciæ; quantum quisque posset, conferre. Qui primi circa hostiles fossas occubuistis, commilitonibus viam stravistis, quâ irent ulteriùs. Crevit in dies vincendi spes, et cum spe fortitudo. Nemo circuitu ambivit gloriam, quæ ante

oculos, quæ in manibus posita erat. Nemo exsequi imperatoris jussa detrectavit, neque illi quorum dignitas erat major, neque illi quorum ob canitiem honestior erat excusatio. Sine discrimine habiti dux, tribunus, gregarius. Nulli dignitatum nomina ab armis feriationem impetravêre. Pro stimulo bellaturientibus fuêre tituli, non pro sufflamine. Quoties Bredam, quoties campos, ubi castra fuêre, quoties agros, quos insedistis vivi, quos tenetis mortui, intuebitur viator, magnanimitatis vestræ recordatione obstupescet! Et, si amicus fuerit, Manibus precabitur benè; sin inimicus, damni sui et dedecoris grandia argumenta recolliget. Inveniet post aliquot aristas arator ossa, quibus felicitatem suam imputabit. Inveniet messor arma, quorum operâ colligendæ messis copiam sibi factam gaudebit. Civis hæc ambulans terras osculabitur, libertatis suæ vindices, in quibus stetistis vigiles, pugnâstis impavidi, occubuistis gloriosi. Flumina, quæ sanguine vestro irrubuêre, testes erunt, vos vicisse, hostem timuisse. Mœnia durata globis glandibusque, resectæ ad operas silvæ, arbores mortis vestræ causas posteris monstrabunt. Ubi tentoria fixistis, ubi hostem exspectâstis, ubi apparatus belli stetit, ubi aciem disposuistis, ubi pluvias, ventos excepistis, ubique in admirationem laudis vestræ rapimur. Sepulcra, si sepulcra sunt tumultuariæ glebæ, et misericordiâ ob mortuos, et honore ob præclarè mortuos excipere dignabimur (1).

C. BARLÆUS. *De receptâ Bredâ, Orat.*, 1, 37.

(1) Voyez les *Leçons latines anciennes*, tom. I, même partie; et ci-dessus, page 415.

Plaintes de la Main gauche contre la Main droite au tribunal de la Nature.

CONFUGIT ad præsidium tuum, ô suprema rerum arbitra Natura, et in te solâ spem habet spoliata per nefas impertito a te jure a sorore soror, ab adjutrice comes, tuamque æquitatem implorat. In te, inquam, sola requiescere potest causæ meæ æquitas, intercluso omni virtutis probitatisque præsidio. Frustrâ preces, frustrâ querelas fudi, frustrâ adversûs injustam vim et audaciam imploravi legum auxilium : surdâ crudeles respuerunt aure preces et querelas; ipsi etiam homines contra propriam utilitatem hujus injustæ libidini favent et suffragantur : hi omni honore sacraverunt impotentem germanæ cupiditatem, hi nostram omni contumeliâ cummulaverunt, si fas est dicere, modestiam. Velis ergo tanto in infortunio jacentis misereri, velis prostratam erigere, omnipotens Natura, cujus justitiam ne ullâ quidem suspicione violare adversarii audeant. Nôsti optimè, quæ ambas finxisti manus, dedisse te utrîque eandem formam, eandem speciem, eadem munia, omnia ad utilitatem corporis spectantia. Quæ communia ambabus statueras, una soror invasit.

Ille, cujus ego quoque lateri hæreo socia, lusum petit, a solâ dextrâ auxilium postulat, dextrâ calamum tenet, scribit, necessarium præbet corpori victum, dextrâ usque utitur, dum otiosa intereâ et segnis, tanquàm nec digitos nec articulos habeam, inglorio torpens veterano, ad omnia inutilis, nisi imperiosæ sororis jussu ad id advocer ad quod illa non sufficit, ita ut me jam non pro comite, sed pro ministrâ habeat.

Quid de concessis dextræ honoribus dicam? Dextrâ inter homines sanctissima fœdera junguntur; non in ea-



cro, non in profano inviolabilius dextrâ vinculum est. Meum verò, si Diis placet, etiam mali ominis nomen est: si quid mali accidit, lævum illud statim omnes et sinistrum clamant.

Itaque hoc mihi iudicio liceat jam erepta jura vindicare, non ut ea quidem sola invadam; nunquàm enim hanc ipsam sororis impiæ superbiam præ me ferre velim; sed ut in eorum, ut par est, communionem consortiumque æquali jure inducar. Si, ô suprema rerum creatrix, aliquod in formandâ utrâque manu habuisses discrimen, nihil sanè nisi justissimum exigeret soror: sed ut his æquâ sorte omnia divisa esse voluisti, nihil in istâ est, quod non et ego tuo munere pariter gloriari possim. Nonne eadem similitudo, eadem æqualitas? Nihil in eâ sanguinis aut nervorum est, quod non in me reperiatur. Quid igitur illa tantos agit spiritus, tantam præ se fert superbiam? Nam quòd majus robur, majoremque solertiam jactitet, id profectò non a naturâ, sed a consuetudine oritur. Testes appello eos homines qui ambas pari jure exercent manus, et apud quos naturæ jussa cultu simplice observantur. Et verò, quotquot sunt geminæ in corpore partes, semper habuère et munia et jura inter se prorsus æqualia: quin et est, ubi pes sinister dextrum superet, eumque sibi fasces cogat submittere; et si dextro pedes, sinistro eques favet.

Nec verò mea solùm jura vindico, mea solùm intueor commoda, sed exacuit animos gravius longè incitamentum, ingentibusque stimulis meum exaugere dolorem videtur: hominis nempè, cujus partes ambæ sunt, utilitas. De meo etiam jure cederem, si non ipsi homini illud noceret. Parùmne ergò tibi erat omni honore, omni dignitate, omni nomine consortem spoliâsse? Tu illum etiam, cujus minima pars es, naturæ dono privasti. Ergò erit quasi mancus ac debilis. Num ergò arbitraris germanæ utilitati anteponenda non jura modò

legitimâ conditione parta, sed vix ferendum fastum et arrogantiam? Quòdusque publica privatæ cedit utilitas utilitati? Ulciscere, ô Natura, ulciscere istam superbiam, istam singularem audaciam, neque eam sinas ampliùs homini sub falso æquitatis nomine nocere. Si ego in mea jura restitutor, quod futurum spondet tua integritas, generosam cum dextrâ manu æmulationem polliceor, cujus finis decus utriusque, et totius corporis utilitas futura est.

Car. LEBEAU.

---

# CARACTÈRES OU PORTRAITS,

ET

## PARALLÈLES.

---

### CARACTERES POLITIQUES.

---

Les Français.

**T**otū populo ingens amor et patientia dominantis. Apud illos verè regnatur; nefasque quantum regi liceat dubitare. Gens armis strenua; sed equestri certamine melior; ignara perfidiæ, publico præsertim consilio: indomitæ intra se molis, et ubi in externos exundat, statim sui impetûs oblita. Eo modo nec diu externum imperium tenuit, et sola est in exitium suū potens. Longobardiam, Neapolim, Siciliam, et plerasque alias per orbem terrarum provincias frequentibus victoriis subegere; sed mox hostes malè domitos fidentiùs, quàm par erat, contemnere, aut simulantibus obsequium credere, inconsultâ laxâque

bônitate; tùm licenter uti victoriâ, et præter illarum gentium indolem lascivire; ad extremum oblivisci armorum, aut ad patriam suam respicere, cujus diù absentiam ferre non possunt: per hæc vitia cessêre in prædâ his ipsis de quibus triumphabant, læta semper bellorum initia atroci exitu corrumpentes.

Nullis mortalibus indoles ad speciem virilis elegantiae magis facta. Oris intrepidi habitus, motusque atque gestus, qui totum corpus decent; et hic decor virtutem ingentium virorum adornat; exiguis autem animis profu-  
fuco est, ac veluti naturali munimento, quo suam humilitatem abscondant aut mitigent. Sic venustè compositi, qualemcunque vestitum de suæ mutationis infinitâ serie, tanquàm inexhausto penu, deprompserint, quocunque salutationis artificio corpus inflectant, putes nihil magis illâ institutione convenire. Vicinæ autem gentes, ridiculo errore deceptæ, ad illorum quoque mores, per earumdem vestium ac motuum variam imitationem, putant accedere, ignaræ leporis et gratiæ virtute in nonnullis hominibus uno genio cuncta placere; in aliis autem, in quibus natura ad hos mutabiles habitus propitia non est, ejusdem venustatis imitationem et curam ingratam ac ludicram esse.

Ut, quò generosiùs vina adolitura sunt, eò adhuc recentia turbulentius despumant, ità gentis istius, ad humanitatem, et, cùm senuerit, prudentiam factæ, adolescentia ac juvenus insano incantoque impetu ut plurimum fervet. Vana in ejusmodi ætate libertas, nunc jocandi, nunc ignotos pariter notosque lacessendi, et ubique titulos nimiae securitatis affectans. Leves animi et rumoribus rapti, jam impatientes otii, moxque tumultus. Ostentatio libidinis supra naturæ desiderium inepta, tùm inconsulti risus, neminique parcentes; vis etiam intra se irrequieta, per varium ac multiplicem tumultum erumpens. Si qui, veluti maturâ sapientiâ compositi,

induant non veram, et ideò majori specie subornatam prudentiam, cùm simulatio virtutis ingrata est, tùm nec diù scientia personæ impatientem omnis veli levitatem abscondit. Media autem indoles, quæ nec Gallis certè deest, lætitiâ capacis animi exuberans, eique non effictâ prudentiâ frenum imponens, ea demùm omni pretio major, et ad optimam sapientiæ simulque hilaritatis imaginem exacta est.

Sed mala si qua sint, et si quæ maculæ se Gallicæ indoli interserunt, omninò donari eorum virtutibus debent, quos vel ætatis, vel sapientiæ pondus ità composuit, ne æstu patriorum vitiorum abripi possint. In iis egregia comitas non fucata, aut insidiosè in hos ipsos, quibus blanditur, collocata. Non fraudibus, non secretis odiis vacant: dignari singulos qui accessum aut notitiam petunt, et pro suâ sorte unumquemque mulcere.

Neque dignas unquàm gratias orbis hospitali Galliæ habebit; quæ humanitatis templum videtur aperire, quò se omnium externorum fortuna conjiciat. Animum in hominibus, non patriam æstimat; neque, communi cæterarum regionum errore, in inquilinis et advenis nascendi sortem punit; ità, candido simplicique amore virtutis, eximios viros, undequèque prodierint, sine invidiâ miratur, et suâ opulentiâ gaudet augeri; et, in tantæ humanitatis præmium, habet publicam primùm laudem, tùm etiam tot hospitem fortunam ac famam, qui Gallico corpori non indignâ aut inutili adoptione inserti sunt. Neque illic hospitibus dediscendi sunt patriæ suæ mores, aut ad Gallicam similitudinem flectendi, dùm superbia absit, aut inculta barbaries. Quippè ipsâ veluti professione exteri moris, sollicitabis cupidæ noscendi gentis studia, simplicius peregrina quàm sua æstimantis, etiam quædam vitæ aut corporis vitia, si modò aliundè advehantur, trahentis in laudem. Nam et peregrini hominis eloquentiam vidimus crebro linguæ errore favorem me-

ruisse , et grandis opinionem scientiæ , quòd non intelligeretur (1).

EUPHORMIO , satyric. Pars IV, cap. III.

Les Anglais.

ANGLIS ut plurimùm gravis animus , et in se velut ad consiliùm seductus , se ipsos , et suæ gentis mores , ingenia , animos , eximiè mirantur. Dùm salutant , aut scribunt , descendere ad verba imaginariæ servitutis , quæ istorum sæculorum blandities invenit , nisi fortè externis moribus imbuti , non sustinent. Populus rei maritimæ studiosus ; neque aliud tantæ insulæ validius munimentum quàm tot nautarum sedulitas. Neque in castris quàm navibus pejor miles , præsertim si externo aeri assuevit , cibisque quos sæpè inexpertos avidiùs Angli gustant. Nam hæc gulæ incommoda delatas a Britannia legiones non semel absumpserunt ; et classem , Elizabethæ reginæ auspiciis , Lusitaniæ littoribus applicitam , cum Angli stragem hostium et vastitatem fecissent , nimius æstus et suavitas pomorum ac baccarum , quas illa plaga habet , totam penè debellavit. Discrimina omnia et adeò mortem impetu plus quàm judicio spernunt : et hinc utilissimos militum dixeris , ubi ducum suorum consilio reguntur : suâ autem sponte ruentes , et illâ audaciæ caligine pleni , de se sæpiùs , post funestos exitus , queri quàm de fortunâ debuerunt (2). *Idem , ibid.*

(1) Voyez les *Leçons françaises* , tom. I et II , *Caractères ou Portraits*.

(2) *Idem , ibid.*

## Les Italiens.

ANIMUS Italis omnium rerum capax. Neque pingui impetu et tantum ad naturæ imperium, sed eruditè et cum artificio, virtutes et vitia sequuntur. Humanitatis effusa promissio ab iis omni corporis gestu sancitur: verba exactæ urbanitatis, et, cum volunt, ad persuadendum aptissima. Etiam prolixè benevolentiae indulgent; et, ubi verè amant, omnia discrimina habent infra tam humani fœderis sanctitatem. Si quos autem oderunt (sive sponte aversi, sive se lacessitos existiment), idè plenior periculi res est, quia, hanc animi ægritudinem plerumque tegentes, altè interim æmulationis aut offensæ memoriam recondunt. Læsi interdum ad obsequium descendunt, ut inter amicitiae jura tutiori fraude grassentur. Etiam ætatem odia hæc ferunt; et, quod noxiosissimum putes, nunquam animus tam facilis est ad vulnus, quam pertinax ad cicatricem. Mentis intra tristiore prudentiam castigatæ vix sustinent jocos; nec quid temerè et absque consilio vel dicere assueti vel facere, ex suo quoque more alios æstimant, nutus omnium, oculos, verba, in argumenta animi superflua subtilitate ducentes. Ità perpetuis suspicionibus atque curis astutus sui pœnas luunt. Sed et ipsa nimiae calliditatis opinio est ingrata, cum, vix in simplicem nec suspectam familiaritatem descendentes, semper stare in speculâ credantur, quid cæteri agent arbitraturi (1).

*Idem, ibid.*

(1) Voyez les *Leçons françaises*, tom. I, *Caractères ou Portraits*.

## Les Espagnols.

**VETERES** Hispani moribus fuere rudes sanè et sine more, feris propiora quàm hominibus ingenia, secreti etiam inter tormenta tenaces, inquieto animo, corporum celeritate maximâ, dediti religionibus, a sapientiæ studiis abhorrentes: tametsi ingenio maximo, quod translati in alias provincias declarârunt, neque mentis perspicuitate, neque memoriæ laude, ac ne orationis quidem copiâ ab ullâ gente superari. Armis aliquantò apud hostes, quàm consilia meliores fuerunt: cultu vitæ agresti, victu copioso magis, quàm exquisito, vino parcissimo, aquæ sæpè potu contenti, vitam propagabant: adversus fontes severi, in advenas humani et hospitales. Hoc tempore vitis et laudibus multùm est additum: nam sapientiæ studia, ut si quâ aliâ in orbis parte coluntur vigentque maximè: nullibique majora virtuti certioraque præmia proposita sunt, cursusque ad laudem apertus magis, quàm in ullâ aliâ gente. Humaniorum litterarum cultus desideratur, sine injuriâ tamen cæterarum disciplinarum. Justitiæ cultores maximi sunt; summos cum mediis, atque cum his infimos, æquabili jure devinctos tenent legibus armati et auctoritate muniti magistratus. Quorum industriâ latrocinia sublata; à cædibus, ab injuriâ manus abstinent. Nulli enim impunè est, quicumque vel sacrosanctas leges, vel quemvis de populo violare ausus fuerit. Retinendæ veteris religionis constantiâ, quo tempore sacra omnia apud nationes alias rerum novarum cupiditate mutantur et convelluntur passim, clari atque præstantes. Domi consilium viget; foris arma, pulsus intestinis hostibus, atque profligatâ Saracenorum impietate, magnam orbis terrarum partem invictâ virtute pervagata sunt. Laborum atque inediæ, quibus virtutibus omnes difficul-



## 464 CARACTÈRES OU PORTRAITS,

tates mari terræque superârunt, patientissima naturâ corpora. Nostrâ tamen ælate, affluentî copiâ voluptatum, illecebris omnis amœnitatis maritimæ terrestrisque, atque commercio gentium exterarum ad copiarum Hispaniæ famam accurrentium, easque importantium merces, quibus vigor animorum extinguitur, emolliuntur labefactanturque vires; enervati et peregrinis moribus depravati, tum obsequio principum, et licentiâ lascivientis plebis corrupti, nec libidini, nec sumptibus, nec vestium pretio modum faciunt. Undè quasi ex summo volvente se fortunâ graves calamitates prudentibus videntur imminere: cum præsertim, ab ingeniorum austeritate, morumque severitate atque arrogantia, odium nationum omnium sustineant, gravissimum atque individuû magnorum imperiorum asseclam (1).

MARIANA. *Hist. d'Espagne. L. I, c. vi*

### Les Belges.

BELGIUM (2), portio quidem Europæ perexigua est, quippè quæ non multum excedat quintam Italiæ partem, nec ultra milliaria circiter mille ambitu protendatur. Tamen haud scio an facilè ulla sit uspiam regio aut ditior aut frequentior, cum non minus fructuum e Belgio suo princeps quàm Angliæ rex amplissimâ ex insulâ percipere consueverit: et urbes in eâ, sive mœnibus clausæ, sive clausis magnitudine propemodum pares, supra trecentas et quinquaginta censeantur: pagi verò majores ultra sex millia ac trecentos numerentur, ut nihil de minoribus vicis arcibusque loquar, quibus supra omnem numerum

(1) Voyez les *Leçons françaises*, t. I, *Caractères ou Portraits*.

(2) Strada comprend sous ce nom général les dix-sept provinces des Pays-Bas.

consitus est Belgicus ager. Jam hominum virtus, operum molitio, copia, varietas, quantum angustias Belgici tractus egreditur! Nusquam militia aut ingeniosior, aut affluentior, aut diuturnior: planè ut aperto hîc ludo accurrentes undique populos Mars ad bellum erudire videatur. Quæ verò ignota marium littora, quasve mundi desinentis oras scrutata non est Belgarum nautica? Nimirum, quando illos natura intra fines terræ contractiores inclusit, tanto ampliores ipsi aperuere Oceani campos, quos subigerent incolerentque Belgii velut pomœria prolatantes. At lanificia atque texturæ non implevere modò, quanta est, Europam; sed longè latèque per Africæ Asiæque populos circumtulere Belgium: ipsique ad Occidentem Indi ex laneis et lineis opificiis Belgicarum urbium nomina didicere. Pauca demùm admiramur hodiè machinamenta, quæ Belga aut non invenerit, aut non absolverit.

Et verò fuerit olim, cum horum ingenia, tanquam ex humilioris soli fato, depressa habebantur. Alia nunc ætas et mores sunt. Litterarum studia, maris militiam, navigandi quæstum, pecuniarum negotiationem, reipublicæ, quam ipsi sibi fecere, culturam, admiranda ignium aquarumque artificia, nempe ingenii non utique depressi documenta, vix alibi paria, nusquam certè tam multa simul per reliquam Europam, quam uno in Belgio quicquam viderit.

Cæterum hæc in universum genti propria, si genio illis suo uti liceat, odisse fraudes, ex fide, quâ ipsi digni, alios æstimare. Gratiâ donisque non magnoperè, neque in longum capi; plerumque beneficiis utentes cœu floribus, tamdiù gratis quamdiù recentibus. Eundem adversus injurias sensum esse, quarum memoriâ citò animum exuunt; nisi si contemni se videant, tanquam ex facili tolerantes; tunc enim verò implacabiliter exandescere. Ad hæc vires suas metiri haud improbè: nec ferè concupiscere, quæ non capiant: cum tamen nulli

mortalium pari solertiâ terram ac mare ad quæstum exer-  
ceant, utriusque cultores elementi, atque incerti juris.  
In hoc etiam perquam admirabiles, quod quantumcun-  
que lucrum, jacturamve, quæ, ut in mercaturâ, persæpè  
faciunt, tam modico surdoque lætitiæ ac doloris sensu  
prætereunt, ut alienis interesse, non sua curare credas,  
æquitate, opinor, animi ac suo illos cœlo frigidius  
afflante. At in libertate propugnandâ calescunt plus satis.  
Scilicet huic posthabere omnia gloriæ ducunt, licentiæ  
interdum quàm libertati propiores.

Famianus STRADA, Jes. *Bellici Belgici Decadis*  
*primæ Lib. I.*

#### Les Allemands.

GERMANIA, olim silvis et incolis fera, nunc oppidis  
passim insignis: nemoribus quoque, quibus immensis  
tegebatur, ad usum decusque castigatis, vitem alit quâ  
in primam excurrit Italiam, supraque inumbrantes Rhe-  
num colles, in Pannoniam quoque declinans; et aliquot  
prætereâ locis, ubi humus propitiis collibus, vel tepore  
fluminum mitigatur. Multâ deindè abiete, in montibus  
silvisque frigentis plægæ arena abundat.

Litteræ in multis locis cultæ inter homines minùs  
sciendi avidos quàm docendi Plura quàm legerint scri-  
bunt, et suam famam ex voluminum, quæ edunt, nu-  
mero aut magnitudine æstimant.

Vis mentium ut opaca, ità ad æternitatem laborum  
est robusta; ut cæteri melius quidem scire, illi verò  
plura possint.

Ignôta ibi perfidia etiam in venali fortitudine sti-  
pendia merentium. Ne ingenium quidem fraudis, aut  
odia sub amicitiae titulis latent; et omninò ingentia sce-  
lera verecundi populi simplicitas ignorat. Parca et in

furtorum suorum tenebris mersa libido, non, ut alibi terrarum, palam inter titulos atque ludos exsultantis juventutis. Nam et propè ad muliebris pudicitiae similitudinem viri quoque hanc pestem aspernantur. Neque desunt altissimæ mentes, in quibus patriam gravitatem vividi et excitati acuminis felicitas temperat, præcipuè si validum ingenium diù peregrinis artibus moribusque miscuerunt. Gens armis egregia, et quæ pacem ferre possit. Tardè et cunctantibus consiliis ad tumultus concitantur; sed excitos longa tempestas et hominibus digna exercet. Populus æris ferrique tractandi peritiâ et per mille artificia ducendi insignis est. Typographiæ inventum pulverisque nitrati illis ingeniis orbis debet, ambiguo prorsus beneficio, et quo tam pernicies mortalium quàm utilitas humanis sese rebus ulterius insinuavit. Candidi animi virtutes aliorum, factaque aut inventa, maximè absentium, non maligno et timido livore delibant, sed sinceris laudibus ac propemodùm immodicis extollunt (1).

EUPHORMIO, satyric. Pars IV, cap. V.

#### Les Polonais.

GENUS hominum promptum ingenio, promptum auxilii, affectûs tardius. Naturâ ad pleraque idoneum, animosum imprimis et forte, assuescere militiæ lubenter, officio et imperiis parum. Privatim quietum, publicè turbidum, cupidum gloriæ, parcum laboris, animæ pro patriâ prodigum vulgò cerneret. Animus lævæ fortunæ sat patiens, bonæ minùs, spe erigitur, usu facillè obruitur. Idem appetens opum simul ac profusum, laudare sua et negligere, quærere aliena, nec imitari. Nobiles feminas auctoritate apud viros circa publica negotia pollere,

(1) Voyez les *Leçons françaises*, tom. I, même partie.

## 468      CARACTÈRES OU PORTRAITS;

nondum obsoleta est opinio; verior, eas ingeniorum habitu plerumque et disciplinam præstantes id magis posse quam egisse. Inest plerisque mobilis usquam voluntas, at domestici nominis ac rei, supra quam cuique credibile est, nulli nonnisi pulchre tenax. Hi Sarmatæ sunt.

*Commentariorum de Bello Sarmatico liber  
unicus. 1808.*

Fabius et Marcellus.

FUIT hæc fortuna populi romani, aut potius divinæ providentiæ cura singularis, quæ Romam ex Annibalis faucibus ereptam orbi principem universo destinabat, ut duos ingentes viros Fabium et Marcellum Roma generaret, iisdemque temporibus amborum virtus eluceret. Cum enim, Punicis armis concussâ republicâ, et sapientiæ robur requireretur quæ rem labefactatam sustineret, et fortitudinis impetus qui hostium vim exultantem retunderet, utriusque viri ita temperata fuit indoles ut illius prudentiam hujus fortitudo, hujus audaciam illius cunctatio frenaret. Ac quæmadmodum inest in animis facultas duplex, voluntas quæ admovet manum, mens quæ consilium adhibet, quarum altera sic alterius ope indiget, ut alterutra si defuerit, illa manca futura sit et iners, hæc cæca et fortuita; sic Fabium reipublicæ quasi mentem et consilium, Marcellum quasi agendi vim et manum non absurdè dixeris. Alter cunctator, cautus, indomitâ animi fortitudine vicens, inter prolabentis imperii ruinas stans impavidus, ut adversus hostium artes, sic adversus civium suorum maledicta invictum animum gerens, publicæ salutis ita studiosus, ut gloriam suam posthaberet; alter ferocior, animi alacritate exultans, contemptor, imò avidus periculorum, quietis im-

patiens ac otii, publicæ gloriæ ita cupidus ut nullam sine gloriâ salutem duceret. Uterque cum altero ita compositus, ut ad tutandam rem Romanam Fabius, Marcellus ad ornandam natus videretur, et ille pro clypeo Romanis, hic pro gladio datus; ille, ne Romani vincerentur, quod primum fuit, hic, quod summum fuit, ut vincerent, efficeret.

Tam diversam indolem suus finis excepit. Fabius in placidâ senectute, cujus maturos fructus vel ipsa juvenilis ætas prudentiâ præceperat, in ipso reipublicæ, quam servaverat, sinu, diem supremum obiit; Marcellus, in maturâ ætate, raptus audaciâ juvenili, ac præcipiti impetu paulò longiùs elatus, militi quàm duci similior pugnando occubuit.

## C. LE BEAU.

## Viriathus.

MIRUM videri queat, unum hominem nullis suis viribus, nullâ cognatorum potentiâ fultum, ne populi quidem iudicio electum, tot per annos arma populi romani sustinuisse; verùm cuimverò tantum in eo virtutis robur fuit, ut à se explere posset quicquid fortuna dare neglexerat. Animus adversum pericula intrepidus, sagacitas ingens, peritia militaris rei summa, corpus edoctum animi imperia sequi. His omnibus justitiam, humanitatem, abstinentiam incredibilem addiderat. Partas armis, opes inter suos æquissimâ partitione dividebat: ipse nihil indè locupletior, eodem armorum, vestium, corporisque cultu, quo bellare cœperat, post tot insignes victorias agere perseverabat.

Hunc tenorem vitæ nulla solemnitas festorum, nulla remissio animi, ne nuptiarum quidem, omnibus gentibus hominibusque probata, hilaritas ullâ ex parte interrumpbat. Cum enim ditissimi cujusdam viri filiam matri-

monio jungeret, multisque poculis aureis argenteisque, multâque stragulâ veste eximii operis adornatum triclinium esset, hæc allevans lanceâ, « Ab hâc pendere ista omnia » dixit. Multùm deindè rogatus, ut lotus accumberet, non paruit; sed ex instructissimis mensis nihil, nisi panem et carnes, tollens, dabat comitibus suis, et ipse stans comedebat haud diù: deindè sponsam adduci jussit. Quam, peractis Hispano more solemnibus, equo impositam, statim ad montes, in quibus eo tempore præsidia sua habebat, secum abduxit. Hâc disciplinâ intentam negotiis mentem, et valida membra, et illibatam virtutis robur ad extremum usque retinuit,.....

Fuit haud dubiè sicut in certando fortissimo militi, sic in providendo sagacissimo cuique imperatori comparandus. Quodque bonis etiam ducibus haud perpetuum est, toto imperii sui tempore benevolentiam omnium militum et amore singulari usus est. Quem moderatione beneficiisque provocabat, virili prædæ parte contentus, cum semper exercitus ipse ampliorem capere juberet; atque hinc etiam multa præmiis meritorum, aut necessitatibus inopum decerpens. Præter hæc cibi viniq̃ue parcimonia viro incredibilis fuerat: neque plus aut somno, aut cuiquam generi voluptatum, indulgebat. Quantus autem ille vir fuerit, ex ipsis rerum argumentis promptum est colligere. Nam continuis contra Romanos quatuordecim annorum bellis, quorum ampliùs decem totius ferme Lusitanie imperatorem egit, non modò concordēs inter se et adversus ducem copias continuit, sed etiam ab hostibus propemodum invictas præstitit. Consilio conatuque, et tantum non successu, Hispaniæ contra romanam potentiam assertor: votique futurus compos, si paulò infirmiores hostes, et firmiores amicos habuisset.

Freinshemius, *Suppl. de Tite-Live*. liv. LIII, ch. XI et XII, et liv. LIV, ch. XXIV.

Athenais.

ATHENAIDEM intueri mihi videor, eruditam illam virginem : quæ à juniore Theodosio conjux adscita, ab humili et jacente fortunâ ad summum imperii culmen evecta est. Latebat illa sub obscuriore tecto, nullâ re nisi virtute felix, uno ingenio clara, solis doctrinis locuples ; paternarum opum, quamvis illæ modicæ forent, testamento exhæres ; spreta à suis, neglecta à civibus, alienis ignota. Venit in palatium deprecatura paterni testamenti injuriâ. Hîc contempta scilicet puella tenuis, et durius habita in limine, vix ut admittatur exorat ; sed admissâ tandem, sequestrâ pulchritudine, tum conciliatricibus gratiis, advocato pudore, patronâ eloquentiâ, peroravit. Placuit imperatori, quæ lictores atque satellites flectere vix potuerat ; et dimissa cum gratiâ, brevi summâ cum gloriâ revocata est. Conjux eligitur, designatur Augusta. Redit in aulam apparatu regio, solemnique pompâ : ingreditur maximis ordinum omnium gratulationibus : imperatricem venerantur, qui modò sordidatam et squalentem contempserant : communicatur cum Athenaidæ Theodosii majestas : tantumque splendoris in obscuram puellam ab augusto matrimonio refusum est, ut, deposito Athenaidis nomine, gloriæ nomen ipsum ferre tum cœperit, et Eudoxia nuncupari.

P. COSSART, Jes.

Charlemagne.

CAROLUS, imperio Francorum longè latèquè propagato, post reddita Europæ jura, Africæ incussam formidinem, Asiæ initam societatem, restitutam terris



pacem; securitatem gentibus, sanctitatem templis; summæ sedi pontificem, cooptato publicè in Augustum Ludovico filio, adactis in ejus verba proceribus, florente disciplinis Parisiorum scholâ, quam auctore Alcuino Bedæ discipulo, conductis annuâ mercede omnis doctrinæ professoribus, ad omnium gentium studia instituerat, de religione, litteris, Francorum gente, orbe universo benè meritus, Aquisgrani in Germaniâ supremum diem agens, cœlestem animam vir cœlestis cœlo reddidit. Tenet fama paucis ante ejus obitum horis tactam fuisse de cœlo urbis ædem primariam, corrasis ac deletis ex affixâ fornici epigraphe his vocibus, *Princeps Carolus*, ut qui mox cœlo insigni cœlitûs consecratione raperetur.

Fuit Carolus virtutibus imperatore dignis præditus, rerum gestarum gloriâ felicissimus, quem vehemens turbo, ereptis duobus liberis, fortunæ, in quam alebantur, capacissimis, extremo vitæ cardine, paululùm excussit ac violavit. Non belli magis quàm pacis artibus instructus, domi forisque idem maximus: consilio providus, manu strenuus, amicis suavis, formidabilis hostibus: quem tamen nimia in victos sæpè humanitas fefellit: innocentia eximius, sanctitate præcipuus, litterarum amantissimus, formâ excellens, animo super humanam et naturam et fidem evector, magnitudine cogitationum, celeritate bellandi, patientiâ periculorum, magno illi Alexandro, sed sobrio nec iracundo, simillimus: dux bello peritissimus, amicitiarum tenax, in offensis exorabilis; pietate in Deum, affectu in suos, in religionem cultu, observantiâ in summum Pontificem, nulli postponendus: ut Augusti, Trajani, Constantini, Theodosii virtutes unus expleverit Carolus Magnus: penè omnium votorum compos, si, quod Metello Macedonico contigisse ferunt, præter excellentissimos triumphos, et principale in hoc terrarum orbe fastigium, extentumque vitæ spatium, acres pro religione conten-

tionem, tres filios omnes reliquisset superstites et honoratissimos, ejusque demortui lectum ei sustulissent; quod nimirum magis fuisset de vitâ migrare feliciter quàm mori (1).

Petrus BERTHAULT, *Orat. Flori Francici*, l. II, c. XX.

Godefroi de Bouillon.

GOTTHOFREDUS dux, Rex Sanctæ Terræ designatur. Is non armis tantum, sed et consilio et religione ingens erat. Franci eum observabant, quod in Franciâ natus esset, patre in regiâ gratiosissimo, patruo pontifice Parisiorum, eodem in amplissimo magistratu. Germanis eum ducebant, quod sub Augustorum signis meruisset. Itali colebant, quod ejus avunculus Stephanus, primum antistes Cassinatis templi cœnobiique, deinde pontifex maximus, priscâ sanctitate sedisset, octavo quidem suæ sedis mense defunctus, sed ingenti gloriâ, quod Ecclesiam Mediolanensem ad officium revocasset, ducentesimo anno ex quo a Romanâ defecisset. Et in Italiâ Gotthofredus militaverat auspiciis Cæsarum, secundâ virtutis, modestiæque et clementiæ famâ. Proinde trilinguis, ac veluti triplici patriâ, sacro bello cunctorum animos in se vertens, eos inter se quoque devinciabat, alioquin solitos amaritiæ verborum dictorumque, ut inter dissonas moribus et ore gentes assolet, decertare. Non deerant Hierosolymis qui regnum darent, sed deerant qui regnum acciperent regerentque. Negavit Bononiensis, se in eâ urbe auream coronam sumpturum, ubi Dominus Deusque spineam gestasset : regia potestas, sine regio nomine insignique, ei credita.

PAULUS ÆMILIUS. *De rebus gestis Francorum*, lib. IV.

(1) Voyez les *Leçons françaises*, tom. I, même partie.

Saint Louis.

**LUTETIÆ** florebant liberalia studia. Juventutis concursus illuc undique fiebat. Scholastici suorum nonnullos a civibus pulsatos conquesti, alii in alia cæterarum urbium musæa concessere. Solitudo exsiliumque litteris indictum Lutetiæ videbatur. Rex non minùs decoris liberales artes, humaniora studia, sacram disciplinam, cultum ingeniorum Francis, quàm arina afferre prædicans, egregiamque consociationem fore bellicarum rerum gloriæ cum divinarum humanarumque rerum cognitione doctrinæque conjunctâ, regiæ urbis cives ad officium, colendosque doctores discipulosque revocavit. Suus ingenuis artibus honor habitus. Ipse Rex, jam virtutis bellicæ documentis datis, quietem et tutiorem et gloriosorem nactus, se totum religioni dedere, publicæ utilitati, decori communi inservire.

Ambitum coercuit. Decuriæ honoresque in suâ cujusque civitate largitionibus parari cœperant; hunc morem gravi edicto solvit, sibi primùm imperans: quod virtuti meritisque deberetur, fortunæ aurove non dari. Histiones, parasitos aulâ exegit. Pestilentia simul et fame ortâ, ut malum malo seritur, cum nullum consilium, nullam humanam opem non adhibuisset, divinam etiam implovit: publicè obsecrationibus, privatim et arcanè (ut postea compertum est) cilicio interiore usus, jejuniis, tergo flagellis lacero. In omnibus vitæ partibus sanctus, cuncta ex usu ac dignitate moderabatur: plebes parentem, nobilitas principem, leges custodem, Francia verum regem, religio vindicem experiri. In alienos maximè pius, in suos etiam liberalissimus (1).

*Ex ejusd libº. viiiº.*

(1) Voyez les *Leçons françaises*, tom. I, même partie.

## Louis XI.

Vix in ullum principem tantum famæ post mortem licuit; metu pressæ voces eruperunt extemplò; et, ut vulgus ad extrema rapitur, vitia Regi affricabant omnia, virtutes adimebant. Ego, ut abstinere ab insanæ plebis rumoribus, non inficiar quin excelluerit Ludovicus in multis, at redarguendus longè in plurimis. Religionem haud dubiè hauserat, atque in res sacras venerationem, ac tametsi aliquoties pietatis speciem privatis consiliis prætexuerit, tamen menti hærebat rerum divinarum cultus aut timor. Regnandi artem apprimè callebat, nihil fortunæ permittens aut aleæ; nec metu aut ignaviâ cessabat a præliis; nam adolescens ingenti animo vitam objectabat periculis, sed consilio atque prudentiâ; gnarus sapientem, quantum homini licet, res suas sorti casuique subripere. Regis partes implebat eximiè, regiæ dignitati, majestati atque incremento cætera posthabens, promotis feliciter studiis, ut Franciæ fines versùs omnem partem protenderit, cum paucis admodum propagator imperii dicendus. Atque eæ laudes sine controversiâ debitæ, quas exaggerâset grata posteritas, nisi pluribus et gravissimis vitiis contaminarentur. Cunctis terribilis, nemini charus, principes habebat pro mancipiis, mancipia pro principibus, vilissimis hominibus addicebat se, tonsori, medico, cubiculario; et, dignitate natalium spreâ vel suspectâ, amabat ingenium, et gratiâ promovebat, nullo metu, nullâ curâ, faciliè repressurus quos evexisset e pulvere. Plebem immodicè tributis vexavit, egitque ad tantam inopiam, ut plerique rustici, aratro de collo suspensio, terram proscinderent; immensas opes plerumque improvidè largiebatur, alendis speculatoribus, et serendâ proximos inter discordiâ; cum privatim nullâ

## 476      CARACTÈRES OU PORTRAITS.

dignitate, nullâ majestate ageret; cultu obsoleto, deformi pileo vetustate, manicis ad thoracem veterem instauratis, et inunctis ocreis sero pingui, ut, præter potentiam atque sævitiam, nihil regium saperet. Nam sævitia in eo supra modum hominis christiani et Franciæ Regis, ut carcer, cavæ, ferreique globi loco clementiæ et veniæ essent. Conjugem inhumaniter habuit, ab aulâ remotam, arce inclusam; ad eam liberorum causâ per contemptum adiens; nec liberos nisi per ambitionem amavit, ne sine hærede in ludibrium iret. Joachimum natu primum filium, raptum anno tertio vitæ, quod præclaram spem vel in cunis ostenderet, persecutus invidiâ, impensius mortuum quàm vivum amavit; et Carolo, alteri filio, institutionem invidit, rejectis præceptoribus, bonisque artibus repudiatis, unum illi dogma ingerens: « Qui nescit dissimulare, nescit regnare, » quasi clarissimum et eminentissimum opus, atque humanæ sortis suprema dignitas, in uno vitio, quo infirmitas latet aliturque, posita sit atque constituta. Uno verbo, qui Ludovicum Tiberium Christianum vel Francicum dixerit, dignè virum exscribet, quippè ille delibavit omnia Romani vitia, nisi quantum religio et Francici mores corruptam indolem quibusdam æqui an metûs terminis concluderunt.

P. de BUSSIÈRES. *Historiæ Franciæ*, l. XII.

François I<sup>er</sup>.

FRANCISCUS I fato functus est in arce Rambuletanâ, anno salutis 1547. Rex virtute eximius, bello acerrimus, aliquandò fortunâ, semper animo maximus; consiliis dux, miles manu, imperio singularis, litterarum amantissimus, quas e situ tenebrarum vindicavit, accitis undique viris clarissimis, quos amplissimâ mercede condu-

xerat. Quippè ante eum regem ità abjectæ ac prostratæ fuerant, ut vix ullum exstaret earum vestigium; sed, eo auctore ac parente, universæ quasi uno impetu lacertos movere, et in apertum prodire visæ sunt.

Cæterùm in eo, præter alias virtutes, artem unam egregiè mirabilem reperire est, semper ei majorem in adversis, quàm in secundis animum exstitisse. Neque enim tantus rex, tantæque virtutis ac scientiæ, ignarus erat fortes et strenuos contra fortunam spe insistere, timidos et ignavos ad desperationem formidine prope-rare. Nec defuit tamen in tanto rege, tantisque virtutibus ornato, quod jure reprehendas: nimius in aulicarum mulierum convivia, mundum, et luxum affectus, sæpè maximarum rerum momenta evertit: adeò nihil est tàm perfectum, ut non alicujus vitii confinio lædatur. Henrico II, longo jam rerum usu tantæ moli haud impari filio, regni habenas commisit. Henricus servatum e nau-fragio imperium, sed propè lacerum servavit, ornavit, auxit.

P. BERTHAULT, *Orat. Flori Francici*, l. iv.

L'Empereur Charles-Quint.

ERAT ejus vultus, ut hoc quoque curiosi minimè desiderent, argenteo et grato quodam pallore dilucidus; oculi cærulei, suaves, nullâ acri severitate formidabiles, et ii quidem ad ingenuum pudorem virilemque modestiam instituti. Nasus in medio clementer assurgebat: quod magnitudinis animi signum in Persarum etiam regibus ab antiquis fuit observatum; mentum ad exiguam venusti oris injuriam paulò prominentius, et, quod gravitatis speciem addebat, subcrispâ et flamenti barbâ con-vestitum; capillum verò fulgore pallentis auri, mōre Romanorum Cæsarum, circumtonsum ostendebat. Porro

## 478      CARACTÈRES OU PORTRAITS,

statura corporis, ut in ipso ætatis integræ flore, et prosperrimâ valetudine, non ab inertî succo, sed a valido nervorum nexu longè firmissima: peramplæ item, robustæque manus ad stringendum ferrum idoneæ: crura autem venustissimè exstantibus toris, trunci proportionè directâ, quod tûm maximè apparebat, cûm equo veheretur. Tanta enim ei inerat cum dignitate equitandi peritia, ut nullus eo armato, atque equum incitante, et in gyrum reflectente, vel pulchrior, vel vividior, vel in ferendo armorum pondere patientior eques reperiri posse videretur.

Paul JOVE. *Histor.*, l. XXVII.

François I<sup>er</sup> et Charles-Quint.

FRANCISCUS planè Rex et Carolus Cæsar cûm æquali haberentur potentiâ, diversis ferebantur consiliis. Cæsar callidior et occultior; Franciscus apertior et elatior. In Rege clemens et mitior natura; in Cæsare durior et minùs remissa. Cæsar valdè acutus et providens: Rex strenuus et magnanimus habebatur. Cæsar, quò astu insidiisque falleret, Rex ut pugnâ apertâ vinceret, laborabat. Cæsar militares homines et callidos complectebatur; Rex ingeniis excellentibus mirificè delectabatur. In Cæsare majorem fidem, in Rege interdûm majorem cautionem desiderares.

Erant apud Cæsarem industriæ quidam stimuli ac laboris: flagrabant ornamenta fortitudinis, comitatis, humanitatis apud Regem. Cæsarem parcum, nec illiberalem tamen, diceres: Rege in largiendo nemo effusior. Cæsar servire temporibus, regere ad tempus suam naturam, torquere et flectere didicerat: Rex constantiam sermonum re exsequebatur, eaque palâm sentiebat, quæ invictum ejus animum faciliè ostenderent. Cæsar cum callidis acutè, cum suis graviter versabatur; Rex cum

aulicis jucundè, cum proceribus humaniter vivebat. Conferres Regem Carolo Burgundioni, Cæsaris avo, nisi quòd et fide et comitate fuit majore Franciscus : Cæsar Ludovico XI, Gallorum Regi, simillimus.

In Rege variam eruditionem memoriamque propè divinam, in Cæsare varium et ad omnia versatile ingenium non desiderares. Cæsar repræsentabat umbram humanitatis et clementiæ; in Rege non adumbrata simulacra, sed totam effigiem harum virtutum agnosceres. Rex manu fortior, Cæsar cautior ferebatur. Cæsarem, nisi se ambitu commaculâsset, verè pii nomen relatum; Regem, nisi deliciis aulicis implicitus fuisset, omnium regum triumphos superaturum, detrectatores tantarum virtutum, et quasi Momi Veneris sandalium carpentes, aiebant. Naturâ enim cum esset comis, facilis, benignus, disertus, conciliârat sibi Franciscus principio regni omnium amorem. Rhythmos quidem Gallicos eâ concinnitate Rex edebat, ut nec fluere rotundiùs, nec cadere numerosius, nec cohærere aptiùs ullo pacto possent, dubitarentque qui in eo genere versati sunt an res verbis, an verba sententiis magis illustrarentur : atque ita amatoris lusibus philosophorum severitatem admiscebat, ut et illi hinc auctoritatem, et hæc illinc hilaritatem precario accepisse videri possent, totumque Fr. Petrarchæ myrothecion, ac nonnihil etiam Dantis Aligerii pigmenta consumpsisse. Vidimus ipsi, si quid plebi Gallicâ linguâ suaderet, præcipientes ferri impetu animos audientium, quòcumque eos impellere ipsi libuisset ; tanta copia orationis, tantum flumen lectissimorum florum, id pondus gravissimarum sententiarum ex ejus ore prorumpibat !

ARN. FERRONIUS. *De Rebus gestis Gallorum*, l. VI.



## Le Chevalier Bayard (1).

**PETRUS** Terralius, Bayardus, vix puber, castrensibus addictus operis, præclarè factis tempora elusit, virtutis miraculo prælusit, primo fermè militiæ tyrocinio magnus, prodigiosæ fortitudinis, quâ domi, quâ foris, spectacula juvenis dedit; sed illustri præsertim Italiæ theatro, lauris adtexta lilia geminum in fronte honorem divisere. Ubi virum animosâ maturitas et experientia tulerunt, quæ finxit fortia facta vetustas fecit. Bayardum Alcidi confudit *impavidi et inculpati equitis* cognomentum. Constantis famæ vulgatu virtutis appellationem suo nomine occupavit. Tres illum reges, lustris ferè septem, gravibus gerendi belli institutis, suæ militiæ præfectum habuerunt. Illi honorem stipendio potioremerito, victori triumphalia decora virtus decreverat, sed honoris currus, tot victoriis onustus nutavit, virtutis magnitudine laboravit. Regiæ vicis in Delphinatûs provinciâ præfecto, ingens honor fuit, honore eo non egere; non concessum regni insigne, sed præmium; Regem suum, gladii succinctu, militiæ inauguravit. Illud tandem duci semper victori deerat, ut lethum vinceret, vicit. Attonitæ mortis, nec ausæ luctari, feriendum se fulmineo telo objecit. Erubuit hæc, et quòd victa, et quòd immatura. Ille equo desiliens, victoriis fessus, sub arbore resedit, et vultu in hostem converso, placidè oculos et diem clausit anno Domini 1524, ætatis 48.

(1) Cette épitaphe de Bayard se lisoit dans l'église des Minimes, près Grenoble, sur un tombeau qu'avoit fait faire, à ses frais, Scipion de Polloud, seigneur de Saint-Agnin.

## Philippe II.

**INVALIDUM** senectâ corpus, et antè, et a vere præsertim proximo, articulorum doloribus frangebatur, cum sub ætatem gravescere valetudo, cui ut remedium ex animi remissione quæreret, Laurentianum lecticâ deferri se jubet, quod immenso sumptu structum ipsi palatium, cum res interea Belgicæ pecuniæ penuriâ dilaberentur, inter clarissima hujus ævi monimenta visitur. Indè pinguis cœli et jactationis impatiens, ubi quieti redditus est, in febrim corrumpitur; solito nervi contractiones, simulque virus abditum ulceribus patescit, in quæ et crus tormentis inflammatum et pectus maximè defecerat. Hæc ubi medicamentis admotis resoluta saniem fudere, dictu tetrum quanta vis pediculorum perpetuò secuta sit, ut quidem multis manibus circa unum laborantibus minima pars esset residuæ sordis quod excernebatur. Mox ubi debile corpus omnisque contactus impatiens mundari ultra nequibat, tam obscenâ tabe viscera exesus, firmo atque invicto adversum dolores animo, quod vitæ sibi superesse intelligebat, ad mortis meditata retulit: quippè ossium compagi insigne capitis regum imponi jubens, suosque subindè artus filio et natæ ostentans, docebat quàm fragile esset quod in rebus humanis maximum habetur. Indè fraternam inter ipsos concordiam, et Romanam fidem commendabat, tam seriò, ut post sepeliendi ritus de parentibus anxie caverit, interque solemnes divum laudes oleo perunctus, et jam supremis proximus, Christi e cruce pendentis imaginem, eandem quam pater olim moriens, contrectaret. Mandatis, quæ animum religione sollicitabant, editisque aliquot clementiæ exemplis, duodevicesimo calendas octobres mortalitatem explevit,

Leg. lat. mod.

31

quem ipse diem sibi fatalem vatis monitu prædixerat.

Is finis Christianorum potentissimi fuit, et principum quotquot nascuntur ditissimi, annum agentis primum ætatis et septuagesimum, imperandi tertium et quadragessimum. Corporis habitus mediocris; nisi quòd frons celsior, tum labia in modum Austriacis gentilem prominentia; vultusque tantò Belgæ propior, quantò moribus in Hispanum concesserat. Mitem ingenio libenter crederes: quippè et accessu comis, nec temerè sæviebat; sed quoties dominationi expediret, famam clementiæ haud multum morabatur. Solertiam, quæ non perindè ut parenti affuisse creditur, perfecit ætas et diligentia, cum parcus otii somnique majora ipse, non per ministros, tractaret. Pecuniæ usum gnarus, Imperatores, Pontifices, fermè quos vellet renuntiabat, arcana regnorum scrutabatur: adversus prospera et ruentia vultu, an et animo æquabili, sed conditus in dissimulationem, odiis et suspicionibus indulgebat: spei improbior, et regnandi libidine cuius veterum conferendus: religionis, quæ quidem in externis actibus versatur, observantissimus; circa imperii artes principum exemplo excusatus, et in his, quæ ut privatus peccabat, laudatæ yerecundiæ. Bella illi primâ ab ætate fuere; sed præter Gallicum, quod juvenis vidit tantum, cætera per legatos administravit. De majoribus et posteris variè meritis, quorum imperium, ut Americanis proventibus auxit, et Lusitanicæ accessione, ita amissis Goletâ, Tuneto et Batavis dehonestavit. Et tamen in tempora paternis diversa incidisse notabatur, non eo sæculo, quo penès eosdem homines summa virtus et fortuna fuit, sed cum feminas puerosque et imbelles æmulos aut hostes haberet. Hæc fermè prudentiorum de eo judicia fuere. Alii ob partes infensi suscepta temerè bella, perfidè gesta, nec minùs cruentam pacem per Hispaniam Belgicamque, in idem sævitæ concitas Gallias, pluraque mala publica et

domestica exprobrabant; ipsam exitûs fœditatem in argumentum trahentes : innoxias scilicet filii, uxoris Isabellæ umbras, has patri, has marito pœnas irrogare, quo modo olim Herodes (quicum pleraque morum et fortunæ comparabatur) et regina Cyrenæorum Pheretima parricidia luissent (1),

Hug. GROTIUS, *Histor. de Bello Belgico*, lib. VII.

Elisabeth.

ELIZABETHA, Angliæ regina, gloriosissima fuit; et omnium, quæ unquam sceptrum gestârunt, felicissima femina. Magnis casibus totâ vitâ conflictata, magnas res pari cum virilis animi magnitudinæ gessit, laude aut fortunâ incertum illustrior. Fuit alto et virili spiritu, et cum regnum auspicata est, anno ætatis vicesimo quinto, non pueriles, sed jam maturas et vexatione exercitas curas ad illud attulit; neque alieno, sed proprio ingenio usa est, et moderationem cum prudentiâ summo temperamento miscuit, erga præferocem et ardentem nobilitatem severa, erga cæteros mitis, ut in illius animis metum ac reverentiam, in aliis amorem suû statim ab initio impresserit, æquali indè usque ad exitum vitæ tenore hoc assecuta, ut constantem æqualemque fortunam, quoad vixit, experta sit; in muneribus dispensandis itâ munifica, ut majorem semper juris rationem habuerit, in donando parcior, ne ærarium exhaustiret, et, largitionibus illo exhausto, populis suis gravior fieret; neque tam avara quàm provida; sic præsentibus in illo fastigio fruebatur, ut non securè inter voluptates, sed cautè inter dignas Principe sollicitudines, in futurum prospiciens, tempus exigeret. Pacem itâ coluit, ut foris populos bel-

(1) Voyez les *Leçons françaises*, même partie, tom. I et II.

licosos, et semper in otio ferocientes, per occasiones semper in armis habuerit, et sub feminino imperio nihil famæ et pristini nominis decori suis in re militari deperire passa sit. Nam et auxiliares copias in Scotiam contraneam et in Belgium proximum misit; et duris temporibus in Galliam opportuna auxilia Henrico IV, dilectissimo fratri, subministravit; et inclytæ in Indias usque navigationes ejus auspiciis feliciter susceptæ sunt, circumnavigato a Francisco Drake terrarum orbe, et aperto ad sepositas Hispanis opes strenuis viris invadendas itinere, quod Batavi postea non minori felicitate persecuti sunt. Pacem toto penè regno habuit. Motus tantum nonnulli ad boreales partes, anno regni decimo, exorti ac statim oppressi sunt. Ab eo tempore, per septem ac decem annos domi quievit, et quanquam ob religionis mutationem occultos adversarios haberet, moderationem naturâ insitam ad eam diem servavit, a sanguine ac duritie, quam deinceps exercuit, aliena; quippe ex suo sensu sic de aliis existimans, ut vim conscientiis adhibendam non putaret, neque tamen ita indulgendum censeret, ut, libertate conscientiis permissâ, prætextu religionis publicam tranquillitatem perturbari sineret. Itaque crebrescente conjurationum procellâ, ex suorum potius, qui fortassè æquè sibi ac ipsi metuebant, quam proprio ingenio, leges acuit, et periculis imminetibus edictorum severitatem opposuit, quæ tamen in bona magis quam in corpora grassata est, avaritiæ interim inusitâ ipsi notâ, cujus invidia potius ad ministros redundare debuisset. Felicitas in tot annorum et sumptuum Hispanâ classe, superno auxilio potius quam humanis virtutibus, profligatâ, præcipuè emicuit, ambitione Hispanorum castigatâ, et iniquâ alieni invadendi cupiditate cœlesti judicio damnatâ.

Fuit ingenio docili et scientiarum cupido, Latine sciens et commodè loquens, Germanicè, quòd hinc ver-

macula lingua derivaretur, benè; Gallicè sæpiùs, sed absonâ voce, Italicè pereleganter. Musicâ et poeticâ summoperè delectabatur, et Ronsardi nostri, quem olim in Angliâ e Scotiâ redeuntem viderat, versibus capiebat, luculento carmine ab eo laudata.

Multa in eam religionis odio jactata, quæ longa vita et æqualis imperscrutabili numinis favore eam ad ultimum spiritum comitata felicitas, magnâ ex parte confutavit.

Ambiri, coli ob formam, et amoribus etiam inclinâtâ jam ætate vacare videri voluit, de fabulosis insulis per illam relaxationem renovatâ quasi memoriâ, in quibus equites ac strenui homines errabant, et amores, fœditate omni prohibitâ, generosè per virtutem exercebant. Quibus rebus, si quid famæ, nihil imperii majestati deperiit, in cujus administratione nunquàm a recto moderamine deflexit. Insitæ virtutis conscia, nihil a fortunâ et regiâ majestate mutuari videri volebat, quasi satis in se haberet undè, etiam in privatâ et mediocri conditione, commendari et laudari debuerit. Vitæ cupidam atque ægrè de morte et successore cogitâsse quidam arguerunt; tamen multis ante obitum annis se comiter vetulam, ut in juventute vigilem, cùm nuptiis habilis esset, vocare consueverat; et de sepulcri inscriptione mandatum dedisse constat, nolle se ambitiosos titulos, tantùm ut nominis, virginitalis, et regni diuturni instauratæque religionis et pacis mentio in eo fieret. In successionis negotio item negligenter versari credita est, quasi parùm de posteritate sollicita; cujus rei cùm quidam ex occasione publicorum munerum, quæ jam diù vacabant, mentionem injecisset, illa, post profundam meditationem, quasi commotior, surrexit, et se certò scire, locum suum ne tantillùm temporis quidem vacaturum; respondit, quod verum eventu patuit. In parte felicitatis positum, quòd pacatum, regnum legitimo hæredi transmisit, et pacem, quam viva coluerat, quasi testamento

populis suis imperturbatam reliquit. Ut verbo dicam, in eâ feminâ et viro atque adeò magno rege dignæ virtutes fuerunt, et pauci, et qui in muliebri sexu excusationem habeant, defectus. Sed post scissum sectis orbem, religionis odio, decus illud apud multos obscuratum est; et quod ex necessitate ad securitatem publicam, ut res erant, decretum fuit, id crudelitati et impotentiae imputatum; ut ad leniendam invidiam tempore opus sit, Elizabethæ olim optimo laudatore, quippè quod, cum jam diù volvatur, nihil aut prisco ævo cum eâ comparandum viderit, aut porrò visurum esse in eo sexu appareat.

Fuit procerâ staturâ et dignâ imperio specie, et prosperâ ad senectutem valetudine, cujus nulla ferè incommoda sensit; placidâ demùm, et, qualis in Augusto memoratur, tranquillâ morte vitam felicissimam finivit, cum nihil triste, nihil miserabile, nihil ominosum, nulla doloris impatientia, nulli cruciatus præcessissent. Tantùm paucos ante obitum dies, nervorum, siccitate attenuatorum, rigore tentari, hebetiore voce ac mentis et totius corporis tarditate debilitari cœpit, ac sensim horâ quartâ matutinâ defecit Richemundæ, pridie non. aprilis, qui in quartum ac vigesimum martis, veterem juxta rationem incidebat, cum sexaginta ac novem annos ac sex menses vitæ exegisset, quadraginta quinque amplius regnâset (1).

De THOU. Lib. CXXIX-CXXXI.

Le Chancelier de l'Hospital.

Hic annus Galliae abstulit Michaelern Hospitalium, rarum sæculi ornamentum; qui per omnes togæ gradus summâ cum doctrinæ, integritatis, gravitatis ac pru-

(1) Voyez les *Leçons françaises*, tom. II, même partie.

dentiae singularis laude versatus, ad solstitium tandem honorum pervenit, et turbulentissimis Galliae temporibus (iis etiam qui rem publicam turbatam quam pacatam malebant, suffragantibus) ob summam virtutis et constantiae opinionem, post Fr. Olivarii mortem, quem ille vivum praecipue coluerat, Cancellarius Franciae creatus. Invidiam, semper magnis virtutibus comitem, magnis conatibus adversam habuit, quam infracta animi magnitudine diu luctatus, non victus, sed cedendo victor evasit, et ad quietem domesticam versus, in honestissimo otio, quod reliquum vitae fuit, tranquillè exegit. Tandem ætatis anno circiter 70, in Viniano suo, 3 id. mart., placidissimâ morte ad Deum migravit, condito prius testamento, quo, vitae anteactae quasi redditâ ratione, pietatis in Deum, charitatis erga patriam, ingenii elegantiae et prudentiae, quæ ad extremum vitae spiritum usque comitata est, testimonium veluti consignatum reliquit. Quæ de jure scripsit, immortalitate dignissima, in tenebris hactenus delituere, aliquandò, utinam! magno rei publicae bono lucem visura. Versus ne perirent vetuit amicorum pietas, qui neglectim ab auctore dispersos colligendos curavere et publici juris esse voluerunt. Si quidem versus puritate sermonis, nitore, acumine, et sententiarum pondere cum omni antiquitate certant, virumque ferè exprimunt: qui non vultu tantum Aristotelis os (quod ex utriusque imaginum ubique prostantium comparatione constat), sed Solonis, Lycurgi, Charondæ, ac Platonis denique, sapientissimorum legistorum, pectus, mores, doctrinam et judicium (quibus confirmatam longo rerum maximarum usu prudentiam junxerat) in omni vitae sive privatae, sive publicae tenore referebat (1).

DE THOU. Liv. LVI.

(1) Voyez les *Leçons françaises*, tom. I, même partie.



## Henri IV.

EA est humanæ vitæ fragilitas, inanitasque consilio-  
rum, nullo in historiæ monumentis luculentiore exemplo;  
cùm Europæ et totius orbis ætate suâ rex maximus, in  
procinctu expeditionis fortissimæ, urbibus hostium intra  
munimenta trepidantibus, erectis principibus quâ spe,  
quâ metu, quò se victoriarum cursus effunderet, is per  
unum et vilissimum homulum, in urbe primariâ, suos  
inter procures, in ipso potentiæ et amplitudinis cumulo,  
cultro, pecudis instar, occiditur, uno duntaxat mo-  
mento vivum inter et mortuum. Quæ Franciæ calamitas  
in paucis atrocissima fuit, cùm e fastigio rerum revocata  
est in bella civilia, ac dejecta in necessitatem miserri-  
mam, feminâ et puero moderantibus clavum. Henricus  
agebat ætatis annum quinquagesimum octavum; sed iis  
corporis viribus, ut ex aperto post necem pectore in-  
spectisque visceribus æstimaverint medici, eum vitam ad  
nonagesimum annum perducturum, si natura relicta  
esset viribus suis. Attamen tam multis facinoribus vitam  
brevem produxit, ut longævus obiisse sit reputandus, et  
facta æstimantibus videantur illa complexa sæculum.  
Sanè Francia, post Carolum Magnum, neminem regum  
inscribit fastis digniorem imperio, si virtutes bellicæ  
perpendantur. Ter, victoriâ reportatâ, hostem profligavit;  
centies quadragesies in minoribus præliis suâ manu  
pugnavit; trecenta oppida obsidione cinxit; et, ut  
verbo uno complectar omnia, ab anno ætatis decimo  
quinto ad quadragesimum octavum ab armis nusquàm  
conquievit; per adversa omnia, quæ cadere in princi-  
pem possunt, probatus, evectorque ad solium ærumnis  
suis atque laboribus, ut dici possit fortitudine, pruden-  
tiâ et patientiâ redemisse hæreditatem avitam; et cùm

cæteri victores propagârint fines imperii, peperisse ipse imperium, atque e pernicië certâ eduxisse. Sed nulla victoria visa illustrior, quàm ipsius suû, quâ hostibus publicis et privatis inimicis tanto animi candore indulsit, ut unûs clementiæ typus posteris illucere debeat. Nemini unquàm simulatè aut ad fraudem pepercit, quodque admirabile sit, educatus in aulâ Henrici III, adeò se indolemque suam secluserat a contagio, ut, Alphei instar, per salsedinem maris puras aquas trahentis, nihil ejus vitii, nihil labis hauserit. Idque fidem haud dubiam facit sanctissimarum mulierum revelationibus, affirmantium regem sub ipsam mortem consecutum a Deo noxarum veniam; divinâ in eum pronâ indulgentiâ, qui tam ultrò ignosceret inimicis, et condonatam injuriam pro nullâ haberet. Quod cùm infrequens sit et difficillimum, præsertim regibus, quibus et injuriæ gravitas, et nocendi facultas, ad ulciscendum stimuli sunt atque instrumenta, planè Henricus Magni agnomen assecutus est meritò, quod delineavit fortitudo bellica, consummavit clementia atque perfecit. Neque ille, ad unam Martis gloriam factus, aspernabatur gloriam pacis; imò eam sic assiduâ curâ, spatio brevî annorum aliquot jam provexerat, ut, æmulatione procerum atque ambitione oppressâ, oppleto nullâ miseria plebis ærario, copiâ omnium in regnum invectâ, Francia jam oblita calamitatum, otio indulgens et voluptatibus, indigeret bello, quo sanum corpus ad saniorē mentem revocaret. Ornavit rex Lutetiam præclaris ædificiis, in quibus regalis illa area (1), dignum amplitudinis regiæ monumentum, imò bonitatis, cùm urbs infensissima et capitalibus odiis dissidens, tot tantisque insignita est amoris tropæis. Sincera illi pietas; indoles prompta; subtile acutumque ingenium, nullis quidem instructum litteris, sed, supplente naturâ et conformante

(1) La place Royale.

experientiâ, capax rerum omnium, atque adeò disciplinarum, quarum notitiam auditu perceperat; sanè urbanissimum erat, ad apophtegmata et acutè responsa nullâ meditatione promptum et paratum; magna morum facilitas, amabilitas consuetudinis, singularis humanitas, nihil ad fastum, nihil ad tuendam dignitatem compositum, ut emereret solis virtutibus, non regali cultu aut supercilio. Attamen suos contraxerat nævos, quos educationis injuria et consuetudo vitæ adjunxerant; nam proclivitatem in feminas, tùm sæculi labes, tùm indolis æstus, tùm institutionis malum, aluerant, et parcimoniam calamitates præteritæ, necessitas præsens et in futurum providentia, induxerant atque tenuerant; et singularia prælia, quibus passus est nobiles dimicare, et certo vitæ animæque discrimine in perniciem suam ruere, militari gloriæ adhibebat; quanquàm ea postmodum edicto severiore coercuit, postquàm advertit per ea in medio pacis otio atrocissimum bellum et internecinum sævire (1).

P. J. DE BUSSIÈRES, Soc. Jes. *Histor. Franciæ*,  
lib. XXII, 1661.

Alexandre de Parme.

HUNC vitæ exitum habuit Alexander Farnesius, seu gravescente morbo, seu peracutâ veneni lue extinctus, viridi adhuc ætate, annorum septem et quadraginta, cum quatuordecim annos in Belgici belli arbitrio egisset: postremos quinque deterioris fortunæ, neque sanè diligentie ejusdem: seu post receptam Antuerpiam gloriæ satur voluptatibus se dedit, seu cognitis Philippi suspicionibus adversus magnam famam remedium e segnitie

(1) Voyez les *Leçons françaises*, tom. I, même partie.

concupivit. Domus illi tam potens quam antiqua, a Paulo quippè tertio, pontifice, originem simul et magnitudinem trahens. Olim adolescens maternis sub imperiis per Belgicam inhonorus egerat, atque adeò contemptus, ut non satis animo competere diceretur. Solita mentiri iudicia vix quisquam convicit apertius. Primum belli decus peperit, expugnato Navarino, cum in Turcam sub Joannis avunculi signis militaret. Belgicis armis impositus, quantus esset ostendit. Studio laudis indefessus, accessu comis, clemens in hostem, quantumque in magnâ simulatione nosci potuit, fidus Regi, et adversus suam gloriam ac populi studia incorruptus. Parebat consiliis, nisi quòd initæ semel sententiæ contumacior, atque infestus dissidentibus: tum rerum successu, nimia concupiscebat, idque illi initium adversorum, quæ mollius tulit, cum, quod multò difficilius est, secunda fortiter toleraret. Sunt qui notant Casparis Roblesii, viri sanè prudentis, monitis diù obsecutum: eo defuncto, nemine prævalente, inter diversa suadentes fluctuasse, atque ex eo cessimisse et fortunam. Majestas oris illi adeò venerabilis, ut et amari posset: statura et cætera corporis mediocria; acres oculi, pervigilis animi notæ. Cætera non jam ipsius, sed aulæ vel sæculi vitia. Famæ ejus detrectatores, regias vires, inopiam aut discordias hostium jactabant, quibus mutatis pariter belli casus vertisse. Contrà alii utrisque prudenter usum, nec minimum in eo difficultatis, quòd diversas in exercitu nationes, et propè insociabiles æquo jure rexisset, compressis odiis, quæ statim post mortem et deinceps acrius eruperunt. Etiam rebus arcis multum in eo præsidii: hinc plerasque seditiones ducis absentiam cœptas. Perdita sanè oppida, dum aliò vocatur, utque multum arma fortuiti habent: sed quotam partem eorum quæ vicisset? Eumdemque hostem non aliis postea ingeniis, non vacuis viribus sisti quivisse. Disciplina non dubiè cum illo concidit. Funus

Belgarum quoque luctu celebratum est, haud sanè dolentibus qui veterum præfectorum sævitiam requirebant.

Hug. GROTIUS. *Hist. de rebus Belgicis*, l. II

Henri IV et Alexandre Farnèse.

RARò aliàs fortuna commisit spectaculo generis humani tam nobile imperatorum par. Ambo fuère victores, mutuo invicti; ingenio, moribusque non minùs, quàm bello discordes erant. Ut à æqualibus ætatis suæ ducibus virtute superiores, ità pares inter se gloriâ, famâque rerum. Henrico sua et gentis indoles alacritatem in vultu, Alexandro natura, an imitatio, avunculi Regis gravitatem induerat. Henricum ingenii apertum et candidum populares amabant sui, et comitatem largè omnibus blandam adorabant milites, quibus non aliud stipendium, quàm facilitas Regis; Alexandrum occultum, et callidum, sed extra fraudes, venerabantur amici, non timebant, timebant hostes, non oderant. Certaminis aleam declinabat Alexander, qui spei certus in ratione, casum in societatem gloriæ non admitteret. Adde quòd, cùm jure regio non esset, duplex in unâ clades, ab hoste in acie, in aulâ ab æmulis timebatur. Contrà pugnæ appetentissimus Henricus, non tam genio suo, quem reges ad usum temperant, quàm Gallicæ nobilitatis, cui pro dominatione serviebat. Nihil tamen in certamine consultius Navarræ rege, audaciæ necessitatem emendante consiliis. Nihil Parmæ duce pugnacius, quasi obluctantem prudentiæ fortunam crine pertraheret. Alter Marcelli artes in oppugnandâ, Fabianas alter in asserendâ Gallicâ Româ repræsentavit. Hic seditiones virtute Scipionis domuit: ille vitavit Annibalis felicitate. Semel in uno congressu regni caput et belli Henricum sors obtulit Alexandro:

sed iste præcipitis occasionis munus, ne præcipitaret, amisit. Alter nimis audendo, cavendo nimis alter, virtute immodicâ magni duces mutuum errorem sunt gratificati, ut liqueret summos quidem, sed homines esse. At novissimè ad Calidobecum suis magistrum artibus Henricus circumvenerat, nisi novis castellis munito, quâ non patebat, exitu hunc ille rursus elusisset.

P. DONDIN, Jes.

Le Prince d'Orange.

AD novandas res haud scio an ullus unquam mortaliū fuerit instructor quàm Orangius. Ingenium ei præsens, et occasionum haud segne, sed subdolum, suū obtegens, etiam iis, qui arcanorum ejus conscii ferebantur, inaccessum. Porro captandæ eorū gratiæ quibuscum semel loqueretur, artifex sanè mirus: adeò ex vero ad omnium mores conformabat suos, seque alienis momentis circumagebat; non quòd ad ista descenderet officiorum aucupia, et vocabula imaginariæ servitutis, quibus hodiè sese homines honorificè ludificant: sed quòd obsequii dignationisque nec modicus nec prælargus, ità verba callidè temperaret, ut facilè crederes eum plura factis reservare; ex quo major et gravitatis ejus opinio et dictorum fides. Accedebat quòd, licèt superbo esset animo ac dominationis appetentissimo, sic tamen in speciem componeret se, ut, ubique suū potens, extra sensum injuriæ videretur. Sed quàm liber ab irâ, tam metui obnoxius, planè ut singula vereretur, atque intuta putaret omnia. Non tamen proptereà absistebat: quòd animus ex unâ parte ferax consiliorum, si prima non probarentur, nova illicò supponeret; ex alterâ vastus, atque immoderata percupiens, omnem denique metum cunctationemque præcideret. At rei domesticæ splendor,

famulorumque et assecularum multitudo magnis principibus par. Nec ulla toto Belgio sedes hospitalior, ad quam frequentius peregrini proceres legatique divertent, exciperenturque magnificentius, quam Orangii domus. Idque et populo gratum, qui gaudere solet patrias opes ac potentiam advenis ostentari, neque invidiosum apud imperantes, a quibus omnem superbiæ suspicionem supplici obsequio redimebat. Cæterum religio prorsus ambigua, aut potius nulla : siquidem a catholicâ fide ad paternam hæresim quam puer hauserat sensim rediit, ac demùm a lutherianâ familiâ perfuga, calvinianæ non sectator modò, sed etiam propugnator videri voluit. Undè propius fidem est, ipsâ religionem obtentui habitam esse, eamque, ceu vestem, pro temporis opportunitate, sumptam juxtâ atque depositam.

STRADA. *Bellici Belgici decad. primæ. Lib. II.*

Richelieu, Mazarin.

REVOcate vobis in memoriam, quot quantisque laboribus colluctandum Mazzarino fuerit, ut Gallorum opinionem Richelieu mancipatam in suam administrandi rationem ab antecessoris normâ planè dissimilem traduceret. Perculerat hic animos inscrutabili ingenii sui altitudine : auræ popularis contemptor audax suffragia populorum non molliter eblandiendo, sed superbè despiciendo extorserat potius quàm obtinuerat, et iisdem vinculis, quibus procerum fastus, quibus Europam ferè totam adstrictam tenebat, ipsam quoque publicam existimationem captivam sibi quodammodò ac famulantem devinxerat. Huic rigido dominatui successit Mazzarinus, et prout ferebat mitior indoles, ac suadebant adjuncta temporum, regni habenas molliori tractavit manu. Quos alter obices fortiter eluctando superaverat,

hos alter declinavit solerter eludendo. Sic ille omnia sibi submiserat ingenia, ut singulæ voluntates in unam coaluisse viderentur; sic iste contrà se omnibus inflexit ingeniis, ut una eademque voluntas videretur in singulas transivisse. Quid plura? suum sibi Mazzarinus regendi institutum accommodavit, deseruit alienum; sed quo tandem successu? Gallia freno rigidiori dudùm assueta, manum experta leniter palpantem, recalcitravit; Gallorum oculi radiis distenti acrioribus, vix lucem sensère benigniorem: sic totam exhauserat admirationem splendidus regni gubernator, ut vix quicquam residui superaret temperato rei Gallicæ administro, nec nisi post graves diuturnasque conflictationes, varioque agitatus æstu molestiarum, publicam demùm opinionem sibi suoque regimini reconciliavit, palmamque non quidem præripuit æmulo, sed divisam cum illo sibi vindicavit (1).

P. BAUDORY, *viris in arte suâ præcellentibus succedere quàm sit operosum, Oratio. 1741.*

Mathieu Molé.

QUAM feliciter sanè turbulentissimis temporibus pro re Gallicâ et regiis rationibus contigit, ut senatui Parisiensi præesset vir ad populos, si quâ magistratuum auctoritate coerceri potuissent, in officio continendos omnium facile suffragio aptissimus!

Molæus, cujus in vultu, in senili canitie sessitare prudentia, fori majestas habitare, imperii regumque reverentia lucere videbatur; qui nunquàm vel ob instantis mortis metum et paratas insidias ab instituto ac debitâ Regi fide deflexit; qui vel solo nutu irrupentes

(1) Voyez les *Leçons françaises*, tom. I et II, même partie.



sicarios sistere non semel visus est; non aliis armis, quàm venerandà quâdam oris majestate, et spectatæ probitatis opinione, securus inter tumultuantis plebeculæ furores.

Ibat in forum senex gravissimus per obsessas domesticis castris, circumsonantesque terrore bellico plateas, eâdem tranquillitate vultûs quàm si fuisset in placido ruris amœnissimi secessu ad oblectationem spatiatûs. Involabat in ejus ædes armata multitudo, regii nominis hostibus extrema quæque minitantibus; jam ferrum, jam faces volabant; jam postes emovebantur: prodibat ipse: ponebat continuò furor, excidebant arma furentium manibus; furorem admiratio, amor, reverentia excipiebant. Quòd si tunc Galliæ malis aliquid medelæ admoveri potuisset, hâc salutiferâ profectò manu vulnera nostra persanari potuissent.

**P. LABAUNE, J. Galliarum Senatui Panegyricus.**

Turenne et Condé.

**QUIS** Fabium Maximum et Julium Cæsarem non agnoscat in præstantissimis illis ducibus Henrico Turenno, Ludovico Condæo? In quibus cùm diversa propè fuerint omnia, summa tamen cuncta fuerunt. In illo anima ingens, et magni consilii capax; in hoc animus excelsus et cogitatione sublimis. Uterque ad arma natus; sed alter naturam usu adjuvans, alter usum naturâ præcurrans. Ille cunctabundus sine tarditate; hic sine temeritate præceps. Ille hostes morâ, ut Fabius; hic, ut Cæsar, impetu frangere idoneus. Ille consilia pugnæ diù parturiens, ut rei benè gerendæ opportunitatem captaret; hic subitâ vi erumpens, ne quid opportunitatis dimitteret.

Turennius ante pugnam vultu nubilo, qui procellam; in pugnâ sereno, qui victoriam præsagiret: Condæus

ante prælium fronte placidâ, quæ securitatem ; in prælio flammeâ , quæ fulminationem portenderet. Ille suâ prudentiâ totum ad pugnam movens exercitum , propè immotus ; hic agilitate suâ in toto præsens exercitu , et quasi multiplex. Neuter periculis territus : alter quia præviderat ; alter quia contemnebat. Ille modum in vincendo servans, ne quid in extremis offenderet ; hic tendens supra modum, ne quid imperfectum relinqueret. Ambos castrorum metatione , urbium expugnatione, præliorum numero , victoriarum magnitudine nobilissimi ; nec tamen satis noti , nisi alterum cum altero turbulenta Galliæ tempora ex adverso committerent.

Neque verò , ut Fabio, sic Turennio pugnanti pro patriâ objectus est Annibal qui sciret vincere, uti victoriâ nesciret ; sed Condæus, qui nunquàm cessaret ubi quid esset agendum, et victus quoque victoriæ partem aliquam extorqueret. Neque, ut Cæsari, sic Condæo patriam impugnanti oblatus est Pompeius , major felicitate vir quàm prudentiâ, qui in extremis actibus personam sibi impositam malè sustineret ; sed Turennius prudentior dux, quàm felicior , qui se ipso major fieret in dies , et priora facta posterioribus superaret. Ambos diceres nunc a patriâ compositos simul, nunc a fortunâ inter se commissos, ut alter illustraretur ab altero, et in dubio relinqueretur utrum anteponeres alteri ; sed Condæum tamen propagando imperio , Turennium protegendo magis habilem crederes : utrumque verò artis bellicæ ita scientem fuisse intelligeres, ut Roma neminem habuerit alterutro , non modò aptiorem bello , sed etiam belli peritiorum (1).

Carol. PORÉE. *De Heroïbus informandis. Oratio*,  
1727.

(1) Voyez les *Leçons françaises*, tom. I et II, même partie.

## Le Maréchal de Vauban.

TENE verò regis maximi laudibus adjungere dubitem, vir ingenio maxime, regionum laborum indefesse comes, ad hujus regni defensionem et gloriam nate, in bellicis operibus tam pace quàm bello exercitate; qui urbes nobis reclusisti plus quinquaginta, et supra trecentas munivisti; qui in extruendis arcibus vel firmandis, sic opportunitate locorum vel importunitate usus es, ut alibi subjungeres artem naturæ, alibi naturam castigares arte, ubique alteram alteri conciliares, non arces impo-  
nens arcibus, ut illi gigantes insanissimi qui, congestis montibus, quantò assurgerent altiùs, tantò fulminanti Jovis dexteræ magis fierent obnoxii; sed propugnacula attollens modicè, et a summo ad ima deprimens, ut quantò minùs eminent ex plano, tantò minùs bellicis fulminibus paterent? Magnum sanè laudis argumentum sic velâsse urbes contra hostium arma, ut solâ ope tuâ viderentur inexpugnabiles : majus verò sic tuum muni-  
visse pectus contra vitia, ut omnibus vel avaritiæ, vel ambitionis, vel superbiæ telis esset inexpugnabile (1).

*Idem, ibid.*

## Le Maréchal de Villars.

LAUDA veteranum illum ducem, lauro pariter coronatum et oleâ; inter Martis et Bellonæ tonitrua exsultare, joculari, ludere, cytharas cum tubis, fistulas cum lituis, sambucas cum tympanis, choreas cum præliis, concentus musicos cum fragore bellico maritare solitum; mentis excelsitate securitatem pariente hilarem,

(1) Voyez les *Leçons françaises*, tom. I, même partie.

artis peritiâ eventum spondente prosperum, felicitate continuâ nobilem afflante confidentiam.

De quo sub ævi finem ambigere licuit an senesceret in dies, an in dies juvenesceret; quem, si numerâsses annos et stipendia, senem pronuntiâsses; si vigorem ingenii, et consilii ostendisses robur, judicâsses virum; (et quantum, ô superi, virum!) Si festivitatem indolis et alacritatem animi expectâsses, jurâsses juvenem, at juvenum quidem expeditissimum; qui non modò adinstar aquilæ, quam nonnihil referebat vultu, in senectute juventutem renovare visus, sed et formidabilior ipso Jovis armigero, trisulci ministro fulminis, trino trini regis fulmine armatus involare gestiit; dignus qui a rege mitteretur altero, ab altero enixè deposceretur; in militiæ societatem cooptaretur a tertio; et, favente istius præsentâ, aspirantibus illorum auspiciis, Germanicas debellaret aquilas, uti olim in Stolophenâ planitie, in Denanii ac Friburgi campis illarum plerisque alas absciderat, ut caderent; alas nonnihil addiderat, ut fugerent: qui porrò, extremæ proximus metæ, post expugnatas tot urbes, quot impugnatas, post lustratas rapido victoriarum cursu Italiæ provincias, post factos vectigales et captivos ejusdem regionis fluvios, minùs annorum numero quàm laurorum fasce, quàm tro-pæorum mole obrutus, in illâ expiravit regiâ, quam ut modò triumphis exhilaraverat et amplificaverat suis, sic etiam suo contristabat et angustabat funere; cujus denique anima brevi temporis intervallo animam regalis hospitæ (1) ideò præcessisse visa est, ut in templo gloriæ præmoneret, beneficiæ principi pandendas esse valvas, ibique ipsius virtuti solum insterneret longè magnificentiùs, quàm quod ejusdem dignitati paulò antè asseruerat.

P. LASANTE, J. *Ludovico XV. Oratio.* 1735.

(1) La Reine de Sardaigne, morte peu de temps après.

Frédéric-le-Grand, Roi de Prusse.

**LAUDES** meruit sempiternas Fredericus, bello ac pace splendidus : inter arma promptus et audax, occasionum callidus, de victoriâ sumens abundè, fortunæ fisus nimium, sed adversam tolerans sapienter, suaque emendans delicta; foedera et amicitias ex usu abrogans, firmans, deserens; in re civili strictius imperans meditata prudenter, castè dicendum jus urgens; ad munia dispiciens idem et evehens idoneos; in communi vitâ simplex, ubi jucundior, in jocosam vituperationem pronus, privatis studiis indulgens parùm, objurgando singulos acerbior, erga adulatorias artes pervicax; cultum suum, turbam plausumque comitum (lætissima vulgò principibus) fastidiens, vim famamque ob res gestas sectatus invidiosè, modicus voluptatum, nullis irritamentis posthabens negotia; quoties musis otia commodaret, disertè perfunctus, tunc quoque imperatorem agens, divertendo ad facetas cavillationes, suaque placita pro alienis judiciis fastuosè promulgando; nummorum adeò parcus, ut vix misereretur singulorum, qui pro se militando vulnera et inopiam adierant; prodigus idem ac munificentia summus, quoties è publicâ re esset, quippè cœli intemperiem, sterilitatem agrorum, quæ flammæ deliquerant, seu fluminum incrementa, largè ministrando pecunias, in gloriam vertit; militem, velut unicum imperii fulcrum, tollens, castigans, lustrans, fovens, augens, principem si spectes, sagax inter paucos, perenni et famæ vovendus.

*Res suo ævo gestas memoriæ tradidit* Carl. Gust. Schultz ab Ascherade. *Holmens*, 1789.

## CARACTÈRES LITTÉRAIRES.

David.

POESEOS cultum et delicias ità in suis scriptis exprompsit, ut profanam vetustatem non minùs hâc parte superet, quàm superat rerum magnitudine. Quid enim illo cultius, quid ornatius, vel cùm felicitatem adumbrat innocentis viri, qui, *tanquàm lignum quod plantatum est secùs decursus aquarum, fructum dat in tempore suo*, vel cùm præcepta Domini enumerat, *desiderabilia super aurum et lapidem pretiosum multùm, et dulciora super mel et favum*? Quid illo vehementius, quid magnificentius, sive impium exhibeat *exallatum sicut cedros Libani*, et uno repente momento deturbatum et in pulverem comminutum: *ità ut transeas, et ecce non sit, nec inveniatur locus ejus*; sive rapidis evectus alis adeat cœlos, felicissimè audax, Deum e suis involucris evolvat, eumque nobis depingat, *amiculum lumine sicut vestimento et super pennas ventorum ambulantem*? Hic montes exultant *a facie Domini*, et in agnorum morem gestiunt; ibi turbatur attonitum mare, et *Jordanis convertitur retrorsùm*. Modò *pluit Deus super peccatores laqueos; ignis, et sulphur, et spiritus procellarum, pars calicis eorum*: modò *juxtà est iis qui tribulato sunt corde, suavis universis, et miserationes ejus super omnia opera ejus*. Quid plura? ità regius vates pacatos, vehementes affectus immiscet, ità terret, minatur, fulminat, ità consolatur, allicit, invitat, ut nusquàm alibi majore cum ornamentorum apparatu atque pompâ, nusquàm alibi majore cum fructu se poesis ostentet.

GRENAN.

Saint Basile.

DIVUS Basilius, vir optimo jure dictus magnus, sed maximi cognomine dignior, cujus facundiam contumeliam esse judico cum quoquam comparare, quorum eloquentiam supra modum admirata est Græcia, juxta modum æmulata Italia. Quis enim sic omnibus dicendi virtutibus excelluit, ut in eo non aliquid desideretur vel offendant? Tonat ac fulgurat Pericles, sed sine arte: Atticâ subtilitate propemodum friget Lysias. Phalereo suavitatem tribuunt, gravitatem adimunt. Isocrates, umbratilis orator, affectatis structuræ numeris ac periodis orationis, perdidit illam nativæ dictionis gratiam. Demostheni, quem velut omnibus numeris absolutum eloquentiæ exemplar producit Tullius, objectum est, quod orationes illius olerent lucernam, nec desunt qui in eo affectus et urbanitatem requirunt. Sed ut maximè aliquis exstiterit, in quo neque naturam, neque artem, neque exercitationem desideres, quem mihi dabis, qui Divi Basilii pectus numine plenum, non dicam æquarit, sed vel mediocri consequatur intervallo? Quem, qui tantum philosophiæ, qui disciplinarum omnium circum cum summâ dicendi facultate conjunxerit? Sed, ut dixi, contumeliæ genus est, virum divinitus afflatum cum profanis, ac nihil aliud quàm hominibus confère.

DES. ERASMUS. *Epistola ad J. Sadoletum, Episc. Carpent. Primæ Edit. Græcæ Basilii præmissa.*

Homère et Virgile.

IN Homero et Virgilio etsi pleræque virtutes similes sint, judicii acumen, morum affectuumque cognitio,

vis inveniendi, exponendi perspicuitas, in eloquendo ubertas, in pingendo solertia, multa tamen dissimilitudo. Eminet in altero grande ingenium, sublime, excelsum, aliquandò tamen incultius, ut in ingenti divitiarum copiâ aliquid inordinatum, aliquid neglectum esse solet. Ridet in altero quidquid in gemmis lætius micat, quidquid in signis mollius spirat. In illo nihil quod redundet, in hoc nihil quod desit. Nervis alter lacertisque rigens; alter carnis plus habet, lacertorum minus. Ille senili cujusdam Dei canitie verendus majestatem profert cum simplicitate conjunctam; ille varietate et concinnitate præstat, veneribus nitens. Tanta denique utriusque excellentia, ut eum maximè esse velis, quem nunc ante oculos habeas; et, si secundus Virgilius, propior tamen primo quàm tertio esse videatur (1).

Ch. LEBEAU.

Horace.

Non ego ad te poetam aliquem unum de multis affero, sed poetam omnibus suis numeris perfectum atque absolutum, summum atque adeò solum in totâ linguâ Latinâ lyricum, satirarumque scriptorem præstantissimum atque excellentissimum, multiplici refertum et variâ copiâ rerum, illustri verborum splendore illuminatum, sententiarum pondere gravissimum, scribendi elegantiam politissimum purissimumque, orationis figuris ornatissimum, in cudendis novis vocabulis felicissimum sine invidiâ, sine vituperatione audacissimum, in Græcorum loquendi generibus imitandis et cum prudentiâ ac judicio liberrimum solutissimumque, et cum libertate ac

(1) Voyez les *Leçons françaises*, et les *Leçons latines anciennes*, tom. I et II, même partie.



## 504. CARACTÈRES OU PORTRAITS;

licentiâ cautissimum eundem atque prudentissimum. Nemo unquàm Romanorum justitiam, fidem, continentiam, parcimoniam, religionem, patientiam paupertatis, contemptum rerum humanarum laudavit ornatiùs; nemo injustitiam, perfidiam, libidinem, avaritiam, luxuriam vituperavit acerbiùs; nemo ad subeunda pro patriâ pericula, atque ad mortem pro libertate oppetendam inflammavit ardentius; nemo aut ad virtutem acriùs excitavit, aut a vitio graviùs revocavit; nemo bellorum civilium calamitatem miserabiliùs deploravit; nemo amores cantavit molliùs ac teneriùs, aut tempestivorum conviviorum hilaritatem descripsit floridiùs; nemo hominum ætatis suæ mores carpsit urbaniùs. Dies me deficiat, si tanti poetæ virtutes poeticas non modò persequi et commemorare scribendo, aut partiendo distinguere, sed etiam cogitando recordari, aut notare coner observando! Quòd si vates omni laude cumlatus, omnibusque suis partibus absolutus et perfectus ille est, qui voluptatem delectationemque legentis cum utilitate fructuque conjunxit, sine controversiâ cæteris omnibus poetis (Homero excepto) Q. Horatius Flaccus meritò est anteponendus, in quo sic dulcedo cum utilitate certat, ità suavitas gravitati par est, ut si, detractâ voluptate ac dulcedine, sola gravitas utilitasque spectentur, hæc legentem retinere queat; contrà si quis, demptâ utilitate, solam versuum dulcedinem ac jucunditatem sequatur, hæc eum suâ illecebrâ captum, ut in se continenter affixus hæreat, pellicere possit (1).

D. LAMBINUS. *Epistola ad Carolum IX Gallorum regem nuncupatoria.*

(1) Voyez les *Leçons françaises*, tom. I et II, même partie.

Ovide.

OMNES (historiarum et tragœdiarum scriptores) transcendit Ovidius, sive falsa probabiliter, sive obscura perspicuè, sive utraque ornatè, sive omnia simpliciter sint exponenda : falsa ut in *Metamorphosi*; obscura, ut *mathematica* et antiquitatis arcana in *Fastis*; quæ ad mores pertinent, ubique; etiam cùm ludit et lascivit; idque verbis et oratione vulgari : ut et dicat quæ velit, et doceat quæ quisque intelligat; tam admirabili felicitate, ut cùm quivis idem posse videatur, nemo possit; nemo, nisi magni et excitati animi, tentare idem ausit; sapientes etiam desperent. Ubique sententiæ, ubique loci communes. Neque semper falsa narrat. Plurimas historias exponit. Quid autem cum simplicitate illâ comparandum, quam indocti et rustici fastidiunt, urbani et ingenui sine ullâ imitationis spe adorant? Numerorum autem tanta puritas, simplicitas, atque invidenda suavitas, ut quid magni viri velint, cùm mutari quædam posse existiment, neque ipsi, nî fallor, neque nos intelligamus. Ubique latinitas vel inter prima : ut non temerè Muretus, quo, post litteras renatas, nemo sine affectatione elegantius scripsit, quemdam, qui auctori tanto hanc detraheret, prodigii instar, ovis ac sulphure lustrandum meritò existimet. Sed natura ejus viri, candor, ingenuitas, quæ in narrationibus potissimum elucet, supra votum est. Proximum est ergò, ut de iis justè judicemus. Aiunt redundare critici. Et sit sanè hoc verum. Idem oceano quoque evenit; cui frustrà ponas legem. Idem fluvii, quorum quisque quò generosior est, eò minùs ripas agnoscit ac pontem. Fontes et stagna inter se consistunt.

D. HEINSIUS. *De Tragœdiæ constitutione.*

Tite-Live, Tacite.

**SOLI**, meherculè, ut in Latinis hæream, Livius et Tacitus, non modò alere, sed etiam gignere facundiam possunt. Ille principis terrarum populi historiam ab initio perscribere ausus, ubique tanto argumento par, magnificum lectori reipublicæ Romanæ spectaculum, velut in illustri theatro, explicat, rerum gestarum grandis pronuntiator. Hic intra quorundam principum vitam finitus, et tanquàm a scenâ remotior, plura penè præcipit quàm narrat, arcanorum consiliorum curiosus indagator et sagax. Ille copiosus et æquabilis, lacteo quodam eloquentiæ flumine lectores perfundit; hic torrenti propior, eosdem crebris vibrantibusque sententiis abripit. In illo plus carnis atque succi; in hoc plus sanguinis atque nervorum. Ille remissis, hic concitatis affectibus melior: illi nihil adjici potest, huic nihil detrahi. Uterque ità ab altero dissimilis, ut alter ex alterius laude partem, uterque autem suam totam et propriam habeat, in hoc certè propè iidem, quòd eloquentiæ vires variis virtutibus æquè augere possunt (1).

COFFIN. *De Historiæ utilitatibus Oratio.*

Démosthène et Cicéron.

**ANNON** in utroque et vim suam experiri voluissè videtur eloquentia, et perfectum sūt exemplar cæteris hominibus nescio ad imitandum dicam an admirandum relinquere? Cogitate celeberrimum illum amnem Nilum, cùm, vel hibernis nivibus auctus, vel aliâ occultâ vi

(1) Voyez les *Leçons françaises*, tom. I, même partie.

tumefactus, aquas, intra notam ripam contineri indignatas, per Ægyptum spargit universam, terroremque ac fertilitatem ubique importat; aut, si mavultis, vastum quoddam incendium cogitate, quod silvam igne continenti amplectitur, quòque grassatur latius, eò majores lucidioresque flammarum globos volvit: vix istæ imagines Demosthenis ac Ciceronis vim in dicendo atque copiam leviter effingant. Sicut autem ex optimo quoque et pinguisimo fundo erumpunt vapores, qui deindè in imbrem amicum resoluti, arbores, pascua, sata mirè fecundant; ità ex eorum scriptis effluere spiritus, tibi que afflari senties, quibus pastum, ut ità dicam, ingenium in fruges luxuriat eloquentiæ uberrimas.

Illos itaque intueatur futurus orator: in illis oculos mentemque defigat; et, ut olim Themistocles Miltiadis gloriâ, ità et ille horum quasi tropæis excitatus, cum illis componat sese, manum quàm frequentissimè poterit conserat, palmam si minùs, quod fieri vix potest, ablaturus, at certè dubiam, quantum in ipso erit, factururus.

Hanc viam triverunt illi ipsi, quos tantoperè miramur, veteres. Ex hoc contentionis et æmulationis æstu se ad immensam gloriæ altitudinem extulerunt: Demostheni magnâ ex parte debetur Cicero, plus apud posteros veræ laudis méritus, quòd Græcum unum dicendi facultate aut exæquârit, aut quorundam sententiâ vicerit, quàm si gentem totam armis vicisset (1).

Benign. GRENAN. *De corrupto dicendi genere Orat.*

Cicéron Orateur.

QUIS unus ex omnibus eligendus, nisi decus ac lumen

(1) Voy. les *Leçons françaises*, et les *Leçons latines anciennes*, tom. I, même partie.

## 508 CARACTÈRES OU PORTRAITS;

eloquentiæ Tullius? cujus ex ore melle dulcior; vehementior torrente, flumine gravior, fluit, exundat, prorumpit oratio : qui tam subtiliter humilia, ita temperatè mediocria, magnificè ac splendidè summa pertractat, ut nihil in eo requiras ; cujus ad vocem clamores, plausus, admirationes excitantur; cujus ubique regnat, ubique dominatur oratio. Etenim, si blandum aliquid, si lene, si pacatum et sedatum postulat oratio, ut sensim ad intimos sensus audientium irrepit! adeò quidem, ut quæ flagitat, non extorquere dicendo, sed impetrare obsecrando, neque auditor invitatus rapi, sed quasi ducentis manum sequi ultrò ac sponte videatur. Si conqueri, si commiserari; si ex clientis invidiâ deonerare aliquid, et in adversarium trajicere; si in aliquam illius criminis quod accusat, vel suspicionem, vel affinitatem eum vocare potuerit, ut eludit hominem! ut versat, ut jactat utrâque manu! Quas in angustias, quos in æstus, quas in tenebras miserum conjicit! Prorsus ut metuere incipiat, ne vel innocenti periculum facesserit, vel se ipsum nihil minùs cogitantem in judicii laqueos induerit! Quid amplificationes ejus? Nonne tot procellis ac turbinibus ferire, tot coruscare fulguribus, tot fulminibus intonare creditur? Quis altiùs in intimas auditorum cogitationes illabitur? Quis potentiùs opiniones aut revellit insitas, aut novas inserit? Quis faciliùs hominum voluntates effundit lætitiâ, mœrore contrahit, expectatione, metu cohibet, invidiâ, odio et iracundiâ succendit, amore, misericordiâ, lenitate restinguit (1)?

STRADA. *Pal. Elog.*, exerc. 1, lect. 3.

(1)]Voyez les *Leçons françaises*, tom. I, même partie.

Cicéron considéré comme Rhéteur.

MAGIS obuius, et, ut ità dicam, tractabilis, et tenellæ ætati longè Aristotele accommodatior videtur Tullius. Nitida, facilis et compta ejus oratio. Non ille, ut e vili rhetorum officinâ tetricus dicendi magister, præcepta quædam vulgaria et contrita tradit, sermone agresti atque horrido : sed ut homo politus et elegans, veterique illâ urbanitate limatus, omnia sale suo et lepore, et suavis-  
simis facetiis sic aspergit, ut, quanquàm in libris, quos de Rhetoricâ scripsit, nihil sit omissum quod ad eloquentiam pertineat, passimque in iisdem perluceat collecta ex omni flore antiquitatis et cognitione artium præstans eruditio, tamen totus ille sermo similior videatur jucundissimi inter confabulantes amicos colloqui, quàm gravissimæ inter homines eruditos disputationis. At ipsa illa varietas dialogorum, quæ mirè a tædio et satietate defendit orationem, nonnihil interdum obscuritatis parit, ut difficile sit, præsertim pueris, inter varias ac sæpè diversas disputantium opiniones, deprehendere quæ sit vera Tullii sententia. Sparsa insuper hùc et illùc præcepta, nec in certum digesta ordinem, vix possunt in justum quoddam rhetoricæ corpus coalescere, atque adeò prorsus ab usu et consuetudine scholarum abhorrent.

ROLLIN, *Préface de l'Abrégé de Quintilien.*

Quintilien.

Fabius Aristotelicam subtilitatem Tullianæ sic elegantiae flosculis distinguit, ut et juventutem detinere suaviter, et exercere altissimam quoque eruditionem et scientiam possit. In scriptis ejus, tanquàm in speculo, vivam men-

tis illius imaginem facileprehendas. Mirus apparet ubique sinceritatis candor, et blanda conciliatrix animorum modestia, ab omni fastu et ostentatione longè abhorrens. Inest tanta illius gravitati aspersa comitas, tam suavis summæ eruditioni adjunctus urbanitatis lepos, ut, licèt non possis non vehementer admirari hominis doctrinam et ingenium, magis tamen ames indolem.

Dùm vivis coloribus præceptoris eximii speciem adumbrat, ipse non cogitans expressit suam. Scias sentire cum quæ dicit. Morum quàm studiorum longè antiquior illi cura; multòque potior apud illum ratio vivendi honestè, quàm vel optimè dicendi. Neque verò usquàm oratorem discernit a viro hono, aut eloquentiam a virtute disjungit, ratus, si vis illa dicendi malitiam instruxerit, nihil perniciosius fore, pessimèque illius magistros de rebus humanis merituos, si latroni comparent hæc arma, non militi. Verè parentis erga discipulos suos animum induit, patiens in docendo, in emendando non acerbus; nec tristi austeritate sibi odium pariens, nec dissolutâ comitate contemptum; minimè iracundus, aut suū impotens, nec tamen eorum, quæ corrigenda sunt, connivens dissimulatur; solers peccata prævertere potius quàm punire; longè alienus ab illâ illiberali consuetudine cædendi pueros, quæ plerùmque et studiorum et magistri odium affert; sicque existimans, ad emendanda vitia plus lenitate et patientiâ quàm objurgatione et plagis profici.

*Idem, ibid.*

Sénèque et son influence sur son siècle.

**FERAX** eminentium in singulis artibus ingeniorum aurea illa ætas nascentis Augusti perductam ad summum culmen, quantum quidem humanæ res patiuntur, eloquentiam viderat. Quamlibet varia fuerit illius temporis

oratorum velut indoles, diversique orationis vultus, in omnibus tamen eandem sanitatem eloquentiæ, et quamdam judicii ac voluntatis similitudinem et cognationem agnoscas. Inerat illis species ac venustas, non adornata cincinnis, aut fuco illita, aut muliebribus quæsitâ pigmentis; sed qualis ex integrâ valetudine efflorescit, nativo quodam colore et succo tincta, sanguine et viribus nitens, plena denique masculæ cujusdam et incorruptæ dignitatis.

At paulatim labi visa est et diffluere, et prorsus ab antiquo more et cultu degenerare eloquentia, omnemque illam rectæ et integræ dictionis salubritatem perdere. Quâ labe Romanos Seneca præsertim infecit, vir multis quidem virtutibus clarus, facilitate inventionis, ubertate doctrinæ, sententiis, figuris, beatissimâ rerum verborumque copiâ; sed nimium amator ingenii sui, cui utinam temperare quàm indulgere maluisset, eoque periculosior, quòd nonnisi dulcibus abundat vitiis. Apud eum scatent omnia sententiis: sed densitas earum, ut in satis omnibus fructibusque arborum accidit, sibi obstat invicem; et in tantâ copiâ quæ est sine delectu, multas necesse est excidere leves, frigidas, ineptas. Quia lucere totam ubique orationem voluit, lumina illa non flammæ, sed scintillis inter fumum emicantibus similia dixeris. Minuti passim corruptique sensiculi; quibus et rerum pondus frangitur, et nimium concisa ac velut soluta subsultat oratio, e singulis non membris, sed frustis collata. Ità nocent apud illum ipsæ præsertim virtutes, ultra modum expetitæ: omnium in eloquentiâ vitiorum pessimum, quoties ingenium judicio caret, et specie boni fallitur. Nam cætera cum vitentur, hoc exquiritur.

Ut autem sunt prona in deterius hominum ingenia, et pravi dociliora quàm recti, malâ contagione novum hoc dicendi genus totam illicò invasit urbem. JUVENES,



## 512 CARACTÈRES OU PORTRAITS,

spretis veteribus, quos ille diversi nempè sibi conscius generis non destiterat lacessere, ad unius Senecæ imitationem compositi, illiusque præsertim vitiorum amatores, tantùm ab illo defluerunt, quantùm ipse ab antiquis descenderat. Sordere cœpit purus inaffectedatæ simplicitatis nitor, et quicquid naturâ dictâset. Non jam placuit nisi picta, et translucida, et versicolor oratio. Neglecta rerum cura est, ut haberetur ratio verborum, quibus hoc unum tamen attributum a naturâ officium est, servire sensibus. Flosculis ac sententiolis respersa temerè omnia. Quasi lege sancitum fuit, ut omnis locus, omnis sensus, in fine sermonis acumine feriret aurem : turpe autem ac propè nefas habitum respirare ullo loco, qui acclamationem non peteret (1). *Idem, ibid.*

### Galilée.

INTER eos qui benè atque præclarè virtute ingeniî maximarumque rerum scientiâ de Florentinæ civitatis nomine ac dignitate meruerunt, primum sine dubio locum ac numerum obtinet Galilæus, Florentiæ nobili ac vetere prosapiâ. Etenim quisnam est in toto orbe terrarum locus itâ remotus, itâ a nobis locorum intervallo disjunctus, quæ natio tam effera, tam barbara, ubi aliquis sit bonis litteris honor, in quâ Galilæi nomen, omnium sermonibus et chartis, summâ cum ejus patriæ, quæ talem virum genuit, laude non usurpetur? Sed quid miramur tantam hominis virtutem orbem omnium peragrâsse terrarum, cum tubæ a se inventæ præsidio, tanquàm curru invectus, adeòque in sublime elatus, per immensas cœli regiones evagaverit, clarissimum solis jubar adierit, atque umbris similes in eo maculas

(1) Voyez les *Leçons latines anciennes*, tom. I, même partie.

deprehenderit, intra lunæ, alienâ micantis luce, sphæram penetraverit, et latos in eâ campos et colles inspexerit, æthereos omnium siderum orbes obierit, ac novas in eis stellas, quas Mediceas, ex Principum suorum cognomine, appellavit, invenerit?

Cùm olim Patavio, ubi octingentorum aureorum stipendio mathematicas disciplinas juventuti tradebat, venisset Venetias, admonitus est a quodam Ordinis Patricii viro, in Germaniâ inventum esse oculare quod oculis ad motum res quantumvis remotissimas, eâ quâ essent magnitudine, aspicienti subjiceret. Ille, qui fortassè jam diù saxum hocolvebat, simul ac se domum recepit, fistulæ plumbeæ, ex organo detractæ, vitreos varii generis orbes ad certum accommodavit intervallum; undè eventum sibi ex sententiâ processisse cognovit: itaque alacris ad nobilem illum virum accurrit, a quo primum, tum ab aliis deinceps multis ejusdem Ordinis, summâ eorum cum admiratione et Galilæi laude, factum est ejus ocularis periculum in turri Sancti Marci campanariâ; qui omnes uno ore fuerunt illi auctores, ut Senatum adiret, deque suo illo tam admirabili invento ipse doceret; fore enim ut Patribus rem gratissimam faceret. Neque prædicta fefellit eventus: nam adeò illi delectati sunt munere, ut ex senatûs consulto veteri singulorum annorum stipendio ducentos aureos nummos alios addiderint. At reversus Patavium totus ad opus suum exponendum se contulit.

Jam in omnes Italiæ, Hispaniæ, Galliæ, atque adeò Europæ totius oras, Galilæi nomen emanârat; jam notum erat omnibus, ocularis a se inventi ope, novas in cœlo stellas, orbesque, omnibus antè sæculis obstructas et reconditas, esse detectas, palàmque prolatas; jam elegantissimus ille *Nuntii Sideris* titulo inscriptus ab eo liber exierat; cùm hâc famâ compulsus magnus Etruriæ Dux arcessivisset eum Pisas, ut, mathematicarum artium docto-

## 514 CARACTÈRES OU PORTRAITS;

ris ac magistri nomine, centenos singulis mensibus nummos argenteos, quos laminas vocant, acciperet, alterum verò, quem vellet, muneris sui vicarium et tanquàm hypodidascalum, sibi sufficeret : quam ipse tam luculentam conditionem, cum Senatùs Venetivenià, libens accepit. Quæ tam insignis liberalissimi Principis in eum benignitas nunquàm, quoad vixit, clausa est, ejusque beneficio, nullius rei egens, patrio sermone complures pertinentes ad mathematica libros composuit. Quatuor ferme et octoginta complevit annos, quorum postremos, oculis orbatus, in tenebris vixit. Obiit in villâ agri Florentini.

NICII ERYTHRÆI (Vittorio Rossi) *Pinacotheca*.

Montaigne.

NON sine ratione, aut felicitatē quādam genii solūm, scriptor iste tantam meruit famam. Nam præter alia multa, quæ ex ejus lectione haurire licet, attentī lectoris judicium maximè format, et instruit. Quo nomine inter aliquot scriptores, quos Gallia tulit, præcipuè numerandus, et, si fas dicere, primariis illis, qui de moribus antiquitūs scripsēre, quodammodò accensendus venit. Quos cū ob oculos semper haberet, ad eorum normam se componere cuperet, nulli aliī rei totā vitā, quam sibi vacavit, et juxta Apollinis præceptum se nosse, et in se descendere studuit. Cū verò quid profectūs in virtute fecisset, qualesque mutationes in opinionibus, et moribus in dies subiret, explorare vellet, denique ut imaginem suā amicis relinqueret, more Lucilii, de quo notissimi sunt Horatii versus, quos ipse citat, libris suis se totum, quantus erat, depinxit, et vitam suam prosecutus est; quamvis alioquē scriptor librorum haberi nolle, omnemque illam, quæ ex operum publicatione

venit, gloriam omninò respueret : quam utinàm adeò non neglexisset, aut ingenio suo homo omnium liberimus, et solutissimus non tantùm indulsisset : absolutissimos planè de philosophiâ libros haberemus; nec qui illum culpant, quid carperent haberent; nimirùm quòd nullam materiam distinctè et ordine prosequatur, aut tractet, sed omnia apud illum sint inconnexa, et crebris digressionibus interrupta. Quæ pro mentis excursibus, per me licet, vel si ità lubet, etiam pro somniis habeant, (modò enim alioquì insolita scripta esse fateri cogimur) dummodò pulcherrima et jucundissima nec ægri, sed excellenti ingenio hominis esse judicent; doctrinamque in iis eximiam, quamvis ipse se indoctum esse ubique calumnietur, sensum, et judicium profundum, vim ingenii summam, rerum minutarum et difficilium, nempè quotidianarum ipsius cogitationum subtilem explicationem, super omnia elocutionem ob audacem, sed non damnandam in sermone novitatem, crebrisque figuris planè admirabilem, et inimitabilem esse agnoscant. Quæ etiam in viro nobili majora sunt, qui in aulâ versatus, et usu rerum tritus, variisque in regionibus peregrinatus, ea quæ affert, non magis ex librorum lectione, quàm ex propriâ experientiâ mutari videtur. Cujus liber quamvis in molem satis amplam excrescat, tamen adeò non lassat, ut plerùmque legentium doleant, virum ingenii minimè vulgaris non plura, quæ minimè labore scribere potuisset, posteris reliquisse : cùm etiam sermones illius familiares, et cum eruditis, cordatisque viris confabulationes minimùm scriptis cecidisse acceperimus.

Roland DESMARETS. *Epistol.* lib. 1.

*Epist.* XXII. 1650.

Malherbe.

**PRIMUS** Franciscus Malherba in primis viam vidit quâ iretur ad carmen, atque hanc inter inscitiae caliginem, ad veram lucem respexit primus, superbissimoque aurium iudicio satisfecit. Non tulit nostros homines, inventis frugibus, amplius *Βαλανοφαγεῖν*. Docuit quid esset purè et cum religione scribere, docuit in vocibus et sententiis delectum, eloquentiae esse originem; atque adeò rerum verborumque collocationem aptam ipsis rebus et verbis plerùmque esse potiore. Non negaverim in quibusdam Philippi Portæ (Desportes) conatum aliquem apparere et primas quasi lineas Malherbianae artis.

Quamvis enim in iis color orationis antiquae sit, numerus tamen videtur novae, cultusque inter nostram atque priorem aetatem medius, ut ille sibi possit utramque vindicare. Verùm bona non multa, quae ei, aliud fortè agenti, excidère, obruuntur multitudine deteriorum, et injuria arti fieret, si eam inter incerta poneremus. Noster semper sibi constans, et suū ubique similis, non potuit, quod fecit, id ratione non fecisse. Perspicaci maximè et castigato iudicio plurima in se, in alios nimium penè multa inquirens, finxit et emendavit civium ingenia, tam felici successu, ut elegantiorum scriptorum proventum, quo nunc Gallia celebratur, una ipsius disciplina Galliae dederit. Haud alius igitur fuit, si modò non numeres verba, sed aestimes, cui plus debeant litterae hae nostrae populares; cùmque summi olim viri in uno tantum summi fuerint, Maronemque genii felicitas in oratione solutâ reliquerit, et Tullium eloquentia sua destituerit, cùm aggressus est carmen; hic et cultissimi poetæ famam egregiè tulit, et in pedestri facundiâ cum laude quoque versatus est.

BALZAC.

Descartes et Newton.

PAR in utroque duce artis peritia, par æmulatio, sed longè dispar arma philosophica tractandi ratio. Cartesius ipsa naturæ primordia primo arripit impetu, indèque ad varia sigillatim rerum naturalium effecta sponte delabitur: Newto ab effectis cautè ac suspiciosè viam auspicatur, et iis innitendo, ad primordiales rerum fontes conatur pedetentim adrepere. Alter primam naturæ scaturiginem audacter occupat, et sequaces indè rivulos pertentat explorando; alter hæret primum in rivulis, et eorum vestigia remetiendo ad latentem scaturiginem iter eluctatur. Cartesius, quamvis præeunte apertissimâ serie principiorum, nonnunquam aberrat in evolvendis naturæ effectibus: Newtono, quamvis effulgente patentium effectuum luce, sæpè caligat in disquirendis principiis. Alter in exstruendo audaciâ plus quàm humanâ; alter in computando plus quàm alatâ velocitate; ille planior ac dilucidior loquitur omnibus, et omnibus intelligitur; hic obscurior viris os aperit duntaxat sagacissimis, et eorum sæpè fugit intellectum. Gallus, more Gallorum pugnat mediâ de luce, procurrit in aciem nudo pectore, amat videri, nec vulnerari timet. Anglus, profundâ septus computationum obscuritate, in umbrâ dimicat, et oculos eludendo, vulnus eludit. Cartesium denique cum ducibus illis audacissimis et experientissimis conferre posse mihi videor, qui amant in plano ac patenti aciem instruere, qui sic agmina densant confertis ordinibus, ut ne minimo quidem loci intervallo sinant ab invicem segregari, qui omnes corporis immensi partes eâ motuum æquabilitate temperant, eo inter se turmarum ac legionum situ disponunt, ut equites peditesque, stataria ac levis armatura, mutuo se æquilibrio tueantur; Newtonem verò ducibus illis versutis et alta

## § 18 CARACTÈRES OU PORTRAITS,

meditantibus ritè contulerim, qui amant per abrupta montium, per loca deserta, vacua et concava, castra metari; qui dissimulando, explorando, speculando, experiendo bellum gerant, nec tam aperto Marte quàm occultâ molitione, quàm imperviâ consiliorum caligine victoriam sibi vindicare conantur (1).

P. BAUDOUY. *De novis Systematum Inventoribus quid sentiendum, Oratio.*

Bossuet.

VIR quidem unus Gallicarum litterarum decus exornavit, spiritûs magnificentiâ præcellentissimus, grandis, elatus, et hanc liberio rem audaciam præ se ferens, ut alienis insistere vestigiis minimè posse videatur; ille, inquam, Bossuetius, vel Tullio, vel Demosthene animosior et sublimior, electus in quo Christiana religio ostenderet quantum posset ad promovendas ingenii vires, et ardorem oratoris inflammandum. Te præsertim, clarissimum Galliæ nostræ lumen, Græcis et Romanis opponere non dubitamus, ultrò interrogantes quis contraheretur. Nam tibi singularis et unica quædam concessa est vis eloquentiæ, sive calamitosos populorum casus, et indignissimam Reginarum fortunam enarras, Regesque commonefactos suspicere in cælum jubes, horrendasque rerum mutationes ex alto peragentem agnoscere cœli Regnatorem: sive regum filix immaturo interitu præreptæ illacrymaris, et omnia luctu et comploratione misces, perturbatus ipse et inopino malo percussus; sive bellicum carens erumpis in prælia, orationem ab ipsâ veluti exorsus victoriâ, immortalẽque Condæi celeritatem, quodam igne volucrem, pari velocitate

(1) Voyez les *Leçons françaises*, tom. I et II, même partie.

consequeris ardens et incitatus, donec paulatim restinctis animorum incendiis placidior, christiani bellatoris pietatem constantissimamque mortem exhibeas, omnibusque vocatis, tu quoque desideratissimi principis ad tumultum accedas lacrymabundus, æ de propriâ morte cogitans. Salve igitur, Gallicæ facundiæ parens, veræ sapientiæ magister, Christianæ religionis assertor. Tu solus apud nos veterum eloquentiam virilem illam et oratoriam repræsentavisti; tu solus effecisti, ut quorum bellicas laudes adæquavimus, illorum non vinceremur ingenio (1).

VILLEMAIN, 1812. *Oratio in solenni præmiorum distributione habita.*

Fléchier.

ECQUIS Flexerio elegantior? Quis tersus magis, comptus ac nitidus? Sed in ipso nitore, in ipso comptu, quis artem solertiùs dissimulat? Ut ad quævis argumenta ingenium accommodat suum! Ut sublimis in sublimibus, quæ prosequitur parcè, lenis in lenibus, quæ consecratur cupidè, in utrisque felix, in utrisque mirus, in utrisque suû usque similis, et tamen usque dissimilis! Ut eodem ore, diverso ritu, Turennii manes, pacificamque Montalzerii umbram funebris dilaudet præco! Pictorem dicas eximium, tum labores Herculis, tum ingenuas Charites eodem penicillo diversis adumbrantem coloribus, sed et in magnis et in parvis imaginibus cuilibet spectabilem, imitabilem nullî (2).

P. LASANTE. *An tribuenda Gallis rei litterariæ palma, Oratio.*

(1) Voyez les *Leçons françaises*, tom. I, même partie.

(2) Voyez *idem*, *ibid.*



Bossuet et Fléchier.

PAR egregium oratorum Bossuetus et Flescherius, quorum neutrum alteri anteposueris, quin alterum cum desiderio quasi quodam respicias. Ità rapit alter, alter allicit. Imò eum te maximè velis esse, quem nunc maximè legas. Eminent in altero grande ingenium, sublime, excelsum, at interdum, si cum altero conferas, paulò horridius: hunc non absimilem dixeris immensæ latitudini camporum, ubi culta quædam, quædam abrupta et silvestria, saxa præcipitia, pendentes scopuli, in immensum depressæ valles, opacæ silvæ, non sine voluptate prospectum horrificant. Ridet in altero quicquid sententiis nitidum, compositione lætum, verbis tersum et concinnum; horto similem dicas magno illi et regio, ubi non solum suas in areolas divisi flores, sed proceræ etiam arbores, at illæ quidem in quincuncem summo artificio digestæ. Alter delectandi minimè studiosus id agit unum ut moveat, ut frangat. Quolibet aditu permeat ad sensus intimos; nihil dat auribus, placens tamen vel sine curâ placendi. Alter in eo ferè totus est, ut delectet; timet penetrare in animos, nisi per aurium voluptatem, nec perrumpit in sensus, sed moliter insinuat, movens tamen, at eò minùs quò curiosiùs. In Bossueto episcopalis gravitas ac senilis quædam canities; in Flescherio academica venustas ac luxuries interdum juvenilis. Ille rerum, hic suû magis memor. Plus in hoc artis, nitoris, ordinis; in illo naturæ, audaciæ, velocitatis. Equidem crediderim illum, in sacris libris assiduè versantem, e divino colloquio, velut alterum Moysem, duxisse radios ac majestatem quamdam frontis, quæ mortalium oculos perstringeret; alterum humanis studiis fortassè magis

deditum; et in Poeseos etiam hortulis sæpè errantem; colorem hinc quemdam traxisse, qui hominum visus suavissimè demulceret (1).

C. LE BEAU.

Bourdaloue.

AB ipso argumentò repetenda est eloquentiæ sacræ difficultas, quòd neque oratori sacro liceat a divini verbi simplicitate deficere sine vitio, neque religionis dignitatem repræsentare, sine quâdam dicendi majestate ac gravitate sententiarum. Quo in genere eluxère omninò pauci qui parabili nec longè accersitâ oratione verbis suis fidem facerent, neque tamen humili ac pedestri stylo reperent humi, dùm cœlestia meditantur ac prædicant.

Talem ætate nostrâ vidimus ac suspeximus virum illum qui, prudentium eruditorumque hominum judicio, oratorum sui temporis facilè princeps audiebat. Is ità sibi temperavit in dicendo, ut neque de simplicitate sermonis majestas, neque de majestate simplicitas quicquam detereret. Non verborum flosculos, non argutias orationis sectari, nec tamen aut rusticitatem amare, aut placere sibi in incultâ negligentia. Ità ingenii sui indole comparatus erat, ut comptus esset a naturâ, non calamistris inustus. Non ille servire muliercularum palato, aut cirratorum auribus, sed eruditæ multitudinis genium ac gustum sequi. Non asperitas sermonis inerat, sed temperata lenitate severitas; non lima exactior, sed neque scabra aut hiulca oratio. Quo fiebat ut hominum animos pertraheret quò vellet, siquidem fuci expers erat ac cerussæ; neque tamen audientium abs se frequentiam abalienaret

(1) Voyez les *Leçons françaises*, tom. I, même partie.

522      **CARACTÈRES OU PORTRAITS,**

aut moveret delicatioribus fastidium, siquidem nativâ quâdam pulchritudine eminebat (1).

P. LE JAY, Soc. Jes. *Oratio, intra utri præstet eloquentia sacra an forensis.* 1710.

Corneille et Racine.

Quid apud nos magno illo Cornelio Gallici cothurni principe clarius? quid illustrius? quod nomen Gallia plenius etiamnum et jactantius personat? Revocate paulisper in memoriam illa tempora, cum nascentis hujus tragiæ stupendi fœtus, et antiquæ Græciæ invidendi, tantam ei celebritatem pepererunt, ut illo fulgore Richelium ipsum, liceat dicere quod historiæ fatentur, ut illo fulgore Richelium ipsum, uri visum fuisse nemo prorsus ignoret. Qui vicariis humeris totius regni pondus fulciebat, qui domûs Austriacæ molem jam tunc formidandam Europæ concusserat, qui minacem illam aquilam pennas latius explicantem in nidum suum compegerat, qui libertatem asseruerat Lusitaniæ, hæresim prostraverat, religionem erexerat, qui positus in summo dignitatum fastigio, sed omni dignitate major, totus collucebat et circumfluebat gloriâ; uno verbo, magnus ille Richelius cujus vitam continentem et perpetuam miraculorum seriem verè dicas, subinvidis oculis Cornelli gloriam in-tuetur, tanquàm minùs esset tot res, tam immortalitate dignas, tam fidem omnem exsuperaturas gessisse, quàm tot hederas, tot lauros ingenio promeritum fuisse.

Successit Cornelio Racinius, ut artis ita et gloriæ legitimus hæres, qui, cum nobilissimum poetam offendisset in theatro regnantem et planè dominantein, non eum quidem e sub regno dejecit, sed imperium, ut sic dicam,

(1) Voyez les *Leçons françaises*, tom. I, même partie.

cum illo divisit, spectatorumque plausus, qui pridem exhausti videbantur, pari magis quam simili virtutum genere renovavit. Alter quidem elatus, concitatus, grandis, omnium admirationem efficaciter commoverat; hic compositus, blandus, suavis, omnium corda potenter alliciebat: ille ducum, imperatorum, heroum majestatem carminis majestate penè superaverat; hic veritatis amantior, homines similius atque expressius pingebat: in illo vim, dignitatem, spiritum obstupuisse; in hoc candelam, elegantiam, et quiddam tenerum ac molle magis amares. Quid multa? Ille Sophocli, hic Euripidi similior, uterque poeticâ facultate tantam sibi famam condidit, ut vivido suæ gloriæ fulgore gloriam heroum quos celebraverint multò vicisse, et longo post se intervallo reliquisse videantur.

GRENAN.

Même sujet.

ECQUIS primus inter nos scriptor maxime in suo genere admirabilis protulit nova et indicta ore alio? surgentem videmus immortalem Gallicæ tragœdiæ auctorem Corneliū. Ecce firmo pede ingreditur pulpita, musamque prævis uti vocibus dedocet, ipse insueta et inaudita loquens, creber sensibus, sublimis, acer, magnificus. Unde vis illa divina descendit? nempe vir excellens ad imitationem antiquitatis conversus, sæculi sui barbariem despexit, melioraque vidit et arripuit. Mox veterum artibus adjunctus nova ipse inveniet, novas ex se ipso virtutes efferet, condetque tragœdiæ genus ignotum Græcis, omnes fortè superaturus, nisi vates alter adnasceretur, studio veterum pariter innutritus, sed Virgilii potius quam Lucani imitator.

(1) Voyez les *Leçons françaises*, tom. I et II, même partie.

Hic erit Racinius carminum perfectissimus artifex, qui patrium sermonem, quòcumque lubeat, tenerum ac flexibilem ducere consuevit, verbis felicissimè audax, libertatem tegens modestiâ. Virgilianam suaviloquentiam agnoveris. Hæ sunt Virgilianæ dotes in alterum locum translatae, et quâdam novitatis gratiâ reviviscentes. Hæc est Euripidea lenitas, Sophoclea vis. Flores ex omni antiquitate summus poeta carpsit ac delibavit. Verùm inchoata perfecit, optimis decus addidit, vel in imitando totus suus, dumque veterum simillimus fieri studet, veteribus par et æqualis evasit (1).      VILLEMAIN.

Molière.

MOLIERUS comœdiæ Gallicæ auctor et actor primarius; poetâ indole magis, quàm studio; factus histrio non fortunæ iniquitate, sed vivendi licentiâ; natus ad vitæ seria, et traductus ad scenæ ludicra; ridiculi observator rigidus, et facetus imitator; in scribendo diligens sine curâ, et sine limâ politus; pressus in oratione solutâ, et in strictâ copiosus; sententiarum plenus et jocos abundans; omnes fermè comicorum virtutes, et pleraque vitia in se uno complexus; tam salsus quàm Aristophanes, nec multò magis aliquandò in salium delectu castus ac severus: tam ingeniosè festivus quàm Plautus, nec minùs interdùm scurriliter jocosus: tam intelligens morum quàm Terentius, nec minùs in amorum corruptelis frequens: de quo jure ambigas, naturâ ne sit melior quàm arte? optimus utrâque, et utrâque pessimus, tantòque pejor quantò melior, siquidem optimo nequitiae artifice nihil pejus (1).

P. PORÉE, Soc. J. *De Theatro Oratio.*

(1) Voyez les *Leçons françaises*, tom. I et II, même partie.

(2) Voyez *idem*, *ibid.*

La Bruyère et la Rochefoucauld.

QUAM scitè hanc artem castigandi simul et emendandi calluit Theophrastus ille recentior, Theophrasti veteris interpretes elegans, qui *characterem* quemlibet tanquam publicum exponit speculum, ubi suam quisque contempletur imaginem, et admonitus a censore muto, nævos agnoscat suos, ac, si sapit, agnitos abstergeat! morum doctor non tetricus stylo bellè pexo informat animos, mentes exhilarat, urbis et aulæ, procerum et plebis exagitat ineptias. Ut arguendo recreat! ut pressis abundat sententiis! Nonnihil subobscurum tolle; jucundius nihil, nihil perfectius.

Ingenium si consideres, propè est ut adæquet moralia Rupifucaldii apophthegmata, quorum stylus nobilitatem spirat auctoris et celatum revelat nomen: quæ si minùs præferant mysterii, si minùs habeant supercilii et philosophici fastûs, si paulò plus virtutis candidæ, minùs pravitatis affingant hominibus; si humanum genus plus æquo non deterant, humani generis demereantur suffragia, omnium teri manibus, omnium legi oculis, omnium laudari vocibus videantur dignissima.

P. LASANTE. *An tribuenda Gallis rei litterariæ palma, Oratio.*

La Fontaine.

HEU! fuit vir ille facetus, Æsopus alter, nugarum ludo Phædro superior; per quem brutæ animantes, vocales factæ, humanum genus edocuère sapientiam. Heu! *Fontanus* interiit. Proh dolor! interiøre simul Joci dicaces, lascivi Risus, Gratiae dicentes, doctæ Camœnæ. Lugete,

## 526. CARACTÈRES OU PORTRAITS,

ô quibus cordi est ingenuus lepos, natura nuda et simplex, incompta et sine fuco elegantia! Illi, illi unum inter omnes doctos licuit esse negligentem. Politiori stylo quantum præstitit aurea negligentia! Tàm caro capiti quantum debetur desiderium! Lugete, Musarum alumni: vivunt tamen, æternumque vivent carmini jocoso commissæ veneres, dulces nugæ, sales attici, suadela blanda atque parabilis. Neque *Fontanum* recentioribus juxta temporum seriem, sed antiquis ob amœnitates ingenii ascribimus. Tu verò, lector, si fidem deneges, codicem aperi. Mores hominum atque ingenia fabulis, Terentius, ad vivum depingit. Maronis molle et facetum spirat hoc in opusculo. Heu! quandònam mercuriales viri quadrupedum facundiam æquiparabunt (1)?

FÉNÉLON.

### Les Epistolaires Français.

Illas testor Epistolas quas a naturâ dictatas credideris matronæ nobili Sevineæ, cui tantus est in scribendo nitor, ut diu meditatam putes; stylus tàm ingenuus, ut hanc tenore uno scriptitasse dicas. A cujus laude Bussii laudem sejungere sit nefas, qui non minùs elegantiae consortio, quàm litterarum commercio, non minùs amœnitatis communione, quàm amicitiae societate cum eâ semper conjunctus exstiterit. Utrique Vetturium non temerè interseram, qui candorem alterius in jocos, alterius maturitatem in seriis quandòque participet: quanquàm sic participat, ut tres personas, tres manus, tres calamos aliquantulò pares, aliquantulò impares, promptum sit discernere. In tribus nempè multum ingenii, venustatis

(1) Version pour M<sup>se</sup> le duc de Bourgogne. Voyez les *Leçons françaises*, tom. I, même partie.

plurimum, affatim suavitatis; at in Sevineâ laudabilior simplicitas, exquisitior in Bussio concinnitas, festivitas in Vetturio laboriosior. In primâ plus ingenuitatis; in proximo plus roboris; in postremo plus artificii. Hic flores quærit anxius; iste inventos legit; illa decerpit obvios. Mirum est dictu! Quicquid est minii ac fuci, femina reliquit viris, et præter neglectam, ideòque gratam magis pulchritudinem, nihil sibi retinuit.

P. LASANTE. *An tribuenda Gallis regi litterarum palma, Oratio.*

Le Nostre.

Id unum laudis supererat, quod Galliæ feliciter asseruit Andreas *le Nostre*, vir hortorum scientiâ gloriâque omnium princeps. Vividum illi erat ingenium, exquisitus naturæ sensus, summa ordinis concinnitas, in arte incredibilis facilitas et fecunditas. Si consuleretur, locum horto destinatum adibat: solus eum circumquaque et transversè rapido cursu pererrabat: mox paulisper conquiescens, in se recondebatur, cogitationibus suis traditus, statimque absolutissimam exprimebat horti imaginem, qualem locus, cælum solumque, vicini longive prospectus, domini fortuna et dignitas ferebant. Nihil unquam intricatum, nihil impeditum aut dissonum, sed ordo, splendor, varietas, in floriferis areis festivitas, majestas in nemoribus, in pomariis utilitas, in aquis, aut bellè fluentibus, aut dispariliter salientibus, aut leviter colludentibus hilaritas, in aperti cœli temperatæque aeris aspiratione ingeniosa sedulitas, venusta ubique amenitas. Si qua loci fœditas, occultata aut dissimulata, gratia quæcunque monstrata et aucta. Oculis mentique æquè consultum. Ornamentorum nihil nimis, nihil parum, quæ artem decerent et naturam condecorarent.



## 528      CARACTÈRES OU PORTRAITS,

Ut verò intelligas quàm fecundum et grande fuerit *Andræ le Nostre* ingenium, contemplare mirabiles *Sangermani* (1) aggeris prospectus, *Bellaquei* (2) diversitatem, *Luparensium* (3) hortorum, cùm nulla adhuc immutata essent decora, elegantiam, *Versalicorum* (4) magnificentiam, quibus utinàm locus fuisset æquior, naturaque, non ars, aquas profudisset! Quæ si felicitas artificii contigisset, quantò majora cum regalibus *Ludovici XIV* impensis miracula prodiissent! Illa conjicere licet ex iis quæ idem artifex præstitit in hortis *Sancloviis* (5), ac maximè in *Cantilliacis* (6); quos quàm modicis opibus in admirabilitatem, intuentium laudes semper obtenturam, extulit magnus ille *Condæus*, summum *Gallorum* decus, qui ingenio bellicæque virtute, et victoriarum monumentis celeberrimos *Romanorum* duces æquavit aut superavit, civiles quoque eorum laudes nobis retulit, cùm ipse visus est victrices manus hortorum culturæ commodare!

Gabr. BROTIER. *Hortorum Historia, Rapini Hortis subjuncta.*

## CARACTÈRES MORAUX.

### L'Enfance.

**HUMANI** generis, sicuti cæterorum omnium, præcipua in cunabulis custodia est. In arboribus rami nascentes

- (1) La terrasse de Saint-Germain.
- (2) Fontainebleau.
- (3) Les Tuileries.
- (4) Versailles.
- (5) Saint-Cloud.
- (6) Chantilly.

obsequuntur agricolæ : cujus ductu vel in altum enituntur, vel ad terram proni deflectunt. Ità puerorum animi parentum, velut obstetricum, manibus fingi possunt, certà et in secuturam ætatem mansurà imagine. Semina maximè et veluti fundamenta virtutum his antiquo præaltoque affectu insinuanda sunt; ut deindè ignorent naturà an præceptis acceperint parentibus obnoxio ingenio esse facillique præcipientibus : intemperantià, mendacio et fraude, veluti insolentià prodigiorum exterreri, præcipuè vim numinis venerari, nunc beneficio, nunc vindictà suscipiendam. Et hæc ipsa non atroci, aut molestà ratione urgenda sunt, sed lenibus rudimentis initiandi imbecilli adhuc puerorum animi, ità ut vitia quidem oderint, virtutes verò tanquàm feras aut rigidas non timeant.

In hâc autem puerorum disciplinâ, gloriæ quoque stimuli infigendi sunt sentientibus animis, ut jam tum suos honores assuescant affectare, et sive scholis, sive ludis exerciti, eminere æqualibus dulcissimo labore contendant. Præterea cum ætate sensim velut e captivitate deducendi sunt, ut et mitior majestas parentum sit, et illi etiam non subito aut improviso libertatis incremento lasciviant. Suis etiam studiis relinquentur. Ja est pueritia, ne vi eamur naturam arguere, quæ hanc ætatem imbecillam esse jussit, et intempestivâ semente sapientiæ nondum præparatum ingenium corrumpamus.

Sit illis innoxia lasciviendi venia, studium litterarum magis ad mutationem ludi, quàm ad fastidium, minusque supplicii e supercilio parentum quàm timoris. Fruantur denique adhuc miserantis naturæ indulgentiâ, neque ante humanarum mentium cruciatus, quàm mernerint, tolerant. Hoc modo lepida pueritia suæ et parentum voluptati relinquetur, et postquàm expleverit stultitiam innoxiarum cupiditatum, ipsa ætas paulatim studia mutabit, radicesque virtutum adolescent, quas ipsi jam non impetu, sed judicio amabunt. Tunc afferent ad

## 530 CARACTÈRES OU PORTRAITS,

adolescentiam et ad crepusculum prudentiæ mentem liberam placidamque, quæ ad lucis illius pulchritudinem vi suæ institutionis obversa sit.

*Ex Joann. BARCLAY Iconis animorum, cap. 1.*

### La Jeunesse.

IN adolescentiam productos, primamque juventutem ipse impetus sanguinis, viresque jam se nimis cognoscentes prorsus immutant, et animum abripiunt per inconsulta fiduciæ ac securitatis æstus. Tunc primum idonea deliciis ætas est, nec plus de voluptatum sensu gaudet, quàm quòd illas audeat impunè experiri. In posterum consulere ideò nesciunt, quia adhuc crudæ vires non reputant se obnoxias esse fortunæ: et prætereà lætarum rerum species tunc animos ita implent, ut severiori prudentiæ, quæ primo aspectu molesta est, in iis nihil vacet. Et tunc quidem jam non vano aut dissimulato impetu, sua quemque natura in studia abripit, ad quæ potissimum factus est.

Ut verò arbores quæ multo ac valido succo inutiles in ramos exuberant, tandem maturescente illâ luxuriæ felicissimos proventus alere possunt: ita juvenis nimio æstu exultantem liberumque animum nactus, aliquandò justâ et ad sapientiam sufficiente moderatione residebit: quòd si jam ab ipsâ adolescentiâ maturam sobriamque vim sortiatur, certè languore inutili ante primam senectutem marcebit. Sed hoc maximè est ad judicium futuræ virtutis, si ipse inter cætera studiorum aut affectuum genera aliquid valdè volet, id quidquid est nimio ac veluti præcipiti fervore complectens. Nam acris hæc cupiditas saltem ostendit, illum vero, et per hoc laborioso impetu, in sua studia posse ferri: sine quâ indole nemo virtutem verè colet, aut gloriæ litabit.

Ceterum quamvis adolescentiæ interdum sint ingrata senectulis consilia, tamen ipsa conscientia sapientiæ nondum in suis annis maturæ, nescio quid de iis altum sentit, qui jam antè experti juventutem per eam commean-tibus iter ostendunt. Animus autem in hoc ætatis flore primâ cupidine laudis ardet, impatiens contumeliarum; nec diù eadem consilia probare aut exsequi facilis; etiam plurimum sibi placet, nec satis amicitias potest eligere, nec postea adversus succrescens fastidium tueri. Quid-quid autem subito mentis acum ne inveniri aut perfici potest, non aptiores in mortalibus habet quàm in hoc flexu annos, ut videatur pueritiæ esse facta majorum, vel dicta, indefessâ memoriâ, adipisci; juventutis et facere nova et loqui; sequentis deinde ætatis se ex utris-que moderari.

*Id. ibid.*

### L'Age viril.

EXCIPIT juventutem stata ætas ac virilis, media inter adolescentiæ præcipitia, pondusque senectutis. In hac adèò cum animo corpus viget, ut tunc demum verè hominem esse credideris, datumque in illorum annorum gratiam quantacumque est mortalibus vita. Hic ingens corporum et animorum mutatio : ut ciborum plerumque ac voluptatum alius tunc delectus, ita mores alii, et in novum efformatæ cupiditates. Robustus animus, et veluti ab adolescentiæ caligine emissus, primum solet de ante-actis erroribus atroci censurâ judicare, mirarique se tam improvidè posse judicare.

Illinc statim utilis pœnitentiæ, et ruinas, quas juven-tus fecerat, emendantis sedulitas. Opum honorumque præcipuus amor est, et quasi nunquam de vitâ deces-suri, ita avidè ad illam subsidium et ornamenta quærent. Simulare amicitias, suisque desideriis imperare, non

alii magis sciunt. Veram quoque fortitudinem habent, castigato impetu, neque extincto, quo ad iram vindictamque adolescentia fervebat. Tum demum vis integra solersque iudicii, in incitato torrente juventutis, non fessi corporis ægritudine laborans. Cauta illis vitia; ac plerumque nec virtutem sine præmio colunt. *Id. ibid.*

### La Vieillesse.

HANC denique pulcherrimam vitæ partem senectus, velut aliquo æstu sensim inundans, sanguini primum, et mox ingenio, suum frigus insinuat. Hæc diversa habitu, affectibus, moribusque priorum annorum virtutes partim auget, partim avertit in vitia: timiditas maximè insidet, et aptam alioqui prudentiæ sedem infestat. Quippè senes co pectoris igne defecti, qui fortitudinem inspirat, nec aliter quàm per sua aliorumque pericula in tantum ætatis pro-  
 vecti, omnia solent nimis anxîa cogitatione versare, tam quæ ipsi effugère, quàm quæ alios perdiderunt. Hinc illa vis consilii atque prudentiæ, quæ maximam senectutis dotem facit, sæpissimè nimio pavore corrumpitur, dum omnia etiam tuta circumspicit, mavultque interdum malo otio vulnera tegi, quàm in periculum venire medicinæ. Sed hunc in senibus nævum facilè virtutes excusant, et maximè conjiciendi futuri sagacitas, quæ in illis edocta per præteriti temporis memoriam, quò minùs corporis vinculis obligatur, eò purius omnia et quasi communicatò cum sideribus consilio prospectat.

Et fortassè hinc senibus illa ingens et plerumque indefessa loquendi cupiditas, quasi datus a naturâ stimulus, ne illi docere gravarentur, qui omnium optimè possent. Hinc, præsertim ut quisque se juvenum illis applicuerit, per suorum annorum rerumque gestarum seriem infinità oratione eundi tenor. Neque audiri tantum amant,

se: ubi consuluntur aut etiam sponte monent, sibi fidem haberi, componique omnia in quem modum præscripserint, nimis interdum pro imperio volant, urgentque nolentes: rati ab iis se contemptos qui abnuunt regi: juvenum virorumque consilia pervicaci fastidio et veluti de altiori scenâ despiciunt.

Eandem autem rerum experientiâ, quæ illos per reliquas ætates ad senectutem deduxit, simulque eorum exemplo, quos viderunt in egestatem labi, agere solent ad nimiam domesticæ rei curam. Quis ferat hoc mortalitatis ludibrium, tunc fortunas avidissimè expeti, cum nec diù manere, nec jam sollicitare pretiosis deliciis effœtum corpus possint? viget hoc tamen in siccis pectoribus malum, labensque natura timet scilicet ad inopiam pervenire a quâ non possit jam lassus viribus in dies morientibus vindicari.

Illis verò qui in senectute hæc vitia, velut syrtes, effugiunt, nihil est ad omne consortium commodius: res publicas atque privatas felicissimè regere; despiciere malos impetus ac vincere, qui animos nostros inconsultè diripiunt; et consulere juventuti, et parcere, quid ipsi fuerint, quid tunc senserint, nondum immemores; digni denique qui longâ senectute suâ sapientiâ fruuntur, orbemque illâ velut expertæ disciplinæ philosophiâ componant.

*Id. ibid.*

#### Le Flatteur.

Cum multa potentiam pericula circumveniant, ipsi nulla pestis est adulatione infestior; corrumpit enim optimam indolem, et virtutis frugem enecat afflatu. Sed quoniam sub caritatis velo plerumque obrepere adulatio solet, ejus notas vultusque omnes cognoscere operæ pretium est. In eo totus est adulator ut omnes principis sensus

exploret. Quod principi placet, id ipsi pulchrum, id egregium, id divinum. Singula ejus facta quantis adornat laudibus! Quidquid excidit ab ore principis, pronis auribus excipit: exclamat in minimis; in mediocribus obstupescit; pondus levissimis, humilibus dignitatem, sordidis nitorem, vitiosis etiam virtutem callidus affligit. Sed prodit ipsa se nimia calliditas. Abhorret enim a veritate nimis studiosa veritatis imitatio. Omnia exquisita, elaborata, arte composita. Eò laus vanior, quò operosior; tot pigmenta deformitatem arguunt. Noster quàm sedulò studet fingere se ad naturam principis, versipellis et cereus! Omnes ejus nutus, motus omnes, umbræ similis, imitari; eò etiam umbra levior, quòd omnia in majus ferat. Quam in partem inclinat princeps, eò dare se præcipitem adulator; si rideat alter, alter cachinno concuti; lacrymanti afflere uberius; si paululum succenseat, ipse exardescere. Non ille sui juris est; non suus illi vultus, non habitus, non mens; ex alienâ mente totus pendet. Cum avaro pecuniæ appetens, cum libidinoso luxuriæ artifex, cum superbo et arroganti ferox et tumidus; insidiatur ejus libidinibus minister ipse et laudator. His etiam aditum molitur in animum principis, ut ingressu patefacto simul irrepat. Nec virtuti aut inopiæ patrocinator, sed sibi. Principem non conciliat cuiquam, sed aut vendit, aut totum arripit. Ille cæteris beneficia non exoraverit, ne imputentur sibi et spes suas impleant, nisi forlè aut mercedem speret aut vices. Si quis tamen principis amicitia dignus tot inter obices ad eum penetraverit, quot artes, quot machinæ admoventur, ut eum summoveat, disturbet, ejiciat, invidia metuque anxius ne delibata semel a principe virtus fastidium faciat adulationis! Itaque silet in alienis laudibus, at malignam ac levem laudationem fœda immiscendo corrumpit, aut dictis quasi temerè et negligenter emissis eò magis vulnerat, quò magis latet

vulnerandi consilium. Latent in adulatore plura quàm apparent ; imò quidquid apparet abest. Abest modestia, cujus falsum sibi colorem induit : tacet quidem ipse de se, at alios summittit qui virtutes ipsius prædicent ; recedit ab aure principis, sed eam committit susurris amicorum. Abest amor principis, quem flagrantissimum simulat ; non discedit quidem ab ejus latere, sed ut obsideat ; insidiæ sunt, non excubiæ ; non custos ille aut minister, sed venator ; sibi unî servit, sibi unî consulit, nec principem tueri sed capere curat, ut ipse se tueatur (1).

C. LE BEAU.

### L'Homme chagrin.

Morosus, homo est felicitatis superbæ, calamitatis querulæ, et miseriæ obstinatæ. Odio generis humani ipse se ulciscitur : et quoniam de suâ spe decidit, vel ingratis vult esse miser, et poenæ suæ incumbere. Mali radix, tetrica superbia et mollities, cui insuevit non pati desideriorum frustrationem, ut agitata animo in irritum cadant, suæque ambitioni aut avaritiæ alæ intervellantur. Nempè non præsumpsit animo, multa posse intervenire, quæ destinata prohibeant. Optima optavit, sed difficillima non cogitavit. Hinc fit ut tantò graviore casu opprimatur, ut qui ruinæ ictum expectatione non eliserit. Spe suâ semel summotus, dedignatur quod concupiverat, inter destituta vota torpens, deses otii sui, tristis, sibi et aliis iratus. Sæpè in hæc erumpit : *ô tempora ! ô mores !* conviciumque dicit sæculo, quo nullus hominum delectus habetur, novique homines ad dignitates promoventur, dum benè meriti, hoc est, suî similes, elevantur. Offenditur lætitiâ aliorum, et miratur quid causæ ridendi

(1) Voyez les *Leçons françaises*, tom. I, même partie.



## 536 CARACTÈRES OU PORTRAITS,

habeant; neque enim risum præfert, nisi simulatum: Ità insuevit frontem caperare austeritate, ut totus rugis asperetur, festinatis senectutis insignibus ante quadragimum ætatis annum. Profitetur se repudium renuntiâsse omnibus deliciis et vitiis, nondùm tamen displicuit, seu superbiæ, seu melancholiæ quam ubique circumfert ore et habitu gloriosa ostentatio. Namque in eo maximè ambitio dominatur, cùm sub specie severitatis delitescit.

LUD. MOLINÆUS. *Morum Exemplar, seu Characteres*, 1662.

### L'Homme futile.

QUID sit futile ingenium quæris? Ego quid respondeam vix habeo; ità quidquid arripio fluit et elabitur. Ventum pingere difficile est levi libandum manu. Ipse adjuva: cogita bullam, auram, umbram, aut, si quid inanius, umbræ somnium, ut quidam dixit; is noster est. Nihil firmi aut solidi; totus in minimis. Si faciem hominis spectes, comptus quidem ac lepidus, sed qui in concinnitate comarum, in vestium nitore totam ponat elegantiam. Gressu erudito, molli gestu; salutat bellè, bellè intuetur, bellè subridet, bellè garrit; omnia bellè, nihil benè. Stupet in nugis; ibi exclamat, ibi magnifico exsultat verborum apparatu; friget in magnis et verè pulchris, quæ illius ingenium exsuperant. In circulo muliebri vir ingens, inter viros penè puer. Si oratorem audiat, ex habitu, ex capillo totam hominis eloquentiam æstimat, neque quicquam hæret in memoriâ ex luculentâ oratione, nisi quòd orator haud satis comptam cæsariem gereret, aut laxiore calceo uteretur. Si quis fortè laudatur absens, ipse multus est in sciscitando quali surâ sit, albine sint an atri dentes. Si

Musas attingat, nihil curat nisi muliebres quisquilias, captator acuminum et levicularum sententiarum; ludibria verborum ac puerilia eloquentiæ crepundia solùm miratur. Nihil ipsius palato sapit, nisi sesamo et papavere sparsum. Ferendus ùtcunque tamen nisi ardeat prurigine scribendi. Tunc enim quàm inepti, quàm insulsi lepores e calamo fluent! Quàm omnia sine succo et nervis! Quàm nihil integri, nihil veri! Ad amatorias nugas Apollinis edicto jampridem amandatum est hoc scriptorum genus, eâ lege, ut a nemine, nisi æquè futili et inepto, perlegantur.

**C. LE BEAU.**

**FIN DU PREMIER VOLUME.**



# TABLE DES MATIÈRES

## CONTENUES DANS LE PREMIER VOLUME.

### NARRATIONS.

	Pag.
Préceptes du Genre. Ludov. MARIN.....	1
Camma. Petrus NANNIUS.....	2
Début de Démosthène. CESAROTTI.....	4
Le comte Ugolin. PAUL-EMILE.....	7
Les Fils dénaturés. MARIANA.....	8
Les Trois Valentins. Car. LE BEAU.....	10
L'Ingratitude punie. P. Fr. POMEY.....	12
Le Cid venge l'outrage fait à ses filles. MARIANA.....	13
Le Médecin des Fous. POGGE.....	15
Le Roi et le Philosophe. Frid. PLATNERI.....	17
Le Trésor enlevé. PÉTRARQUE.....	19
L'Œil du Maître. MELANDER.....	21
Le Compte rendu. ERASME.....	23
La fausse Loterie. Georg. STENGELIUS.....	24
Vengeance d'un Peintre. LE MÊME.....	26
La Rave et le Cheval.....	28
Intelligence d'un Eléphant. CAMERARIUS.....	29
Le Perroquet avisé. BISSELIUS.....	30
L'Aigle pourvoyeur. DE THOU.....	31
L'Âne astrologue. Gasp. ENS.....	33
Le Spectre. BARCLAY, <i>Euphormio</i> .....	34
La fausse Magie. J. N. ERYTHRÆUS.....	38
Le Brigand écossais. BUCHANAN.....	42
Le Géryon moderne, ou le Brigand aux trois visages. BARCLAY.....	46
Le Brigand de Sienne. C. LE BEAU.....	43
Le Soufflet vengé. J. L. BALZAC.....	44

	Pag.
Ruse d'une Mère. Eryc. PUTEANUS.....	46
La Chose impossible. Gasp. ENS.....	49
L'Ennemi généreux. DE THOU.....	50
L'Algérien reconnaissant. C. LE BEAU.....	52
Aventure de François Civil. DE THOU.....	54
Conjuration du comte de Fiesque. LE MÊME.....	56
Prise de Jérusalem par les Croisés. PAUL-EMILE.....	60
Siège et prise de Constantinople par les Français et les Vénitiens. LE MÊME.....	62
Prise de Breda. Hug. GROTIUS.....	67
Prise d'Amiens. LE MÊME.....	70
Sélim détrône son père Bajazet. J. LIPSIVS.....	71

## TABLEAUX.

Cléopâtre remontant le Cydnus. Franç. BENCIVS.....	75
Entrée triomphante de Charlemagne dans Rome. PAUL- EMILE.....	76
Prise du camp de Saladin par les Croisés. LE MÊME.....	78
Massacre des Juifs à Lisbonne. MARIANA.....	80
Mort de Pierre-le-Cruel. LE MÊME.....	81
Derniers momens de Louis XI. P. DE BUSSIÈRES.....	83
Mort de Charles Quint. Fam. STRADA.....	84
Henri II blessé à mort dans un tournoi. LE MÊME.....	85
Retour de Marie Stuart en Ecosse. G. BUCHANAN.....	86
Retour du grand Condé à la Cour et à Paris, Benj. PRIOLI..	87
Régence d'Anne d'Autriche. LE MÊME.....	88
La Fronde. Marc. Ant. HERSAN.....	89
Révolutions de la Langue française, Benign. GRENNAN.....	90
Les Invalides. ROLLIN.....	93
Intrépidité de la Palisse. P. DE BUSSIÈRES.....	95
Le Phosphore naturel. BUCHANAN.....	96
Danger que court l'historien De Thou sur le lac de Vvalenstødt. DE THOU, <i>Mémoires de sa vie</i> .....	98
Le Courtisan disgracié. Petr. FIRMIVS.....	99
Le Charlatan. P. COMMIRE.....	100
Difficulté de succéder aux hommes supérieurs. P. BAUDORY.	101
Carrousel, à Amsterdam, en l'honneur de Marie de Mé- dicis. G. BARLÆVS.....	102
Fête populaire. Nicivs ERYTHRÆVS.....	104
Le Mât de Cocagne. LE MÊME.....	105
Promenade des Champs-Élysées. G. BROTIER.....	106

## DES MATIÈRES.

541  
Pag.

Paris et les Provinces. P. BAUDORY.....	107
Venise. J. P. MAFFÉE.....	109
Coup d'œil d'un port de mer. C. LE BEAU.....	<i>ib.</i>
Le bon Roi. BUCHANAN.....	110
Le Tyran. LE MÊME.....	112

## DESCRIPTIONS.

Education de l'héritier de la couronne chez les Perses.	
P. STEPHONIUS.....	114
Education de Henri IV. P. PETAU.....	115
Supplice du Connétable de Lune. MARIANA.....	116
Mort de Marie Stuart, Reine d'Ecosse. Fam. STRADA.....	118
La Galère d'Agrigente. P. Leo. SANCTIUS.....	121
Le Printemps. P. CAUSSIN.....	123
Chute du Pont de Florence. C. LE BEAU.....	124
Déesse des Hollandais dans la mer Glaciale. H. GROTIUS.....	125
Même Sujet. LE BEAU.....	128
Deuil des Soldats, après la mort de Turenne. LE MÊME...	130
La Tempête. P. J. BISSELIUS.....	132
L'inondation. C. LE BEAU.....	133
Tremblement de terre de Lisbonne. Carl. Gust. SCHULTZ	
ab Ascherade.....	134
Les Iles Fortunées. MURET.....	137
L'Opéra. P. PORÉE.....	138
Grotte de Calypso. C. LE BEAU.....	139
La Maison de Campagne. Petr. FIRMIANUS.....	140
Maison de plaisance de l'Empereur Cang-hi, en Chine.	
Gabr. BROTIER.....	142
Fête de l'Agriculture. MARTINIUS.....	145
Entrevue du Grand Maître Lisle-Adam et de l'Empereur	
Soliman. Jacob. PONTANUS.....	147
Combat singulier. J. BARCLAY. <i>Argenidis</i> L. IV.....	150
Combat des Trente en Ecosse. BUCHANAN.....	153
Combat de Déodat de Gozon contre un serpent monstrueux.	
BARCLAY, <i>Euphormio</i> .....	155
Combat d'un brochet et d'une grenouille. CAMERARIUS.....	158
Les Fourmis. P. CAUSSINUS.....	159
L'Araignée. LE MÊME.....	<i>ib.</i>
Le Papillon. LE MÊME.....	160
Les Abeilles. CAMERARIUS.....	161
Le Rossignol. P. CAUSSIN.....	163

	Pag.
Le Coq. Melch. DE LA CERDA.....	164
Le Paon. P. CAUSSIN.....	165
L'Alouette huppée. P. DE LA CERDA.....	166
Le Chien de Berger. LE MÊME.....	167
Le Chameau. P. CAUSSIN.....	168
Le Chat. J. Bapt. FERRARIUS.....	ib.
Les Singes. CAMERARIUS.....	169
Le Cerf. P. CAUSSINUS.....	172
Le Loup. P. Melch. DE LA CERDA.....	ib.
La Licorne. P. CAUSSIN.....	173
Le Rhinocéros. P. Melch. DE LA CERDA.....	174
Le Lion. P. CAUSSIN.....	ib.
Même sujet. P. Melch. DE LA CERDA.....	175
Le Pétard. Fam. STRADA.....	176
Le Palmier. P. MAFFÉE.....	178

### DÉFINITIONS.

La fausse Philosophie. HÉRIVAUX.....	180
Même sujet. MALTOR.....	181
Le bon Roi. LE MÊME.....	182
La Prudence considérée comme vertu royale. P. PORÉE....	ib.
La Cour. M. Ant. HERSAN.....	184
Le Ministre d'Etat. P. LA SANTE.....	185
Le Juge. P. LABAUNE.....	186
L'Avocat. ROLLIN.....	187
Le Rhéteur. LE MÊME.....	188
L'Orateur. Fam. STRADA.....	189
L'Historien. P. OLIVIER.....	190
La Poésie et la Philosophie. GRENAN.....	191
L'Éloquence et la Poésie. C. LE BEAU.....	193
L'Apologue. P. VAVASSEUR.....	195
L'Histoire. COFFIN.....	197
Le Sublime. P. LA SANTE.....	198
Le Style italien. LE MÊME.....	199
Le Style espagnol. LE MÊME.....	200
Le Style anglais. LE MÊME.....	ib.
Le Genre épistolaire. M. Ant. MURET.....	201
La Critique. P. LA SANTE.....	203
La Satire. P. PORÉE.....	204
L'Académie Française. P. BAUDORY.....	206
La France. BARCLAY.....	207

## DES MATIÈRES.

943  
Pag.

Même sujet. P. PORRE.....	208
Paris. Benj. PAJOU.....	209
La Géométrie. P. DE LA CERDA.....	210
Les Songes. ERASME.....	211
La Mémoire. Fam. STRADA.....	212

## FABLES.

Préceptes du Genre. Lud. MARI.....	214
But moral de l'Apologue. LE MÊME.....	215
L'Araignée et la Goutte. PÉTAARQUE.....	217
Le Pin et la Courge. Jov. PONTANUS.....	219
Le Taureau qui renonce à ses cornes. Cœl. CALCAGNINUS...	220
Jupiter et l'Abeille. P. LEJAY.....	ib.
Le Rat, le Coq et le Chat. J. Nic. ERYTHRÆUS.....	221
L'Alouette et ses Petits. C. LE BEAU.....	222
L'Achat de Chevaux. MARTINIUS.....	224
La Paresse et la Diligence. Jac. FAGGIOLATI.....	225
Le Singe réformateur. C. LE BEAU.....	226
Le Courtisan et Protée. LE MÊME.....	228
Les Etats-Généraux de la Mort. LE MÊME.....	229
L'Épingle et l'Aiguille aimantée. LE MÊME.....	231

## ALLÉGORIES.

L'Amour et la Vertu. P. LA SENTE.....	233
Apollon et les Muses. MARI.....	234
L'Histoire. Leo SANCTIUS.....	235
Même sujet. Eryc. PUTANUS.....	ib.
La Postérité. Cœl. CALCAGNINUS.....	237
Les Grâces. C. LE BEAU.....	238
L'île des Sirènes. MURET.....	239
La Cour. Gasp. ENS.....	240
La Politique. P. BOMBINUS.....	241
L'Opinion. <i>Somnia Sapientis</i> .....	ib.
Même sujet. P. LA SENTE.....	242
Les deux Tonneaux. Hieron. CARDANI.....	243
Le Vaisseau de la Grammaire. P. Leo SANCTIUS.....	245
La Rhétorique. P. BOMBINUS.....	246
La double Route de l'Eloquence. Petr. FIAMIANUS.....	ib.
Comus. Eryc. PUTANUS.....	248
La Galopnie. P. DREXLIUS.....	250



	Pag.
Cærus, ou l'Occasion. P. CAUSSIN.....	252
La Fidélité. P. LEO SANCTIUS.....	ib.
L'Amour du Prince. LE MÊME.....	253
La Bienfaisance LE MÊME.....	ib.
Temple de la déesse Monnaie. Janus BODECHERUS.....	254
Le Génie du Siècle. Petr. FIRMIANUS.....	256

### MORALE RELIGIEUSE, OU PHILOSOPHIE PRATIQUE.

Cours d'Astronomie morale. C. BARLÆUS.....	260
Importance de la première Education. BARCLAY.....	262
La Vertu. J. PONTANUS.....	263
La véritable Vertu. HÉRIVAUX.....	264
Union de la Vertu et de la Science. ROLLIN.....	265
Prix et Difficulté de la véritable Science. LE MÊME.....	268
L'Emploi du Temps. ERASME.....	269
Philosophie de Socrate. Dan. HEINSIUS.....	270
Bonheur des Monarchies héréditaires. Ch. COFFIN.....	272
La véritable et solide Gloire des Souverains. ROLLIN.....	273
Malheur de la condition des Rois. Benign. GRÉNAN.....	275
La Modération dans les grandes places. HERSAN.....	276
Utilité de la Censure. BALZAC.....	277
Tribunal de l'Histoire. C. COFFIN.....	278
L'Histoire, école de l'Homme d'Etat. LE MÊME.....	279
Utilité de l'Histoire pour les Guerriers LE MÊME.....	280
Agrémens de la Campagne. Just. LIPSIIUS.....	282
Testament de Pierre PITHOU.....	283
Les Livres, amis sincères. ERASME.....	285
Utilité des Ennemis. C. LE BEAU.....	286
Danger des bons mots. Silvestris PETRA SANCTA.....	288
Trésor trouvé en songe. PÉTRARQUE.....	289
La Colère. J. Lud. VIVÈS.....	292
Le Duel. J. BARCLAY.....	293
Même sujet. ROLLIN.....	294
Danger des Romans pour le goût et pour les mœurs. GRÉNAN.....	296

### LETTRES.

Préceptes du Genre épistolaire. ERASME.....	300
Muret à Sacratius.....	301
Ange Politien au Pape Innocent VIII.....	303
Erasme à Léon X.....	305

## DES MATIÈRES.

545

Pag.

Ange Politien à J. Teixera, grand-chancelier du Roi de Naples, Ferdinand I <sup>er</sup> d'Arragon.....	310
De même à J. Pic de la Mirandole.....	312
Cœlius Calpagninus à Olympia Morata.....	314
Ange Politien à Jean Pic de la Mirandole.....	316
Léon X à Raphaël d'Urbino. Petr. BEMBUS.....	317
Le même au poète Arioste. LE MÊME.....	ib.
Erasme à François I <sup>er</sup> .....	318
Le même à Charles Utenhove.....	320
Le même au comte Guillaume de Montjoye.....	322
Paul Manuce à Camille Paleotti, à Bologne.....	327
Tanneguy-Lefèvre à M. Chevreau.....	325
Le même au marquis de Chandenier.....	327
Coffin à un ami.....	328
Balzac au Cardinal de Richelieu.....	329
Tanneguy-Lefèvre à un ami qui venoit de perdre son père.....	332
Le même au Président de Lamoignon.....	333

## DIALOGUES.

Naclerus, Nautæ, Jonas. Sébastien CASTELLION.....	335
L'Espérance, la Raison. PÉTRARQUE.....	338
La Vertu, Mercure.....	342
Charon, une Ombre. J. PONTANUS.....	345
Mercure, Diogène. Cœl. CALCAGNINUS.....	351
Durerius Pictor, Gryneus, Velius. Jean-Louis VIVÈS.....	354
L'Alchymie. PÉTRARQUE.....	360
Le Mot et la Chose. ERASME.....	363
La Fortune et le Courtisan. RAVISIUS TEXTOR.....	372
Assaut de fourberies. LE MÊME.....	381

## DISCOURS ET MORCEAUX ORATOIRES.

Préceptes du Genre. Eloquence des Anciens. GRENAN.....	389
La fausse Eloquence. LE MÊME.....	391
Eumène aux Argyraspides. C. LEBEAU.....	393
Les Tribuns du peuple contre Claudia. J. FREINSHEMIUS.....	394
Tamerlan à Bajazet, avant de le faire enfermer dans une cage de fer. C. LEBEAU.....	398
Viomade exhorte les Francs à rappeler Chilpéric. DE BUSSIÈRES.....	399

i. Leç. lat. mod.

35

	Pag.
Les Députés des Exilés français supplient Théodoric 1 <sup>er</sup> de leur permettre de rentrer dans leur patrie. PAUL-EMILE..	400
Charles-Martel aux Français, avant de livrer bataille aux Sarrasins. LE MÊME.....	401
Abdérame à ses troupes. LE MÊME.....	403
Pélage exhorte les Espagnols à secouer le joug des Maures. MARIANA.....	404
Un des conseillers d'Alphonse, Roi de Castille, le dissuade de porter la guerre dans les Etats du Roi de Tolède, dont le père lui avait donné un asile, lorsqu'il était proscrit et fugitif. — Réponse du Roi. LE MÊME.....	406
Léopold, duc d'Autriche, accuse Richard-Cœur-de-Lion, devant l'Empereur Henri. — Réponse de Richard. PAUL-EMILE.....	408
Le Président du Conseil de Flandres au faux Baudouin. — Réponse du faux Baudouin. — Louis VIII au faux Baudouin. LE MÊME.....	411
Un Evêque fait l'éloge des soldats morts à la bataille de Dorylée. LE MÊME.....	415
Charles VIII à l'armée française, avant la bataille de Fornoue. Arn. FERRONUS.....	418
L'Isle-Adam exhorte les habitans de Rhodes à se défendre contre les Turcs. Jac. PONTANUS.....	419
Un ami du premier Président du Parlement d'Aix le dissuade de mettre à exécution la sentence portée contre les Vaudois de Merindol. DE THOU.....	423
Charles-Quint à Philippe II, son fils, en abdiquant la couronne d'Espagne. STRADA.....	425
Alphonse, Roi de Naples, abdique la couronne en faveur de son fils Ferdinand. MARIANA.....	426
Le Prince d'Orange à ses soldats, au siège de Bréda. C. BARLÆUS.....	428
Les Députés viennent offrir à Henri III, roi de France, la souveraineté des Pays-Bas. Fam. STRADA.....	429
Elisabeth, reine d'Angleterre, à l'ambassadeur de Marie Stuart, reine d'Ecosse, qui lui propose de déclarer cette Princesse son héritière. BUCHANAN.....	431
L'amiral Hemskerke à ses capitaines de vaisseau, avant de combattre les Espagnols. Hug. GROTIUS.....	433
Des Sénateurs suédois dissuadent Gustave-Adolphe d'en-	

## DES MATIÈRES.

547  
Pag.

treprendre la guerre contre l'Empereur. Petr. Bapt.	435
BUREIUS.....	435
Le grand Condé aux compagnons de son exil. — Marsin répond au nom de ses camarades. Benj. PRIOLUS.....	436
Le doge Brignolé exhorte les Génois à soutenir un siège après l'expulsion des Autrichiens. Cast. BONAMICUS.....	438
Les Lettres à Pie IV, à son avènement au pontificat. Paul MANUCE.....	441
Eloge des Lettres. MURET.....	444
Eloge des Fleurs. J. Bapt. FERRARIUS.....	446
L'Eloquence invoque Dicé (la Justice) contre ses corrupteurs. P. Nic. CAUSSIN.....	448
Apologie de Socrate. Dan. HEINSIUS.....	450
Eloge des Guerriers morts au siège de Bréda. C. BARLÆUS.....	452
Plaintes de la Main gauche contre la Main droite au tribunal de la Nature. C. LEBEAU.....	455

## CARACTÈRES OU PORTRAITS ET PARALLÈLES.

### CARACTÈRES POLITIQUES.

Les Français. BARCLAY, <i>Euphormio</i> .....	458
Les Anglais. LE MÊME.....	461
Les Italiens. LE MÊME.....	462
Les Espagnols. MARIANA.....	463
Les Belges. Farn. STRADA.....	464
Les Allemands. LE MÊME.....	466
Les Polonais.....	467
Fabius et Marcellus. C. LEBEAU.....	468
Viriathus. FREINSHEMIUS.....	469
Athenais. P. COSSART.....	471
Charlemagne. Pet. BERTHAULT.....	ib.
Godefroi de Bouillon. PAUL-ÉMILE.....	473
Saint Louis. LE MÊME.....	474
Louis XI. P. DE BUSSIÈRES.....	475
François I <sup>er</sup> . P. BERTHAULT.....	476
L'Empereur Charles-Quint. Paul JOYE.....	477
François I <sup>er</sup> et Charles-Quint. Arn. FERRONIUS.....	478
Le Chevalier Bayard.....	480
Philippe II. Hug. GROTIUS.....	481
Elisabeth. DE THOU.....	483
Le Chancelier de L'Hospital. LE MÊME.....	487

	Pag.
Henri IV. P. DE BUSSIÈRES.....	488
Alexandre de Parme. Hug. GROTIUS.....	490
Henri IV et Alexandre Farnèse. P. DONDIN.....	492
Le Prince d'Orange. STRADA.....	493
Richelieu, Mazarin. P. BAUDORY.....	494
Mathieu Molé. P. LABAUNE.....	495
Turenne et Condé. C. PORÉE.....	496
Le Maréchal de Vauban. LE MÊME.....	498
Le Maréchal de Villars. P. LASANTE.....	ib.
Frédéric-le-Grand, Roi de Prusse. Carl. Gust. SCHULTZ....	500

## CARACTÈRES LITTÉRAIRES.

David. GRENAN.....	501
Saint Basile. ERASME.....	502
Homère et Virgile. C. LEBEAU.....	ib.
Horace. D. LAMBINUS.....	503
Ovide. D. HEINSIUS.....	505
Tite-Live, Tacite. COFFIN.....	506
Démosthène et Cicéron. Benign. GRENAN.....	ib.
Cicéron Orateur. STRADA.....	507
Cicéron considéré comme Rhéteur. ROLLIN.....	509
Quintilien. LE MÊME.....	ib.
Sénèque et son influence sur son siècle. LE MÊME.....	510
Galilée. Nic. ERYTHRÆUS.....	512
Montaigne. Roland DESMARETS.....	514
Malherbe. BALZAC.....	516
Descartes et Newton. P. BAUDORY.....	517
Bossuet. VILLEMMAIN.....	518
Fléchier. P. LASANTE.....	519
Bossuet et Fléchier. LEBEAU.....	520
Bourdaloue. P. LEJAY.....	521
Corneille et Racine. GRENAN.....	522
Même sujet. VILLEMMAIN.....	523
Molière. P. PORÉE.....	524
La Bruyère et la Rochefoucauld. P. LASANTE.....	525
La Fontaine. FÉNÉLON.....	id.
Les Epistolaires français. P. LASANTE.....	526
Le Nostre. Gabr. BROTTIER.....	527

**CARACTÈRES MORAUX.**

	<b>Pag.</b>
<b>L'Enfance. BARCLAY.....</b>	<b>528</b>
<b>LA Jeunesse. LE MÊME.....</b>	<b>530</b>
<b>L'Age viril. LE MÊME.....</b>	<b>531</b>
<b>La Vieillesse. LE MÊME.....</b>	<b>532</b>
<b>Le Flatteur. C. LEBEAU.....</b>	<b>533</b>
<b>L'Homme chagrin. Lud. MOLINÆUS.....</b>	<b>535</b>
<b>L'Homme futile. C. LEBEAU.....</b>	<b>536</b>

**FIN DE LA TABLE DES MATIÈRES DU PREMIER VOLUME.**













